

Abhidhammapiṭake

Vibhaṅgaṭṭhakathāya Atthavaṇṇanābhūtā

Bhadantācariya-ānandattherena katā

# Vibhaṅgamūlaṭīkā

---

Tapassānuvaṇṇanābhūtā

Bhadantācariyadhammapālattherena katā

# Vibhaṅga-anuṭīkā



Romanized from Myanmar version published in 1960

© Buddhasāsana Society

Ṭikā Series 23

First published in 2008 by Ministry of Religious Affairs

Yangon, Myanmar

THE PĀLI ALPHABET  
IN BURMESE AND ROMAN CHARACTERS

VOWELS

အ a      အာ ā      ဣ i      ဤ ī      ဥ u      ဦ ū      ဧ e      ဩ o

CONSONANTS WITH VOWEL "A"

က ka	ခ kha	ဂ ga	ဃ gha	င ṅa
စ ca	ဆ cha	ဇ ja	ဈ jha	ည ṅa
ဋ ta	ဌ tha	ဍ ḍa	ဎ ḍha	ဏ ṇa
တ ta	ထ tha	ဒ da	ဓ dha	န na
ပ pa	ဖ pha	ဗ ba	ဘ bha	မ ma

ယ ya      ရ ra      လ la      ဝ va      သ sa      တ ha      ဠ ḷa      ၎ ṁ

VOWELS IN COMBINATION

-၁ ၎ = ā      ၎ = i      ၎ = ī      ၎-၂ = u      ၎-၂ = ū      - = e      -၁ ၎ = o

က ka	ကာ kā	ကိ ki	ကီ kī	ကု ku	ကူ kū	ကေ ke	ကော ko
ခ kha	ခါ khā	ခိ khi	ခီ khī	ခု khu	ခုူ khū	ခေ khe	ခေါ kho ...

CONJUNCT-CONSONANTS

ကက kka	ဃ ṅgha	ဏ ṅtha	ဈ dhya	ဠ pla	ဣ lla
က့ kka	ဣ cca	ဏ့ ṅḍa	ဣ dhva	ဠ pba	ဣ lya
ကျ kya	ဣ ccha	ဏ့ ṅṇa	ဣ nta	ဣ bbha	ဣ lha
ကြ kri	ဣ jja	ဏ့ ṅha	ဣ ntva	ဣ bya	ဣ vha
ကက kla	ဣ jjha	ဣ tta	ဣ ntha	ဣ bra	ဣ sta
က့ kva	ဣ ṅṅha	ဣ ttha	ဣ nda	ဣ mpa	ဣ stra
ဈ khya	ဣ ṅha	ဣ tva	ဣ ndra	ဣ mpha	ဣ sna
ဣ khva	ဣ ṅca	ဣ tya	ဣ ndha	ဣ mba	ဣ sya
ဣ gga	ဣ ṅcha	ဣ tra	ဣ nna	ဣ mbha	ဣ ssa
ဣ ggha	ဣ ṅja	ဣ dda	ဣ nya	ဣ mma	ဣ sma
ဈ gya	ဣ ṅjha	ဣ ddha	ဣ nha	ဣ mya	ဣ sva
ဣ gra	ဣ ṅṅta	ဣ dya	ဣ ppa	ဣ mha	ဣ hma
ဣ ṅka	ဣ ṅṅtha	ဣ dra	ဣ ppha	ဣ yya	ဣ hva
ဣ ṅkha	ဣ ṅṅḍa	ဣ dva	ဣ pya	ဣ yha	ဣ ḷha
ဣ ṅga					

၁	၂	၃	၄	၅	၆	၇	၈	၉	၀
1	2	3	4	5	6	7	8	9	0

# Vibhaṅgamūlaṭīkā

Mātikā

Piṭṭhaṅka

## 1. Khandhavibhaṅga

1. Suttantabhājanīyavaṇṇanā	...	...	1
1. Rūpakkkhandhaniddesavaṇṇanā	...	...	4
2. Vedanākkhandhaniddesavaṇṇanā	...	...	12
3. Saññākkhandhaniddesavaṇṇanā	...	...	15
4. Saṅkhārakkhandhaniddesavaṇṇanā	...	...	16
Pakiṇṇakakathāvaṇṇanā	...	...	17
Kamādivinicchayakathāvaṇṇanā	...	...	25
2. Abhidhammabhājanīyavaṇṇanā	...	...	28
3. Pañhapucchakavaṇṇanā	...	...	33

## 2. Āyatanavibhaṅga

1. Suttantabhājanīyavaṇṇanā	...	...	34
2. Abhidhammabhājanīyavaṇṇanā	...	...	39
3. Pañhapucchakavaṇṇanā	...	...	41

## 3. Dhātuvibhaṅga

1. Suttantabhājanīyavaṇṇanā	...	...	42
2. Abhidhammabhājanīyavaṇṇanā	...	...	45
3. Pañhapucchakavaṇṇanā	...	...	49

## 4. Saccavibhaṅga

1. Suttantabhājanīya uddesavaṇṇanā	...	...	50
1. Dukkhasaccaniddesa jātiniddesavaṇṇanā	...	...	60
Jarāniddesavaṇṇanā	...	...	63
Maraṇaniddesavaṇṇanā	...	...	63

Mātikā	Piṭṭhaṅka
Sokaniddesavaṇṇanā	64
Paridevaniddesavaṇṇanā	65
Dukkhadomanassaniddesavaṇṇanā	65
Upāyāsaniddesavaṇṇanā	66
Appiyasampayoganiddesavaṇṇanā	66
Piyavippayoganiddesavaṇṇanā	67
Icchāniddesavaṇṇanā	68
Upādānakkhandhaniddesavaṇṇanā	68
2. Samudayasaccaniddesavaṇṇanā	69
3. Nirodhasaccaniddesavaṇṇanā	70
4. Maggasaccaniddesavaṇṇanā	71
2. Abhidhammabhājanīyavaṇṇanā	75
3. Pañhapucchakavaṇṇanā	77

### 5. Indriyavibhaṅga

1. Abhidhammabhājanīyavaṇṇanā	78
2. Pañhapucchakavaṇṇanā	81

### 6. Paṭiccasamuppādavibhaṅga

1. Suttantabhājanīya uddesavāravaṇṇanā	83
Avijjāpadaniddesavaṇṇanā	92
Saṅkhārapadaniddesavaṇṇanā	93
Viññāṇapadaniddesavaṇṇanā	101
Nāmarūpapadaniddesavaṇṇanā	114
Saḷāyatanapadaniddesavaṇṇanā	117
Phassapadaniddesavaṇṇanā	119
Vedanāpadaniddesavaṇṇanā	120
Taṇhāpadaniddesavaṇṇanā	120

Mātikā	Piṭṭhaṅka
Upādānapadaniddesavaṇṇanā	121
Bhavapadaniddesavaṇṇanā	122
Jātijarāmarañādipadaniddesavaṇṇanā	124
Bhavadakkakathāvaṇṇanā	125
2. Abhidhammabhājanīyavaṇṇanā	132
1. Paccayacatukkavaṇṇanā	133
2. Hetucatukkavaṇṇanā	136
4. Aññamaññacatukkavaṇṇanā	137
Saṅkhārādīmūlakanayamātikāvaṇṇanā	138
Akusalaniddesavaṇṇanā	139
Kusalābyākataniddesavaṇṇanā	140
Avijjāmūlakakusalaniddesavaṇṇanā	141
Kusalamūlakavipākaniddesavaṇṇanā	142

### 7. Satipaṭṭhānavibhaṅga

1. Suttantabhājanīya uddesavāravaṇṇanā	144
Kāyānupassanā-uddesavaṇṇanā	147
Vedanānupassanādi-uddesavaṇṇanā	149
Kāyānupassanāniddesavaṇṇanā	150
Vedanānupassanāniddesavaṇṇanā	156
Cittānupassanāniddesavaṇṇanā	158
Dhammānupassanāniddesa nīvaraṇapabbavaṇṇanā	158
Bojjhaṅgapabbavaṇṇanā	160
2. Abhidhammabhājanīyavaṇṇanā	161

### 8. Sammappadhānavibhaṅga

1. Suttantabhājanīyavaṇṇanā	162
3. Pañhapucchakavaṇṇanā	164

Mātikā

Piṭṭhaṅka

**9. Iddhipādavibhaṅga**

1. Suttantabhājanīyavaṇṇanā	...	...	166
2. Abhidhammabhājanīyavaṇṇanā	...	...	169
3. Pañhapucchakavaṇṇanā	...	...	169

**10. Bojjhaṅgavibhaṅga**

1. Suttantabhājanīya paṭhamanayavaṇṇanā	...	...	171
Dutīyanayavaṇṇanā	...	...	172
Tatīyanayavaṇṇanā	...	...	173
2. Abhidhammabhājanīyavaṇṇanā	...	...	174

**11. Maggaṅgavibhaṅga**

2. Abhidhammabhājanīyavaṇṇanā	...	...	175
-------------------------------	-----	-----	-----

**12. Jhānavibhaṅga**

1. Suttantabhājanīya mātikāvaṇṇanā	...	...	176
Niddesavaṇṇanā	...	...	176
2. Abhidhammabhājanīyavaṇṇanā	...	...	185
3. Pañhapucchakavaṇṇanā	...	...	186

**13. Appamaññāvibhaṅga**

1. Suttantabhājanīyavaṇṇanā	...	...	187
3. Pañhapucchakavaṇṇanā	...	...	188

**14. Sikkhāpadavibhaṅga**

1. Abhidhammabhājanīyavaṇṇanā	...	...	189
2. Pañhapucchakavaṇṇanā	...	...	190

Mātikā

Piṭṭhaṅka

**15. Paṭisambhidāvibhaṅga****1. Suttantabhājanīya**

1. Saṅgahavāraṇṇanā	...	...	191
2. Saccavārādivaṇṇanā	...	...	194
2. Abhidhammabhājanīyaṇṇanā	...	...	194
3. Pañhapucchakaṇṇanā	...	...	195

**16. Nāṇavibhaṅga**

1. Ekakamātikādivaṇṇanā	...	...	197
10. Dasakamātikāvaṇṇanā	...	...	197
1. Ekakaniddesaṇṇanā	...	...	199
2. Dukaniddesaṇṇanā	...	...	201
3. Tikaniddesaṇṇanā	...	...	202
4. Catukkaniddesaṇṇanā	...	...	203
5. Pañcakaniddesaṇṇanā	...	...	205
6. Chakkaniddesaṇṇanā	...	...	206
7. Sattakaniddesaṇṇanā	...	...	206
8. Aṭṭhakaniddesaṇṇanā	...	...	206

**10. Dasakaniddesa**

Paṭhamabalaniddesaṇṇanā	...	...	207
Dutiyabalaniddesaṇṇanā	...	...	210
Tatīyabalaniddesaṇṇanā	...	...	211
Catutthabalaniddesaṇṇanā	...	...	212
Pañcamabalaniddesaṇṇanā	...	...	212
Chaṭṭhabalaniddesaṇṇanā	...	...	212
Sattamabalaniddesaṇṇanā	...	...	214
Dasamabalaniddesaṇṇanā	...	...	214



Mātikā

Piṭṭhaṅka

**17. Khuddakavatthuvibhaṅga**

1. Ekakamātikādivaṅṅanā	...	...	216
1. Ekakaniddesavaṅṅanā	...	...	216
2. Dukaniddesavaṅṅanā	...	...	222
3. Tikaniddesavaṅṅanā	...	...	223
4. Catukkaniddesavaṅṅanā	...	...	224
5. Pañcakaniddesavaṅṅanā	...	...	225
6. Chakkaniddesavaṅṅanā	...	...	226
7. Sattakaniddesavaṅṅanā	...	...	227
8. Aṭṭhakaniddesavaṅṅanā	...	...	227
9. Navakaniddesavaṅṅanā	...	...	228
10. Dasakaniddesavaṅṅanā	...	...	229
Taṇhāvicaritaniddesavaṅṅanā	...	...	229

**18. Dhammahadayavibhaṅga**

1. Sabbasaṅgāhikavāraṅṅanā	...	...	231
2. Uppattānuppattivāraṅṅanā	...	...	231
3. Pariyāpannāpariyāpannavāraṅṅanā	...	...	232

**6. Uppādakakamma-āyupamāṅavāra**

1. Uppādakakammavaṅṅanā	...	...	232
2. Āyupamāṅavaṅṅanā	...	...	232
7. Abhiññeyyādivāraṅṅanā	...	...	235

**Vibhaṅgamūlaṭīkāya mātikā niṭṭhitā.**

# Vibhaṅga-anuṭṭikā

## 1. Khandhavibhaṅga

Mātikā		Piṭṭhaṅka
1. Suttantabhājanīyavaṇṇanā	...	1
1. Rūpakkhandhaniddesavaṇṇanā	...	9
2. Vedanākkhandhaniddesavaṇṇanā	...	17
3. Saññākkhandhaniddesavaṇṇanā	...	20
4. Saṅkhārakkhandhaniddesavaṇṇanā	...	22
Pakiṇṇakakathāvaṇṇanā	...	22
Kamādivinicchayakathāvaṇṇanā	...	32
2. Abhidhammabhājanīyavaṇṇanā	...	34
3. Pañhapucchakavaṇṇanā	...	38

## 2. Āyatanavibhaṅga

1. Suttantabhājanīyavaṇṇanā	...	39
2. Abhidhammabhājanīyavaṇṇanā	...	46
3. Pañhapucchakavaṇṇanā	...	50

## 3. Dhātuvibhaṅga

1. Suttantabhājanīyavaṇṇanā	...	51
2. Abhidhammabhājanīyavaṇṇanā	...	55
3. Pañhapucchakavaṇṇanā	...	59

## 4. Saccavibhaṅga

1. Suttantabhājanīyavaṇṇanā	...	60
1. Dukkhasaccaniddesa	...	68
Jātiniddesavaṇṇanā	...	68

Mātikā	Piṭṭhaṅka
Maraṇaniddesavaṇṇanā	70
Sokaniddesavaṇṇanā	71
Paridevaniddesavaṇṇanā	72
Dukkhadomanassaniddesavaṇṇanā	72
Upāyāsaniddesavaṇṇanā	72
Appiyasampayoganiddesavaṇṇanā	72
Icchāniddesavaṇṇanā	73
Upādānakkhandhaniddesavaṇṇanā	73
2. Samudayasaccaniddesavaṇṇanā	73
3. Nirodhasaccaniddesavaṇṇanā	75
4. Maggasaccaniddesavaṇṇanā	75
2. Abhidhammabhājanīyavaṇṇanā	79
3. Pañhapucchakavaṇṇanā	81

### 5. Indriyavibhaṅga

1. Abhidhammabhājanīyavaṇṇanā	82
2. Pañhapucchakavaṇṇanā	86

### 6. Paṭiccasamuppādavibhaṅga

1. Suttantabhājanīya uddesavāravaṇṇanā	89
Avijjāpadaniddesavaṇṇanā	99
Saṅkhārapadaniddesavaṇṇanā	99
Viññāṇapadaniddesavaṇṇanā	111
Nāmarūpapadaniddesavaṇṇanā	127
Saḷāyatanapadaniddesavaṇṇanā	130
Phassapadaniddesavaṇṇanā	131
Vedanāpadaniddesavaṇṇanā	132
Taṇhāpadaniddesavaṇṇanā	132

Mātikā	Piṭṭhaṅka
Upādānapadaniddesavaṇṇanā	133
Bhavapadaniddesavaṇṇanā	134
Jātijarāmarañādipadaniddesavaṇṇanā	135
Bhavacakkakathāvaṇṇanā	135
2. Abhidhammabhājanīyavaṇṇanā	141
1. Paccayacatukkavaṇṇanā	141
2. Hetucatukkavaṇṇanā	144
4. Aññamaññacatukkavaṇṇanā	145
Saṅkhārādīmūlakanayamātikāvaṇṇanā	145
Akusalaniddesavaṇṇanā	146
Kusalābyākataniddesavaṇṇanā	147
Avijjāmūlakakusalaniddesavaṇṇanā	148
Kusalamūlakavipākaniddesavaṇṇanā	148

### 7. Satipaṭṭhānavibhaṅga

1. Suttantabhājanīya uddesavāravaṇṇanā	150
Kāyānupassanā-uddesavaṇṇanā	152
Vedenānupassanādi-uddesavaṇṇanā	153
Kāyānupassanāniddesavaṇṇanā	153
Vedanānupassanāniddesavaṇṇanā	157
Cittānupassanāniddesavaṇṇanā	158
Dhammānupassanāniddesa nīvaraṇapabbavaṇṇanā	158
Bojjhaṅgapabbavaṇṇanā	160
2. Abhidhammabhājanīyavaṇṇanā	161

### 8. Sammappadhānavibhaṅga

1. Suttantabhājanīyavaṇṇanā	162
3. Pañhapucchakavaṇṇanā	164

Mātikā

Piṭṭhaṅka

**9. Iddhipādavibhaṅga**

1. Suttantabhājanīyavaṇṇanā	...	...	165
2. Abhidhammabhājanīyavaṇṇanā	...	...	168
3. Pañhapucchakavaṇṇanā	...	...	168

**10. Bojjhaṅgavibhaṅga**

1. Suttantabhājanīya	...	...	170
Paṭhamanayavaṇṇanā	...	...	170
Dutīyanayavaṇṇanā	...	...	171
Tatīyanayavaṇṇanā	...	...	173
2. Abhidhammabhājanīyavaṇṇanā	...	...	173

**11. Maggaṅgavibhaṅga**

2. Abhidhammabhājanīyavaṇṇanā	...	...	174
-------------------------------	-----	-----	-----

**12. Jhānavibhaṅga**

1. Suttantabhājanīya mātikāvaṇṇanā	...	...	176
Niddesavaṇṇanā	...	...	176
2. Abhidhammabhājanīyavaṇṇanā	...	...	186
3. Pañhapucchakavaṇṇanā	...	...	187

**13. Appamaññāvibhaṅga**

1. Suttantabhājanīyavaṇṇanā	...	...	188
3. Pañhapucchakavaṇṇanā	...	...	189

**14. Sikkhāpadavibhaṅga**

1. Abhidhammabhājanīyavaṇṇanā	...	...	190
2. Pañhapucchakavaṇṇanā	...	...	191

**15. Paṭisambhidāvibhaṅga**

1. Suttantabhājanīya	...	...	192
1. Saṅgahavāraṇṇanā	...	...	192
2. Saccavārādivaṇṇanā	...	...	195

Mātikā			Piṭṭhaṅka
2. Abhidhammabhājanīyavaṇṇanā	...	...	195
3. Pañhapucchakavaṇṇanā	...	...	196

### 16. Nāṇavibhaṅga

1. Ekakamātikādivaṇṇanā	...	...	198
10. Dasakamātikāvaṇṇanā	...	...	199
1. Ekakaniddesavaṇṇanā	...	...	200
2. Dukaniddesavaṇṇanā	...	...	202
3. Tikaniddesavaṇṇanā	...	...	202
4. Catukkaniddesavaṇṇanā	...	...	203
5. Pañcakaniddesavaṇṇanā	...	...	205
6. Chakkaniddesavaṇṇanā	...	...	206
7. Sattakaniddesavaṇṇanā	...	...	206
8. Aṭṭhakaniddesavaṇṇanā	...	...	207
10. Dasakaniddesa paṭhamabalaniddesavaṇṇanā	...	...	207
Dutiyabalaniddesavaṇṇanā	...	...	212
Pañcamabalaniddesavaṇṇanā	...	...	212
Chaṭṭhabalaniddesavaṇṇanā	...	...	212
Sattamabalaniddesavaṇṇanā	...	...	213
Dasamabalaniddesavaṇṇanā	...	...	214

### 17. Khuddakavatthuvibhaṅga

1. Ekakaniddesavaṇṇanā	...	...	215
2. Dukaniddesavaṇṇanā	...	...	218
3. Tikaniddesavaṇṇanā	...	...	220
4. Catukkaniddesavaṇṇanā	...	...	221
5. Pañcakaniddesavaṇṇanā	...	...	222
6. Chakkaniddesavaṇṇanā	...	...	222

Mātikā			Piṭṭhaṅka
8. Aṭṭhakaniddesavaṇṇanā	...	...	223
9. Navakaniddesavaṇṇanā	...	...	223
10. Dasakaniddesavaṇṇanā	...	...	223
Taṇhāvicaritaniddesavaṇṇanā	...	...	224

### 18. Dhammahadayavibhaṅga

1. Sabbasaṅgāhikavāraṇṇanā	...	...	225
2. Uppattānuppattivāraṇṇanā	...	...	225
3. Pariyāpannāpariyāpannavāraṇṇanā	...	...	226

### 6. Uppādakakamma-āyuppamāṇavāra

1. Uppādakakammavaṇṇanā	...	...	226
2. Āyuppamāṇavaṇṇanā	...	...	227
7. Abhiññeyyādivāraṇṇanā	...	...	229

**Vibhaṅga-anuṭikāya mātikā niṭṭhitā.**

# Abhidhammapiṭaka

## Vibhaṅgamūlaṭīkā

Namo tassa Bhagavato Arahato Sammāsambuddhassa.

### 1. Khandhavibhaṅga

#### 1. Suttantabhājanīyavaṇṇanā

**Catusaccadasoti** cattāri saccāni samāhaṭāni catusaccaṃ, catusaccaṃ passīti catusaccadaso. Satipi sāvakanāṃ paccakabuddhānaṃ catusaccadassanabhāve anaññapubbakattā bhagavato catusaccadassanassa tattha ca sabbaññutāya dasabalesu ca vasībhāvassa pattito parasantānesu ca pasāritabhāvena supākaṭattā bhagavāva visesena “catusaccadaso”ti thomanāṃ arahatīti. Nāthatīti **nātho**, veneyyānāṃ hitasukhaṃ āsīsatīti pattheti, parasantānagataṃ vā kilesabyasanaṃ upatāpeti, “sādhu bhikkhave bhikkhu kālena kālaṃ attasampattim paccavekkhitā”ti-ādinā<sup>1</sup> vā taṃ taṃ hitapaṭipattim yācatīti attho. Paramena cittissariyena samannāgato, sabbasatte vā guṇehi īsati abhibhavatīti paramissaro bhagavā “nātho”ti vuccati. “**Saddhamme gāravaṃ katvā karissāmī**”ti sotabbabhāve kāraṇaṃ vatvā puna savane niyojento āha “**taṃ suṇātha samāhitā**”ti. “**Porāṇaṭṭhakathānayaṃ vigāhitvā karissāmī**”ti vā etena sakkaccasavane ca kāraṇaṃ vatvā tattha niyojento āha “**saddhamme gāravaṃ katvā taṃ suṇāthā**”ti.

1. Am 3. 9 piṭṭhe.



Ettha ca “catusaccadaso”ti vacanaṃ thomanameva catuppabhedāya desanāya samānagaṇanadassanaguṇena, “aṭṭhārasahi buddhadhammehi upeto”ti ca aṭṭhārasappabhedāya desanāya samānagaṇanaguṇehī daṭṭhabbāṃ. Yathāvuttena vā nirisayena catusaccadassanena bhagavā catudhā dhammasaṅgaṇiṃ desetum samattho ahoṣi, aṭṭhārasabuddhadhammasamannāgamena aṭṭhārasadhā vibhaṅganti yathāvuttadesanāsamatthataśampādakaguṇanidassanametaṃ “catusaccadaso upeto buddhadhammehi aṭṭhārasahi”ti. Tena yathāvuttāya desanāya sabbaññubhāsittā aviparītaṃ dassento tattha satte uggahādīsu niyojeti, niṭṭhānagamanañca attano vāyāmaṃ dassento aṭṭhakathāsavane ca ādaraṃ uppādayati, yathāvuttaguṇarahitena asabbaññunā desetum asakkuṇeyyatam dhammasaṅgaṇīvibhaṅgappakaraṇānaṃ dassento tattha tadaṭṭhakathāya ca sātīsayam gāraṃ janayati, buddhādīnañca ratanānaṃ sammāsambuddhatādiguṇe vibhāveti.

Tattha cattāri saccāni pākaṭāneva, aṭṭhārasa pana buddhadhammā evaṃ veditabbā—“atītaṃse buddhassa bhagavato appaṭihataṃ ñāṇaṃ, anāgataṃse -pa- paccuppannaṃse -pa-. Imehi tīhi dhammehi samannāgatassa buddhassa bhagavato sabbaṃ kāyakammaṃ ñāṇapubbaṅgamaṃ ñāṇānuparivattaṃ, sabbaṃ vacīkammaṃ -pa- sabbaṃ manokammaṃ -pa-. Imehi chahi dhammehi samannāgatassa buddhassa bhagavato natthi chandassa hāni, natthi dhammadesanāya, natthi vīriyassa, natthi samādhissa, natthi paññāya, natthi vimuttiyā hāni. Imehi dvādasahi dhammehi samannāgatassa buddhassa bhagavato natthi davā, natthi ravā, natthi aphuṭam, natthi vegāyitattam, natthi abyāvaṭamano, natthi appaṭisaṅkhānupekkhā”ti.

Tattha **natthi davāti** khiḍḍādhippāyena kiriyā natthi. **Natthi ravāti** sahasā kiriyā natthi. **Natthi aphuṭanti** ñāṇena aphasitaṃ natthi. **Natthi vegāyitattanti** turitakiriyā natthi. **Natthi abyāvaṭamanoti** niratthako cittasamudācāro natthi. **Natthi appaṭisaṅkhānupekkhāti** aññānupekkhā natthi. Katthaci pana “natthi dhammadesanāya hāni”ti alikhivā “natthi chandassa hāni, natthi vīriyassa, natthi sattiya”ti likhanti.

1. Dhammasaṅgahe dhamme kusalādike tikadukehi saṅgahetvā te eva dhamme suttante khandhādivasena vutte vibhajitum vibhaṅgappakaraṇaṃ vuttaṃ.

Tattha saṅkhepena vuttānaṃ khandhādīnaṃ vibhajanāṃ vibhaṅgo. So so vibhaṅgo pakato adhikato yassā pāḷiyā, sā “**vibhaṅgappakaraṇaṃ**”ti vuccati. **Adhikatoti** ca vattabbabhāvena pariggahitoti attho. Tattha vibhaṅgappakaraṇassa ādibhūte khandhavibhaṅge “pañcakkhandhā rūpakkhandho -pa- viññāṇakkhandho”ti idaṃ suttantabhājanīyaṃ nāma. Nanu na ettakameva suttantabhājanīyanti? Saccāṃ, **iti**-saddena pana ādi-saddatthajotakena pakāratthajotakena vā sabbaṃ suttantabhājanīyaṃ saṅgahetvā viññāṇakkhandhoti evamādi evampakāraṃ vā idaṃ **suttantabhājanīyanti** veditabbaṃ. Atha vā ekadesena samudāyaṃ nidasseti pabbatasamuddādinidassako viya. Tattha nibbānavajjānaṃ sabbadhammānaṃ saṅgāhakattā sabbasaṅgāhakehi ca āyatanādīhi appakatarapadattā khandhānaṃ khandhavibhaṅgo ādimhi vutto.

**Na tato heṭṭhāti** rūpādīnaṃ vedayitādisabhāvattābhāvā yasmim̐ sabhāve atītādayo rāsī katvā vattabbā, tassa ruppanādito aññassābhāvā ca heṭṭhā gaṇanesu saṅkhatadhammānaṃ aniṭṭhānaṃ sāvasesabhāvaṃ, na heṭṭhā gaṇanamattābhāvā sandhāya vuttaṃ. Chaṭṭhassa pana khandhassa abhāvā “**na uddhan**”ti āha. Na hi savibhāgadhammehi<sup>1</sup> nissaṭṭassa atītādibhāvarahitassa ekassa nibbānassa rāsaṭṭho atthīti. “**Rāsīmhi**”ti saddatthasahitaṃ khandha-saddassa visayaṃ dasseti. “**Guṇe paṇṇattiyāṃ ruḷhiyaṃ**”ti visayameva khandha-saddassa dasseti, na saddatthaṃ. Lokiyalokuttarabhedaṅhi sīlādiguṇaṃ nippadesena gahetvā pavattamāno khandha-saddo sīlādiguṇavisiṭṭhaṃ rāsaṭṭhaṃ dīpetīti. Keci pana “guṇatṭho ettha khandhatṭho”ti vadanti. **Dārukhandhoti** ettha pana na **khandha**-saddo paññatti-saddassa atthe vattati, tādise pana puthulāyate dārumhi dārukhandhoti paññatti hotīti paññattiyāṃ nipatatīti vuttaṃ. Tathā ekasmimpi viññāṇe pavatto viññāṇakkhandhoti khandha-saddo na ruḷhī-saddassa atthaṃ vadati, samudāye pana niruḷho khandha-saddo tadekadese pavattamāno tāya eva ruḷhiyā pavattatīti khandha-saddo ruḷhiyaṃ nipatatīti vuttaṃ.

**Rāsito guṇatoti** sabbattha nissakkavacanaṃ visayasseva khandha-saddappavattiyā kāraṇabhāvaṃ sandhāya katanti veditabbaṃ. “Rāsito”ti imamatthaṃ

---

1. Sabbasavibhāgadhammehi (Ka)

saddatthavasenapi niyametvā dassetuṃ “**ayañhi khandhaṭṭho nāma piṇḍaṭṭho**”ti-ādimāha. Koṭṭhāsaṭṭhe khandhaṭṭhe chaṭṭhenapi khandhena bhavitabbaṃ. Nibbānampi hi chaṭṭho koṭṭhāsoti. Tasmā “khandhaṭṭho nāma rāsaṭṭho”ti yuttaṃ. Yesaṃ vā atītādivasena bhedo atthi, tesaṃ ruppanādilakkhaṇagavasena taṃtaṃkoṭṭhāsataṃ vuccatīti bhedarahitassa nibbānassa koṭṭhāsaṭṭhena ca khandhabhāvo na vuttoti veditaḅbo.

**Ettāvatāti** uddesamattenāti attho. **Cattāro ca mahābhūtā -pa- rūpanti** evaṃ vibhatto. Katthāti ce? Ekādasasu okāsesu. Iti-saddena nidassanattena sabbo vibhajanāyāyo dassito. Idañca vibhajānaṃ oḷārikādīsū cakkhāyatananti-ādivibhajānañca yathāsambhavaṃ ekādasasu okāsesu yojetabbaṃ, evaṃ vedanākkhandhādīsūpi. Viññāṇakkhandho pana ekādasokāsesu purime okāsaṇṇake “cakkhuvīññāṇaṃ -pa- manovīññāṇaṃ”ti chaviññāṇakāyavisesena vibhatto, na tatha manodhātu manovīññāṇadhātūti vibhajānaṃ atthi. Taṃ pana dvayaṃ manovīññāṇanti vuttanti imamatthaṃ dassetuṃ aṭṭhakathāyaṃ “**manodhātu manovīññāṇadhātū**”ti vuttanti daṭṭhabbaṃ.

Evaṃ pāḷinayena pañcasu khandhesu dhammaparicchedaṃ dassetvā puna aññena pakārena dassetuṃ “**apicā**”ti-ādimāha. **Etthāti** etasmim khandhaniddese.

### 1. Rūpakkhandaṇḍesavaṇṇanā

2. **Yaṃ kiñcīti** ettha **yanti** sāmāññena aniyamanidassanaṃ, **kiñcīti** pakārantarabhedāṃ āmasitvā aniyamanidassanaṃ. Ubhayenapi atītaṃ vā -pa- santike vā appaṃ vā bahuṃ vā yādisaṃ vā tādisaṃ vā yaṃ kiñcīti napuṃsakaniddesārahaṃ sabbaṃ byāpetvā saṅgaṇhātīti aññesūpi napuṃsakaniddesārahesu pasaṅgaṃ disvā tassa adhippetatthaṃ aticca pavattito atippasaṅgassa niyamanatthaṃ “**rūpaṃ**”ti āha. **Yaṃkiñcīti** sanipātaṃ yaṃ-saddaṃ kiṃ-saddaṃca aniyamekatthadīpanavasena ekaṃ padanti gaheṭvā “**padadvayenapī**”ti vuttaṃ.

**Kiñca bhikkhave rūpaṃ vadethāti** tumhepi rūpaṃ rūpanti vadetha, taṃ kena kāraṇena vadethāti attho, atha vā kena kāraṇena rūpaṃ, taṃ

kāraṇaṃ vadethāti attho. Athetesu bhikkhūsu tuṅhībhūtesu bhagavā āha “ruppatīti kho”ti-ādi.

**Bhijjati**ti sītādisannipāte visadisasantānuppattidassanato purimasantānassa bhedaṃ sandhāyāha. Bhedo ca visadisatāvīkārapattīti bhijjati ti vikāraṃ āpajjati ti attho. Vikārapatti ca sītādisannipāte visadisarūpuppattiyeva. Arūpakkhandhānaṃ pana atilāhuparivattito yathā rūpadhammānaṃ ṭhitikkhaṇe sītādīhi samāgamo hoti, yena tattha utuno ṭhitippattassa purimasadisasantānuppādanasamatthā na hoti āhārādikassa vā, evaṃ aññehi samāgamo natthi. Saṅghaṭṭanena ca vikārapattiyāṃ **ruppana**-saddo niruḷho, tasmā arūpadhammānaṃ saṅghaṭṭanavirahitattā rūpadhammānaṃ viya pākaṭassa vikārassa abhāvato ca “ruppanti”ti “ruppanalakkhaṇā”ti ca na vuccanti. Jighacchāpipāsāhi ruppanaṅca udaraggisannipātena hotīti daṭṭhabbaṃ. Ettha ca **kuppati**ti etena kattu-atthe rūpapadasiddhiṃ dasseti, **ghaṭṭiyati pīḷiyati**ti etehi kammatthe. Kopādikiriyāyeva hi ruppanakiriyāti. So pana kattubhūto kammabhūto ca attho bhijjamāno hotīti imassatthassa dassanattamaṃ “**bhijjati attho**”ti vuttaṃ. Atha vā **ruppati rūpanti** kammakattutthe rūpapadasiddhi vuttā. Vikāro hi ruppananti. Teneva “bhijjati attho”ti kammakattutthena bhijjati-saddena attham dasseti. Yaṃ pana ruppati bhijjati, taṃ yasmā kuppati ghaṭṭiyati pīḷiyati, tasmā etehi ca padehi padattho pākaṭo katoti. “Kenatthenā”ti pucchāsabhāgavasena “**ruppanatthenā**”ti vuttaṃ. Na kevalaṃ saddatthoyeva ruppanaṃ, tassa panatthassa lakkhaṇaṅca hotīti atthalakkhaṇavasena “**ruppanalakkhaṇena rūpanti pi vattum vaṭṭati**”ti āha.

**Chijjivā**ti mucchāpattiyā muccitvā aṅgapaccaṅgānaṃ chedanavasena vā chijjivā. **Accantakhārena sītodakenā**ti atisītabhāvameva sandhāya accantakhāratā vuttā siyā. Na hi taṃ kappasaṅghānaṃ udakaṃ sampattikaraṃ pathavīsandhāraṃ kappavināsa-udakaṃ viya khāraṃ bhavitum arahati. Tathā hi sati pathavī vilīyeyyāti. **Avīcimahānirayeti** sa-ussadaṃ avīcinirayaṃ vuttaṃ. Teneva “**tattha hī**”ti-ādi vuttaṃ. **Petti -pa- na hontī**ti evaṃvidhāpi sattā atthīti adhippāyo evaṃvidhāyeva hontīti niyamābhāvato. Evaṃ **kālakaṅjikādīsupīti**. **Sarantā gacchantī**ti sarīsapa-saddassa attham vadati.

**Abhisaññūhitvā**ti ettha samūhaṃ katvātipi attho. **Etena sabbaṃ rūpaṃ -pa- dassitaṃ hotī**ti etena rūpakkhandha-saddassa samānādhikaraṇasamāsabhāvaṃ dasseti. Tenevāha “**na hi rūpato -pa-atthī**”ti.

3. **Pakkhipitvā**ti ettha ekādasokāsesu rūpaṃ pakkhipitvāti attho. Na hi tattha mātikaṃyeva pakkhipitvā mātikā ṭhapitā, atha kho pakaraṇappattaṃ rūpanti.

**Aparo nayo -pa- ettheva gaṇanaṃ gatanti** etena **atītaṃsenā**ti bhummatthe karaṇavacananti dasseti. Yena pakārena gaṇanaṃ gataṃ, taṃ dassetuṃ “**cattāro ca mahābhūtā**”ti-ādi vuttanti imasmim atthe sati mahābhūtupādāyarūpabhāvo atītakotṭhāse gaṇanassa kāraṇanti āpajjati. Na hi atītaṃsānaṃ vedanādīnaṃ nivattanatthaṃ idaṃ vacanaṃ “yaṃ rūpan”ti eteneva tesāṃ nivattitattā, nāpi rūpassa aññappakāranivattanatthaṃ sabbappakāraṇassa tattha gaṇitattā, na ca anāgatapaccuppannākāranivattanatthaṃ atītaṃsavacanena taṃnivattanatoti. Atha pana yaṃ atītaṃsena gaṇitaṃ, taṃ **cattāro ca -pa- yarūpanti** evaṃ gaṇitanti ayamattho adhippeto, evaṃ sati gaṇanantaradassanaṃ idaṃ siyā, na atītaṃsena gaṇitappakāradassanaṃ, taṃdassane pana sati bhūtupādāyarūpappakārena atītaṃse gaṇitaṃ taṃsabhāvattāti āpannameva hoti, na ca evaṃsabhāvata atītaṃse gaṇitatāya kāraṇaṃ bhavituṃ arahati evaṃsabhāvasseva paccuppannānāgatesu gaṇitattā sukhādisabhāvassa ca atītaṃse gaṇitattā, tasmā purimanayo eva yutto. Ajjhattabahiddhānidde sesupi tādiso evattho labbhatīti.

**Suttantapariyāyato**ti pariyāyadesanattā suttassa vuttaṃ. **Abhidhammaniddesato**ti nippariyāyadesanattā abhidhammassa nicchayena deso niddesoti katvā vuttaṃ. **Kiñcāpī**ti-ādīsu ayamadhippāyo—suttantabhājanīyattā yathā “atītaṃ nanvāgameyyā”ti-ādīsu<sup>1</sup> addhānavasena atītādibhāvova vutto, tathā idhāpi niddisitabbo siyā. Evaṃ santepi suttantabhājanīyampi abhidhammadesanāyeva suttante vuttadhamme vicinitvā vibhajanavasena pavattāti abhidhammaniddeseneva atītādibhāvo niddiṭṭhoti.

1. Ma 3. 226, 227, 229; Khu 4. 162 piṭṭhesu.

**Addhāsantatisamayakhaṇavasenā**ti ettha cutipaṭisandhiparicchinne kāle **addhā**-saddo vattatīti “ahosiṃ nu kho ahamatītamaddhānan”<sup>1</sup> ādisuttavasena viññāyati. “Tayo me bhikkhave addhā. Katame tayo? Atīto addhā, anāgato addhā, paccuppanno addhā”<sup>2</sup>ti ettha pana paramatthato paricchiḍḍamāno addhā **niruttipathasuttavasena**<sup>3</sup> khaṇaparicchinno yutto. Tattha hi “yaṃ bhikkhave rūpaṃ jātaṃ pātubhūtaṃ, ‘atthi’<sup>4</sup>ti tassa saṅkhā”<sup>4</sup>ti vijjamānassa paccuppannatā tato pubbe pacchā ca atītānāgatatā vuttatī. Yebhuyyena pana cutipaṭisandhiparicchinno **sutesu**<sup>5</sup> atītādiko addhā vuttoti so eva idhāpi “**addhāvasenā**”<sup>5</sup>ti vutto. Sītaṃ sītaṃ sabhāgo, tathā uṇhaṃ uṇhassa. Yaṃ pana sītaṃ uṇhaṃ vā sarīre sannipatitaṃ santānavasena pavattamānaṃ anūnaṃ anadhikaṃ ekākāraṃ, taṃ eko utūti vuccati. Sabhāga-utuno anekantasabhāvato ekagahaṇaṃ kataṃ, evaṃ āhārepi. **Ekavīthi-ekajavanasamuṭṭhānanti** pañcachaṭṭhadvārasena vuttaṃ. **Santatisamayakathā** vipassakānaṃ upakāratthāya aṭṭhakathāsu kathitā.

**Niṭṭhitahetupaccayakiccaṃ**<sup>6</sup>, **niṭṭhitahetukiccaṃ** **aniṭṭhitapaccayakiccaṃ**, **ubhayakiccamasampattaṃ**, **sakiccakkhaṇe paccuppannaṃ**. Janako **hetu**, upatthambhako **paccayo**, tesaṃ uppādanaṃ upatthambhanaṅca **kiccaṃ**. Yathā bijassa aṅkuruppādanaṃ pathavī-ādīnaṅca tadupatthambhanaṃ kammaṃsa kaṭattārūpavipākuppādanaṃ āhārādīnaṃ tadupatthambhanaṃ, evaṃ ekekassa kalāpassa cittuppādassa ca janakānaṃ kammānantarādipaccayabhūtānaṃ upatthambhakānaṅca sahaḍḍapurejātapacchājātānaṃ kiccaṃ yathāsambhavaṃ yojetabbaṃ. Tattha uppādakkhaṇe **hetukiccaṃ** daṭṭhabbaṃ, tīsupi khaṇesu **paccayakiccaṃ**. Pathavī-ādīnaṃ sandhāraṇādikaṃ phassādīnaṃ phusanādikaṅca attano attano kiccaṃ sakiccaṃ, tassa karaṇakkhaṇo **sakiccakkhaṇo**. Saha vā kiccena sakiccaṃ, yasmim khaṇe sakiccaṃ rūpaṃ vā arūpaṃ vā hoti, so **sakiccakkhaṇo**, tasmim khaṇe **paccuppannaṃ**.

6. **Ettakamevā**ti “tesaṃ tesan”<sup>6</sup>ti iminā āmedītavacanena abhibyāpanatthena vuttatthameva. “Aparassa aparassā”<sup>6</sup>ti dīpanaṃ **aparadīpanaṃ**.

1. Ma 1. 10; Saṃ 1. 265 piṭṭhesu. 2. Khu 1. 232; Dī 3. 181 piṭṭhesu.

3. Saṃ 2. 59 piṭṭhe.

4. Saṃ 2. 60 piṭṭhe.

5. Dī 3. 181; Khu 1. 232 piṭṭhesu.

6. Atikkantahetupaccayakiccaṃ (Aṭṭhakathāyaṃ)

**Pariyesatūti** etena pariyesanāya anīṭhanāmanivattanassa akāraṇabhāvaṃ dasseti. Kammadosena hi cittavipallāsadosena ca gūṭhabhakkhapāṇādayo ummattakādayo ca pariyeseyyūṃ diṭṭhivipallāsena ca yonakādayo na ārammaṇassa pariyesitabbasabhāvattā, apariyesitabbasabhāvattā pana etassa anīṭhamicceva nāmanti attho.

**Sampattivirahatoti** rūpādīnaṃ devamanussasampattibhave kusalakammaphalatā samiddhasobhanatā ca sampatti, tabbvirahatoti attho. Tato eva taṃ na pariyesitabbanti. Sobhanāni ca kānici hatthirūpādīni akusalakammanibbattāni na tesāmyeva hatthi-ādīnaṃ sukhassa hetubhāvaṃ gacchantīti tesāṃ saṅgaṇhanattham **“akantan”**ti vuttaṃ. Tassa tasveva hi sattassa attanā katena kusalena nibbattaṃ sukhassa paccayo hoti, akusalena nibbattaṃ dukkhassa. Tasmā kammajānaṃ iṭṭhāniṭṭhatā kammakāraṇasattassa vasena yojanārahā siyā. Aṭṭhakathāyaṃ pana **“kusalakammajānaṃ anīṭhaṃ nāma natthī”**ti idameva vuttaṃ, na vuttaṃ **“akusalakammajānaṃ iṭṭhaṃ nāma natthī”**ti. Tena akusalakammajampi sobhanaṃ parasattānaṃ iṭṭhanti anuññātāṃ bhavissati. Kusalakammajānaṃ pana sabbesaṃ iṭṭhamevāti vadanti. Tiracchānagatānaṃ pana kesañci manussarūpaṃ amanāpaṃ, yato te disvāva palāyanti. Manussā ca devatārūpaṃ disvā bhāyanti, tesampi vipākaviññānaṃ taṃ rūpaṃ ārabba kusalavipākaṃ uppajjati, tādisassa pana puññaṃ abhāvā na tesāṃ tattha abhirati hotīti adhippāyo. Kusalakammajassa pana anīṭhassābhāvo viya akusalakammajassa sobhanassa iṭṭhassa abhāvo vattabbo. Hatthi-ādīnampi hi akusalakammajānaṃ manussānaṃ akusalavipākasseva ārammaṇaṃ, kusalakammajānaṃ pana pavatte samuṭṭhitaṃ kusalavipākassa. Iṭṭhārammaṇena pana vomissakattā appakaṃ akusalakammajānaṃ bahulaṃ akusalavipākuppattiyā kāraṇaṃ na bhavissatīti sakkā vattunti. Vipākaṃ pana katthaci na sakkā vañcetunti vipākavasena iṭṭhāniṭṭhārammaṇavavattānaṃ suṭṭhu vuttaṃ. Tasmā taṃ anugantvā sabbattha iṭṭhāniṭṭhatā yojetabbā.

**Anīṭhā pañca kāmagaṇāti** kasmā vuttaṃ, nanu **“cakkhuviññeyyāni rūpāni iṭṭhāni”**ti<sup>1</sup> evamādinā iṭṭhāneva rūpādīni **“kāmagaṇā”**ti vuttānīti?

---

1. Ma 1. 119; Ma 2. 117; Ma 3. 155; Saṃ 3. 18 piṭṭhesu.

Kāmaguṇasadisesu kāmaguṇavohārato, sadisatā ca rūpādibhāvoyeva, na iṭṭhatā. “Aniṭṭhā”ti vā vacanena akāmaguṇatā dassitāti kāmaguṇavisabhāgā rūpādayo “kāmaguṇā”ti vuttā asive “sivā”ti vohāro viya. Sabbāni vā iṭṭhāniṭṭhāni rūpādīni taṇhāvattathubhāvato kāmaguṇāyeva. Vuttañhi “rūpā loke piyarūpaṃ sātārūpaṃ”ti-ādi<sup>1</sup>. Atisayena pana kāmanīyattā suttesu “kāmaguṇā”ti iṭṭhāni rūpādīni vuttānīti.

Dvīsupi hīnapañītapadesu “**akusalakammajavasena kusalakammajavasena**”ti vacanaṃ “**tesaṃ tesaṃ sattānaṃ**”ti sattavasena niyametvā vibhajitattā, ayañcattho”**tesaṃ tesaṃ**”ti avayavayoge sāmivacanaṃ katvā vuttoti veditabbo. Sattasantānapariyāpannesu kammajam viṣiṭṭhanti “**kammajavasena**”ti vuttaṃ. Yadi pana tehi tehīti etasmim atthe **tesaṃ tesanti** sāmivacanaṃ, visayavisayīsambandhe vā, na kammajavaseneva rūpādīni vibhattāni, sabbesaṃ pana indriyabaddhānaṃ vasena vibhattānīti viññāyanti. Ettha ca pākāṭehi rūpādīhi nayo dassitoti cakkhādīsupi hīnapañītatā yojetabbā.

**Manāpapariyantanti** manāpaṃ pariyantaṃ mariyādābhūtaṃ pañcasu kāmaguṇesu vadāmīti attho. Kim kāraṇanti? Yasmā te ekaccassa manāpā honti, ekaccassa amanāpā, yassa yeva manāpā, tassa teva paramā, tasmā tassa tassa ajjhāsavayasena kāmaguṇānaṃ paramatā hoti, na tesaṃyeva sabhāvato.

**Evanti** imasmim sutte vuttanayena. Ekasmimyeva assādanakujjhanato ārammaṇasabhāvasseva iṭṭhāniṭṭhābhāvato aniṭṭhaṃ “iṭṭhan”ti gahaṇato ca, iṭṭhaṃ “aniṭṭhan”ti gahaṇato ca **iṭṭhāniṭṭhaṃ nāma pāṭiyekkaṃ paṭivibhattaṃ natthīti** attho. **Saññāvipallāsena cāti**-ādinā nibbāne viya aññesu ārammaṇesu saññāvipallāsena iṭṭhāniṭṭhaggahaṇaṃ hoti. Pittummattādīnaṃ khīrasakkarādīsū dosussadasamuṭṭhitasaññāvipallāsavasena tittaggahaṇaṃ viyāti imamatthaṃ sandhāya manāpapariyantatā vuttāti dasseti.

---

1. Dī 2. 246; Ma 1. 85; Abhi 2. 107 piṭṭhesu.



**Vibhattaṃ atthīti** ca vavatthitaṃ atthīti attho, aṭṭhakathācariyehi vibhattaṃ pakāsitaṃ vā. Tañca majjhimakasattassa vasena vavatthitaṃ pakāsitañca, aññesañca vipallāsavasena idaṃ iṭṭhaṃ aniṭṭhañca hotīti adhippāyo. Evaṃ vavatthitassa paniṭṭhāniṭṭhassa aniṭṭhaṃ iṭṭhanti ca gahaṇe na kevalaṃ saññāvipallāsova kāraṇaṃ, dhātukkhobhavasena indriyavikārāpatti-ādinā kusalākusalavipākuppattihetubhāvopīti sakkā vattuṃ. Tathā hi sītudakaṃ ghammābhitattānaṃ kusalavipākassa kāyaviññāṇassa hetu hoti, sītābhibhūtānaṃ akusalavipākassa. Tūlapicusamphasso vaṇe dukkho nivaṇe sukho, mudutaruṇahatthasambāhanañca sukhaṃ uppādeti, teneva hatthena paharaṇaṃ dukkhaṃ, tasmā vipākavasena ārammaṇavavatthānaṃ yuttaṃ.

**Kiñcāpīti**-ādinā satipi saññāvipallāse buddharūpadassanādīsu kusalavipākasseva gūthadassanādīsu ca akusalavipākassa uppattiṃ dassento tena vipākena ārammaṇassa iṭṭhāniṭṭhataṃ dasseti. Vijjamānepi saññāvipallāse ārammaṇena vipākaniyamadassanaṃ ārammaṇaniyamadassanatthameva katanti.

**Apica dvāravasenapīti**-ādinā dvārantare dukkhassa sukhasa ca paccayabhūtassa dvārantare sukhadukkhavipākuppādanato vipākena ārammaṇaniyamadassanena ekasmimyeva ca dvāre samānasseva maṇiratanādiphoṭṭhabbassa saṇikaṃ phusane pothane ca sukhadukkhuppādanato vipākavasena iṭṭhāniṭṭhatā dassitāti viññāyati.

**Heṭṭhimanayoti** majjhimakasattassa vipākassa ca vasena vavatthitaṃ ārammaṇaṃ gahetvā “tesaṃ tesaṃ sattānaṃ uññātan”<sup>1</sup>ti ca ādināvuttanayo. **Sammutimanāpanti** majjhimakasattassa vipākassa ca vasena sammataṃ vavatthitaṃ manāpaṃ, taṃ pana sabhāveneva vavatthitanti abhinditabbatova na bhindatīti adhippāyo. Saññāvipallāse na nerayikādīhipi puggalehi manāpanti gahitaṃ puggalamanāpaṃ “**taṃ taṃ vā panā**”ti-ādinā bhindati. Vemānikapetarūpampi akusalakammajattā kammakāraṇādīdukkhavatthubhāvato ca “manussarūpato hīna”ti vuttaṃ.

---

1. Abhi 2. 2 piṭṭhe.

7. Oḷārikarūpānaṃ vatthārammaṇapaṭiḡhātavasena supariḡḡahitatā, sukhumānaṃ tathā abhāvato duppariḡḡahitatā ca yojetabbā. Duppariḡḡahaṭṭheneva lakkhaṇaduppaṭivijjhanatā daṭṭhabbā. **Dasavidhanti** “dūre”ti avuttassa dassanatthaṃ vuttaṃ. Vuttampi pana okāsato dūre hotiyeva.

**Heṭṭhimanayoti** “itthindriyaṃ -pa- idaṃ vuccati rūpaṃ santike”ti<sup>1</sup> evaṃ lakkhaṇato dvādasahatthavasena vavatthita-okāsato ca dassetvā niyyātitanayo. So lakkhaṇokāsavasena dūrasantikena saha gahetvā niyyātittatā **bhindamāno** missakaṃ karonto **gato**. Atha vā **bhindamānoti** sarūpadassanena lakkhaṇato yevāpanakena okāsatoti evaṃ lakkhaṇato okāsato ca visuṃ karonto gatoti attho. Atha vā lakkhaṇato santikadūrānaṃ okāsato dūrasantikabhāvākaraṇena santikabhāvaṃ bhinditvā dūrabhāvaṃ, dūrabhāvaṃca bhinditvā santikabhāvaṃ karonto pavattoti **“bhindamāno gato”**ti vuttaṃ. **Idha panāti** “taṃ taṃ vā pana rūpaṃ upādāya upādāyā”ti idha purimanayena lakkhaṇato dūraṃ okāsato santikabhāvākaraṇena na bhindati bhagavā, na ca okāsadūrato visuṃ karaṇena, nāpi okāsadūrena vomissakakaraṇenāti attho. Kim pana karotīti? Okāsato dūrameva bhindati. Ettha pana na pubbe vuttanayena tidhā attho daṭṭhabbo. Na hi okāsato dūraṃ lakkhaṇato santikaṃ karoti, lakkhaṇato vā visuṃ tena vā vomissakanti. Okāsato dūrassa pana okāsatova santikabhāvākaraṇaṃ idha “bhedanan”ti veditabbaṃ. **Idha pana na lakkhaṇato dūraṃ bhindatīti** etthāpi vā na pubbe vuttanayena tidhā bhedassa akaraṇaṃ vuttaṃ, lakkhaṇato santikadūrānaṃ pana lakkhaṇato upādāyupādāya dūrasantikabhāvo natthīti lakkhaṇato dūrassa lakkhaṇatova santikabhāvākaraṇaṃ lakkhaṇato dūrassa abhedananti daṭṭhabbaṃ. Purimanayo viya ayaṃ nayo na hotīti ettakameva hi ettha dassetīti bhindamānoti ettha ca aññathā bhedanaṃ vuttaṃ, bhedanaṃ idha ca aññathā vuttanti.

Rūpakkhandaṇiddesavaṇṇanā niṭṭhitā.

---

1. Abhi 2. 2, 3 piṭṭhesu.

## 2. Vedanākkhandhaniddesavaṇṇanā

8. Cakkhādayo pasādā oḷārikamanomayattabhāvapariyāpannā kāyavohāraṃ arahantīti tabbatthukā adukkhamasukhā “**kāyikā**”ti pariyāyena vuttā, na kāyapasādavatthukattā. Na hi cakkhādayo kāyapasādā hontīti. **Santativasena khaṇādivasena cāti** ettha addhāsamayavasena atītādibhāvassa avacanaṃ sukhādivasena bhinnāya atītādibhāvavacanato. Na hi sukhāyeva addhāvasena samayavasena ca atītādikā hoti, tathā dukkhā adukkhamasukhā ca kāyikacetāsikādibhāvena bhinnā. Tena vedanāsamudayo addhāsamayavasena atītādibhāvena vattabbaṃ arahati samudāyassa tehi paricchinditabbattā, vedanekadesā pana ettha gahitāti te santatikhaṇehi paricchedaṃ arahanti tattha tathāparicchinditabbānaṃ gahitattāti. Ekasantatiyaṃ pana sukhādi-anekebhedasabbhāvena tesu yo bhedo paricchinditabbabhāvena gahito, tassa ekappakārassa pākaṭassa paricchedikā taṃsahitadvārālanappavattā, avicchena taduppādakekavidhavisayasamāyogappavattā ca santati bhavituṃ arahatīti tassa bhedantaraṃ anāmasitvā paricchadakabhāvena gahaṇaṃ kataṃ. Lahuparivattino vā dhammā parivattaneneva paricchedaṃ arahantīti santatikhaṇavasena paricchedo vutto. **Pubbantāparantamajjhagatāti** etena hetupaccayakiccavasena vuttanayaṃ dasseti.

11. Kilesaggisampayogato **sadarathā**. Etena sabhāvato oḷārikataṃ dasseti, **dukkhavipākattṭhenāti** etena oḷārikavipākanipphādanena kiccato. Kammavegakkhittā kammaṭṭhābaddhabhūtā ca kāyakammādi-byāpāravirahato nirussāhā vipākā, sa-ussāhā ca kiriyā avipākā. Savipākā ca sagabbhā viya oḷārikāti tabbipakkhato avipākā **sukhumāti** vuttā.

**Asātattṭhenāti** amadhuraṭṭhena. Tena sātapaṭṭipakkhaṃ anittṭhasabhāvaṃ dasseti. **Dukkhattṭhenāti** dukkhamaṭṭhena. Tena dukkhānaṃ santāpanakiccaṃ dasseti. “Yāyaṃ bhante adukkhamasukhā vedanā, santasmim esā paṇīte sukhe vuttā bhagavatā”ti<sup>1</sup> vacanato **adukkhamasukhā** pharaṇasabhāvavirahato asantānaṃ

---

1. Ma 2. 59; Saṃ 2. 423 piṭṭhesu.

kāmarāgapaṭighānusayānaṃ anusayanassa aṭṭhānattā **santā**, sukhe nikantiṃ pariyādāya adhigantabbattā padhānabhāvaṃ nīṭāti **paṇīṭāti**. Tathā anadhigantabbā ca kāmāvacarajāti-ādisaṅkaraṃ akatvā samānajātiyaṃ ñāṇasampayuttavippayuttādike samānabhede sukhato paṇīṭāti yojetabbā. Upabrūhitānaṃ dhātūnaṃ paccayabhāvena sukhā **khobheti** vibādhitānaṃ paccayabhāvena dukkhā ca. Ubhayampi kāyaṃ byāpentaṃ viya uppajjātī **pharati**. **Madayamānanti** madaraṃ karontaṃ. **Chādayamānanti** icchaṃ uppādentāṃ, avattharamānaṃ vā. Ghammābhitattassa sītodakaghaṭṭena āsittassa yathā kāyo upabrūhito hoti, evaṃ sukhasamaṅginopīti katvā **“āsiṅcamānaṃ viyā”**ti vuttaṃ. **Ekattanimitteyevāti** pathavīkasiṅṇādike ekasabhāve eva nimitte. **Caratīti** nānāvajjane javane vedanā viya vipphandanarahitattā **sukhumā**.

Adhippāye akusalatāya **akovido**. **Kusalattike -pa- āgatattāti** “kusalākusalā vedanā oḷārikā, abyākatā vedanā sukhumā”ti evaṃ āgatattā. Bhūmantarabhede dassetuṃ **“yampī”**ti-ādi āradhānaṃ. **Iminā nīhārenāti** etena “kāmāvacarasukhato kāmāvacarupekkhā sukhumā”ti-ādinaṃ sabhāvādibhedena ca oḷārikasukhumabhāvaṃ tatra tatreva kathento na bhindatīti nayaṃ dasseti.

**Lokiyalokuttaramissakā kathitā**, tasmā ekantapaṇīte hīnapaṇītānaṃ uddhaṭṭattā evameva ekantahīne ca yathāsambhavaṃ hīnapaṇītatā uddharitabbāti anuññātānaṃ hotīti ubhayattha taduddharaṇe na kukkucāyitabbanti attho.

Akusalānaṃ kusalādīhi sukhumattābhāvato paḷiyā āgatassa aparivattanīyabhāvena **“heṭṭhimanayo na oloketabbo”**ti vuttanti vadanti, taṃtaṃvāpanavasena kathanepi parivattanaṃ natthīti na parivattanaṃ sandhāya **“heṭṭhimanayo na oloketabbo”**ti vuttaṃ, heṭṭhimanayassa pana vuttattā avuttanayaṃ gahetvā **“taṃ taṃ vā panā”**ti vuttuṃ yuttanti **“heṭṭhimanayo na oloketabbo”**ti vuttanti veditabbo. Bahuvipākā akusalā dosussannatāya **oḷārikā**, tathā appavipākā kusalā. Mandadosattā appavipākā akusalā **sukhumā**, tathā bahuvipākā kusalā ca. Oḷārikasukhumanikantivatthubhāvato kāmāvacarādīnaṃ

**oḷārikasukhumatā. Sāpīti** bhāvanāmayāya bhedanena dānamayasīlamayānañca paccekam bhedanam nayato dassitanti veditabban. **Sāpīti** vā tividhāpīti yojetabban.

13. Jāti-ādivasena asamānakotṭhāsātā **visabhāgaṭṭho**. Dukkhavipākatādivasena asadisakiccatā, asadisasabhāvātā vā **visamsaṭṭho**, na asampayogo. Yadi siyā, dūravipariyāyena santikam hotīti samsaṭṭhaṭṭhena santikatā āpajjati, na ca vedanāya vedanāsampayogo atthi. Santikapadaavaṇṇanāya ca “sabhāgaṭṭhena sarikkhaṭṭhena cā”ti vakkhatīti vuttanayeneva attho veditabbo.

**Na dūrato santikam uddharitabbanti** kasmā vuttam, kim yathā santikato akusalato akusalā dūreti uddharīyati, tathā tato dūrato kusalato kusalā santiketi uddharitum na sakkāti? Na sakkā. Tathā hi sati kusalā kusalāya santiketi katvā santikato santikatā eva uddharitā siyā, tathā ca sati santikasantikataratāvacanameva āpajjati, upādāyupādāya dūrasantikātāva idha vuccati, tasmā dūrato dūruddharaṇam viya santikato santikuddharaṇaṇca na sakkā katum dūradūrataratāya viya santikasantikataratāya ca anadhippetattā. Atha pana vadeyya “na kusalā kusalāya eva santiketi uddharitabbā, atha kho yato sā dūre, tassā akusalāyā”ti, tañca natthi. Na hi akusalāya kusalā kadāci santike atthīti. Athāpi vadeyya “yā akusalā kusalāya santike, sā tato dūrato kusalato uddharitabbā”ti, tadapi natthi. Na hi kusale akusalā atthi, yā tato santiketi uddhariyeyya, tasmā idha vuttassa dūrassa dūrato accantavisabhāgattā dūre santikam natthīti na sakkā dūrato santikam uddharitum, santike panidha vutte bhinne tattheva dūram labbhatīti āha “**santikato pana dūram uddharitabban**”ti.

Upādāyupādāya dūrato ca santikam na sakkā uddharitum. Lobhasahagatāya dosasahagatā dūre lobhasahagatā santiketi hi vuccamāne santikatova santikam uddharitam hoti. Tathā dosasahagatāya lobhasahagatā dūre dosasahagatā santiketi

etthāpi sabhāgato sabhāgantarassa uddhaṭṭā, na ca sakkā “lobhasahagatāya dosasahagatā dūre sā eva ca santike”ti vattum dosasahagatāya santikabhāvassa akāraṇattā, tasmā visabhāgatā bhedaṃ aggahetvā na pavattatīti sabhāgābyāpakattā dūrātāya dūrato santikuddharaṇaṃ na sakkā kātum. Na hi dosasahagatā akusalasabhāgaṃ sabbaṃ byāpetvā pavattatīti. Sabhāgatā pana bhedaṃ antogadhaṃ katvā pavattatīti visabhāgābyāpakattā santikatāya santikato dūruddharaṇaṃ sakkā kātum. Akusalatā hi lobhasahagatādisabbavisabhāgābyāpikāti. Tenāha “**na dūrato santikaṃ uddharitabban**”ti-ādi.

Vedanākkhandhaniddesavaṇṇanā niṭṭhitā.

### 3. Saññākkhandhaniddesavaṇṇanā

17. **Cakkhusamphassajā saññā**ti ettha yadipi vatthuto phassassa nāmaṃ phassato ca saññāya, vatthuvisiṭṭhaphassena pana viṭṭhasaññā vatthunā ca viṭṭhā hoti phassassa viya tassāpi tabbatthukattāti “**vatthuto nāman**”ti vuttam. **Paṭighasamphassajā saññā**ti etthāpi yathā phasso vatthārammaṇapaṭighaṭṭanena uppanno, tathā tato jātasaññāpīti “**vatthārammaṇato nāman**”ti vuttam. Ettha ca paṭighajo samphasso, paṭighaviññeyyo vā samphasso **paṭighasamphassoti** uttarapadalopaṃ katvā vuttanti veditabbaṃ.

Viññeyyabhāve vacanaṃ adhikicca pavattā, vacanādhīnā vā arūpakkhandhā, adhivacanaṃ vā etesaṃ pakāsaṇaṃ atthīti “adhivacana”ti vuccanti, tatojo samphasso adhivacanasamphasso, samphassoyeva vā yathāvutthehi atthehi adhivacano ca samphasso cāti adhivacanasamphasso, adhivacanaṃ viññeyyo vā samphasso adhivacanasamphasso, tato, tasmim vā jātā **adhivacanasamphassajā**. Pañcadvārikasamphassepi yathāvutto attho sambhavatīti tena pariyāyena tato jāpi saññā “**adhivacanasamphassajā**”ti vuttā. Yathā pana aññappakārāsambhavato manosamphassajā nipariyāyena “adhivacanasamphassajā”ti vuccati, na evaṃ ayaṃ paṭighasamphassajā āveṇikappakārāntarasambhavatoti adhippāyo.

Yadi evaṃ cattāro khandhāpi yathāvuttasamphassato jātattā  
 “adhivacanasamphassajā”ti vattum yuttā, saññāva kasmā evaṃ vuttāti?  
 Tiṇṇaṃ khandhānaṃ atthavasena attano pattampi nāmaṃ yattha  
 pavattamāno adhvācānasamphassaja-saddo nirulhatāya dhammābhilāpo  
 hoti, tassā saññāya eva āropetvā sayāṃ nivattanaṃ hoti. Tenāha “**tayo hi  
 arūpino khandhā**”ti-ādi. Atha vā saññāya paṭighasamphassajāti aññampi  
 viṣiṭṭhaṃ nāmaṃ atthīti adhvācānasamphassajānāmaṃ tiṇṇaṃyeva  
 khandhānaṃ bhavitum arahati. Te pana attano nāmaṃ saññāya datvā  
 nivattāti imamattaṃ sandhāyāha “**tayo hi arūpino khandhā**”ti-ādi.  
**Pañcadvārikasaññā oloketvāpi jānituṃ sakkāti** idaṃ tena tenādhippāyena  
 hatthavikārādikaraṇe tadadhippāyavijānananimittabhūtā viññatti viya rajjivā  
 olokanādīsu rattatādivijānananimittaṃ olokanāṃ  
 cakkhuviññānavisayasamāgame pākaṭaṃ hotīti taṃsāmpayuttāya saññāyapi  
 tathāpākaṭabhāvaṃ sandhāya vuttaṃ.

Rajjivā olokanādivasena pākaṭā javanappavattā bhavitum arahatīti  
 etissā āsaṅkāya nivattanattaṃ “**pasādavattukā evā**”ti āha. **Aññaṃ  
 cintentaṃ** ti yaṃ pubbe tena cintitaṃ nātaṃ, tato aññaṃ cintentaṃ attho.

Saññākkhandhaniddesavaṇṇanā niṭṭhitā.

#### 4. Saṅkhārakkhandhaniddesavaṇṇanā

20. **Heṭṭhimakoṭiyāti** ettha bhūmaniddesova. Tattha hi padhānaṃ  
 dassitanti. Yadi evaṃ uparimakoṭiyā taṃ na dassitanti āpajjati? Nāpajjati  
 uparimakoṭigatabhāvena vinā heṭṭhimakoṭigatabhāvābhāvato. Heṭṭhimakoṭi  
 hi sabbabyāpikāti. Dutiye karaṇaniddeso, heṭṭhimakoṭiyā āgatāti sambandho.  
 Purimepi vā “heṭṭhimakoṭiyā”ti yaṃ vuttaṃ, tañca  
 padhānaṃsaṅkhārādasānavasena sambandhakaraṇena karaṇaniddesova.  
**Taṃsāmpayuttā saṅkhārāti** ekūnapaññāsappabhede saṅkhāre āha. **Gahitāva  
 honti** tappaṭibaddhattā.

Saṅkhārakkhandhaniddesavaṇṇanā niṭṭhitā.

### Pakiṇṇakakathāvaṇṇanā

**Samuggama**-saddo sañjātiyaṃ ādi-uppattiyaṃ niruḷho.

Taṃtaṃpaccayasamāyoge hi purimabhavasāṅkhātā purimantato uddhaṅgamaṇaṃ **samuggamo**, sandhiyaṃ vā paṭisandhiyaṃ uggamo **samuggamo**. So pana yattha pañcakkhandhā paripuṇṇā samuggacchanti, tattheva dassito. Etena nayena aparipuṇṇakhandhasamuggamo ekavokāracatuvokāresu sakkā viññātunti. Atha vā yathādhigatānaṃ pañcannampi khandhānaṃ saha uggamo uppatti **samuggamo**. Etasmim atthe vikaluppatti asaṅgahitā hoti. Himavantappadese jātimanta-ḷakalomaṃ **jāti-  
uṇṇā**. **Sappimaṇḍabindū**ti evaṃ etthāpi **bindu**-saddo yojetabbo. **Evaṃvaṇṇappaṭibhāg**anti evaṃvaṇṇaṃ evaṃsaṅṭhānaṃca. Paṭibhajānaṃ vā **paṭibhāgo**, sadisatābhajānaṃ sadisatāpattīti attho. Evaṃvidho vaṇṇappaṭibhāgo etassāti **evaṃvaṇṇappaṭibhāgaṃ**.

**Santatisīsānī**ti santatimūlāni, santatikoṭṭhāsā vā.

Anekindriyasamāhārabhāvato hi padhānaṅgaṃ “sīsan”ti vuccati, evaṃ vatthudasakādikoṭṭhāsā anekarūpasamudāyabhūtā “sīsānī”ti vuttānīti.

**Pañcakkhandhā paripuṇṇā** hontīti gaṇanāpāripūrim sandhāya vuttaṃ, na tassa tassa khandhassa paripuṇṇataṃ. Kammasamuṭṭhānapaveṇiyā vuttattā “utucittāhārajaṇaveṇī ca ettakaṃ kālaṃ atikkamitvā hotī”ti-ādinā vattabbā siyā, taṃ pana “pubbāparato”ti ettha vakkhatīti akathetvā kammajaṇaveṇī ca na sabbā vuttāti avuttaṃ dassetuṃ opapātikasamuggamo nāma dassito. **Evaṃ -pa- pañcakkhandhā paripuṇṇā** hontīti paripuṇṇāyatanānaṃ vasena nayo dassito, aparipuṇṇāyatanānaṃ pana kāmāvacarānaṃ rūpāvacarānaṃ parihīnāyatanassa vasena santatisīsahāni veditabbā.

**Pubbāparatoti** ayaṃ vicāraṇā na pañcannaṃ khandhānaṃ uppattiyaṃ, atha kho tesāṃ rūpasamuṭṭhāpaneti daṭṭhabbā. Taṃ dassento āha “**evaṃ panā**”ti-ādi. **Apacchā-apure uppannesū**ti etena sāmsayakāraṇaṃ dasseti. Sahuppannesu hi idameva paṭhamaṃ rūpaṃ samuṭṭhāpeti, idaṃ pacchāti adassitaṃ na sakkā viññātum. Ettha ca “pubbāparato”ti etissā vicāraṇāya vatthubhāvena paṭisandhiyaṃ uppannā pavattā pañcakkhandhā gahitā. Tattha ca



niddhāraṇe bhummaniddesoti “**rūpaṃ paṭhamam rūpaṃ samuṭṭhāpeti**”ti āha. Aññathā bhāvenabhāvalakkhaṇatthe bhummaniddese sati rūpassa rūpasamuṭṭhāpanakkhaṇe kammassapi rūpasamuṭṭhānaṃ vadantīti ubhayanti vattabbaṃ siyāti. Rūpārūpasantatiṅca gahetvā ayaṃ vicāraṇā pavattāti “**rūpaṃ paṭhamam rūpaṃ samuṭṭhāpeti**”ti vuttaṃ. Aññathā paṭisandhikkhaṇe eva vijjamāne gahetvā vicāraṇāya kariyamānāya arūpassa rūpasamuṭṭhāpanameva natthīti pubbāparasamuṭṭhāpanavicāraṇāva idha na upapajjatīti vattabbaṃ siyāti. **Vatthu uppādakkhaṇe dubbalaṃ hotīti** sabbarūpānaṃ uppādakkhaṇe dubbalaṃ sandhāya vuttaṃ. Tadā hi taṃ pacchājātapaccayarahitaṃ āhārādīhi ca anupatthaddhanti “dubbalaṃ”ti vuttaṃ. **Kammavegakkhittattāti** idaṃ satipi bhavaṅgassa kammajabhāve sāyaṃ vipākasantati paṭisandhikkhaṇe purimabhavaṅgasamuṭṭhāpakato aññena kammunā khittā viya appatīṭhitā, tato paraṅca samānasantatiyaṃ anantarapaccayaṃ purejātapaccayaṅca labhitvā patīṭhitāti imamatthaṃ sandhāya vuttaṃ.

**Paveṇi ghaṭiyatīti** cakkhādivatthusantati ekasmiṃ vijjamāne eva aññassa nirodhuppattivāsena ghaṭiyati, na cutipaṭisandhinissayavattūnaṃ viya vicchedappavattīti attho. **Āngatoti** jhānaṅgato. Jhānaṅgāni hi cittaṇa saha rūpasamuṭṭhāpakāni, tesam anubaladāyakāni maggaṅgādīni tesu vijjamānesu visesarūpappavattidassanato. Atha vā yāni cittaṅgāni cetanādīni cittassa rūpasamuṭṭhāpane aṅgabhāvaṃ sahāyabhāvaṃ gacchanti, tesam baladāyakehi jhānaṅgādīhi aparīhīnanti attho. Tato parīhīnattā hi cakkhuviññānādīni rūpaṃ na samuṭṭhāpentīti. Yo pana vadeyya “paṭisandhicittena saha jātavattu tassa ṭhitikkhaṇe ca bhaṅgakkhaṇe ca purejātanti katvā paccayavekallābhāvato tasmim khaṇadvaye rūpaṃ samuṭṭhāpetū”ti, taṃ nivārento āha “**yadi hi cittaṇ**”ti-ādi. Tattha ṭhitibhaṅgakkhaṇesupi tesam dhammānaṃ vatthu purejātaṃ na hotīti na vattabbamevetanti anujāni, tatthāpi dosaṃ dasseti. Yadi tadā rūpaṃ samuṭṭhāpeyya, tava matena paṭisandhicittampi samuṭṭhāpeyya, tadā pana rūpuppādanameva natthi. Yādā ca rūpuppādanaṃ, tadā uppādakkhaṇe tava matenapi paccayavekallameva paṭisandhikkhaṇe purejātanissayābhāvato, tasmā **paṭisandhicittaṃ rūpaṃ na samuṭṭhāpetīti** ayamettha adhippāyo. Uppādakkhaṇe aṭṭha rūpāni

gahetvā uṭṭhahati. Kasmā? Arūpadhammānaṃ anantarā dipaccayavasena savegānaṃ paripuṇṇabalānameva uppattito.

**Avisayatāyāti** agatapubbassa gāmassa āgantukassa avisayabhāvato. **Appahutatāyāti** tattha tassa anissarabhāvato. **Cittasamuṭṭhāna -pa- ṭhitānīti** idaṃ yehākārehi cittasamuṭṭhānarūpānaṃ cittacetāsikā paccayā honti, tehi sabbehi paṭisandhiyaṃ cittacetāsikā samatimsakammajarūpānaṃ yathāsambhavaṃ paccayā hontīti katvā vuttaṃ.

**Vaṭṭamūlanti** taṇhā avijjā vuccati. Cuticittena uppajjamānaṃ rūpaṃ tato purimatārehi uppajjamānaṃ viya na bhavantare uppajjatīti vaṭṭamūlassa vūpasantattā anuppatti vicāretabbā.

**Rūpassa natthitāyāti** rūpānaṃ nissaraṇattā arūpassa, virāgavasena pahīnattā uppādetabbassa abhāvaṃ sandhāya vuttaṃ. Rūpokāse vā rūpaṃ atthīti katvā rūpapaccayānaṃ rūpuppādanaṃ hoti, arūpaṃ pana rūpassa okāso na hotīti yasmim rūpe sati cittaṃ aññaṃ rūpaṃ uppādeyya, tadeva tattha natthīti attho. Purimarūpassapi hi paccayabhāvo atthi puttassa pitisadisatādassanatoti.

**Utu pana paṭhamaṃ rūpaṃ samuṭṭhāpeti** paṭisandhicittassa ṭhitikkhaṇe samuṭṭhāpanatoti adhippāyo. **Utu nāma cesa dandhanirodhoti**-ādi utussa ṭhānakkhaṇe uppādane kāraṇadassanatthaṃ arūpānaṃ uppādakāladassanatthaṃca vuttaṃ. Dandhanirodhattā hi so ṭhitikkhaṇe balavāti tadā rūpaṃ samuṭṭhāpeti, tasmim dharante eva khippanirodhattā soḷasasu cittesu uppannesu paṭisandhi-anantaram cittaṃ utunā samuṭṭhite rūpe puna samuṭṭhāpetīti adhippāyo. **Tasmim dharante eva soḷasa cittāni uppajjitvā nirujjhantīti** etena pana vacanena yadi uppādanirodhakkhaṇā dharamānakkhaṇe eva gahitā, “soḷasacittakkhaṇāyukaṃ rūpaṃ”ti vuttaṃ hoti, athuppādakkhaṇaṃ aggahetvā nirodhakkhaṇova gahito, “sattarasacittakkhaṇāyukan”ti, sace nirodhakkhaṇaṃ aggahetvā uppādakkhaṇo gahito, “adhikasōḷasacittakkhaṇāyukan”ti, yadi pana uppādanirodhakkhaṇā dharamānakkhaṇe na gahitā, “adhikasattarasacittakkhaṇāyukan”ti. Yasmā pana “**tesu**

**paṭisandhi-anantaran**”ti paṭisandhipi tassa dharamānakkhaṇe uppannesu gahitā, tasmā uppādakkaṇo dharamānakkhaṇe gahitoti nirodhakkhaṇe aggaḥite adhikasolaṣacittakkhaṇāyukatā vakkhamānā, gahite vā solaṣacittakkhaṇāyukatā adhippetāti veditabbā.

**Ojā kharāti** savatthukaṃ ojaṃ sandhāyāha. Sabhāvato sukhumāya hi ojāya vatthivasena atthi oḷārikasukhumatāti.

**Cittañcevāti** cittassa pubbaṅgamatāya vuttaṃ, taṃsampayuttakāpi pana rūpasamuṭṭhāpakā hontīti. Yathāha “hetū hetusampayuttakānaṃ dhammānaṃ taṃsamuṭṭhānānaṃ rūpānaṃ hetupaccayena paccayo”ti-ādi<sup>1</sup>. **Cittanti** vā cittuppādaṃ gaṇhāti, na kammacetanaṃ viya ekadhamameva avijjamānaṃ. Kammasamuṭṭhānaṃ taṃsampayuttehipi samuṭṭhitaṃ hotūti ce? Na, tehi samuṭṭhitabhāvassa avuttattā, avacanaṃ tesāṃ kenaci paccayena paccayabhāvābhāvato.

**Addhānaparicchedatoti** kālaparicchedato. Tattha “sattarasa cittakkhaṇā rūpassa addhā, rūpassa sattarasamo bhāgo arūpassa”ti eso addhānaparicchedo adhippeto. **Paṭisandhikkhaṇeti** idaṃ nayadassanamattaṃ daṭṭhabbaṃ tato pararūpārūpānaṃ sahuppattisabbhāvato, na panaṇaṃ paṭisandhikkhaṇe asahuppatti-abhāvaṃ sandhāya vuttanti daṭṭhabbaṃ, paṭisandhicittassa ṭhitibhaṅgakkhaṇesu rūpuppattiṃ sayameva vakkhatīti. Phalappattanidassanena ca rūpārūpānaṃ asamānakālatāṃ nidasseti, na sahuppādaṃ tadatthaṃ anāraddhattā. Sahuppādena pana asamānakālatā sukhadīpanā hotīti taṃdīpanatthameva sahuppādaggahaṇaṃ.

Yadi evaṃ rūpārūpānaṃ asamānaddhattā arūpaṃ ohāya rūpassa pavatti āpajjatīti etassā nivāraṇatthamāha “**tattha kiñcāpi**”ti-ādi. **Ekappamāṇāvāti** nirantaraṃ pavattamānesu rūpārūpadhammesu nicchidde arūparahitaṃ rūpaṃ, rūparahitaṃ vā arūpaṃ natthīti katvā vuttaṃ. Ayaṃ kathā pañcavokāre kammajarūpappavattiṃ nibbānapaṭibhāganirodhasamāpattirahitaṃ sandhāya katāti daṭṭhabbā. **Pade padanti** attano pade eva padaṃ nikkhipanto viya lahuṃ lahuṃ akkamitvāti attho. **Anohāyāti** yāva cuti,

---

1. Abhi 8. 1 piṭṭhe.

tāva avijahitvā, cutikkhaṇe pana saheva nirujjhatīti. Yasmiñcaddhāne aññamaññaṃ anohāya pavatti, so ca paṭisandhicutiparicchinno ukkaṃsato etesaṃ addhāti. **Evanti** etena pubbe vuttaṃ avakaṃsato addhāpakāraṃ imaṃca saṅgaṇhātīti daṭṭhabbaṃ.

**Ekuppādanānānirodhatoti** etaṃ dvayamapi saha gahetvā rūpārūpānaṃ “ekuppādanānānirodhato”ti eko daṭṭhabbākāro vuttoti daṭṭhabbo. Evaṃ ito paresupi. **Pacchimakammajaṃ ṭhapetvāti** tassa cuticcitena saha nirujjhanato nānānirodho natthīti katvā vuttanti vadanti. Tassa pana ekuppādopi natthi heṭṭhā soḷasake pacchimassa bhaṅgakkhaṇe uppattivacanato. Yadi pana yassa ekuppādanānānirodhā dvepi na santi, taṃ ṭhapetabbaṃ. Sabbampi cittassa bhaṅgakkhaṇe uppannaṃ ṭhapetabbaṃ siyā, pacchimakammajassa pana uppattito parato cittesu pavattamānesu kammajarūpassa anuppattito vajjetabbaṃ gahetabbaṃca tadā natthīti “pacchimakammajaṃ ṭhapetvā”ti vuttanti veditabbaṃ. Tato pubbe pana aṭṭhacattālīsakammajarūpapaveṇī atthīti tattha yaṃ cittassa uppādakkhaṇe uppannaṃ, taṃ aññassa uppādakkhaṇe nirujjhatīti “ekuppādanānānirodhan”ti gahetvā ṭhitibhaṅgakkhaṇesu uppannarūpāni vajjetvā evaṃ ekuppādanānānirodhato veditabbāti yojanā katāti daṭṭhabbā. Tañhi rūpaṃ arūpena, arūpaṃca tena ekuppādanānānirodhanti. Tattha saṅkhalikassa viya sambandho paveṇīti katvā aṭṭhacattālīsakammajiyavacanaṃ kataṃ, aññathā ekūnapaññāsakammajiyavacanaṃ kattabbaṃ siyā.

**Nānuppāda -pa- pacchimakammajena dīpetabbāti** tena sudīpanattā vuttaṃ. Etena hi nayena sakkā tato pubbepi ekassa cittassa bhaṅgakkhaṇe uppannarūpaṃ aññassapi bhaṅgakkhaṇe eva nirujjhatīti taṃ arūpena, arūpaṃca tena nānuppādaṃ ekanirodhanti viññātunti. Ubhayatthāpi pana aññassa cittassa ṭhitikkhaṇe uppannaṃ rūpaṃ aññassa ṭhitikkhaṇe, tassa ṭhitikkhaṇe uppajjitvā ṭhitikkhaṇe eva nirujjhanakaṃ arūpaṃca na saṅgahitaṃ, taṃ “nānuppādato nānānirodhato”ti ettheva saṅgahaṃ gacchatīti veditabbaṃ. Catusantatīkarūpena hi nānuppādanānānirodhatādīpanā ettha ṭhitikkhaṇe uppannassa dassitattā adassitassa vasena nayadassanaṃ hotīti. Samatīmsakammajarūpesu eva ṭhitassapi gabbhe gatassa maraṇaṃ atthīti tesam eva vasena pacchimakampi yojitaṃ. **Amarā nāma bhavyeyyaṃ**, kasmā? Yathā channaṃ vatthūnaṃ

pavatti, evaṃ taduppādakakammeneva bhavaṅgādīnaṅca tabbatthukānaṃ pavattiyā bhavitabbanti. Na hi taṃ kāraṇaṃ atthi, yena taṃ kammajesu ekaccaṃ pavatteyya, ekaccaṃ na pavatteyyāti. Tasmā āyusmāviññāṇādīnaṃ jīvitasāṅkhārānaṃ anūnattā vuttaṃ **“amarā nāma bhaveyyun”**ti.

“Uppādakkhaṇe uppannaṃ aññassa uppādakkhaṇe nirujjhati, ÷hitikkhaṇe uppannaṃ aññassa ÷hitikkhaṇe, bhaṅgakkhaṇe uppannaṃ aññassa bhaṅgakkhaṇe nirujjhati”ti idaṃ aṭṭhakathāyaṃ āgatattā vuttanti adhippāyo. Attano panādhippāyaṃ uppādakkhaṇe uppannaṃ nirodhakkhaṇe, ÷hitikkhaṇe uppannaṅca uppādakkhaṇe, bhaṅgakkhaṇe uppannaṃ ÷hitikkhaṇe nirujjhatīti dīpetiyeva. Evaṅca katvā addhānaparicchede “taṃ pana sattarasamena cittena saddhiṃ nirujjhati”ti<sup>1</sup> vuttaṃ. **Imāya pāḷiyā virujjhati**, kasmā? Catusamuṭṭhānikarūpassapi samānāyukatāya bhavitabbattāti adhippāyo. Yathā pana etehi yojitaṃ, tathā rūpassa ekuppādanānānirodhatā nānuppādekanirodhatā ca natthiyeva.

Yā pana etehi rūpassa sattarasacittakkhaṇāyukatā vuttā, yā ca aṭṭhakathāyaṃ tatiyabhāgādhikasolaṣacittakkhaṇāyukatā, sā **paṭiccasamuppādavibhaṅgaṭṭhakathāyaṃ**<sup>2</sup> atītārammaṇāya cutiyā anantarā paccuppannārammaṇaṃ paṭisandhiṃ dassetuṃ “ettāvata ekādasa cittakhaṇā atītā honti, tathā pañcadasa cittakhaṇā atītā honti, athāvasesapañcacitta-ekacittakkhaṇāyuke tasmimyevārammaṇe paṭisandhicittaṃ uppajjati”ti dassitena soḷasacittakkhaṇāyukabhāvena virujjhati. Na hi sakkā “÷hitikkhaṇe eva rūpaṃ āpāthamāgacchatī”ti vuttuṃ. Tathā hi sati na rūpassa ekādasa vā pañcadaseva vā cittakhaṇā atītā, atha kho atireka-ekādasapañcadacittakkhaṇā. Tasmā yadipi pañcadvāre ÷hitippattameva rūpaṃ pasādaṃ ghaṭṭetīti yujjeyya, manodvāre pana uppādakkhaṇepi āpāthamāgacchatīti icchitabbametaṃ. Na hi manodvāre atītādīsu kiñci āpāthaṃ nāgacchatīti. Manodvāre ca evaṃ vuttaṃ “ekādasa cittakhaṇā atītā, athāvasesapañcacittakkhaṇāyuke”ti<sup>2</sup>.

Yo cettha cittassa ÷hitikkhaṇo vutto, so ca atthi natthīti vicāretabbo. **Cittayamake**<sup>3</sup> hi “uppannaṃ uppajjamānanti? Bhaṅgakkhaṇe uppannaṃ,

1. Abhi-Ṭṭha 2. 24 piṭṭhe.

2. Abhi-Ṭṭha 2. 150 piṭṭhe.

3. Abhi 6. 312 piṭṭhe.



atilahuparivattañca cittanti yena sahuppajjati, taṃ cittakkhaṇe rūpaṃ uppajjamānamevāti sakkā vuttum. Teneva hi taṃ paṭisandhito uddham acittasamuṭṭhānānaṃ attanā saha uppajjamānānaṃ na kenaci paccayena paccayo hoti, tadanantarañca taṃ ṭhitippattanti tadanantaraṃ cittaṃ tassa pacchājātapaccayo hoti, na sahajātapaccayoti. Yadi evaṃ “yassa kāyasaṅkhāro uppajjati, tassa vacīsaṅkhāro nirujjhatīti? No”ti<sup>1</sup> na vattabbanti ce? Na, cittanirodhakkhaṇe rūpuppādārambhābhāvati. Nippariyāyena hi cittassa uppādakkhaṇe eva rūpaṃ uppajjamānaṃ hoti, cittakkhaṇe pana avītivatte taṃ attano rūpasamuṭṭhāpanapurejātapaccayakiccaṃ na karoti, arūpañca tassa pacchājātapaccayo na hotīti ṭhitippattivisesālābham sandhāya pariyāyena idaṃ vuttanti.

**Tato paraṃ panāti** etassa “ettha pana yadetan”ti-ādikāyapi saṅgahakathāya niṭṭhitāya purimakathāya sannitṭhānato “tato paṭṭhāya kammajarūpapaveṇī na pavattatī”ti etena saha sambandhoti cutito paranti attho.

**Rūpaṃ pana rūpena sahāti-ādinā** yathā aṭṭhakathāyaṃ vuttaṃ, tathā ekuppādekanirodhatā rūpānaṃ arūpehi, arūpānaṃ rūpehi ca natthīti katvā rūpānaṃ rūpeheva, arūpānañca arūpehi yojitā.

**Sarīrassa rūpaṃ** avayavabhūtaṃ attho, ghanabhūto puñjabhāvo **ghanapuñjabhāvo**, na tilamuggādipuñjā viya sithilasambandhanānaṃ puñjoti attho. **Ekuppādādītīti** yathāvutte tayo pakāre āha.

**Heṭṭhāti** rūpakaṇḍavaṇṇanāyaṃ. **Parinipphannāva hontīti** vikārarūpādīnañca rūpakaṇḍavaṇṇanāyaṃ parinipphannatāpariyāyo vuttoti katvā vuttaṃ. Parinipphannanipphannānaṃ ko visesoti? Pubbantāparantaparicchinno paccayehi nipphādito tilakkhaṇāhato sabhāvadhammo **parinipphanno, nipphanno** pana asabhāvadhammopi hoti nāmaggaḥaṇasamāpajjanādivasena nipphādiyamānoti. **Nirodhasamāpatti panāti** etena sabbampi upādāpaññattim tadekadesena dassētīti veditabbam.

**Pakiṇṇakakathāvaṇṇanā niṭṭhitā.**

1. Abhi 6. 43 piṭṭhe.

### Kamādivinicchayakathāvaṇṇanā

Dassanena pahātabbāti-ādinā paṭhamam pahātabbā paṭhamam vuttā, dutiyam pahātabbā dutiyanti ayam pahānakkamo. Anupubbapaṇītā bhūmiyo anapubbena vavattitāti tāsam vasena desanāya bhūmikkamo. “Cattāro satipaṭṭhānā”ti-ādiko<sup>1</sup> ekakkhaṇepi satipaṭṭhānādisambhavato **desanākkamova**. Dānakathādayo anupubbukkamsato kathitā, uppatti-ādivavattihānābhāvato pana dānādīnam idha desanākkamavacanam. Desanākkamoti ca yathāvuttavavattihānābhāvato anekesam vacanānam saha pavattiyā asambhavato yena kenaci pubbāpariyena desetabbatā tena tenādhippāyena desanāmatasseva kamo vuccati. **Abhedena hīti** rūpādīnam bhedaṁ akatvā piṇḍaggahaṇenāti attho. **Cakkhu-ādīnampi visayabhūtanti** ekadesena rūpakkhandham samudāyabhūtam vadati. **Evanti** ettha vuttanayenāti adhippāyo. “Chadvārādhīpati rājā”ti<sup>2</sup> “manopubbaṅgamā dhammā”ti<sup>3</sup> ca vacanato viññāṇam **adhipati**.

Rūpakkhandhe “**sāsavam upādāniyan**”ti vacanam anāsavanam dhammānam sabbhāvato rūpakkhandhassa taṁsabhāvatānivattanattham, na anāsavarūpanivattanatthanti. **Anāsavāva khandhesu vuttāti** ettha aṭṭhānappayutto **eva**-saddo daṭṭhabbo, anāsavā khandhesveva vuttāti attho.

Sabbasaṅkhatānam sabhāgena ekajjham saṅgaho **sabbasaṅkhatasabhāgekasaṅgaho**. Sabhāgasabhāgena hi saṅgayhamānā sabbasaṅkhatā phassādayo pañcakkhandhā honti. Tattha ruppanādisāmaññena samānakoṭṭhāsā “sabhāgā”ti veditabbā. Tesu saṅkhatābhisaṅkharāṇakiccaṁ āyūhanarasāya cetanāya balavanti sā “saṅkhārakkhandho”ti vuttā, aññe ca ruppanādivisesalakkhaṇarahitā phassādayo saṅkhatābhisaṅkharāṇasāmaññenāti daṭṭhabbā. Phusanādayo pana sabhāvā visum khandha-saddavacanīyā na hontīti dhammasabhāvaviññunā tathāgatena phassakkhandhādayo na vuttāti daṭṭhabbāti. “Ye keci bhikkhave samaṇā vā brāhmaṇā vā sassatavādā sassatam lokaṅca paññapenti attānaṅca, sabbe te imeyeva pañcupādānakkhandhe nissāya paṭicca, etesam vā aññataran”ti-ādīnaṅca suttānam vasena attattaniyagāhavatthussa etaparamatā daṭṭhabbā, etena ca vakkhamānasuttavasena ca khandhe eva

1. Saṁ 3. 128, 144; Abhi 2. 200 piṭṭhesu.

2. Dhammapada-Ṭṭha 2. 150 piṭṭhe.

3. Khu 1. 13 piṭṭhe Dhammapade.



nissāya parittārammaṇādivasena na vattabbā ca diṭṭhi uppajjati,  
khandhanibbānavajjassa sabhāvadhammassa abhāvatoti vuttam hoti.  
Aññesañca khandha-saddavacanīyānaṃ sīlakkhandhādīnaṃ sabbhāvato na  
pañcevāti etaṃ codanaṃ nivattetumāha “**aññesañca tadavarodhato**”ti.

Dukkhadukkhavipariṇāmadukkhasaṅkhāraddockhatāvasena vedanāya  
**ābādhakattaṃ** daṭṭhabbānaṃ. Rāgādisampayuttassa vipariṇāmadidukkhassa  
itthipurisādi-ākāraggāhikā taṃtaṃsaṅkappamūlabhūtā saññā **samuṭṭhānaṃ**.  
Rogassa pittādīni viya āsanna-kāraṇaṃ **samuṭṭhānaṃ**, utubhojanavesamādīni  
viya mūlakāraṇaṃ **nidānaṃ**. “Cittassaṅgabhūtā cetasikā”ti cittaṃ  
**gilānūpamaṃ** vittaṃ, sukhasaññādivasena vedanākāraṇāya hetubhāvato  
vedanābhojanassa chādāpanato ca saññā **aparādhūpamā byañjanūpamā** ca,  
“pañca vadhakā paccatthikāti kho bhikkhave pañcannetaṃ  
upādānakkhandhānaṃ adhivacanaṃ”ti **āsivisūpame**<sup>1</sup> vadhakāti vuttā,  
“bhāroti kho bhikkhave pañcannetaṃ upādānakkhandhānaṃ adhivacanaṃ”ti  
**bhārasutte**<sup>2</sup> bhāroti, “atītaṃpāhaṃ addhānaṃ rūpena khajjīm,  
seyyathāpāhaṃ etarahi paccuppanna rūpena khajjāmi, ahañceva kho pana  
anāgataṃ rūpaṃ abhinandeyyāṃ, anāgatenapāhaṃ rūpena khajjeyyāṃ.  
Seyyathāpetarahi khajjāmi”ti-ādīnā **khajjanīyapariyāyena**<sup>3</sup> khādakāti, “so  
aniccaṃ rūpaṃ ‘aniccaṃ rūpaṃ’ti yathābhūtaṃ nappajānātī”ti-ādīnā  
**yamakasutte**<sup>4</sup> aniccādīkāti. Yadi pi imasmiṃ vibhaṅge avisesena khandhā  
vuttā, bāhullena pana upādānakkhandhānaṃ tadantogadhānaṃ daṭṭhabbatā  
vuttāti veditabbāti.

**Desitādiccabandhunā**ti desitaṃ ādiccabandhunā, desitāni vā.  
Gāthāsukhatthaṃ anunāsikalopo, nikāralopo vā kato.

**Gahetuṃ na sakkāti** niccādivasena gahetuṃ na yuttanti attho.

Rūpena saṅghānena phalakasadiṣo dissamāno kharabhāvābhāvā  
phalakakiccaṃ na karotīti “**na sakkā taṃ gahetvā phalakaṃ vā āsanaṃ vā  
kātuṃ**”ti āha. **Na tathā tiṭṭhatīti** niccādīkā na hotīti attho, taṅhādītiṭṭhīhi vā  
niccādiggahaṇavasena uppādādi-anantaraṃ bhijjanato gahitākārā hutvā na  
tiṭṭhatīti attho. **Koṭisatasahasasaṅkhyāti**

1. Saṃ 2. 383 piṭṭhe.

2. Saṃ 2. 72 piṭṭhe.

2. Saṃ 2. 21 piṭṭhe.

4. Saṃ 2. 93 piṭṭhe.

idaṃ na gaṇanaparicchedadassanaṃ, bahubhāvadassanameva panetaṃ daṭṭhabbaṃ. **Udakajallakanti** udakalasikaṃ. Yathā udakatale bindunipātanita vāto udakajallakam saṅkaḍḍhitvā puṭam katvā pupphulaṃ nāma karoti, evaṃ vatthumhi ārammaṇāpāthagamanajanita phasso anupacchinnam kilesajallam saḥkāripaccayantarabhāvena saṅkaḍḍhitvā vedanam nāma karoti. Idañca kilesehi mūlakāraṇabhūtehi ārammaṇassādanabhūtehi ca nibbattam vaṭṭagatavedanam sandhāya vuttanti veditabbam. Ukkaṭṭhaparicchedena vā cattāro paccayā vuttā, ūnehipi pana uppajjateva.

**Nānālakkhaṇoti** vaṇṇagandharasaphassādīhi nānāsabhāvo. Māyāya dassitam rūpam “**māyā**”ti āha. Pañcapi upādānakkhandhā asubhādisabhāvā eva kilesāsucivatthubhāvāditoti asubhādito daṭṭhabbā eva. Tathāpi katthaci koci viseso sukhaggahaṇīyo hotīti āha “**visesato cā**”ti-ādi. Tattha cattāro satipaṭṭhānā catuvipallāsappahānakarāti tesam gocarabhāvena rūpakkhandhādīsu asubhādivasena daṭṭhabbatā vuttā.

**Khandhehi na vihaññati** parividditasabhāvattā. Vipassakopi hi tesam vipattiyam na dukkhamāpajjati, khīṇāsavesu pana vattabbameva natthi. Te hi āyatimpi khandhehi na bādhiyantīti. **Kabaḷikārāhāram pariḷānātīti** “āhārasamudayā rūpasamudayo”ti<sup>1</sup> vuttattā ajjhattikarūpe chandharāgam pajahanto tassa samudayabhūte kabaḷikārāhārepi chandarāgam pajahatīti attho, ayam pahānapariññā. Ajjhattikarūpam pana pariggaṇhanto tassa paccayabhūtam kabaḷikārāhārampi pariggaṇhātīti nātapariññā. Tassa ca udayavayānupassī hotīti tīraṇapariññā ca yojetabbā. Kāmarāgabhūtam abhijjham sandhāya “**abhijjhākāyaganthan**”ti āha. Asubhānupassanāya hi kāmarāgappahānam hotīti. Kāmarāgamukhena vā sabbalobhappahānam vadati. “Phassapaccayā vedanā”ti vuttattā āhārapariḷānane vuttanayena phassapariḷānanañca yojetabbam.

Sukhatthameva bhavapatthanā hotīti vedanāya taṇham pajahanto **bhavogham uttarati**. Sabbam vedanam dukkhato passanto attano parena apubbam dukkham

---

1. Sam 2. 48, 51 piṭṭhesu.

uppāditaṃ, sukhaṃ vā vināsitaṃ na passati, tato “anattaṃ me acari”ti-ādi āghātavatthuppahānato **byāpādakāyaganthaṃ bhindati**. “Sukhabahule sugatibhave suddhī”ti gahetvā gosīlagovatādīhi suddhiṃ parāmasanto sukhatthanāvaseneva parāmasatīti vedanāya taṇhaṃ pajahanto **sīlabbatupādānaṃ na upādiyati**. Manosañcetanā saṅkhārakkhandhova, saññā pana taṃsampayuttatī saññāsaṅkhāre anattato passanto manosañcetanāya chandarāgaṃ pajahati eva, taṅca pariggaṇhāti tīreti cāti “**saññāṃ saṅkhāre -pa- pari jānāti**”ti vuttaṃ.

Avijjāya viññāṇe ghanaggahaṇaṃ hotīti ghanavinibbhogaṃ katvā taṃ aniccato passanto **avijjogaṃ uttarati**. Mohabaleneva sīlabbataparāmāsaṃ hotīti taṃ pajahanto **sīlabbataparāmāsakāyaganthaṃ bhindati**.

“Yaṅca kho etaṃ bhikkhave vuccati cittaṃ itipi mano itipi viññāṇaṃ itipi, tatrāsutavā puthujjano nālaṃ nibbinditum, nālaṃ virajjitum, nālaṃ vimuccitum. Taṃ kissa hetu? Dīgharattaṃ hetam bhikkhave assutavato puthujanassa ajjhositaṃ mamāyitaṃ parāmaṭṭhaṃ ‘etaṃ mama, esohamasmi, eso me attā’ti”<sup>1</sup>—

vacanato viññāṇaṃ niccato passanto diṭṭhupādānaṃ upādiyati aniccato passanto taṃ na upādiyati.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

34. Evaṃ yā ekavidhādīnā vuttavedanānaṃ bhūmivasena jānitabbatā, taṃ vatvā puna sampayuttato dassitatādijānitabbappakāraṃ vattumāha “**apicā**”ti-ādi. **Aṭṭhavidhena tatthāti tattha**-saddassa sattavidhabhedeneva yojanā chabbidhabhedena yojanāya sati aṭṭhavidhattābhāvato.

**Pūraṇatthameva vuttoti** dasavidhatāpūraṇatthameva vutto, na navavidhabhede viya nayadānatthaṃ. Kasmā? Tattha nayassa dinnattā. Bhinditabbassa hi bhedanam nayadānaṃ, taṅca tattha katanti. Yathā ca kusallattiko, evaṃ

1. Saṃ 1. 319 piṭṭhe.

“kāyasamphassajā vedanā atthi sukhā, atthi dukkhā”ti idampi pūraṇatthamevāti dīpitaṃ hoti aṭṭhavidhabhede nayassa dinnatā.

Pubbe gahitato aññassa gahaṇaṃ vaḍḍhanaṃ gahaṇavaḍḍhanavasena, na purimagahite ṭhite aññupacayavasena. Vaḍḍhana-saddo vā chedanattho kesavaḍḍhanādīsu viyāti pubbe gahitassa aggahaṇaṃ chindanaṃ vaḍḍhanaṃ, dukatikānaṃ ubhayesaṃ vaḍḍhanaṃ ubhayavaḍḍhanaṃ, ubhayato vā pavattaṃ vaḍḍhanaṃ ubhayavaḍḍhanaṃ, tadeva ubhatovaḍḍhanakaṃ, tena nayanīharaṇaṃ **ubhatovaḍḍhanakanīhāro**. Vaḍḍhanakanayo vā vaḍḍhanakanīhāro, ubhayato pavatto vaḍḍhanakanīhāro **ubhatovaḍḍhanakanīhāro**. Tattha dukamūlakatikamūlaka-ubhatovaḍḍhanakesu duvidhatividhabhedānaṃyeva hi viseso. Aññe bhedā avisiṭṭhā, tathāpi paññāppabhedajananatthaṃ dhammavitakkena ñātivitakkādiniratthakavitakkanivāraṇatthaṃ imaṅca pāḷiṃ vitakkentassa dhammupasamhitapāmojjajananatthaṃ ekekassa vārassa gahitassa niyyānamukhabhāvato ca duvidhatividhabhedanānattavasena itarepi bhedā vuttāti veditabbā aññamaññāpekkhesu ekassa visesena itaresampi visiṭṭhabhāvato. Na kevalaṃ ekavidhova, atha kho duvidho ca. Na ca ekaduvidhova, atha kho tividhopi. Nāpi eka -pa- navavidhova, atha kho dasavidhopīti hi evaṅca te bhedā aññamaññāpekkhā, tasmā eko bhedo visiṭṭho attanā apekkhiyamāne, attānaṅca apekkhamāne aññabhede visesetīti tassa vasena tepi vattabataṃ arahantīti vuttāti daṭṭhabbā.

**Sattavidhenā**ti-ādayo aññappabhedanirapekkhā kevalaṃ bahuppakāratādassanatthaṃ vuttāti sabbehi tehi pakārehi “**bahuvidhena vedanākkhandhaṃ dassesī**”ti vuttaṃ. Mahāvisayo rājā viya savisaye bhagavāpi **mahāvisayatāya** appaṭihato **yathā yathā icchati, tathā tathā desetuṃ sakkoti** sabbaññūtānāvarenaññāyogatoti attho. Duke vatvā tikā vuttāti tikā dukesu pakkhittāti yuttaṃ, dukā pana kathaṃ tikesu pakkhittāti? Parato vuttepi tasmim tasmim tike apekkhakāpekkhitabbavasena dukānaṃ yojitattā.

**Kiriyamanodhātu āvajjanavasena labbhatīti** vuttaṃ, āvajjanā pana cakkhusamphassapaccayā na hoti. Na hi samānavīthiyaṃ pacchimo dhammo

purimassa koci paccayo hoti. Ye ca vadanti “āvajjanavedanāva cakkhusaṅghaṭṭanāya uppannattā evaṃ vuttā”ti, tañca na yuttam. Na hi “cakkhurūpapaṭighāto cakkhusamphasso”ti katthaci sutte vā aṭṭhakathāyaṃ vā vuttam. Yadi so ca cakkhusamphasso siyā, cakkhuviññāṇasahajātāpi vedanā cakkhusamphassapaccayāti sā idha aṭṭhakathāyaṃ na vajjetabbā siyā. Pāḷiyañca “cakkhusamphassapaccayā vedanā atthi abyākatā”ti ettha saṅgahitattā puna “cakkhusamphassajā vedanā”ti na vattabbari siyāti. Ayaṃ panetthādhippāyo—āvajjanavedanaṃ vinā cakkhusamphassassa uppatti natthīti taduppādikā sā tappayojanattā pariyāyena cakkhusamphassapaccayāti vuttum yuttāti, nippariyāyena pana cakkhusamphassassa paratova vedanā labbhanti.

**Catutimsacittuppādavasenā**ti ettha rūpārūpāvacarānaṃ aggahaṇaṃ tesam sayameva manodvārahūtattā. Sabbabhavaṅgamaṇo hi manodvāraṃ, cutipaṭisandhiyo ca tato anaññāti. Imasmim pana catuvīsatividhabhede cakkhusamphassapaccayādikusalādīnaṃ samānavīthiyaṃ labbhamānatā aṭṭhakathāyaṃ vuttā, pāḷiyaṃ pana ekūnavīsaticatuvīsatikā saṅkhipitvā āgatāti “cakkhusamphassapaccayā vedanākkhandho atthi anupādīna-anupādāniyo asaṅkiliṭṭha-asamkilesiko avitakka-avicāro”ti-ādīnā nānavīthigatānaṃ labbhamānatāya vuttattā kusalattikassapi nānavīthiyaṃ labbhamānatā yojetabbā. Aṭṭhakathāyaṃ pana samānavīthiyaṃ cakkhusamphassapaccayādikatā ekantikāti katvā ettha labbhamānatā dassitā, na pana samānavīthiyaṃ labbhamānatā paṭikkhattā. Teneva “**tāni sattavidhādīsū yattha katthaci ṭhatvā kathetuṃ vaṭṭanti**”ti āha. Na hi samānavīthiyaṃyeva upanissayakoṭisamatikkamabhāvanāhi labbhamānatā hoti. Tidhāpi ca labbhamānataṃ sandhāya “**yattha katthaci ṭhatvā kathetuṃ vaṭṭanti**”ti vuccati.

**Etānī**ti yathādassitāni kusalādīni cittāni vadati, vedanāniddesepī ca etasmim pubbaṅgamaṇassa cittassa vasena kathetuṃ sukhanti cittasambandho kato. Teneva pana cittāni sattavidhabhede tikabhūmivasena, catuvīsatividhabhede dvāratikavasena, timsavidhabhede dvārahūmivasena, bahavidhabhede dvāratikabhūmivasena dīpitānīti “**tesu**

**yattha kатhaci ṭhatvā kатhetuṃ vaṭṭanti**”ti vuttaṃ. Kusalādīnaṃ dīpanā kāmāvacarādibhūmivasena kātabbā, tā ca bhūmiyo tiṃsavidhabhede sayamevāgatā, na ca sattavidhabhede viya dvāraṃ anāmaṭṭhaṃ, atibyattā ca ettha samānāsamānavīthīsu labbhamānatāti **tiṃsavidhe -pa- sukhadīpanāni honti**”ti vuttaṃ. Kasmā pana tiṃsavidhasmiṃyeva ṭhatvā dīpayiṃsu, nanu dvāratikabhūmīnaṃ āmaṭṭhattā bahavidhabhede ṭhatvā dīpetabbānīti? Na, dīpetabbaṭṭhānātikkamato. Sattavidhabhedo hi dvārassa anāmaṭṭhattā dīpanāya aṭṭhānaṃ, catuvīsatividhabhede āmaṭṭhadvāratikā na bhūmiyo apekkhitvā ṭhapitā, tiṃsavidhabhede āmaṭṭhadvārabhūmiyo vuttā. Ye ca ṭhapitā, te cettha tikā apekkhitabarhitā kevalaṃ bhūmīhi saha dīpetabbāva. Tenedaṃ dīpanāya ṭhānaṃ, tadatikkame pana ṭhānātikkamato hotīti.

**Upanissayakoṭiyāti** ettha “saddhaṃ upanissāya dānaṃ detī”ti-ādinā<sup>1</sup> nānāvīthiyaṃ pakatūpanissayo vuttoti ekavīthiyaṃ kusalādīnaṃ cakkhusamphassādayo tadabhāve abhāvato jāti viya jarāmarañassa upanissayalesena paccayoti vuttuṃ yujjeyya, idha pana “kasiṇarūpadassanahetu-uppannā parikammādivedanā cakkhusamphassapaccayā”ti vakkhati, tasmā nānāvīthiyaṃ gatāni etāni cittāni cakkhusamphassapaccayā labbhamānānīti na upanissayaleso upanissayakoṭi, balavabalavānaṃ pana parikammādīnaṃ upanissayānaṃ sabbesaṃ ādibhūto upanissayo upanissayakoṭi. “Vālakoti na paññāyatī”ti-ādīsu viya hi ādī, avayavo vā koṭi. Kasiṇarūpadassanato pabhuti ca kāmāvacarakusalādīnaṃ vedanānaṃ upanissayo pavattoti taṃ dassanaṃ upanissayakoṭi. Parikammādīni viya vā na balava-upanissayo dassananti tassa upanissayantabhāvena upanissayakoṭitā vuttā. Ghānādidvāresu tīsu upanissayakoṭiyā labbhamānattābhāvaṃ vadanto idha samānavīthi na gahitāti dīpeti. Dassanasavanāni viya hi kasiṇaparikammādīnaṃ ghāyanādīni upanissayā na hontīti tadalābho dīpitoti. Yadipi vāyokasiṇaṃ phusitvāpi gahetabbaṃ, purimena pana savanena vinā taṃ phusanaṃ sayameva mūlupanissayo yebhuyyena na hotīti tassa upanissayakoṭitā na vuttā.

---

1. Abhi 8. 145 piṭṭhe.

Ajjhāsayaena sampattigato **ajjhāsayasampanno**, sampannajjhāsayoti vuttaṃ hoti. **Vattappaṭivattanti** khuddakañceva mahantañca vattaṃ, pubbe vā kataṃ **vattaṃ**, pacchā kataṃ **paṭivattaṃ**. **Evam cakkhuviññāṇanti** ādimhi uppannaṃ āha, tato paraṃ uppannānipi pana kasiṇarūpadassanakalyāṇamittadassanasamvegavatthudassanādīni upanissayapaccayā hontiyevāti. Tena tadupanissayaṃ cakkhuviññāṇaṃ dassetīti veditabbaṃ.

Yathābhūtasabhāvādassanaṃ **asamapekkhanā**. “Asmī”ti rūpādīsu **vinibandhassa**. Sabhāvantarāmasanavasena **parāmaṭṭhassa**, parāmaṭṭhavatoti attho. Ārammaṇādhigahaṇavasena anu anu uppajjanadhammatāya thirabhāvakilesassa **thāmagatassa**, appahīnakāmarāgādikassa vā. **Pariggahe** **ṭhitoti** vīmaṃsāya ṭhito. Ettha ca **asamapekkhanāyāti**-ādinā mohādīnaṃ kiccena pākaṭena tesaṃ uppattivaseṇa vicāraṇā daṭṭhabbā. Rūpadassanena uppannakilesasamatikkamavasena pavattā rūpadassanahetukā hotīti “**cakkhusamphassapaccayā nāma jātā**”ti āha. Ettha ca cakkhusamphassassa catubhūmikavedanāya upanissayabhāvo eva pakārantarena kathito, tathā “bhāvanāvasenā”ti ettha ca.

Kalāpasammasanena **tīṇi lakkhaṇāni āropetvā** udayabbayānupassanādīkāya **vipassanāpaṭipāṭiyā** ādimhi rūpārammaṇapariggahena rūpārammaṇaṃ sammasitvā, taṃmūlakaṃ vā sabbaṃ sammasanaṃ ādibhūte rūpārammaṇe pavattatīti katvā āha “**rūpārammaṇaṃ sammasitvā**”ti. Ettha ca nāmarūpapariggahādi sabbaṃ sammasanaṃ **bhāvanāti** veditabbā. **Rūpārammaṇaṃ sammasitvāti** ca yathāvuttacakkhuviññāṇassa ārammaṇabhūtaṃ rūpārammaṇaṃ vuttaṃ, na yaṃ kiñci. Ārammaṇena hi cakkhusamphassaṃ dassetīti. **Evam** “rūpārammaṇe uppannaṃ kilesaṃ”ti etthāpi veditabbaṃ.

**Idaṃ phoṭṭhabbaṃ kiṃmissanti** cakkhudvāre viya yojanāya yathāsambhavaṃ āpodhātuyā aññamaññassa ca vasena mahābhūtanissitatā yojetabbā.

**Jāti -pa- balavapaccayo hotīti** yathāvuttānaṃ bhayato dissamānānaṃ jāti-ādināṃ balavapaccayabhāvena tesaṃ bhayato dassanena saha-jātassa manosamphassassa, tassa vā dassanassa dvārabhūtaṃ bhavaṅgamanosamphassassa balavapaccayabhāvaṃ dasseti.

**Dhammārammaṇeti** na pubbe vutte jāti-ādi-ārammaṇeva, atha kho sabbasmim̃ rāgādivatthubhūte dhammārammaṇe. **Vatthunissitanti** ettha vedanādisaṅkhātassa dhammārammaṇekadesassa pariggahamukhena dhammārammaṇapariggahaṃ dasseti.

**Manosamphassoti** viññāṇaṃ samphassassa kāraṇabhāvena gahitaṃ, tadeva attano phalasseva phalabhāvena vattuṃ na yuttaṃ kāraṇaphalasaṅkarabhāvena sotūnaṃ sammohajanakattāti āha “**na hi sakkā viññāṇaṃ manosamphassajanti niddisituṃ**”ti, na pana viññāṇassa manosamphassena saha jātabhāvassa abhāvā. Yasmā vā yathā “tiṇṇaṃ saṅgati phasso”ti<sup>1</sup> vacanato indriyavisayā viya viññāṇampi phassassa visesapaccayo, na tathā phasso viññāṇassa, tasmā indriyavisayā viya viññāṇampi cakkhusamphassajādivacanaṃ na arahatīti cakkhusamphassajādibhāvo na katoti veditabbo.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

150. Cittuppādarūpavasena taṃ taṃ samudāyaṃ ekekaṃ dhammaṃ katvā “**pañcapaṇṇāsa kāmāvacaradhamme**”ti āha. **Rajjantassāti-ādīsu** rāgādayo chasu dvāresu silādayo ca pañca saṃvarā yathāsambhavaṃ yojetabbā, sammasanaṃ pana manodvāre eva. Rūpārūpāvacaradhammesu abhijjhādomanassādi-uppatti atthīti tato satisaṃvaro ñāṇavīriyasamvarā ca yathāyogaṃ yojetabbā. Pariggahavacanena sammasanapaccavekkhaṇāni saṅgaṇhāti. **Teyevāti** cattāro khandhā vuttā.

Samāne desitabbe desanāmettassa parivaṭṭanaṃ **parivaṭṭo**. Tīsupi parivaṭṭesu katthaci kiñci ūnaṃ adhikaṃ vā natthīti katvā āha “**ekova paricchedo**”ti.

Khandhavibhaṅgavaṇṇanā niṭṭhitā.

---

1. Ma 1. 158; Ma 3. 328, 332, 333; Saṃ 2. 261 piṭṭhesu.



## 2. Āyatanavibhaṅga

### 1. Suttantabhājanīyavaṇṇanā

15. **Visesatoti** āyatana-saddattho viya asādhāraṇato cakkhādisaddatthatoti attho. **Assādeti**ti cakkhati-saddo “madhum cakkhati byañjanaṃ cakkhati”ti rasasāyanattho atthīti tassa vasena atthaṃ vadati. “Cakkhum kho māgaṇḍiya rūpārāmaṃ rūparataṃ rūpasammuditan”<sup>1</sup>ti vacanato cakkhu rūpaṃ assādeti. Satipi sotādināṃ saddārammaṇādiratibhāve niruḷhattā cakkhumhiyeva cakkhu-saddo pavattati padumādīsu paṅkajādisaddā viyāti daṭṭhabbaṃ. **Vibhāveti cāti** saddalakkhaṇasiddhassa cakkhati-saddassa vasena atthaṃ vadati. Cakkhatīti hi ācikkhati, abhibyattaṃ vadatīti attho. Nayanassa ca vadantassa viya samavisamavibhāvanameva ācikkhananti katvā āha “**vibhāveti cāti attho**”ti. Anekatthattā vā dhātūnaṃ vibhāvanatthattā cakkhusaddassa daṭṭhabbā. Rattaduṭṭhādikālesu kakaṇṭakarūpaṃ viya uddarūpaṃ viya ca **vaṇṇavikāraṃ āpajjamānaṃ** rūpaṃ **hadayaṅgatabhāvaṃ rūpayati** rūpamiva pakāsaṃ karoti, saviggahamiva katvā dassetīti attho. Vitthāraṇaṃ vā rūpa-saddassa attho, vitthāraṇaṅca pakāsanamevāti āha “**pakāseti**”ti. Anekatthattā vā dhātūnaṃ pakāsanatthoyeva rūpasaddo daṭṭhabbo, vaṇṇavācākassa rūpa-saddassa **rūpayatīti** nibbacanaṃ, rūpavācākassa rūppatīti ayaṃ viseso.

**Udāharīyatīti** vuccatīti atthe vacanameva gahitaṃ siyā, na ca vacanasaddoyeva ettha saddo, atha kho sabbopi sotaviññeyyoti **sappatīti** sakehi paccayehi sappīyati sotaviññeyyabhāvaṃ gamīyatīti attho. **Sūcayatīti** attano vatthum gandhavasena apākaṭaṃ “idaṃ sugandhaṃ duggandhan”ti pakāseti, paṭicchannaṃ vā pupphādivatthum “ettha pupphaṃ atthi campakādi, phalamatthi ambādī”ti pesuññaṃ karontaṃ viya hotīti attho. Rasaggahaṇamūlakattā āhārajjhoharaṇassa jīvitahetumhi āhārarase ninnatāya **jīvitaṃ avhāyatīti** jivhā vuttā nirutilakkaṇena. **Kucchitānaṃ sāsavadhammānaṃ āyoti** visesena **kāyo** vutto anuttariyahetubhāvaṃ anāgacchantesu kāmarāganidānakammajānitesu kāmarāgassa ca

---

1. Ma 2. 171 piṭṭhe.

visesapaccayesu ghānajivhākāyesu kāyassa visesatarasāsavapaccayattā. Tena hi phoṭṭhabbam assādentā sattā methunampi sevanti. **Uppattidesoti** uppattikāraṇanti attho. Kāyindriyavatthukā vā cattāro khandhā balavakāmāsavādihetubhāvato visesena “**sāsavā**”ti vuttā, tesam uppajjanaṭṭhānanti attho. **Attano lakkhaṇam dhārayantīti** ye visesalakkhaṇena āyatanasaddaparā vattabbā, te cakkhādayo tathā vuttāti aññe manogocarabhūtā dhammā sāmāññalakkhaṇeneva ekāyatanattam upanetvā vuttā. Oḷārikavatthārammaṇamananasāṅkhātehi visayavisayibhāvehi purimāni pākāṇāntī tathā apākāṭā ca aññe manogocarā na attano sabhāvaṃ na dhārentīti imassatthassa dīpanattho dhamma-saddoti.

**Vāyamantīti** attano kiccaṃ karonticceva attho. Imasmiñca atthe āyatanti etthāti āyatananti adhikaraṇattho āyatana-saddo, dutiyatatiyesu kattu-attho. **Te cāti** cittacetāsikadhamme. Te hi taṃtaṃdvārārammaṇesu āyanti āgacchanti pavattantīti **āyāti**. **Vitthārentīti** pubbe anuppannattā līnāni apākāṭāni pubbantato uddham pasārenti pākāṭāni karonti uppādentīti attho.

Ruḷhīvasena āyatana-saddassattham vattum “**apicā**”ti-ādi āradham. **Tamnisittattāti** ettha mano manoviññāṇādīnam cittacetāsikānam nissayapaccayo na hotīti tassa nesam dvārābhāvo nissayabhāvoti daṭṭhabbo. **Atthatoti** vacanatthato, na vacanīyatthato. Vacanattho hettha vutto “cakkhatī”ti-ādinā, na vacanīyattho “yam cakkhu catunnam mahābhūtānam upādāya pasādo”ti-ādinā<sup>1</sup> viyāti.

**Tāvatvatoti** anūnādhikabhāvaṃ dasseti. Tattha dvādasāyatanaavinimuttassa kassaci dhammassa abhāvā adhikabhāvato codanā natthi, salakkhaṇadhāraṇam pana sabbesam sāmāññalakkhaṇanti ūnacodanā sambhavatīti dassento āha “**cakkhādayopi hi**”ti-ādi. **Asādhāraṇanti** cakkhuvīññāṇādīnam asādhāraṇam. Satipi asādhāraṇārammaṇabhāve cakkhādīnam dvārābhāvena gahitattā dhammāyatane aggahaṇam daṭṭhabbam. Dvārārammaṇabhāvehi vā asādhāraṇattam sandhāya “**asādhāraṇan**”ti vuttam.

---

1. Abhi 1. 157 piṭṭhe.

Yebhuyyasahuppatti-ādīhi uppattikkamādi-ayutti yojetabbā.  
**Ajjhattikesu** hīti etena ajjhattikabhāvena visayibhāvena ca ajjhattikānaṃ paṭhamam desetabbatam dasseti. Tesu hi paṭhamam desetabbesu pākaṭattā paṭhamataram cakkhāyatanam desitanti. **Tato ghanāyatanādīnīti** ettha bahūpakārattābhāvena cakkhusotehi purimataram adesetabbāni saha vattum asakkuṇeyyattā ekena kamena desetabbānīti ghānādikkamena desitānīti adhippāyo. Aññathāpi hi desitesu na na sakkā codetum<sup>1</sup>, na ca sakkā sodhetabbāni<sup>2</sup> na desetunti. Gocarō visayo etassāti **gocaravisayo**, mano. Kassa pana gocarō etassa visayoti? Cakkhādīnam pañcannampi.  
**Viññāṇuppattikāraṇavavathānatoti** etena ca cakkhādi-anantaram rūpādivacanassa kāraṇamāha.

**Paccayabhedo** kammādibhedo. Nirayādiko apadādigatinānākaraṇaṇca **gatibhedo**. Hatthi-assādiko khattiyādiko ca **nikāyabhedo**. Taṃtaṃsattasantānabhedo **puggalabhedo**. Yā ca cakkhādīnam vatthūnam anantabhedatā vuttā, soyeva hadayavatthussa ca bhedo hoti. Tato manāyatanassa anantappabhedatā yojetabbā dukkhāpaṭipadādito ārammaṇādhipati-ādibhedato ca. Imasmim sattantabhājanīye vipassanā vuttāti vipassanupagamanaṇca viññāṇam gahetvā ekāsītibhedatā manāyatanassa vuttā niddesavasena. Nīlam nīlasseva **sabhāgam**, aññam **visabhāgam**, evam kusalasamuṭṭhānādibhedesu yojetabbam.  
**Tebhūmakadhammārammaṇavasenāti** pubbe vuttam cakkhādivajjam dhammārammaṇam sandhāya vuttam.

Saparipphandakiriyāvasena ihanam **ihā**. Cintanasena byāpāraṇam **byāpāro**. Tattha byāpāram dassento āha “**na hi cakkhu rūpādīnam evam hoti**”ti. Iham dassento āha “**na ca tāni**”ti-ādi. Ubhayampi pana ihā ca hoti byāpāro cāti uppaṭipāṭivacanam. **Dhammatāvāti** sabhāvova, kāraṇasamatthatā vā. Ihābyāpārarahitānam dvārādibhāvo **dhammatā**. Imasmiṇca atthe **yanti** etassa yasmāti attho. Purimasim sambhavanavisesanam yam-saddo. “Suñño gāmoti kho bhikkhave channetaṃ ajjhattikānam āyatanānam adhivacanan”ti<sup>3</sup> vacanato **suññagāmo viya daṭṭhabbāni**.

1. Bodhetum (?)

2. Bodhetabbāni (?)

3. Saṃ 2. 383 piṭṭhe.

Annapanāsamohitanti gahite suññagāme yaññadeva bhājanam parāmasīyati, tam tam rittakamyeva parāmasīyati, evam dhuvādibhāvena gahitāni upaparikkhiyamānāni rittakāneva etāni dissantīti. Cakkhādiddvāresu abhijjhādomanassuppādakabhāvena rūpādīni cakkhādīnam **abhighātakānī** vuttāni. Ahisusumārapakkhikukkurasiṅgālamakkaṭā **cha pāṇakā**. Visamabilākāsagāmasusānavanāni **tesam gocarā**. Tattha visamādi-  
ajjhāsayehi cakkhādīhi  
visamabhāvabilākāsagāmasusānasannissitasadisupādinnadhammavanabhāve hi abhiramitattā rūpādīnampi visamādisadisatā yojetabbā.

**Hutvā abhāvattāthenāti** idam itaresam catunnam ākārānam saṅghakattā visum vuttam. Hutvā abhāvākāro eva hi uppādavayattākārādayoti. Tattha **hutvāti** etena purimantavivittatāpubbakam majjhe vijjamānataṃ dasseti, tam vatvā **abhāvavacanena** majjhe vijjamānatāpubbakam, aparante avijjamānataṃ, ubhayenapi sadā abhāvo aniccalakkhaṇanti dasseti. Sabhāvavijahanam **vipariṇāmo**, jarābhaṅgehi vā parivattanam, santānavikārāpatti vā. Sadā abhāvepi ciraṭṭhānam siyāti tamnivāraṇattham **“tāvakālikato”**ti āha. Uppādavayaññathattarahitam **niccam**, na itarathāti **niccapaṭikkhepato aniccam**, niccapaṭipakkhatoti adhippāyo.

Jātidhammatādīhi anīṭṭhatā **paṭipīlanam**. **Paṭipīlanattāthenāti** ca yassa tam pavattati, tam puggalam paṭipīlanato, sayam vā jarādīhi paṭipīlanattāti attho. Parittaṭṭhitikassapi attano vijjamānakkhaṇe uppādādīhi abhiṇham sampāṭipīlanattā **“abhiṇhasampāṭipīlanato”**ti purimam sāmāññalakkhaṇam visesetvā vadati, puggalassa pīlanato **dukkhamam**. Sukhapaṭipakkhabhāvato dukkham sukham paṭikkhipati nivāreti, dukkhavacanam vā atthato sukham paṭikkhipatīti āha **“sukhapaṭikkhepato”**ti.

Natthi etassa vasavattanako, nāpi idam vasavattanakanti avasavattanakam, attano parasmim parassa ca attani vasavattanabhāvo vā vasavattanakam, tam etassa natthīti avasavattanakam, avasavattanakassa, avasavattanako vā attho sabhāvo **avasavattanakaṭṭho**, idaṅca sāmāññalakkhaṇam. **Tenāti** parassa attani **vasavattanākārena suññam**. Imasmiṅca atthe **suññatoti** etasseva visesanam **“assāmikato”**ti. Atha vā

“yasmā vā etaṃ -pa- mā pāpuṇātū”ti evaṃ cintayamānassa kassaci tīsu ṭhānesu vasavattanabhāvo natti, suññaṃ taṃ **tena** attanoyeva **vasavattanākārenā**ti attho. Na idaṃ kassaci kāmakāriyaṃ, nāpi etassa kiñci kāmakāriyaṃ atthīti **akāmakāriyaṃ**. Etena avasavattanattham viresetvā dassati.

**Vibhavagati** vināsagamanam. Santatiyaṃ bhavantaruppattiyeva **bhavasāṅkantiagamanam**. Santatiyā yathāpavattākāravijahanam **pakatibhāvavijahanam**. “Cakkhu anicca”ti vutte cakkhu-anicca-saddānam ekatthattā aniccānam sesadhammānampi cakkhubhāvo āpajjatīti etissā codanāya nivāraṇattham visesasāmaññalakkhaṇavācakanāṅca saddānam ekadesasamudāyabodhanavisesam dīpetum **“apicā”**ti-ādimāha.

**Kiṃ dassitanti** vipassanācāram kathentena kiṃ lakkhaṇam dassitanti adhippāyo. “Katamā cānanda anattasaññā? Idhānanda bhikkhu arañṇagato vā rukkhamūlagato vā suñṇāgāragato vā iti paṭisañcikkhati ‘cakkhu anattā’ti -pa- ‘dhammā anattā’ti. Iti imesu chasu ajjhattikabāhiresu āyatanesu anattānupassī viharatī”ti<sup>1</sup> avisesesu āyatanesu anattānupassanā vuttāti kāraṇabhūtānam cakkhādīnam, phalabhūtānaṅca cakkhuviññāṇādīnam kāraṇaphalamattatāya anattatāya anattalakkhaṇavibhāvanatthāya āyanadesanāti āha **“dvādasannaṃ -pa- anattalakkhaṇaṃ”**ti. Yadi pi aniccadukkhakkhaṇāni ettha dassitāni, tehi ca anattalakkhaṇameva visesena dassitanti adhippāyo. **Veti cāti** ettha **iti**-saddo samāpanattho. **Iccassāti** ettha **iti**-saddo yathāsamāpitassa āropetabbadosassa nidassanattho. **Evanti** “cakkhu attā”ti evaṃ vāde satīti attho. **Iccassāti** vā **iti**-saddo “iti vadantassā”ti paravādissa dosalakkhaṇākāranidassanattho. **Evanti** dosagamanappakāranidassanattho. Rūpe attani “evaṃ me rūpaṃ hotū”ti attaniye viya sāmīniddesāpattīti ce? Na, “mama attā”ti gahitattā. “Mama attā”ti hi gahitaṃ rūpaṃ vasavattitāya “evaṃ me hotū”ti icchiyamānaṅca tatheva bhaveyya, icchatopi hi tassa rūpasāṅkhāto attā avasavatti cāti. **Ābādhāyāti** evaṃ dukkhena.

---

1. Am 3. 343 piṭṭhe.

**Paññāpananti** paresaṃ ñāpanaṃ. Anattalakkhaṇapaññāpanassa aññesaṃ avisayatā anattalakkhaṇadīpakānaṃ aniccadukkhalakkhaṇānaṃ ca paññāpanassa avisayatā dassitā hoti.

Evam pana duppaññāpanatā etesaṃ durūpaṭṭhānatāya hotīti tesam anupaṭṭhahanakāraṇaṃ pucchanto āha “**imāni panā**”ti-ādi. Ṭhānādīsu nīrantaraṃ pavattamānassa heṭṭhā vuttassa **abhiṇhasampañipīlanassa**. Dhātumattatāya cakkhādīnaṃ samūhato vinibbhujjanaṃ **nānādhātuvinibbhogo**. **Ghanenāti** cattāripi ghanāni ghanabhāvena ekattaṃ upanetvā vadati. Paññāyeva santativikopanāti daṭṭhabbaṃ. **Yāthāvasarasatoti** aviparītasabhāvato. Sabhāvo hi rasiyamāno aviraddhapaṭivedhena assādiyamāno “**raso**”ti vuccati. Aniccādīhi aniccalakkhaṇādīnaṃ aññattha vacanaṃ rupanādivasena pavattarūpādiggahaṇato viṣiṭṭhassa aniccādiggahaṇassa sabbhāvā. Na hi nāmarūpaparicchedamattena kiccāsiddhi hoti, aniccādayo ca rūpādīnaṃ ākāraṃ daṭṭhabbā. Te panākārā paramatthato avijjamānā rūpādīnaṃ ākāramattāyevāti katvā **aṭṭhasālīniyam**<sup>1</sup> lakkhaṇārammaṇīkavipassanāya khandhārammaṇatā vuttāti adhippāyamatte ṭhātuṃ yuttaṃ, nātidhāvituṃ. “Aniccan”ti ca gaṇhanto “dukkhaṃ anattā”ti na gaṇhāti, tathā dukkhādiggahaṇe itarassāgahaṇaṃ. Aniccādiggahaṇāni ca niccasaññādinivattanakāni saddhāsamādhipaññindriyādhikāni tividhavamokkhamukhabhūtāni. Tasmā etesaṃ ākāraṇaṃ pariggayhamānānaṃ aññamaññaṃ viśeso ca atthīti tīṇi lakkhaṇāni vuttāni.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

167. Nāmarūpaparicchedakathā abhidhammakathāti suttante viya paccayayugaḷavasena akathetvā ajjhattikabāhiravasena abhiññeyyāni āyatanāni abbokārato abhidhammabhājanīye kathitāni. **Āgammāti** sabbasaṅkhārehi nibbindassa viśaṅkhāraninnassa gotrabhunā vivatṭitamānasassa maggena sacchikaraṇenāti attho. Sacchikiriyamānañhi taṃ adhigantvā

1. Abhi-Ṭṭha 1. 270 piṭṭhe.

ārammaṇapaccayabhūtañca paṭicca adhipatipaccayabhūte ca tamhi paramassāsabhāvena vinimuttasaṅkhārassa ca gatibhāvena patiṭṭhānabhūte patiṭṭhāya khayasaṅkhāto maggo rāgādayo khepetūti taṃsacchikaraṇābhāve rāgādīnaṃ anuppattinirodhagamanābhāvā “**taṃ āgamma rāgādayo khīyanti**”ti vuttaṃ. **Suttato muñcitvā**ti suttapadāni muñcitvā. Añño suttassa attho “mātaram pitaram hantvā”ti-ādīsu<sup>1</sup> viya āharitabbo, natthi suttapadeheva nīto atthoti attho.

**Ekam nānanti** cuṇṇitaṃ, khuddakaṃ vā karaṇaṃ **cuṇṇikaraṇanti** abahumānena vadati. **Na tvaṃ ekam nānaṃ jānāsīti** kiṃ ettakaṃ tvameva na jānāsīti attho. **Nanu nātetī** “yadipi pubbe na nātaṃ, adhunāpi nāte nanu sādhu hotī”ti attano jānanaṃ paṭicchādetvā vikkhepaṃ karontaṃ nibandhati. **Vibhajitvā**ti akkharatthamatte aṭṭhatvā līnaṃ atthaṃ vibhajitvā uddharitvā nīharitvā kathitanti attho. **Rāgādīnaṃ khayō** nāma abhāvamatto, na ca abhāvassa bahubhāvo atthi attano abhāvattāti vadantassa vacanapacchindanatthaṃ pucchati “**rāgakkhayō nāma rāgasseva khayō**”ti-ādi. Yadi hi rāgakkhayō dosādīnaṃ khayō na hoti, dosakkhayādayo ca rāgādīnaṃ khayā, aññamaññavisitṭhā bhinnā āpannā hontīti bahuniḃbānatā āpannā eva hoti, aññamaññaviseso ca nāma nissabhāvassa natthīti sasabhāvataṃ ca nibbānassa. **Nava taṇhāmūlakā** “taṇhaṃ paṭicca pariyesanā”ti<sup>2</sup> ādayo, tesu pariyesanādayo ca pariyesanādikarakilesā daṭṭhabbā. **Diyaḍḍhakilesasahassaṃ** nidānakathāyaṃ vuttaṃ.

**Oḷārikatāya kāretabboti** atisukhumassa nibbānassa oḷārikabhāvadosāpattiyā bodhetabbo, niggaḥetabbo vā. **Vatthunti** upādinnakaphoṭṭhabbaṃ methunaṃ. Acchādīnampi nibbānappatti kasmā vuttā, nanu “kilesānaṃ accantaṃ anuppattinirodho nibbānaṃ”ti icchantassa kilesānaṃ vināso kañci kālāṃ appavatti nibbānaṃ na hotīti? Na, abhāvasāmaññato. Accantāpavatti hi kañci kālāñca appavatti abhāvoyevāti natthi viseso. Savisesaṃ vā vadantassa abhāvataṃ āpajjatīti. Tiracchānagatehipi pāpuṇitabbattā tesampi pākaṭaṃ piḷandhanaṃ viya oḷārikaṃ thūlaṃ. Kevalaṃ pana kaṇṇe piḷandhituṃ na sakkoti, piḷandhanatopi vā thūlattā na sakkāti uppaḍḍento viya niggaṇhāti.

1. Khu 1. 55 piṭṭhe Dhammapade.

2. Dī 2. 50; Dī 3. 253; Aṃ 3. 201; Abhi 2. 404 piṭṭhesu.

Nibbānārammaṇakaraṇena gotrabhukkhāṇe kilesakkhayappatti paṇassa āpaṇnāti maññamāno āha “**tvam̐ akhīṇesuyevā**”ti-ādi. Nanu ārammaṇakaraṇamattena kilesakkhayo anuppattoti na sakkā vuttum̐. Cittañhi atītānāgatādisabbaṃ ālambeti, na nipphannamevāti gotrabhupi maggena kilesānaṃ yā anuppattidhammatā kātabbā, taṃ ārabba pavattissatīti? Na, appattanibbānassa nibbānārammaṇaññābhāvato. Na hi aññadhammā viya nibbānaṃ, taṃ pana atigambhīrattā appattena ālambitum̐ na sakkā. Tasmā tena gotrabhunā pattabbena tikālikasabhāvātikkantagambhīrabhāvena bhavitabbaṃ, kilesakkhayamattataṃ vā icchato gotrabhuto puretaraṃ nipphanena kilesakkhayena. Tenāha “**tvam̐ akhīṇesuyeva kilesesu kilesakkhayam̐ nibbānaṃ paññapesī**”ti. Appattakilesakkhayārammaṇakaraṇe hi sati gotrabhuto puretaracittānipi ālambeyyunti.

**Magassa kilesakkhayam̐ nibbānanti** maggassa ārammaṇabhūtaṃ nibbānaṃ katamanti attho. **Maggoti-**ādinā purimapucchādvayameva vivarati.

**Na ca kiñcīti** rūpādīsu nibbānaṃ kiñci na hoti, na ca kadāci hoti, atītādibhāvena na vattabbanti vadanti, taṃ āgamma avijjātaṇhānaṃ kiñci ekadesamattampi na hoti, tadeva taṃ āgamma kadāci na ca hotīti attho yutto.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

168. **Na -pa-** navattabbadhammārammaṇattāti yathā sārammaṇā parittādibhāvena navattabbaṃ kiñci ārammaṇaṃ karonti, evaṃ kiñci ālambanato na navattabbakoṭṭhāsaṃ bhajatīti attho.

Āyatanavibhaṅgavaṇṇanā niṭṭhitā.



### 3. Dhātuvibhaṅga

#### 1. Suttantabhājanīyavaṇṇanā

172. Yadi pi dhātusaṃyuttādīsu “dhātunānattam vo bhikkhave desessāmi, katamañca bhikkhave dhātunānattam? Cakkhudhātu -pa-manoviññāṇadhātū”ti-ādinā<sup>1</sup> aṭṭhārasa dhātuyo āgatā, tā pana abhidhamme ca āgatāti sādharmaṇattā aggahetvā suttantesveva āgate tayo dhātuchakke gahetvā suttantabhājanīyaṃ vibhattanti veditabbaṃ. **Sabbā dhātuyoti** aṭṭhārasapi. Suññe sabhāvamatte niruḷho **dhātu**-saddo daṭṭhabbo. **Asamphuṭṭhadhātū**ti catūhi mahābhūtehi abyāpitabhāvoti attho.

173. **Pathavīdhātudvayanti** aṭṭhakathāyaṃ paduddhāro kato, pāḷiyaṃ pana “dveyan”ti āgacchati, attho pana yathāvuttova. **Dvayanti** pana pāṭhe sati ayampi attho sambhavati. Dve avayavā etassāti dvayaṃ, pathavīdhātūnaṃ dvayaṃ **pathavīdhātudvayaṃ**, dvinnaṃ pathavīdhātūnaṃ samudāyoti attho. Dve eva vā avayavā samuditā dvayaṃ, **pathavīdhātudvayanti**. “Tattha katamā pathavīdhātu? Pathavīdhātudvayaṃ, esā pathavīdhātū”ti saṅkhepena vissajjeti. **Atthi ajjhattikā atthi bāhirā**ti ettha **ajjhattikabāhira**-saddā na ajjhattikaduke viya ajjhattikabāhirāyatanavācakā, nāpi ajjhattattike vuttehi ajjhattabahiddhā-saddehi samānatthā, indriyabaddhānindriyabaddhavācakā pana ete. Tena “**sattasantānapariyāpannā**”ti-ādi vuttaṃ. **Niyakajjhattā**ti ca na paccattaṃ attani jātataṃ sandhāya vuttaṃ, atha kho sabbasattasantānesu jātataṃ daṭṭhabbaṃ. **Ajjhattaṃ paccattanti** vacanena hi sattasantānapariyāpannatāya ajjhattikabhāvaṃ dasseti, na pāṭipuggalikatāya. **Sabhāvākāratoti** āpādīhi visiṭṭhena attano eva sabhāvabhūtena gahetabbākārena.

**Kesā kakkhaḷattalakkhaṇā**ti kakkhaḷatādhikatāya vuttā. **Pāṭiyekko koṭṭhāsoti** pathavīkoṭṭhāsamatto suññoti attho. Matthaluṅgaṃ aṭṭhimiñjaggahaṇena gahitanti idha visuṃ na vuttanti veditabbaṃ.

**Imināti** “seyyathidaṃ kesā”ti-ādinā. **Kammaṃ katvāti** payogaṃ vīriyaṃ āyūhanaṃ vā katvāti attho. Bhogakāmena kasiyādīsu viya arahattakāmena ca imasmiṃ manasikāre kammaṃ kattabbanti. **Pubbapalibodhāti** āvāsādayo dīghakesādike khuddakapalibodhe aparapalibodhāti apekkhitvā vuttā.

Vaṇṇādīnaṃ pañcannaṃ vasena manasikāro dhātupaṭṭikūlavaṇṇamanasikārānaṃ sādharmaṇo pubbhāgoti nibbattitadhātumanasikāraṃ dassetuṃ “**avasāne evaṃ manasikāro pavattetabbo**”ti āha. **Aññamaññaṃ ābhogapaccavekkhaṇarahitāti** kāraṇassa ca phalassa ca abyāpāratāya dhātumattataṃ dasseti. **Ābhogapaccavekkhaṇādīnampi** evameva abyāpāratā daṭṭhabbā. Na hi tāni, tesaṃ kāraṇāni ābhujitvā paccavekkhitvā ca uppajjanti karonti cāti. **Lakkhaṇavasenāti** “kakkhaḷaṃ kharigatan”ti-ādivacanaṃ sandhāya vuttaṃ.

**Vekantakaṃ** ekā lohajāti. **Nāganāsikalohaṃ** lohasadisam lohavijāti haliddivijāti viya. Tiputambādīhi missetvā kataṃ karaṇena nibbattattā **kittimalohaṃ**. **Morakkhādīni** evaṃnāmānevetāni. **Sāmuḍḍikamuttāti** nidassanamattametaṃ, sabbāpi pana muttā muttā eva.

174. Appetīti **āpo**, ābandhanavasena sesabhūtatayaṃ pāpuṇāti silesatīti attho. **Yūsbhūtoti** rasabhūto. **Vakkahadayayakanapapphāsāni tementanti** ettha yakanam heṭṭhābhāgapūraṇena, itarāni tesam upari thokam thokam paggharaṇena temeti. **Heṭṭhā leḍḍukhaṇḍāni temayamāneti** temakatemitabbānaṃ abyāpārasāmaññanidassanatthāyeva upamā daṭṭhabbā, na ṭhānasāmaññanidassanatthāya. Sannicalohitena temetabbānaṃ kesaṃci heṭṭhā, kassaci upari. **Ṭhitatañhi** satipaṭṭhānavibhaṅge vakkhatīti, yakanassa heṭṭhābhāgo “ṭhitaṃ mayi lohitaṃ”ti na jānāti, vakkādīni “amhe temayamānaṃ lohitaṃ ṭhitaṃ”ti na jānantīti evaṃ yojanā kātabbā. Yathā pana bhesajjasikkhāpade niyamo atthi “yesam māmsam kappati, tesam khīraṃ”ti, evamidha natthi.

175. **Tejanavasenāti** nisitabhāvena tikkhabhāvena. Sarīrassa pakatim atikkamitvā uṇhabhāvo **santāpo**, sarīradahanavasena

pavatto mahādāho **paridāho**. Ayametesam viseso. **Yena jīriyatīti** ekāhikādi jararogena jīriyatītipi attho yujjati. Satavāraṃ tāpetvā udake pakkhipitvā uddhaṭasappi **satadhotasappīti** vadanti. Rasasoṇitamedamaṃsanhāru-aṭṭhi-aṭṭhimiñjā **rasādayo**. Keci nhāruṃ apantvā sukkaṃ sattamadhātuṃ avocunti. **Pākatikoti** khobhaṃ appatto sadā vijjamāno. **Petaggi** mukhato bahi niggatova idha gahito.

176. **Vāyanavasenāti** savegagamanavasena, samudīraṇavasena vā.

177. **Iminā yasmim ākāse -pa- taṃ kathitanti** idaṃ kasiṇugghāṭimākāsassa akathitaṃ, ajaṭākāsassa ca kathitaṃ dassetuṃ vuttaṃ.

179. Sukhadukkhānaṃ pharaṇabhāvo sarīraṭṭhaka-utussa sukhadukkhaphoṭṭhabbasamuṭṭhānapaccayabhāvena yathābalaṃ sarīrekadesasakalasarīrapharaṇasamatthatāya vutto, somanassadomanassānaṃ iṭṭhāniṭṭhacittajasamuṭṭhāpanena tatheva pharaṇasamatthatāya. Evaṃ etesaṃ sarīrapharaṇatāya ekassa ṭhānaṃ itaraṃ paharati, itarassa ca aññanti aññamaññena sappāṭipakkhataṃ dasseti, aññamaññapaṭipakkha-oḷārikappavatti eva vā etesaṃ pharaṇaṃ. Vatthārammaṇāni ca pabandhena pavattihetubhūtāni pharaṇaṭṭhānaṃ daṭṭhabbaṃ, ubhayavato ca puggalassa vasena ayaṃ sappāṭipakkhatā dassitā sukhadassanīyattā.

181. **Kilesakāmaṃ sandhāyāti** “saṅkappo kāmo rāgo kāmo”ti<sup>1</sup> ettha vuttaṃ saṅkappaṃ sandhāyāti adhippāyo. Sopi hi vibādhati upatāpeti cāti kilesasanthavasambhavato kilesakāmo vibhatto kilesavatthusambhavato vā. **Kāmapaṭisaṃyuttāti** kāmarāgasāṅkhātena kāmena sampayuttā, kāmapaṭibaddhā vā. Aññesu ca kāmapaṭisaṃyuttadhammesu vijjamānesu vitakkeyeva kāmopapado dhātusaddo niruḷho veditabbo vitakkassa kāmapasaṅgappavattiyā sātisayattā. Esa nayo **byāpādadhātu-ādīsu**. Parassa attano ca dukkhāyanaṃ **vihimsā**. **Vihimsantīti** hantuṃ icchanti.

182. Ubhayattha uppannopi abhijjhāsaṃyogena kamma pathajananato anabhijjhākamma pathabhindanato ca kāmavitakko “**kamma pathabhedo**”ti

1. Khu 7. 2; Khu 8. 36 piṭṭhesu.

vutto. **Byāpādo panāti** byāpādavacanena byāpādavittakkaṃ dasseti. So hi byāpādadhātūti. Tathā vihiṃsāya vihiṃsādhātuyā ca byāpādavāsena yathāsambhavaṃ pāṇātipātādivasena ca kammaṭṭhabhedo yojetabbo.

**Etthāti** dvīsu tikesu. Sabbakāmāvacarasabbakusalasaṅgāhakehi itare dve dve saṅgahetvā kathanāṃ **sabbasaṅgāhikakathā**. **Etthāti** pana etasmiṃ chakketi vuccamāne kāmādhātuvacanena kāmāvacarānaṃ nekkhammadhātu-ādīnaṃ gahaṇaṃ āpajjati.

**Labhāpetabbāti** cakkhudhātādībhāvaṃ labhamānā dhammā nīharitvā dassanena labhāpetabbā. Carati etthāti cāro, kiṃ carati? Sammasanaṃ, sammasanassa cāro **sammasana-cāro**, tebhūmakadhammānaṃ adhivacanāṃ.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

183. **Cakkhussāti** visesakāraṇaṃ asādhāraṇasāmbhāvena niddiṭṭhaṃ. Tañhi puggalantarāsādhāraṇaṃ nīlādisabbarūpasādhāraṇaṃ. **Vidahatīti** evaṃ evaṃca tayā pavattitabbanti viniyujjamānaṃ viya uppādetīti attho. **Vidahatīti** ca dhātu-attho eva viṣiṭṭho upasaggena dīpitoti vināpi upasaggena dhātūti eso saddo tamatthaṃ vadatīti daṭṭhabbo. Kattukammabhāvakaṇṇa-adhikāraṇesu dhātupadasiddhi hotīti pañcapi ete atthā vuttā. **Suvaṇṇarajatādīdhātuyo** suvaṇṇādīnaṃ bījabhūtā selādayo.

**Attano sabhāvaṃ dhārentīti dhātuyoti** etthāpi dhātīti dhātūti padasiddhi veditabbā. Dhātu-saddo eva hi dhāraṇatthopi hotīti. Kattu-atthopi cāyaṃ purimena asadisoti nissattasabhāvamattadhāraṇaṃca dhātu-saddassa padhāno atthoti visuṃ vutto. **Dhātuyo viya dhātuyoti** ettha sīha-saddo viya kesarimhi niruḷho purisesu, selāvayavesu niruḷho dhātu-saddo ca cakkhādīsu upacarito daṭṭhabbo. Nāṇaṃca ñeyyaṃca ñāṇaṇeyyāni, tesāṃ avayavā tappabhedabhūtā dhātuyo **ñāṇaṇeyyāvayavā**. Tattha ñāṇappabhedā dhammadhātu-ekadeso, ñeyyappabhedā aṭṭhārasāpīti ñāṇaṇeyyāvayavamattā

dhātuyo honti. Atha vā nāṇena nātabbo sabhāvo dhātusaddena vuccamāno aviparītato nāṇaṇeyyo, na diṭṭhi-ādīhi viparītaggāhakehi ñeyyoti attho. Tassa nāṇaṇeyyassa avayavā cakkhādayo. Visabhāgalakkhaṇāvayavesu rasādīsu niruḷho dhātu-saddo tādisesu aññāvayavesu cakkhādīsu upacarito daṭṭhabbo, rasādīsu viya vā cakkhādīsu niruḷhova. **Nijjīvamattassetarṇ** **adhivacananti** etena nijjīvamattapadatthe dhātu-saddassa niruḷhatarṇ dasseti. Cha dhātuyo etassāti **chadhāturo**, yo loke “puriso”ti dhammasamudāyo vuccati, so chadhāturo channarṇ pathavī-ādīnarṇ nijjīvamattasabhāvānarṇ samudāyamatto, na ettha jīvo puriso vā atthīti attho.

Cakkhādīnarṇ kamo pubbe vuttoti idha ekekasmīrṇ tike tiṇṇarṇ tiṇṇarṇ dhātūnarṇ kamarṇ dassento āha “**hetuphalānupubbavavatthānavasena**”ti. Hetuphalānarṇ anupubbavavatthānarṇ hetuphalabhāvova. Tattha **hetūti** paccayo adhippeto. **Phalanti** paccayuppannanti āha “**cakkhudhātū**”ti-ādī. Manodhātudhammadhātūnarṇa manoviññāṇassa hetubhāvo yathāsambhavarṇ yojetabbo, dvārabhūtanamanovasena vā tassā manodhātuyā.

**Sabbāsarṇ vasenāti** yathāvuttānarṇ ābhādhātu-ādīnarṇ pañcatīmasāya dhātūnarṇ vasena. Aparamatthasabhāvassa paramatthasabhāvesu na kadāci antogadhatā atthīti āha “**sabhāvato vijjamānānarṇ**”ti. Candābhāsūriyābhādikā vaṇṇanibhā evāti āha “**rūpadhātuyeva hi ābhādhātū**”ti. **Rūpadīpaṭibaddhāti** rāgavatthubhāvena gahetabbākāro subhanimittanti sandhāya “rūpādayovā”ti avatvā paṭibaddhavacanaṇ āha. Asatīpi rāgavatthubhāve “kusalavipākārammaṇā subhā dhātū”ti dutiyo vikappo vutto. **Vihimsādhātu** cetanā, paraviheṭhanachando vā. **Avihimsā** karuṇā.

**Ubhopīti** dhammadhātumanoviññāṇadhātuyo. **Hīnādīsu** purimanayena hīlītā cakkhādayo **hīnā**, sambhāvitā **paṇītā**, nātihīlītā natisambhāvitā **majjhimāti** khandhavibhaṅge āgatahīnadukatoyeva nīharitvā majjhimā dhātu vuttāti veditabbā. Viññāṇadhātu yadīpi chaviññāṇadhātuvasena vibhattā, tathāpi “viññāṇadhātuggahaṇena tassā purecārikapacchācārikattā manodhātu gahitāva hotī”ti vuttattā

āha “**viññāṇadhātu -pa- sattaviññāṇasaṅkhepoyevā**”ti. Anekesaṃ cakkhudhātu-ādīnaṃ, tāsu ca ekekissā nānappakāratāya nānādhātūnaṃ vasena anekadhātunānādhātuloko vuttoti āha “**aṭṭhārasadhātuppabhedamattamevā**”ti.

“**Cakkhusotaghānajiṅhākāyamanomanoviññāṇadhātubhedanā**”ti aṭṭhakathāyaṃ likhitaṃ. Tattha na cakkhādīnaṃ kevalena dhātu-saddena sambandho adhippeto vijānanasabhāvassa pabhedavacanato. Viññāṇadhātu-saddena sambandhe kariyamāne dve manogahaṇāni na kattabbāni. Na hi dve manoviññāṇadhātuyo atthīti. “**Cakkhu -pa- kāyamanoviññāṇamanodhātū**”ti vā vattabbaṃ atulyayoge dvandasamāsābhāvato. Ayaṃ panettha pāṭho siyā “cakkhu -pa- kāyaviññāṇamanomanoviññāṇadhātubhedanā”ti.

Khandhāyatanadesanā **saṅkhepadesanā**, indriyadesanā **vitthāradesanā**ti tadubhayaṃ apekkhitvā **nātisaṅkhepavittārā dhātudesanā**. Atha vā suttantabhājanīye vuttadhātudesanā **atisaṅkhepadesanā**, ābhādhātu-ādīnaṃ anekadhātunānādhātu-antānaṃ vasena desetabbā **ativittāradesanā**ti tadubhayaṃ apekkhitvā ayaṃ “**nātisaṅkhepavittārā**”ti.

**Bherītaḷaṃ viya cakkhudhātu** saddassa viya viññāṇassa nissayabhāvato. Etāhi ca upamāhi nijjīvānaṃ bherītaladaṇḍādīnaṃ samāyoge nijjīvānaṃ saddādīnaṃ viya nijjīvānaṃ cakkhurūpādīnaṃ samāyoge nijjīvānaṃ cakkhuvīññāṇādīnaṃ pavattīti kāraṇaphalānaṃ dhātumattattā kārakavedakabhāvaviraḷaṃ dasseti.

**Purecarānucarā viyāti** nijjīvassa kassaci keci nijjīvā purecarānucarā viyāti attho. Manodhātuyeva vā attano khaṇaṃ anativattantī attano khaṇaṃ anativattantānyeva cakkhuvīññāṇādīnaṃ avijjamānepi purecarānucarabhāve pubbakālāparakālatāya **purecarānucarā** viya daṭṭhabbāti attho. **Sallamiva sūlamiva** tividhadukkhataśamāyogato daṭṭhabbo. Āsāyeva dukkhaṃ **āsādukkhaṃ**, āsāvighātaṃ dukkhaṃ vā. Saññā hi abhūtaṃ dukkhadukkhampi subhādito sañjānantī taṃ āsaṃ tassā ca

vighātaṃ āsīsitasubhādi-asiddhiyā janetīti. Kammappadhānā saṅkhārāti “**paṭisandhiyaṃ pakkhipanato**”ti-ādimāha. **Jātidukkhānubandhanatoti** attanā nibbattiyamānena jātidukkhena anubandhattā. Bhavapaccayā jāti hi jātidukkhanti. Padumaṃ viya dissamānaṃ khuracakkaṃ viya rūpampi itthiyādibhāvena dissamānaṃ nānāvidhupaddavaṃ janeti. Sabbe anathā rāgādayo jāti-ādayo ca visabhūtā asantā sappaṭibhayā cāti tappaṭipakkhabhūtattā amatādito daṭṭhabbā.

**Muñcivāpi aññaṃ gahetvāvāti** etena makkaṭassa gahitaṃ sākhaṃ muñcivāpi ākāse ṭhātuṃ asamatthatā viya gahitārammaṇaṃ muñcivāpi aññaṃ aggahetvā pavattituṃ asamatthatāya makkaṭasamānataṃ dasseti. Aṭṭhivedhaviddhopi **damathaṃ** anupagacchanto duṭṭhasso **assakhaḷuṅko**. Raṅgagato naṭo **raṅganaṭo**.

184. **Cakkhuṅca paṭicca rūpe cāti**-ādinā dvārārammaṇesu ekavacanabahuvacananiddesā ekanānāsantānagatānaṃ ekasantānagataviññāṇapaccayabhāvato ekanānājātikattā ca.

**Sabbadhammesūti** ettha **sabba**-saddo adhikārasena yathāvuttaviññāṇasaṅkhāte ārammaṇasaṅkhāte vā padesasabbasmim tiṭṭhatīti daṭṭhabbo manoviññāṇadhātuniddese “cakkhuviññāṇadhātuyā uppajjitvā niruddhasamanantarā uppajjati manodhātu, manodhātuyāpi uppajjitvā niruddhasamanantarā uppajjati cittaṃ”ti cakkhuviññāṇadhātānantaram manodhātu viya manodhātānantarampi uppajjati cittanti yāva aññā manodhātu uppajjissati, tāva pavattaṃ sabbaṃ cittaṃ ekattena gahetvā vuttanti evampi attho labbhati. Evañhi sati manoviññāṇadhātānantataṃ uppannāya manodhātuyā manoviññāṇadhātubhāvappasaṅgo na hotiyeva. Pañcaviññāṇadhātumanodhātukkamanidassanañhi tabbidhurasabhāvena uppattiṭṭhānena ca paricchinnassa cittassa manoviññāṇadhātubhāvadassanatthaṃ, na anantaruppatimattenāti tabbidhurasabhāve ekattaṃ upanetvā dassanaṃ yujjati. Anupanītepi ekatte abbidhurasabhāve ekasmim dassite sāmāññasena aññaṃpi sabbaṃ taṃ sabhāvaṃ dassitaṃ hotīti daṭṭhabbaṃ. **Pi**-saddena manoviññāṇadhātusampiṇḍane ca sati “manoviññāṇadhātuyāpi samanantarā uppajjati cittaṃ -pa- tajjā

manoviññāṇadhātū”ti manoviññāṇadhātuggahaṇena bhavaṅgānantaraṃ uppannaṃ manodhātucittaṃ nivattitaṃ hotīti ce? Na, tassa manoviññāṇadhātubhāvāsiddhito. Na hi yaṃ codiyati, tadeva parihārāya hotīti.

**Manodhātuyāpi manoviññāṇadhātuyāpīti** manadvayavacanena dvinnaṃ aññamaññavidhurasabhāvataḍḍassitāti teneva manodhātāvajjanassa manoviññāṇadhātubhāvo nivattitoti daṭṭhabbo. Vutto hi tassa manoviññāṇadhātuvidhuro manodhātusabhāvo **“sabbadhammesu vā pana paṭhamasamannāhāro uppajjati”**ti-ādinā. **Sā sabbāpīti** etaṃ mukhamattanidassanaṃ. Na hi javanapariyosānā eva manoviññāṇadhātu, tadārammaṇādīnīpi pana hontiyevāti. Evaṃ pañcaviññāṇadhātumanodhātuvisiṭṭhasabhāvavasena sabbam manoviññāṇadhātuṃ dassetvā pana manodvāravasena sātisayaṃ javanamanoviññāṇadhātuṃ dassento **“manañca paṭiccā”**ti-ādimāha. Yadi pana channaṃ dvārānaṃ vasena javanāvasānāneva cittāni idha **“manoviññāṇadhātū”**ti dassitānīti ayamattho gayheyya, cutipaṭisandhibhavaṅgānaṃ aggahitattā sāvasesā desanā āpajjati, tasmā yathāvuttena nayena attho vedītabbo. Chadvārikacittehi vā samānalakkhaṇāni aññānīpi **“manoviññāṇadhātū”**ti dassitānīti vedītabbāni.

**Paṭiccāti āgataṭṭhāneti** ettha **“mano ca nesaṃ gocaravisayaṃ paccanubhotī”**ti-ādīsu<sup>1</sup> visuṃ kātuṃ yuttaṃ, idha pana **“cakkhuñca paṭiccā”**ti-ādīsu ca-saddena sampiṇḍetvā āvajjanassapi cakkhādisannissitātakaraṇaṃ viya **manañca paṭiccāti āgataṭṭhāne** manodvārasaṅkhātabhavaṅgasannissitameva āvajjanaṃ kātabbanti adhippāyo.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

Pañhapucchakaṃ heṭṭhā vuttanayattā uttānamevāti.

Dhātuvibhaṅgavaṇṇanā niṭṭhitā.

---

1. Ma 1. 369 piṭṭhe.



## 4. Saccavibhaṅga

### 1. Suttantabhājanīya

#### Uddesavaṇṇanā

189. **Sāsanakkamoti** ariyasaccāni vuccanti ariyasaccadesanā vā. Sakalañhi sāsanam bhagavato vacanam saccavinimuttam natthīti saccesu kamati, silasamādhipaṇṇāsāṅkhātām vā sāsanam etesu kamati, tasmā kamati etthāti kamo, kiṃ kamati? Sāsanam, sāsanassa kamo **sāsanakkamoti** saccāni sāsanapavattiṭṭhānāni vuccanti, taṃdesanā ca tabbohārenāti.

**Tathāti** taṃsabhāvāva. **Avitathāti** amusāsabhāvā. **Anaññathāti** aññākārahitā. Dukkhadukkhatātaṃnimittatāhi anīṭṭhatā pīḷanaṭṭho, dvidhāpi paridahanam, kilesadāhasamāyogo vā **santāpaṭṭhoti** ayametesam viseso. Puggalahimsanam vā **pīḷanam**, attano eva tikhiṇabhāvo santāpanam **santāpoti**. Ettha ca **pīḷanaṭṭho** dukkhassa saraseneva āvibhavanākāro itare yathākkamam samudayamagganirodhadassanehi āvibhavanākārāti ayam catunnampi viseso. Tatrataṭṭhābhinandanavasena byāpetvā ūhanam rāsikaraṇam dukkhanibbattanam **āyūhanam**, samudayato āgacchatīti vā āyam, dukkham. Tassa ūhanam pavattanam **āyūhanam**, sarasāvibhavanākāro eso. Nidadāti dukkhanti **nidānam**, “idaṃ taṃ dukkhan”ti sampatiṇchāpentam viya samuṭṭhāpetīti attho. Dukkhadassanena cāyam **nidānaṭṭho** āvi bhavati. **Samyogapalibodhaṭṭhā** nirodhamaggadassanehi, te ca saṃsārasamyojanamagganivāraṇākārā daṭṭhabbā.

Nissaranti ettha sattā, sayameva vā nissaṭam visamyuttam sabbasaṅkhatehi sabbupadhipaṭinissaggabhāvatoti **nissaraṇam**. Ayamassa sabhāvena āvibhavanākāro. **Vivekāsaṅkhatāmataṭṭhā** samudayamaggadukkhadassanāvibhavanākārā, samudayakkhaya-appaccaya-avināsītā vā. Saṃsārato niggamanam **niyyānam**. Ayamassa sarasena pakāsanākāro, itare samudayanirodhadukkhadassanehi. Tattha palibodhupacchedavasena nibbānādhigamova

nibbānanimittatā **hetvaṭṭho**. Paññāpadhānattā maggassa nibbānadassanaṃ, catusaccadassanaṃ vā **dassanaṭṭho**. Catusaccadassane kilesadukkhasantāpavūpasamane ca ādhipaccaṃ karonti maggaṅgadhammā sampayuttadhammesūti so maggassa **adhipateyyaṭṭhoti**. Visesato vā ārammaṇādhipatibhūtā maggaṅgadhammā honti “maggādhipatino dhammā”ti vacanatoti so tesam ākāro **adhipateyyaṭṭho**. Evamādi āhāti sambandho. Tattha **abhisamayāṭṭhoti** abhisametabbaṭṭho, abhisamayassa vā visayabhūto attho **abhisamayāṭṭho**, abhisamayasseva vā pavatti-ākāro **abhisamayāṭṭho**, so cettha abhisametabbena pīlanādinā dassitoti daṭṭhabbo.

Kucchitaṃ khaṃ **dukkhaṃ**. “**Samāgamo sametan**”ti-ādīsu kevalassa **āgama**-saddassa **eta**-saddassa ca payoge saṃyogatthassa anupalabbhanato **sams**saddassa ca payoge upalabbhanato “**saṃyogaṃ dīpeti**”ti āha, evaṃ “**uppannaṃ uditan**”ti etthāpi. **Aya**-saddo gati-atthasiddho hetu-saddo viya kāraṇaṃ dīpeti attano phalanipphādanena ayati pavattati, eti vā etasmā phalanti ayoti, saṃyoge uppattikāraṇaṃ samudayoti ettha visum payujjamānāpi upasagga-saddā sadhātukaṃ saṃyogatthaṃ uppādatthañca dīpenti kiriyāvisesakattāti veditabbā.

**Abhāvo ettha rodhassāti nirodhoti** etena nibbānassa dukkhavivekabhāvaṃ dasseti. Samadhigate tasmim tadadhigamavato puggalassa rodhābhāvo pavattisaṅkhātassa rodhassa paṭipakkhabhūtāya nivattiyā adhigatattāti etasmiñcatthe abhāvo etasmim rodhassāti nirodho-icceva padasamāso. Dukkhabhāvo panettha puggalassa, na nibbānasseva. Anuppādo eva nirodho **anuppādanirodho**. Āyatibhavādīsu appavatti, na pana bhaṅgoti bhaṅgavācakaṃ nirodha-saddaṃ nivattetvā anuppādavācakaṃ gaṇhāti. Etasmim atthe kāraṇe phalopacāraṃ katvā nirodhapaccayo nirodhoti vutto. **Paṭipadā ca hoti** puggalassa **dukkhanirodhappattiyā**. Nanu sā eva dukkhanirodhappattīti tassā eva sā paṭipadāti na yujjati? Na, puggalādhigamassa yehi so adhigacchati, tesam kāraṇabhūtadhammāñca pattibhāvena paṭipadābhāvena ca vuttattā.

Sacchikiriyāsacchikaraṇadhammānaṃ aññattābhāvepi hi puggalasacchikiriyadhammabhāvehi nānattaṃ katvā

niddeso kato. Atha vā dukkhanirodhappattiyā niṭṭhānaṃ phalanti tassā dukkhanirodhappattiyā paṭipadatā daṭṭhabbā.

**Buddhādayo ariyā paṭivijjhantīti** ettha paṭividdhakāle pavattam buddhādivohāraṃ “agamā rājagahaṃ buddho”ti-ādīsu<sup>1</sup> viya purimakālepi āropetvā “buddhādayo”ti vuttam. Te hi buddhādayo catūhi maggehi paṭivijjhantīti. Ariyapaṭivijjhitaḥḥāni saccāni **ariyasaccānīti** cettha purimapade uttarapadalopo daṭṭhabbo. **Ariyā imanti** paṭivijjhitaḥḥāna ekattam upanetvā “iman”ti vuttam. **Tasmāti** tathāgatassa ariyattā tassa saccānīti **ariyasaccānīti** vuccantīti attho. Tathāgatena hi sayam adhigatattā, teneva pakāsitattā, tato eva ca aññehi adhigamanīyattā tāni tassa honṭīti. **Ariyabhāvasiddhitopīti** ettha ariyasādhakāni saccāni **ariyasaccānīti** pubbe viya uttarapadalopo daṭṭhabbo. **Ariyāni saccānītipīti** ettha avitathabhāvena araṇīyattā adhigantabbattā ariyāni, ariyavohāro vā ayam avisamvādako avitatharūpo daṭṭhabbo.

**Bādhanalakkhaṇanti** ettha dukkhadukkhatannimittabhāvo bādhanā, udayabbayapīḷitā vā. Bhavādīsu jāti-ādivasena cakkhurogādivasena ca anekadhā dukkhassa pavattanameva puggalassa **santāpanaṃ**, tadassa kiccaṃ **raso**. Pavattinivattīsu saṃsāramokkhesu pavatti hutvā gayhatīti **pavattipaccupaṭṭhānaṃ**. Pabhavati etasmā dukkham paṭisandhiyam nibbattati purimabhavena pacchimabhavo ghaṭito saṃyutto hutvā pavattatīti **pabhavo**. “Evampi taṇhānusaye anūhate, nibbattatī dukkhamidaṃ punappunan”ti<sup>2</sup> evam punappunaṃ uppādanaṃ **anupacchedakaraṇaṃ**. Bhavanissaraṇanivāraṇaṃ **palibodho**. Rāgakkhayādibhāvena sabbadukkhasantatā **santi**. **Accutirasanti** accutisampattikaṃ. Cavanaṃ vā kiccanti tadabhāvaṃ kiccamaiva voharivā accutikiccanti attho. Acavanañca sabhāvassāpariccajanaṃ avikāratā daṭṭhabbā. Pañcakkhandhanimittasuññatāya aviggahaṃ hutvā gayhatīti **animittapaccupaṭṭhānaṃ**. Anusayupacchedanavasena saṃsāracārakato niggamanūpāyabhāvo **niyyānaṃ**. Nimittato pavattato ca cittassa vuṭṭhānaṃ hutvā gayhatīti **vuṭṭhānapaccupaṭṭhānaṃ**.

1. Khu 1. 340 piṭṭhe Suttanipāte.

2. Khu 1. 62 piṭṭhe.

Asuvaṇṇādi suvaṇṇādi viya dissamānaṃ māyāti vatthusabbhāvā tassā **viparītata** vuttā. Udakaṃ viya dissamānā pana marīci upagatānaṃ tucchā hoti, vatthumattampi tassā na dissatīti **visaṃvādikā** vuttā. Marīcimāyā-attānaṃ vipakkho bhāvo **tacchāviparītabhūtabhāvo**. **Ariyañāṇassāti** avitathagāhakassa ñāṇassa, tena paṭivedhapaccavekkhaṇāni gayhanti, tesaṅca **gocarabhāvo** paṭivijjhatabbatā-ārammaṇabhāvo ca daṭṭhabbo. **Aggilakkhaṇaṃ** uṇhattaṃ. Tañhi katthaci katthādi-upādānabhedepi visaṃvādakaṃ viparītaṃ abhūtaṃ vā kadāci na hoti. “Byādhidhammā jarādhammā, atho maraṇadhammino”<sup>1</sup>ti ettha vuttā jāti-ādikā **lokapakati**. Manussānaṃ uddhaṃ dīghatā, ekaccānaṃ tiracchānānaṃ tiriyaṃ dīghatā, vuddhiniṭṭhaṃ pattānaṃ puna avaḍḍhanaṃ evamādikā cāti vadanti. Tacchāviparītabhūtabhāvesu pacchimo **tathatā**, paṭhamo **avitathatā**, majjhimo **anaññathatā**ti ayametesāṃ viseso.

**Dukkhā aññaṃ na bādhakanti** kasmā vuttaṃ, nanu taṇhāpi jāti viya dukkhanimittatāya bādhikāti? Na, bādhakapabhavabhāvena viṣuṃ gahitattā. Jāti-ādīnaṃ viya vā dukkhassa adhiṭṭhānabhāvo dukkhadukkhata ca **bādhakatā**, na dukkhassa pabhavakatāti natthi taṇhāya pabhavakabhāvena gahitāya bādhakattappasaṅgo. Tenāha “**dukkhā aññaṃ na bādhakan**”ti. **Bādhakattaniyāmenāti** dukkhaṃ bādhakameva, dukkhameva bādhakanti evaṃ dvidhāpi bādhakattāvadhāraṇenāti attho. **Taṃ vinā nāññatoti** satipi avasesakilesa-avasesākusalasāsavakusalamūlavasesasāsavakusaladhammānaṃ dukkhahetubhāve na taṇhāya vinā tesāṃ dukkhahetubhāvo atthi, tehi pana vināpi taṇhāya dukkhahetubhāvo atthi kusalehi vinā akusalehi, rūpāvacarādīhi vinā kāmāvacarādīhi ca taṇhāya dukkhanibbattakattā. **Tacchaniyyānabhāvattāti** dvidhāpi niyamena taccho niyyānabhāvo etassa, na micchāmaggassa viya viparītataya, lokiyamaggassa viya vā anekantikataya atacchoti tacchaniyyānabhāvo, maggo. Tassa bhāvo tacchaniyyānabhāvattaṃ, tasmā **tacchaniyyānabhāvattā**. Sabbattha dvidhāpi niyamena tacchāviparītabhūtabhāvo vuttoti āha “**iti tacchāvipallāsā**”ti-ādi.

---

1. Aṃ 1. 145; Aṃ 2. 66 piṭṭhesu.

Sacca-saddassa sambhavantānaṃ atthānaṃ uddharaṇaṃ, sambhavante vā atthe vatvā adhippetatthassa uddharaṇaṃ **atthuddhāro**. **Viratisacceti** musāvādaviratiyaṃ. Na hi aññaviratiṣu sacca-saddo niruḷhoti. “Idameva saccaṃ, moghamaññaṃ”ti gahitā diṭṭhi **diṭṭhisaccaṃ**. “Amosadhammaṃ nibbānaṃ, tadariyā saccato vidū”ti<sup>1</sup> amosadhammattā nibbānaṃ **paramatthasaccaṃ** vuttaṃ. Tassa pana taṃsampāpakassa ca maggassa pajānanā paṭivedho avivādakāraṇanti dvayampi “ekañhi saccaṃ na dutiyamatthi, yasmim pajā no vivade pajānan”ti<sup>2</sup> imissā gāthāya saccanti vuttaṃ.

**Netāṃ dukkhaṃ ariyasaccanti āgaccheyya, netāṃ ṭhānaṃ vijjatīti** etena jāti-ādīnaṃ dukkha-ariyasaccabhāve aviparītataṃ dasseti, **aññaṃ dukkhaṃ ariyasaccanti āgaccheyya, netāṃ ṭhānaṃ vijjatīti** iminā dukkha-ariyasaccabhāvassa jāti-ādīsu niyatataṃ. Sacepi kathañci koci evaṃcitto āgaccheyya, paññāpane pana sahadhammena paññāpane attano vādassa ca paññāpane samattho natthīti dassetuṃ “**ahametaṃ -pa- paññāpessāmīti āgaccheyya, netāṃ ṭhānaṃ vijjati**”ti vuttaṃ. Jāti-ādīnaṃ anaññathatā aññaṃ ca tathābhūtaṃ abhāvoyevettha ṭhānābhāvo. Sacepi koci āgaccheyya, āgacchatu, ṭhānaṃ pana natthīti ayamettha suttattho. Esa nayo dutiyasuttepi. Tattha pana sampattatā paccakkhatā ca **paṭhamatā**, taṃnimittatā **dutiyatā**, tadupasamatā **tatiyatā**, taṃsampāpakatā **catutthatāti** daṭṭhabbā.

Nibbutikāmena pariḷānaṃ aññaṃ kiñci kiccaṃ kātappaṃ natthi, dhammañāṇakiccaṃ vā ito aññaṃ natthi, pariññeyyādīni ca etapparamānevāti **cattāreva vuttāni**. Taṇhāya ādīnavadassāvīnaṃ vasena “taṇhāvatthu-ādīnaṃ etaṃparamatāyā”ti vuttaṃ. Tathā ālaye pañcakāmaguṇasaṅkhāte, sakalavatthukāmasaṅkhāte, bhavattayasāṅkhāte vā dukkhe dosadassāvīnaṃ vasena “ālayādīnaṃ etaṃparamatāyā”ti vuttaṃ.

**Sahetukena dukkhenāti** etena dukkhassa abbochinnatādassanena atisaṃvegavatthutaṃ dasseti.

1. Khu 1. 396 piṭṭhe Suttanipāte.

2. Khu 1. 416; Khu 7. 226 piṭṭhesupi.

Na paṭivedhañāṇaṃ viya sakideva bujjhati, atha kho anu anu bujjhanato **anubodho**, anussavākāraparivitakkadiṭṭhinijjhānakkhanti-anugato vā bodho **anubodho**. Na hi so paccakkhato bujjhati, anussavādivasena pana kappetvā gaṇhātīti. **Kiccatoti** pariṇānādito. Tamkiccakaraṇeneva hi tāni tassa pākaṭāni. Vivaṭṭānupassanāya hi saṅkhārehi patilīyamānamānasassa uppajjamānaṃ maggañāṇaṃ visaṅkhāraṃ dukkhanissaraṇaṃ ārammaṇaṃ katvā dukkhaṃ paricchindati, dukkhagatañca taṇhaṃ pajahati, nirodhañca phusati ādicco viya pabhāya, sammāsaṅkappādīhi saha uppannaṃ taṃ maggaṃ bhāveti, na ca saṅkhāre amuñcitvā pavattamānena ñāṇena etaṃ sabbaṃ sakkā kātuṃ nimittapavattehi avuṭṭhitattā, tasmā etāni kiccāni karontaṃ taṃ ñāṇaṃ dukkhādīni vibhāveti tattha sammohanivattanenaṃti “**cattāripi saccāni passatī**”<sup>1</sup> vuttaṃ.

**Dukkhasamudayampi so passatīti** kālantaradassanaṃ sandhāya vuttanti ce? Na, “yo nu kho āvuso dukkhaṃ passatī, dukkhasamudayampi so passatī”<sup>2</sup> ti-ādinā<sup>2</sup> ekadassino aññattayadassitā vicāraṇāya tassā sādhanatthaṃ gavampatittherena imassa suttassa āharitattā paccekañca saccesu dissamānesu aññattayadassanassa yojitattā. Aññathā anupubbābhisamayeva purimadiṭṭhassa pacchā adassanato samudayādidassino dukkhādidassanatā na yojetabbā siyāti. Suddhasaṅkhārapuñjamattadassanato **sakkāyaditṭhi** pariyaṭṭhānaṃ nivāreti. “Lokasamudayaṃ kho kaccāna yathābhūtaṃ sammappaññāya passato yā loke natthitā, sā na hotī”<sup>3</sup> ti<sup>3</sup> vacanato samudayadassanaṃ hetuphalappabandhāvicchedadassanavasena **ucchedaditṭhi** pariyaṭṭhānaṃ nivatteti. “Lokanirodhaṃ kho -pa- passato yā loke atthitā, sā na hotī”<sup>3</sup> ti<sup>3</sup> vacanato nirodhadassanaṃ hetunirodhā phalanirodhadassanavasena **sassataditṭhi** pariyaṭṭhānaṃ nivāreti. Attakārassa paccakkhadassanato maggadassanena “natthi attakāre, natthi parakāre, natthi purisakāre”<sup>4</sup> ti-ādikaṃ<sup>4</sup> **akiriyaditṭhi** pariyaṭṭhānaṃ pajahati. “Natthi hetu, natthi paccayo sattānaṃ saṅkilesāya, ahetū appaccayā sattā saṅkilissanti. Natthi hetu -pa- visuddhiyā, ahetū appaccayā sattā visujjhantī”<sup>4</sup> ti-ādikaṃ<sup>4</sup> ahetukadiṭṭhi ca idha akiriyaditṭhiggaṇaṇena gahitāti daṭṭhabbā. Sāpi hi visuddhimaggadassanena pahīyatīti.

1. Paṭivijjhatīti (Aṭṭhakathāyaṃ)

3. Saṃ 1. 257 piṭṭhe.

2. Saṃ 3. 382 piṭṭhe.

4. Dī 1. 50 piṭṭhe.

Dukkhañāṇaṃ samudayaphalassa dukkhassa adhuvādhāvāṃ passatīti **phale vippaṭṭipattim** nivatteti. “Issaro lokaṃ pavatteti nivatteti cā”ti **issarakāraṇino** vadanti, padhānato āvi bhavati, tattheva ca patilīyatīti **padhānakāraṇino**. “Kālavaseneva pavattati nivattati cā”ti **kālavādino**. “Sabhāveneva sambhoti vibhoti cā”ti **sabhāvavādino**. **Ādi**-saddena aṇūhi loko pavattati, sabbaṃ pubbekatahetūti evamādi akāraṇapariggaho daṭṭhabbo. Rāmudakāḷārādīnaṃ viya **arūpaloke**, nigaṇṭhādīnaṃ viya **lokathupikāya apavaggo** mokkhoti gahaṇaṃ. **Ādi**-saddena padhānassa appavatti, guṇaviyuttassa attano sakattani avaṭṭhānaṃ, brahmunā salokatā, diṭṭhadhammanibbānavādāti evamādiggaḥaṇaṇca daṭṭhabbaṃ. Ettha **guṇaviyuttassāti** buddhisukhadukkha-icchādosapayattadhammādhammaṣaṅkhārehi navahi attaguṇehi vippayuttassāti kaṇḍābhakkhavādo<sup>1</sup>. Indriyatappanaputtamukhadassanādīhi vinā apavaggo natthīti gahetvā tathāpavattanaṃ **kāmasukhallikānuyogo**.

Ajjhattikabāhiresu dvādasasu āyatanesu kāmabhavavibhavataṇhāvasena dvādasa tikā **chattimsa taṇhāvicarītāni**. **Khuddakavatthuvibhaṅge** vā āgatanayena kālavibhāgaṃ anāmasitvā vuttāni. Vīmaṃsiddhipādādayo bodhipakkhiyā kiccaṇānattena vuttā, atthato ekattā sammādiṭṭhimukhena tattha antogadhā. **Tayo nekkhamavitakkādayoti** lokiyakkhaṇe alobhamettākaruṇāsampayogavasena bhinnā maggakkhaṇe lobhabyāpādavihiṃsāsamucchedavasena tayoti ekopi vutto. Esa nayo sammāvācādīsu. Appicchatāsantuṭṭhitānaṃ pana bhāve sammā-ājīvasambhavato tena tesāṃ saṅgaho daṭṭhabbo. Bhavantarepi jīvitahetupi ariyehi avītikkamanīyattā ariyakantānaṃ sammāvācādisīlānaṃ gahaṇena yena saddhāhatthena tāni pariggahetabbāni, so saddhāhattho gahitoyeva hotīti tato anaññāni saddhindriyasaddhābalāni tattha antogadhāni honti. **Tesaṃ atthitāyāti** saddhindriyasaddhābalachandiddhipādānaṃ atthitāya sīlassa atthibhāvato tividhenapi sīlena te tayopi gahitāti tattha antogadhā. **Cittasamādhīti** cittiddhipādānaṃ vadati. “Cittāṃ paññaṇca bhāvayan”ti<sup>2</sup> hi cittamukhena

1. Kaṇḍābhassavādo (?)

2. Saṃ 1. 13, 167 piṭṭhesu.

samādhī vuttoti samādhimukhena cittampi vattabbaṃ arahati. Cittiddhipādabhāvanāya pana samādhipi adhimatto hotīti vīmaṃsiddhipādādivacaṇaṃ viya cittiddhipādavacaṇaṃ avatvā idha “**cittasamādhī**”ti vuttam. “Pīṭimanassa kāyo passambhati, passaddhakāyo sukhaṃ vedeti, sukhino cittaṃ samādhiyati”<sup>1</sup> vacanato samādhī-upakāraṃ pīṭipassaddhiyo, tasmā samādhiggahaṇena gahitā, upekkhā pana samādhī-upakāraṃ taṃsadisakiccato ca, tasmā sammāsamādhivasena etesaṃ antogadhatā daṭṭhabbā.

**Bhāro viya vighātakattā. Dubbhikkhamiva bādhakattā.** “Nibbānaparamaṃ sukhaṃ”<sup>2</sup> sukhabhāvato **subhikkhamiva.** Anīṭṭhabhāvato sāsāṅkasappaṭibhayato ca dukkhaṃ **verīvisarukkhabhaya-orimatīrūpamaṃ.**

**Tathatthenā**ti tathasabhāvena, pariññeyyabhāvenāti attho. Etena ariyasaccadvayaṃ siyā dukkhaṃ, na ariyasaccaṃ, siyā ariyasaccaṃ, na dukkhanti imamatthaṃ dasseti. Ariyasacca-saddaparā hi dukkhādi-saddā pariññeyyādibhāvaṃ vadanti. Teneva ariyasacca-saddānapekkaṃ dukkha-saddaṃ sandhāya maggasampayuttasāmaññaphaladhammānaṃ ādīpadaṅgaho vutto, tadapekkaṃ sandhāya catutthapadaṅgaho. Samudayādīsu avasesakilesādayo samudayo, na ariyasaccaṃ, saṅkhāranirodho nirodhasamāpatti ca nirodho, na ariyasaccaṃ, ariyamaggato aññāni maggaṅgāni maggo, na ariyasaccanti iminā nayena yojanā kātabbā. Dukkhaṃ vedanīyampi santaṃ vedakarahitaṃ, kevalaṃ pana tasmīṃ attano paccayehi pavattamāne dukkhaṃ vedetīti vohāramattaṃ hoti. Evaṃ itaresupī.

**Kiriyāva vijjatīti** samudayameva vadati, tassa vā dukkhapaccayabhāvaṃ. Maggo atthīti vattabbe “**maggamatthī**”ti okārassa abhāvo katoti daṭṭhabbo. **Gamakoti** gantā. Sāsavatā asubhatāti katvā nirodhamaggā **subhā eva.** Dukkhadīnaṃ pariyāyena samudayādibhāvo ca atthi, na pana nirodhabhāvo, nirodhassa vā dukkhādibhāvoti na aññamaññasamaṅgitāti āha “**nirodhasuññāni vā**”ti-ādi. **Samudaye dukkhassābhāvatoti** ponobbhavikāya taṇhāya punabbhavassa abhāvato. Yathā vā pakativādīnaṃ vikārāvibhāvato pubbe paṭṭipalīnā ca pakatibhāveneva tiṭṭhanti, na

1. Dī 1. 195; Dī 3. 252; Saṃ 3. 135; Aṃ 1. 245; Aṃ 3. 535 piṭṭhesu.

2. Ma 2. 176, 177; Khu 1. 43 piṭṭhesu.



evaṃ samudayasampayuttampi dukkhaṃ samudayabhāvena tiṭṭhatīti āha “**samudaye dukkhassābhāvato**”ti. Yathā avibhattehi vikārehi mahantā visesindriyabhūtavisesehi pakatibhāveneva ṭhitehi pakati sagabbhā pakativādīnaṃ, evaṃ na phalena sagabbho hetūti attho.

**Dukkhasamudayānaṃ nirodhamaggānañca asamavāyāti** etaṃ vivaranto āha “**na hetusamavetaṃ hetuphalan**”ti-ādi. Tattha idha tantūsu paṭo, kapālesu ghaṭo, biraṇesu kaṭo, dvīsu aṇūsu dvi-aṇukanti-ādinā idha buddhivohārajanako avisuṃ siddhānaṃ sambandho samavāyo, tena samavāyena kāraṇesu dvīsu aṇūsu dvi-aṇukaṃ phalaṃ samavetaṃ ekībhūtamiva sambandhaṃ, tīsu aṇūsu ti-aṇukanti evaṃ mahāpathavimahā-udakamahā-aggimahāvātakkhandhapaniyantaṃ phalaṃ attano kāraṇesu samavetanti samavāyavādino vadanti. Evaṃ pana vadantehi aparimāṇesu kāraṇesu mahāparimāṇaṃ ekaṃ phalaṃ samavetaṃ attano antogadhehi kāraṇehi sagabbhaṃ asuññanti vuttaṃ hoti, evamidha samavāyābhāvā phale hetu natthīti hetusuññaṃ phalanti attho.

**Pavattibhāvato**ti saṃsārassa pavattibhāvato. **Catu-āhārabhedato**ti iminā cattāro āhārabhede tehi bhinne tappaccayadhamabhede ca saṅgaṇhāti. **Rūpābhinandanādibhedo** rūpādikhandhavasena, ārammaṇavasena vā. Upādānehi upādīyatīti upādi, upādānakkhandhapañcakam. Nibbānañca taṃnissaraṇabhūtaṃ tassa vūpasamo taṃsantīti katvā tassa yāva pacchimaṃ cittaṃ, tāva sesataṃ, tato parañca anavasesataṃ upādāya “**sa-upādīsesanibbānadhātu anupādīsesanibbānadhātu**”ti dvidhā voharīyatīti. Sammādiṭṭhi sammāsankappo **vipassanā**, itare **samātho**”ti vadanti. Sīlampi hi samathassa upakārakattā samathaggahaṇena gayhatīti tesam adhippāyo. Atha vā yānadvayavasena laddho maggo **samatho vipassanā**ti āgamanavasena vuttoti daṭṭhabbo. **Sappadesattā**ti sīlakkhandhādīnaṃ ekadesattāti attho. Sīlakkhandhādayo hi sabbalokiyalokuttarasīlādisaṅgāhakā, ariyamaggo lokuttaroyevāti tadekadeso hoti.

**Onatasahāyo viya vāyāmo** paggahakiccasāmaññato. **Aṃsakūṭaṃ datvā ṭhitasahāyo viya sati** apilāpanavasena niccalabhāvakaraṇasāmaññato. **Sājātī**toti savitakkasavicārādibhedesu samānāya

samādhijātiyāti attho. **Kiriyatoti** samādhi-anurūpakiriyato. Tato eva hi “cattāro satipaṭṭhānā samādhinimittā, cattāro sammappadhānā samādhiparikkhārā”<sup>1</sup>ti<sup>1</sup> sativāyāmanāṃ samādhissa nimittaparikkhārabhāvo vuttoti.

**Ākoṭentena viyāti** “aniccam aniccan”<sup>2</sup>ti-ādinā paññāsadisena kiccena samantato kākoṭentena viya “aniccam khayaṭṭhena, dukkham bhayaṭṭhena”<sup>2</sup>ti-ādinā **parivattantena viya** ca ādāya ūhitvā dinnameva paññā paṭivijjhati. Dvinnāṃ samānakālattepi paccayabhāvena saṅkappassa purimakālassa viya niddeso kato. **Sajātitoti** “dukkhe ñāṇan”<sup>2</sup>ti-ādīsu samānāya paññājātiyā. **Kiriyatoti** ettha paññāsadisakiccaṃ kiriyāti vuttam, pubbe pana samādhī-upakāraṃ tadanurūpaṃ kiccanti ayamettha viseso. “Sabbaṃ bhikkhave abhiññeyyan”<sup>2</sup>ti<sup>2</sup> vacanato cattāripi abhimukhaṃ paccakkhato ñātābbāni, abhivisiṭṭhena vā ñāṇena ñātābbānīti **abhiññeyyāni**.

**Durabhisambhavaranti** abhisambhavitum sādhetum asakkuṇeyyatarāṃ, sattaviḅhātena duradhigamanti attho. Bādhakapabhavasantiyānalakkhaṇehi vavattānaṃ **salakkhaṇavavattānaṃ**. **Duravagāhatthena gambhīrattāti** oḷārikā dukkhasamudayā. Tiracchānagatānampi hi dukkham āhārādīsu ca abhilāso pākaṭo, pīḷanādi-āyūhanādivasena pana “idam dukkham, idamassa kāraṇan”<sup>3</sup>ti yāthāvato ogāhitum asakkuṇeyyattā **gambhīrā**, saṅhasukhumadhammattā nirodhamaggā sabhāvato eva gambhīrattā **duravagāhā**, teneva uppanne magge natthi nirodhamaggānaṃ yāthāvato anavagāhoti. Nibbānampi maggena adhigantabbattā tassa phalanti apadissatīti āha “**phalāpadesato**”<sup>3</sup>ti. Vuttañhi “dukkhanirodhe ñāṇaṃ atthapaṭisambhidā”<sup>3</sup>ti<sup>3</sup>. Maggopi nirodhassa sampāpakabhāvato hetūti apadissatīti āha “**hetu-apadesato**”<sup>3</sup>ti. Vuttampi cetam “dukkhanirodhagāminiyā paṭipadāya ñāṇaṃ dhammapaṭisambhidā”<sup>4</sup>ti<sup>4</sup>. **Iti vijaññāti iti**-saddena vijānanakkamaṃ dasseti. **Evam pakārehīti evam**-saddena vijānanakāraṇabhūte naye.

Uddesavaṇṇanā niṭṭhitā.

1. Ma 1. 375 piṭṭhe.

3. Abhi 2. 307 piṭṭhe.

2. Sam 2. 258 piṭṭhe.

4. Abhi 2. 307 piṭṭhe.

## 1. Dukkhasaccaniddesa

### Jātiniddesavaṇṇanā

190. **Tattha -pa- ayaṃ mātikā**ti niddesavāra-ādimhi vutte jāti-ādiniddese tesam jāti-ādīnaṃ niddesavasena dukkhassa ariyasaccassa kathanatthāya, tesu vā jāti-ādīsu tesañca dukkhaṭṭhe veditabbe jāti-ādīnaṃ niddesavasena dukkhassa ariyasaccassa kathanatthāya dukkhadukkanti-ādikā dukkhamātikā veditabbāti attho. Atha vā **tatthā**ti tasmim niddesavāre. “Jātipi dukkhā -pa- saṅkhittena pañcupādānakkhandhā dukkhā”ti ayaṃ dukkhassa ariyasaccassa kathanatthāya mātikāti yathādassitassa jāti-ādiniddesassa mātikābhāvaṃ dīpeti. Tam dīpetvā puna yasmim padadvaye tathā dukkham ariyasaccam kathetabbam, tassa niddhāraṇattham sabbam dukkham saṅkaddhento āha “**idañhi dukkham nāmā**”ti-ādi.

**Sabhāvatoti** dukkhavedayitasabhāvato. **Nāmatoti** teneva sabhāvena laddhanāmato. Tena na aññena pariyāyena idaṃ dukkham nāma, atha kho dukkhattāyevāti sabhāvena nāmaṃ viseseti. Atha vā **nāmatoti** udayabbayavantatāya laddhanāmato. Yathā aññe udayabbayavanto dhammā na sabhāvato dukkhā, na evaṃ idaṃ, atha kho sabhāvato dukkhā bhūtamevedaṃ dukkhanti purimena dukkha-saddena pacchimaṃ viseseti. Vipariṇānavantatāya sukham aniṭṭhameva hotīti dukkham nāma jātam. Tenevāha “**dukkhuppattihetuto**”ti. Kaṇṇasūlādīhi abhibhūtassa nitthunanādīhi dukkhābhhibhūtātāya viññāyamānāyapi kiṃ tava rujjatīti pucchitvāva kaṇṇasūlādidukkham jānitabbam hotīti **paṭicchannadukkhātā** tassa vuttā. **Upakkamassa ca pākaṭabhāvato**ti kāraṇavasena dukkhavisesassa pākaṭabhāvaṃ dasseti.

Sabhāvaṃ muñcitvā pakārantarena dukkhanti vuccamānaṃ **pariyāyadukkham**. Kathetabbatā paṭiññātaṃ yathā kathetabbam, tam pakāradassanattham “**ariyasaccañca nāmetan**”ti-ādimāha. **Saṅkhepo** sāmāññaṃ, sāmāññañca visese antokarivā pavattatīti tattha ubhayathāpi kathetuṃ vaṭṭati. **Vitthāro pana** viseso jāti-ādiko, viseso ca visesantaranivattakoti jāti-ādīsu jarādīnaṃ saṅkhipanaṃ na sakkā kātunti tattha vitthāreneva kathetabbam.

191. “Aparassa aparassā”ti dīpanaṃ **aparattadīpanaṃ**. Sāmi-atthehi hi aparattha-saddo sijjhatīti. **Tesaṃ tesanti** vā sāmivasena vuttaṃ atthaṃ bhummavasena vattukāmatāya āha “**aparattadīpanan**”ti, aparasmim aparasmim dīpananti attho. Aparassa aparassa vā jāṭisaṅkhātassa atthassa dīpanaṃ **aparattadīpanaṃ**. Pañcagativasena ekekāyapi gatiyā khattiyādibhummadevādihatthi-ādijātivasena cāti **gatijātivasena**.

Tiṇākāro **tiṇajāti**, so ca upādāpaññattīti “**paññattiyān**”ti āha. **Tadupādāyāti** taṃ paṭhamāṃ viññāṇaṃ upādāya ayaṃ jāti, nāssa kutoci niggamaṇaṃ upādāya. Yasmā ca evaṃ, tasmā **sāvassa jāti** paṭhamaviññāṇasaṅkhātāti attho. Atha vā tadupādāya sajātoti vuccatīti **sāvassa jāti** paṭhamaviññāṇasaṅkhātāti attho. Viññāṇamukhena ca pañcapi khandhā vuttā hontīti “**paṭisandhiyān**”ti āha. Ariyabhāvakaraṇatā **ariyasīlanti** pātimokkhasaṃvaro vuccatī. Jāti-ādīnipi lakkhaṇāni dhammānaṃ ākāravikārāti katvā sahuppādakā sahavikārakāti vuttā. **Jāyanatthenāti**-ādi āyatanavasena yonivasena ca dvīhi dvīhi padehi sabbasatte pariyādiyivā jātim dassetuṃ vuttaṃ. Purimanaye pana ekekeneva padena sabbasatte pariyādiyivā jāti dassitāti ayaṃ viseso. Keci pana “purimanaye kattuniddeso, pacchimanaye bhāvaniddeso kato”ti vadanti, “tesaṃ tesaṃ sattānaṃ jāti”ti pana kattari sāmīniddesassa katattā ubhayatthāpi bhāvaniddesova yutto. Sampuṇṇā jāti **sañjāti**. Pākaṭā nibbatti **abhinibbatti**. “Tesaṃ tesaṃ sattānaṃ -pa- abhinibbattī”ti sattavasena pavattattā **sammutikathā**.

**Tatra tatrāti** ekacatuvoṅkārabhavesu dvinnāṃ dvinnāṃ, sese rūpadhātuyaṃ paṭisandhikkhaṇe uppajjamānānaṃ pañcannaṃ, kāmādhātuyaṃ vikalāvikalindriyānaṃ vasena sattannaṃ navannaṃ dasannaṃ puna dasannaṃ ekādasannaṃca āyatanānaṃ vasena saṅgaho veditabbo. Ekabhavapariyāpannassa khandhasantānassa paṭhamābhinibbattibhūtā paṭisandhikkhandhāti āha “**paṭhamābhinibbattilakkhaṇā**”ti. Tameva santānaṃ niyyātentāṃ viya “handā gaṇhathā”ti paṭicchāpentāṃ viya pavattatīti **niyyātanarasā**. Santatiyā eva ummujjanaṃ hutvā gayhatīti **ummujjanapaccupaṭṭhānā**. Dukkharāsissa vicittatā dukkhaviccittatā, dukkhavisesā vā tadavayavā, taṃ paccupaṭṭhāpeti phalatīti **dukkhaviccittatāpaccupaṭṭhānā**.

Pariyāyanipariyāyadukkhesu yaṃ dukkhaṃ jāti hoti, taṃ dukkhabhāvoyeva tassā dukkhaṭṭho. Yadi akkhānena pāpuṇitabbaṃ siyā, bhagavā ācikkheyya. Bhagavatāpi—

“Taṃ kiṃ maññatha bhikkhave, katamo nu kho mahantataro? Yo cāyaṃ mayā paritto paṇimatto pāsāṇo gahito, yo ca himavā pabbatarājāti. Appama -pa- gahito, himavantaṃ pabbatarājānaṃ upanidhāya saṅkhampi na upeti, kalabhāgampi na upeti, upanidhampi na upeti. Evameva kho bhikkhave yaṃ so puriso tīhi sattisatehi haññamāno tatonidānaṃ dukkhaṃ domanassaṃ paṭisaṃvedeti, taṃ nerayikassa dukkhassa upanidhāya saṅkhampi -pa- upanidhampi na upeti”<sup>1</sup>—

upamāvasena pakāsitaṃ **āpāyikadukkhaṃ**. Sukhuppattikāraṇāni sucīni uppalādīnīti katvā tattha nibbattinivāraṇena jātiyā dukkhavattubhāvaṃ dasseti “**atha kho**”ti-ādinā. Dukkuppattikāraṇe nibbattanena gabbhapariharaṇūpakkena vinā mātukucchisambhavameva **dukkhaṃ gabbhokantimūlakam** aññānapekkhattā, upakkamanibbattaṃ pana **pariharaṇamūlakam** okkantimattānapekkhattā. Ayametesam viseso.

Attano abhimukhaṃ kaḍḍhanaṃ **ākaḍḍhanaṃ**, parito sabbatobhāgena kaḍḍhanaṃ **parikaḍḍhanaṃ**. Adho dhunanaṃ **odhunanaṃ**, tiriyaṃ, sabbato vā dhunanaṃ **nidhunanaṃ**. Tacchetvā khārapakkhipanaṃ **khārāpaṭicchakam**.

Sakalasarīraṇhāpanaṃ **nhāpanaṃ**, ekadesadhovanaṃ **dhovanaṃ**, sūriyābhimukhapavattanena **ātāpanaṃ**, pañcaggitāpena **paritāpanaṃ** daṭṭhabbaṃ. Sabboyeva vā tāpo dvidhāpi vutto.

**Kuhiṃ nu patiṭṭhaṃ labhetha**, jātiyā vinā na tassa dukkhassa patiṭṭhānaṃ atthīti attho, jātiyā vā vinā so satto kuhiṃ nu patiṭṭhaṃ, kattha nu patiṭṭhanto taṃ dukkhaṃ labhethāti attho. Tattha tiracchānesu kathaṃ dukkhaṃ bhavēyya tahiṃ tiracchānesu jātiṃ vinā. **Na cassāti** na ce assa. Nanu nevatthīti sambandho kātabbo, nanu āhāti vā. **Yadatoti** yasmā nevatthi, tasmā āhāti attho.

1. Ma 3. 204 piṭṭhe.

### Jarāniddesavaṇṇanā

192. Jīraṇameva **jīraṇatā**, jīraṇassa vā ākāro **tā**-saddena vutto.

**Yathāpure asallakkhenti** gāravakaraṇa-upaṭṭhānādīni asallakkhente taṇnimittam domanassam uppajjati attho.

**Satādīnanti** satisutaviriyapaññādīnam vippavāsanimittam attanā apasādetabbehi attano puttadārehi apasādanīyato.

Avasavattaṅgapaccaṅgatāya suci-asuci-ādivicāraṇavirahena ca bālakumārakakālo viya jīṇṇakālo hotīti āha “**bhiyyo bālattappattiyā**”ti.

### Maraṇaniddesavaṇṇanā

193. “Kālassa antakassa kiriyā”ti yā loke vuccati, sā cuti, maraṇanti attho. Cavanakāloyeva vā anatikkamanīyattā visesena kāloti vutto, tassa kiriyā cutikkhandhānam bhedappattiyeva. **Maccu maraṇanti** etthāpi samāsam akatvā yo maccu vuccati bhedo, yañca maraṇam pāṇacāgo, idam vuccati maraṇanti visum sambandho na na yujjati.

Yassa khandhabhedassa pavattattā “tisso mato, phusso mato”ti vohāro hoti, so khandhappabandhassa anupacchinnatāya “**sammutimaraṇan**”ti vutto, pabandhasamucchedo ca “**samucchedamaraṇan**”ti. Maraṇampi dukkhanti imasmim panatthe dukkhasaccakathā vaṭṭakathāti katvā “**sammutimaraṇam adhippetan**”ti āha. **Tasseva nāmanti** tabbhāvato tadekadesabhāvato ca maraṇa-saddabahutte asammohattham vuttam. **Cutilakkhaṇanti** “cavanatā”ti nidassitacavanalakkhaṇameva vadati. Sampattibhavakhandhehi viyojetīti **viyogarasam**, viyogakiriyābhūtatāya vā “**viyogarasan**”ti vuttam. Sattassa purimabhavato vippavāso hutvā upaṭṭhātīti **vippavāsapaccupaṭṭhānam**.

**Maraṇantikāti** maraṇassa āsannā. Yadi maraṇam na bhavissati, yathāvuttam kāyikam cetasikañca dukkham na bhavissatīti āha “**dvinnampi dukkhānam vatthubhāvenā**”ti.

**Pāpakammādinimittanti** pāpakammanimittam pāpagatinimittañcāti attho, kammampi vā ettha “nimittan”ti vuttam upapattinimittabhāvena upaṭṭhānato. Tadupaṭṭhānēpi hi “akataṃ vata me kalyāṇan”ti-ādinā anappakaṃ domanassaṃ upajjatīti. **Bhaddassāti** kalyāṇakammassāti attho. **Avisesatoti** “sabbesan”ti etena yojetabbam. **Sabbesanti** ca yesam kāyikaṃ dukkham uppajjati, teyeva sabbe gahitā “**vitujjamānamammānan**”ti visesitattā sandhīnaṃ bandhanāni sandhibandhanāni, tesam chedanena nibbattam dukkham “**sandhibandhanacchedanan**”ti vuttam. **Ādi-saddo** vā kāraṇattho, sandhibandhanacchedanamūlakanti attho.

**Anayabyasanāpādanam viyāti** anayabyasanāpatti viyāti attho. Vāḷādīhi kate hi anayabyasanāpādane antogadhā anayabyasanāpatti ettha nidassananti.

### Sokaniddesavaṇṇanā

194. Sukhakāraṇam **hitam**, tassa phalam **sukham**. **Ñātikkhayoti** bhogādīhi ñātīnam parihāni maraṇaṅca. **Ayam pana visesoti** bhogabyasanāpattatthavisesam rogabyasanādisu samāsavisesaṅca sandhāyāha. **Ñātibhogā** paññattimattā tabbināsāvāti iminā adhippāyena aparinipphannataṃ sandhāya “**anipphannāni**”ti āha. Aparinipphannatamyeva hi sandhāya **vusiddhimagge**<sup>1</sup> ca “dasa rūpāni anipphannāni”ti vuttam. **Rūpakaṇḍavaṇṇanāyañhi**<sup>2</sup> tāni “aparinipphannāni”ti vuttāni. **Khandhavibhaṅge** ca nipphādetabbassa nirodhasamāpatti-ādikassa nipphannatā vuttāti asabhāvadhammassa ca nipphannatā, nibbānasseva anipphannatāti.

Dhamma-saddo hetu-atthoti āha “**dukkhassa uppattihetunā**”ti. **Jhāmanti** daḍḍham. Pubbe vuttalakkaṇādikā domanassavedanā sokoti tassa puna lakkhaṇādayo na vattabbā siyūm, tathāpi domanassavisesattā sokassa ca viṣiṭṭhā lakkhaṇādayo vattabbāti “**kiñcāpi**”ti-ādimāha. Visārarahitam anto eva saṅkucitam cintanam, sukkhanam vā **antonijjhānam**. **Parinijjhāyanam** dahanam. **Ñātibyasanādi-anurūpam** socanam **anusocanam**, tam tam vā guṇam dosaṅca anugantvā socanam tappanam **anusocanam**.

1. Visuddhi 2. 81 piṭṭhe.

2. Abhi-Ṭṭha 1. 378 piṭṭhe.

**Javanakkhaṇeti** manodvāra javanakkhaṇe. Tathā hi taṃ dassento “**ettakā me**”ti-ādimāha. Kāyaviññāṇādivīthiyampi pana javanakkhaṇe domanassassa paccayo hoti eva. Teneva “**javanakkhaṇe cā**”ti āha. Aññathā kāyikacetāsikadukkhānaṃ kāyavatthukamanodvārappavattānameva paccayoti gaṇheyya tattha visesena kāyikacetāsikasaddappavattito.

**Tujjatīti** “tudaṭī”ti vattabbe byattayavasena vuttanti vedītabbāṃ.

### Paridevaniddesavaṇṇanā

195. **Ādevanti etenāti ādevoti** ādevana-saddaṃ katvā assuvimocanādivikāraṃ āpajjantānaṃ tabbikārāpattiyā so saddo karaṇabhāvena vuttoti. Vīhipalāpādayo viya tucchaṃ vacanaṃ **palāpo**. Guṇadose kitteti bodhetīti **guṇadosakittanaraso** lālappa-saddo. Atthānatthe hiriyaṭṭabbajane ca avicāretvā puggalassa sambhamabhāvo hutvā paridevana-saddo upaṭṭhāṭīti “**sambhamapaccupaṭṭhāno**”ti vutto, sokavatthu-avighātena vā sambhamo, na uttāsasambhamo, so ca paridevana-saddena pākaṭo hotīti paridevo “**sambhamapaccupaṭṭhāno**”ti vutto.

Sokābhibhūto paridevananimittaṃ muṭṭhipoṭhanādīni karoti, paridevananimittameva ca ñāti-abbhatthaṅgamanādīni cintetīti paridevassa dukkhadomanassānaṃ **vatthubhāvo** vutto.

**Bhiyyoti** yena vinā na hoti, tato paridevasamuṭṭhāpakadomanassato, pubbe vuttadukkhato vā bhiyyo, kaṇṭhoṭṭhatālu-ādisosajatopi vā bhiyyoti aññañca kāyikaṃ cetāsikaṃ taṃnidānadukkhāṃ saṅgaṇhāti.

### Dukkhadomanassaniddesavaṇṇanā

196-7. Kāyikaṃ dukkhaṃ kāyikassa dukkhassa upanissayapaccayoti “**dukkhitassa dukkhaṃ uppajjati**”ti vuttaṃ. Etena dukkhena abhibhūtattā nakkhattaṃ



kīlītuṃ na labhāmīti balavadomanassaṃ uppajjatīti dukkhassa  
domanassavatthutā hoti.

Attano pavattikkhaṇaṃ sandhāya “**pīletī**”ti vuttaṃ kāyikadukkhaṃ,  
tadupanissayato vā.

**Āvaṭṭanti**ti parivaṭṭanti. **Vivaṭṭanti**ti pabbhāre khittatthambho viya  
ludhanti<sup>1</sup>. Mūlacchinnarukkho viya **chinnapapātaṃ papatanti**,  
paridayhamānacittā purimadomanassupanissayavasena **cintenti**, vigate  
domanasse tathācintanaṃ natthīti.

### Upāyāsāniddesavaṇṇanā

198. Sabbavisayaṇṇapattinivāraṇavasena samantato sīdanaṃ  
**saṃsīdanaṃ**, uṭṭhetumpi asakkuṇeyyatākaraṇavasena atibalavaṃ, virūpaṃ  
vā sīdanaṃ **visīdanaṃ**. Aññaṃ visayaṃ agantvā ñātibyasanādīsu virūpo  
āsaṅgo tattheva avabandhatā **byāsatti**. Nitthunanakaraṇato **nitthunanaraso**.  
Visīdanaṃ **visādo**.

Sayaṃ na dukkho dosattā  
saṅkhārakkhandhapariyāpannadhammantarattā vā. Ye pana domanassameva  
upāyāsoti vadeyyuṃ, te “upāyāso tīhi khandhehi ekenāyatanena ekāya  
dhātuyā sampayutto, ekena khandhena ekenāyatanena ekāya dhātuyā kehici  
sampayutto”ti<sup>2</sup> imāya pāliyā paṭikkhipitabbā. Visādappattiyā  
sukhadukkhaṅkāraṇaṃ agaṇayitvā dukkhaṭṭhānādīni karontānaṃ upāyāso  
kāyikadukkhaṃ vattu hoti, visādanavaseneva ñātivināsādīni cintentānaṃ  
domanassassa. Attano pavattikkhaṇeyeva upāyāso domanassasampayogato  
cittaṃ paridahati, avipphārikatākaraṇavasena kāyaṃ visādeti,  
tadubhayakaraṇeneva tato paraṃ taṃnimittaṃ kāyikaṃ cetasaṅka  
adhimattaṃ dukkhaṃ janayatīti dukkho vutto.

### Appiyasampayoganiddesavaṇṇanā

199. **Na appiyanti**ti na gamiyanti, na pavesīyantīti attho. **Anatthanti**  
byasanaṃ, dukkhaṃ vā. **Ahitanti** tassa hetuṃ. Dutiye atthavikappe atthaṃ  
na

1. Luthanti (?)

2. Abhi 3. 46 piṭṭhe.

kāmentīti **anattakāmā**ti-ādi asamatthasamāsoṇi yojito. “Asūriyapassāni mukhāni”ti-ādīsu viya hi yena samāso, na tassāyaṃ paṭisedhako a-kāroti. Yasmiṃ kismiñci nibbhaye yogakkhema-saddo niruḷho dukkhayogato khemattā.

**Saṅgati**-ādīsu saṅkhāravasena yaṃ labbhati, taṃ gahetabbaṃ. Na hi saṅkhārānaṃ ṭhānanisajjādayo bhojanādikiccesu vā sahakaraṇaṃ vijjatīti pacchimadvayaṃ tadatthavasena labbhatīti na sakkā vattunti. **Yaṃ labbhatīti** vā yaṃ atthajātaṃ labbhatīti attho. Tena yathā labbhati saṅgati-ādīsu attho, tathā yojetabbo. Puggalassa hi saṅgati gantvā saṅkhārehi saṃyogo hoti, āgatehi ca tehi, puggalassa ca attano ṭhānādīsu saṅkhārehi sahabhāvo hoti, sabbakiriyaṃ ca missībhāvoti. **Anatthabhāvo** upaddavabhāvo.

Aniṭṭhānaṃ āpāthagamanamattaṃ taṃgahaṇamattaṃca **appiyasampayogo**, na pana pathaviphassādayo viya appiyasampayogo nāma eko dhammo atthīti āha “so atthato eko dhammo nāma natthī”ti. Aniṭṭhāni kaṇṭakādīni amittā ca usu-ādīhi vijjhanādiddukhaṃ uppādentī.

**Idhā**ti imasmiṃ loke dukkhaṃ hotīti vā idha imasmiṃ dukkhasaccaniddese dukkho vuttoti vā yojetabbaṃ.

### Piyavippayoganiddesavaṇṇanā

200. **Minantīti** nāḷiyādīsu dhaññaṃ viya anto pakkhipanti, na bahi karontīti attho. **Amā**-saddo sahabhāvādīpako. **Ñāyanti vā** ajjhattikā-icceva. **Ñātibyasanādīko** hutvā upaṭṭhātīti **byasanapaccupaṭṭhāno**. Sokuppādaneneva sarīraṃ sosenti, kisaṃ karonti, akisampi nirojatākaraṇena milāpentī, tato ca kāyikaṃ dukkhaṃ uppajjatīti taduppādakatā vuttā.

**Sokasarasamappitā**ti etena cetasikadukkhaṃ dasseti, **vitujjantīti** etena kāyikaṃ dukkhaṃ.

### Icchāniddesavaṇṇanā

201. Yasmiṃ kāle jātiyā na āgantabbam, taṃ kālaṃ gahetvā āha “**parinibbutesu ca vijjamānaṃ jātiyā anāgamanan**”ti. **Yampī**ti yenapīti attho vutto. Yadāpi pana **yam**-saddo “icchan”ti etaṃ apekkhati, tadāpi alābhaviṣiṭṭhā icchā vuttā hoti. Yadā “na labhatī”ti etaṃ apekkhati, tadā icchāviṣiṭṭho alābho vutto hoti. So panatthato añño dhammo natthi, tathāpi alabbhaneyya-icchāva vuttā hoti. Apāpuṇitabbesu pavattattā eva “**appattipaccupaṭṭhānā**”ti vuttā. Yattha hi sā icchā pavattā, taṃ vatthum apāpuṇantī hutvā gayhatīti.

**Chinnabhinnagaṇenā**ti nillajjena dhuttagaṇena, kappāṭikagaṇena vā.

**Vighātamayanti** cittavighātamayaṃ domanassaṃ cittavighātato eva uppannaṃ ubbandhanajarātisārādikāyikaṃ dukkhaṅca. **Ichchitālābhanti** alabbhaneyya-icchameva vadati.

### Upādānakkhandhaniddesavaṇṇanā

202. Vitthiṇṇassa dukkhassa ettakanti dassanaṃ dukkhassa saṅkhepo, taṃ kātum na sakkā vitthārassa anantattā. Dukkhavitthāragataṃ pana desanāvithhāraṃ pahāya yattha sabbo dukkhavitthāro samodhānaṃ gacchati, tattha desanāya vavatthānaṃ saṅkhepo, taṃ kātum sakkā tādisassa vatthuno sabbhāvā.

Desaṃ jānanto maggakkhāyikapuriso **desako**. Bhagavāpi **dukkhassa desako**. “**Dukkhantadesakenā**”ti vā pāṭho, dukkhantakkhāyikoti attho.

Pāvakādayo yathā indhanādīni bādhenti, evaṃ **bādhayamānā**. **Māraṇantikadukkhābhighātenā**ti iminā atipākaṭena jātijarādukkhavighātajasokādayo dasseti. **Tatoti** paridevato uddhaṃ. Kaṇṭha sosādi sandhi bandhacchedanādi janaka dhātukkhobha samāyogato **kāyassa ābādhanadukkhāṃ dukkhāṃ**. **Yesu kesucīti** tissassa vā phussassa vā upādānakkhandhesu sabbampi cakkhurogādidukkhāṃ sabbasattagataṃ evaṃpakāramevāti saṅkhipitvā dassentoti attho.

Dukkhasaccaniddesavaṇṇanā niṭṭhitā.

## 2. Samudayasaccaniddesavaṇṇanā

203. Uttarapadalopam katvā “**punabbhavakaraṇam punobbhavo**”ti āha. “Manosamphasso”ti ettha mano viya ca purimapadassa okārantatā daṭṭhabbā. Atha vā sīlaṭṭhena ika-saddena gamiyatthattā kiriyāvācakassa saddassa adassanam daṭṭhabbam yathā “apūpabhakkhanasīlo apūpiko”ti<sup>1</sup>. “Taddhitā” iti bahuvacananiddesā vicittatā vā taddhitānam abhidhānalakkhaṇatā vā “punabbhavam detī”ti-ādīsu atthesu ponobbhavikasaddasiddhi daṭṭhabbā. Tattha kammahajātā punabbhavam deti, kammahāyabhūtā tadasahajātā punabbhavāya samvattati duvidhāpi punappunam bhava nibbatteti. Tenevāha “**punabbhavassa dāyikāpi**”ti-ādi. **Ponobbhavikāyevāti nāmam labhatī**ti punabbhavam dāyikāpi adāyikāpi punabbhavam deticceva ponobbhavikāti samānavipākāti nāmam labhati samānasabhāvattā tadānubhāvattā ca. Evaṃ itaresu daṭṭhabbam. Tattha upadhimi yathānibbatte attabhāve vipaccanakammaṃ etissāti **upadhivepakkā**. Nandanatṭhena **nandī**, rañjanatṭhena **rāgo**. Yo ca nandirāgo, yā ca taṇhā, ubhayametaṃ ekattham, byañjanameva nānanti taṇhā “**nandirāgena saddhim atthato ekattam gatā**”ti vuttā. Rāgasambandhena “**uppannassā**”ti vuttam. Rūpārūpabhavarāgo visum vakkhatīti kāmabhava eva bhavapatthanā-uppatti vuttāti veditabbā.

Tasmim tasmim piyarūpe paṭhamuppattivasena “**uppajjati**”ti vuttā, punappunam pavattivasena “**nivisati**”ti, pariyuṭṭhānānusayavasena vā uppattinivesā yojetabbā. **Sampattiyanti** manussasobhagge devatte ca. **Attano cakkhunti** savatthukam cakkhumāha, sapaśadam vā maṃsapiṇḍam. **Vippasannapañcapasādanti** parisuddhanīlapītalohitakaṇha-odātavaṇṇapasadam. **Rajatapanālikam viya** chiddam abbhantare odātattā. **Pāmaṅgasuttam viya** lambakaṇṇabaddham. Tuṅgā uccā dīghā nāsikā **tuṅganāsikā**, evam **laddhavohāram** attano **ghānam**. “Laddhavohārā”ti vā pāṭho. Tasmim sati tuṅgā nāsikā yesam, te **tuṅganāsikā**. Evaṃ **laddhavohārā** sattā attano ghānanti yojanā kātabbā. **Jivham -pa- maññanti** vaṇṇa saṅghānato kiccato ca. **Manam -pa- ulāram maññanti** atītādi-atthavicinanasamattham. **Attanā paṭiladdhānti** ajjhataṅca

1. Asūpabhakkhanasīlo āsūpikoti (Ka) visuddhimaggamahāṭīkāyam indriyasaccaniddesavaṇṇanāyam passitabbam.

sarīragandhādīni bahiddhā ca vilepanagandhādīni. **Uppajjamānā uppajjati** yadā uppajjamānā hoti, tadā ettha uppajjati sāmāññena gahitā uppādakiriya lakkhaṇabhāvena vuttā, visayavisiṭṭhā lakkhitabbabhāvena. Na hi sāmāññavisesehi nānattavohāro na hotīti. **Uppajjamānāti** vā anicchito uppādo hetubhāvena vutto. **Uppajjati** nicchito phalabhāvena “yadi uppajjamānā hoti, ettha uppajjati”ti. So hi tena upayojito viya hoti.

Samudayasaccaniddesavaṇṇanā niṭṭhitā.

### 3. Nirodhasaccaniddesavaṇṇanā

204. **Anūhatehi** anuddhate, appahīneti attho.

Sīho vedhake paṭipajjati, na usumhi, suvāno leḍḍumhi paṭipajjati, na pahārake. Khayagamanavasena **virajjati**, appavattigamanavasena **nirujjhati**. Anapekkhatāya cajanavasena hānivasena ca **cajīyati**, puna yathā na pavattati, tathā dūrakhipanavasena **paṭinissajjīyati**, bandhanabhūtāya mocanavasena **muccati**, asaṅkilesavasena **na allīyati**. Āyūhanam samudayo, tappaṭipakkhavasena **anāyūhanam**.

**Apaññattinti** apaññāpanam, “titta-alābu atthi”ti vohārābhāvam vā. Titta-alābuvalliyā appavattim icchanto puriso viya maggo daṭṭhabbo, tassa tassā appavattinnacittassa mūlacchedanam viya maggassa nibbānārammaṇassa taṇhāpahānam. Tadappavatti viya taṇhāya appavattibhūtam nibbānam daṭṭhabbam. Dutiyūpamāya dakkhiṇadvāram viya nibbānam, coraghātakā viya maggo daṭṭhabbo, purimā vā upamā maggena niruddhāya piyarūpasātarūpesu niruddhāti vattabbatādassanattham vuttā, pacchimā nibbānam āgamma niruddhāyapi.

Nirodhasaccaniddesavaṇṇanā niṭṭhitā.

#### 4. Maggasaccaniddesavaṇṇanā

205. **Aññamaggapaṭikkhepanatthanti** titthiyehi kappitassa maggassa dukkhanirodhagāminipaṭipadābhāvaṃ paṭikkhepetunti attho, aññassa vā maggabhāvapaṭikkhepo **aññamaggapaṭikkhepo**. Puggalassa ariyabhāvakarattā ariyaṃ karotīti **ariyo**, ariyaphalapaṭilābhakarattā ariyaṃ labhāpeti janetīti **ariyo**. Attano kiccavasena phalavasena ca ariyanāmalābho eva vuttoti daṭṭhabbo. Aṭṭha aṅgāni assāti aññapadatthasamāsaṃ akatvā **“aṭṭhaṅgāni assa santīti aṭṭhaṅgiko”**ti padasiddhi daṭṭhabbā.

Caturaṅgasamannāgatā vācā janam saṅgaṇhātīti tabbipakkhaviratisabhāvā sammāvācā bhedakaramicchāvācāpahānena jane sampayutte ca pariggaṇhanakiccavatī hotīti **“pariggahalakkhaṇā”**ti vuttā. Yathā cīvarakammādiko kammanto ekaṃ kātabbāṃ samuṭṭhāpeti nipphādeti, taṃtaṃkiriyānipphādako vā cetanāsaṅkhāto kammanto hatthapādacalanādikaṃ kiriyāṃ samuṭṭhāpeti, evaṃ sāvajjakattabbakiriyāsamuṭṭhāpakamicchākammantappahānena sammākammanto niravajjasamuṭṭhāpanakiccavā hoti, sampayuttadhamme ca samuṭṭhāpento eva pavattatīti **“samuṭṭhāpanalakkhaṇo”**ti vutto. Kāyavācānaṃ khandhasantānassa ca saṃkilesabhūtamicchā-ājīvappahānena sammā-ājīvo **“vodāpanalakkhaṇo”**ti vutto.

**Attano paccanīkakilesā** diṭṭhekaṭṭhā avijjādayo. **Passatīti** pakāsetīti attho. Teneva hi aṅgena tattha paccavekkhaṇā pavattatīti. **Tathevāti** attano paccanīkakilesehi saddhinti attho.

**Kiccatoti** pubbabhāgehi dukkhādiññāṇehi kattabbakiccassa idha nipphattito, imasseva vā ñāṇassa dukkhādippakāsanakiccato. **Tīṇi nāmāni labhati** kāmasaṅkappādippahānakiccanipphattito. **Sikkhāpadavibhaṅge**<sup>1</sup> “viraticetanā sabbe sampayuttadhammā ca sikkhāpadāni”ti vuttāti tattha padhānānaṃ viraticetanānaṃ vasena **“viratiyopi honti cetanāyopi”**ti āha. Musāvādādīhi viramaṇakāle vā viratiyo subhāsītādivācābhāsanādīkāle ca cetanāyo yojetabbā, **maggakkhaṇe**

1. Abhi 2. 299 piṭṭhe.

**viratīyova** cetanānaṃ amaggaṅgattā ekassa ñāṇassa dukkhādiñāṇatā viya ekāya viratīyā musāvādādiviratibhāvo viya ca ekāyacetanāya sammāvācādikiccattayasādhanasabhāvābhāvā sammāvācādiabhāvāsiddhito, taṃsiddhiyañca aṅgattayattāsiddhito ca.

**Pubbabhāgepi maggakkhaṇepi sammāsamādhi evāti** yadipi samādhi-upakāraṅkānaṃ abhiniropanānumajjanasampiyāyanabrūhanasantasukhānaṃ vitakkādīnaṃ vasena catūhi jhānehi sammāsamādhi vibhatto, tathāpi vāyāmo viya anuppannākusalānuppādanādicatuvāyāmakiccaṃ, sati viya ca asubhāsukhāniccānattesu kāyādīsu subhādisaññāpahānacatusatikiccaṃ, eko samādhi catukkajjhānasamādhikiccaṃ na sādhetīti pubbabhāgepi paṭhamajjhānasamādhicitte jhānasamādhi paṭhamajjhānasamādhi eva maggakkhaṇepi, tathā pubbabhāgepi catutthajjhānasamādhicitte jhānasamādhi catutthajjhānasamādhi eva maggakkhaṇepīti attho.

Vacībhedassa upakāraṅko vitakko sāvajjānavajjavacībhedanivattanapavattanakarāya sammāvācāyapi upakāraṅko evāti “**svāyan**”ti-ādimāha. Vacībhedanīyāmikā **vācā** kāyikakiriyāniyāmakassa sammākammantassa **upakārikā**. **Idaṃ vīriyanti** catusammappadhānavīriyaṃ. **Gatīyoti** nipphattiyo, kiccādisabhāve vā. **Samanvesitvāti** upadhāretvā.

Purimāni dve saccāni uggaṇhitvāti sambandho. **Itthaṃ kantanti** nirodhamaggesu ninnabhāvaṃ dasseti, na abhinandanānaṃ, tanninnabhāvoyeva ca tattha kammakaraṇaṃ daṭṭhabbaṃ.

**Kiccatoti** pariññādito. **Ārammaṇapaṭivedhoti** sacchikiriyāpaṭivedhamāha. **Sabbampi paṭivedhañāṇaṃ lokuttaranti** kasmā vuttaṃ, nanu uggaḥādīpaṭivedho ca paṭivedhova, na ca so lokuttaroti? Na, kevalena paṭivedha-saddena uggaḥādīpaṭivedhānaṃ avacanīyattā, paṭivedhanimittattā vā uggaḥādīvasena pavattaṃ dukkhādisu pubbabhāge ñāṇaṃ “paṭivedho”ti vuttaṃ, na paṭivedhattā, paṭivedhabhūtaṃ pana ñāṇaṃ sandhāyāha “**sabbampi paṭivedhañāṇaṃ lokuttaran**”ti. Uggaḥaparipucchāñāṇānipi savanañāṇe eva avarodhaṃ gacchantīti “**savanadhāraṇasammasanañāṇaṃ lokiyaṇ**”ti tividhameva ñāṇamāha. Uggaḥādīhi saccapariggaṇhanaṃ **pariggaho**.

**Payogoti** kiriyā, vāyāmo vā. Tassa mahantatarassa-icchitabbatāṃ dukkarataratañca upamāhi dasseti “**bhavaggagahaṇatthan**”ti-ādinā.

**Padaghātanti** ettha gatamaggo “padan”ti vuccati. Yena cupāyena kāraṇena kāmavitakko uppajjati, so tassa gatamaggoti tassa ghāto **padaghāto**. **Ussukkāpetvāti** uddham uddham santivisesayuttam katvā, vaḍḍhetvāti attho.

**Pāliyaṃ vibhattesūti** katarapāliyaṃ? **Dhammasaṅghe** tāva aṭṭha kasiṇāni dasa asubhā cattāro brahmavihārā cattāri āruppāni vibhattāni, **āgamesu** dasa anussatiyo āhāre paṭikūlasaṅṅā catudhātuvaṅṅatthānanti imāni cāti tattha tattha vibhattam. **Imesu tīsūti** kāmādīsū tīsū ṭhānesu.

**Micchāvācāsankhātāyāti** etena ekāya cetanāya pahātabba-ekattam dasseti. Idha ariyasāvako sakalyāṇaputhujjanako sekkho. **Kāyadvāravītikkamāti** ājīvahetukato paṇātipātādito visum visum viramaṇam yojetabbam.

**Ayam panassāti** maggabhāvena catubbidhampi ekattena gahetvā assa maggassa ayam jhānavasena sabbasadisabbāsadisa-ekaccasadisatā **viseso**. **Pādakajjhānaniyāmena hotīti** idha pādakajjhānaniyāmam dhuram katvā āha, **aṭṭhasāliniyam** pana vipassanāniyāmam tattha sabbavādāvirodhato, idha pana sammasitajjhānapuggalajjhāsayaṅṅavādanivattanato pādakajjhānaniyāmam. Vipassanāniyāmo pana sādharmaṇattā idhāpi na paṭikkhittoti daṭṭhabbo. Aññe cācariyavādā vakkhamānā vibhajitabbāti yathāvuttameva tāva pādakajjhānaniyāmam vibhajanto āha “**pādakajjhānaniyāmena tāvā**”ti.

**Āruppe catukkapañcaka -pa- vuttam** aṭṭhasāliniyanti adhippāyo. Nanu tattha “āruppe tikacatukkajjhānam uppajjati”ti vuttam, na “catukkapañcakajjhānan”ti? Saccam, yesu pana samsayo atthi, tesam uppattidassanena, tenatthato catukkapañcakajjhānam uppajjati vuttameva hotīti evamāhāti veditabbam. Samudāyañca apekkhitvā “**tañca lokuttaram, na lokiyan**”ti āha. Catutthajjhānameva hi lokiyaṃ tattha uppajjati, na catukkam pañcakañcāti.



**Ettha kathanti** pādakajjhānassa abhāvā katham daṭṭhabbanti attho.

**Tamjhānikāva tassa tattha tayo maggā uppajjanti** tajjhānikam paṭhamaphalādim pādakam katvā uparimaggabhāvanāyāti adhippāyo, tikacatukkajjhānikam pana maggam bhāvetvā tathuppannassa arūpajjhānam tajjhānikam phalañca pādakam katvā uparimaggabhāvanāya aññajjhānikāpi uppajjantīti jhānaṅgādinīyamikā pubbābhisaṅkhārasamāpatti pādakam, na sammasitabbāti phalassapi pādatatā daṭṭhabbā.

Dukkhañāṇādīnam rūpādichaḷārammaṇattā nekkhammasaṅkappādīnam kasiṇāditaṃtaṃkusalārammaṇārammaṇattā sammāvācādīnam aṅgānam taṃtaṃvīramitabbādi-ārammaṇattā “**yathānurūpan**”ti āha. **Tadanurūpoti** avipparisāra karasīlam vāyāmassa visesapaccayoti sīlanurūpatā vāyāmassa vuttā sampayuttassapi, sampayuttasseva ca vacanato “sīlabhūmiyam patitṭhitassā”ti avatvā “**patitṭhamānassā**”ti vuttam. **Cetaso asamosoti** “ekārakkho”ti ettha vuttena satārakkhena cetaso rakkhitatā. Tenāha “**iti -pasuvihitacittārakkhassā**”ti.

Āsavakkhayañāṇassa vijjābhāvo vuttoti āsavakkhayaṅkhatē magge tīhi khandhehi saṅgahite paññākkhandho **vijjā**, sīlassa catunnañca jhānānam caraṇabhāvo vuttoti itare dve khandhā **caraṇam**. Yanti etena nibbānam gacchantīti yānam, vipassanā va yānam **vipassanāyānam**. Sīlam samādhissa visesapaccayo, samādhi vipassanāyāti samathassa upakāratā sīlakkhandho ca **samathayānena** saṅgahito. **Vipassanāyānena** kāmesu ādīnavam vibhāvento samathayānena nirāmisam jhānasukham apariccajanto antadvayakummaggam vivajjeti. Paññā viya mohassa, sīlasamādhayo ca dosalobhānam ujuvipaccanīkā adosālobhehi sādhetabbattā. Sīlasamādhipaññāyogato **ādimajjhāpariyosānakalyāṇam**. Sīlādīni hi sāsanassa ādimajjhāpariyosānanti. Yasmiṃ tṭhito maggaṭṭho phalaṭṭho ca ariyo hoti, tam maggaphalasaṅkhatam khandhattayasaṅgahitam sāsanam **ariyabhūmi**.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

206-214. **Ariyasacca**-saddo samudaye vattamāno pariññeyyabhāvarahite ekantapahātabbe taṇhāsankhāte samudaye pavattati, na pahātabbapariññeyyesu avasesakilesāvasesākusalesu appahātabbesu ca sāsavakusalāmūlāvasesasāsavakusalesūti sappadeso tattha samudayo hoti, kevalaṃ saccasadde nippadesoti āha “**nippadesato samudayaṃ dassetun**”ti. Dukkhanirodhā pana ariyasaccadesanāyaṃ dhammato nippadesā eva. Na hi tato añño dhammo atthi, yo saccadesanāyaṃ dukkhaṃ nirodhoti ca vattabbo siyā, maggopi aṭṭhaṅgikapañcaṅgikavāresu apubbo natthi, tasmā samudayameva “nippadesato dassetun”ti vadati tassa sabbattha tīsupi vāresu apubbassa dassitattā. Apubbasaṃsamudayadassanattāyapi hi saccadesanāyaṃ “tattha katamo dukkhasamudayo? Taṇhā”ti vacanaṃ kevalāya taṇhāya sacca-saddassa pavattidassanattanti. Desanāvasena pana taṃ taṃ samudayaṃ ṭhapetvā dukkhaṃ tassa tassa pahānavasena nirodho aṭṭhaṅgikapañcaṅgikasabbalokuttarakusalavasena maggo ca ariyasaccadesanāyaṃ na vuttoti dukkhādīni ca tattha sappadesāni dassitāni hontīti tāni ca nippadesāni dassetuṃ saccadesanā vuttāti vattuṃ vaṭṭati. **Paccayasāṅkhātanti** kammakilesavasena jāti-ādidukkhassa mūlabhūtanti attho.

**Nirodhasaccam -pa- pañcahākārehi niddiṭṭhanti** ariyasaccadesanato saccadesanāya viśesaṃ dasseti. Tattha “tiṇṇannañca kusalamūlānaṃ avasesānañca sāsavakusalānaṃ pahānaṃ”ti idaṃ tesāṃ paccayānaṃ avijjātaṇhā-upādānaṃ pahānavasena, avijjādīsu vā pahīnesu tesāṃ appavattivasena vuttanti veditabbaṃ. Na hi kusalā pahātabbāti. **Pahānanti** ca maggakiccavasena tadadhigamaṇīyaṃ nirodhaṃ dasseti, nirodhasseva vā taṇhādīnaṃ appavattibhāvo **pahānanti** daṭṭhabbaṃ.

Yadipi “pubbeva kho panassa kāyakammaṃ vacīkammaṃ ājīvo suparisuddho hoti, evamassāyaṃ ariyo aṭṭhaṅgiko maggo bhāvanāpāripūriṃ gacchatī”ti<sup>1</sup> lokuttaramaggakkaṇe aṭṭhaṅgikamaggapāripūriyā upanissayadassanattam

---

1. Ma 3. 337 piṭṭhe.

idaṃ vuttaṃ, tathāpi “pubbeva kho panā”ti vacanaṃ kāyakammādisuddhiyā dūratarupanissayataṃ, cakkhādīsu asārajantassa asaṃyuttassa asammūlhasa ādīnavānupassino viharato tāyeva vuṭṭhānagāminiyā vipassanāya āyatim pañcupādānakkhandhesu apacayaṃ gacchantesu sabbasaṅkhāresu vivaṭṭanavasena, ponobbhavikataṅhāya pahīyamānāya kilesadūrībhāvena, kāyikacetāsikadarathasantāpapaṇiṭāhesu pahīyamānesu passaddhakāyacittavasena kāyikacetāsikasukhe paṭisaṃvediyamāne “yā tathābhūtaṃ diṭṭhi, sāssa hoti sammādiṭṭhi”ti-ādīnā<sup>1</sup> vuttānaṃ vuṭṭhānagāminivipassanākkhaṇe pavattānaṃ pañcannaṃ sammādiṭṭhādīnaṃ aṅgānaṃ āsannatarupanissayatañca dasseti āsannatarupanissayavasena pañcaṅgikaṃ maggaṃ sukhaṃ bujjhantānaṃ puggalānaṃ ajjhāsayaṃvasena pañcaṅgikamaggadesanāya pavattataṃ dīpeti. Tenāha “**pubbeva kho -pa-suparisuddho hotīti vacanato**”ti-ādi. Evamidam **vacanatotī** nissakkavacanaṃ desanupāyassa nāpakanidassanaṃ hoti, **vacanatotī** vā attano vacanānurūpaṃ pañcaṅgikopi maggo paṭipadā evāti bhagavatā desitoti attho. Katthāti? Devapure, tasmā taṃ desitanayaṃ dassetuṃ pañcaṅgikavāropi niddiṭṭho dhammasaṅgāhakehi. Atha vā “pubbeva kho panassā”ti vacaneneva ajjhāsayaṃvisesakāraṇanidassakena puggalajjhāsayaṃvasena pañcaṅgiko maggopi paṭipadā evāti desito hotīti āha “**pubbeva kho pana -pa- vacanato pana -pa- desito**”ti, tasmā taṃ suttante desitanayaṃ dassetuṃ pañcaṅgikavāropi niddiṭṭho bhagavatā devapureti attho.

Jhānehi desanāpaveso, bhāvanāpaveso vā **jhānābhīniveso**. Ekekasmim koṭṭhāse catunnaṃ catunnaṃ nayasahassānaṃ dassanaṃ gaṇanāsukhatthanti veditabbaṃ. Yathā pana pāḷi ṭhitā, tathā ekekissā paṭipadāya suññatādīsu ca pañca pañca koṭṭhāse yojetvā pāḷigamaṇaṃ katanti viññāyati. Tattha aṭṭhaṅgikavāre dutiyajjhānādīsu tasmim samaye sattaṅgiko maggo hotīti yojanā kātabbā, sabbasaṅgāhikavāre ca yathā vijjamaṇadhammavaseṇāti.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

215. **Evaṃ purimesupi dvīsūti** kasmā vuttaṃ, nanu suttantabhājanīye dukkhanirodhagāminipaṭipadāniddese lokiyalokuttaramissako maggo vutto. Tassa hi aṭṭhakathāyaṃ<sup>1</sup> “catūsu saccesu uggahādivasena pubbhāgañāṇuppattiṃ sandhāya idaṃ ‘dukkhe ñāṇaṃ’ti-ādi vuttaṃ, paṭivedhakkhaṇe pana ekameva ñāṇaṃ hoti”ti sammādiṭṭhiyā, tathā sammāsaṅkappādīnaṅca lokiyalokuttaramissakatā dassitā “apicesā sammādiṭṭhi nāma pubbhāge nānākkhaṇā nānārammaṇā hoti, maggakkhaṇe<sup>2</sup> ekakkhaṇā ekārammaṇā”ti-ādinā cāti? Saccametaṃ, evaṃ pana āgamanavasena tathāpi catusaccakammaṭṭhānadassanādīmukhena ariyova aṭṭhaṅgiko maggo dassito. Evaṅca katvā “paṭivedhakkhaṇe pana ekameva ñāṇaṃ hoti”ti maggañāṇassa ekasseva dukkhañāṇādītā, “maggakkhaṇe pana -pa- ekova kusalasaṅkappo uppajjati, ayaṃ sammāsaṅkappo nāmā”ti-ādinā maggasaṅkappādīnaṃ sammāsaṅkappādītā ca niddhāritā, pāliyaṅca aṭṭhaṅgikaṃ maggaṃ uddisitvā tameva niddisitum “dukkhe ñāṇaṃ”ti-ādi vuttaṃ. Tena suttantabhājanīyepi dvinnaṃ lokiyatā, dvinnaṃ lokuttaratā vuttā “**evaṃ purimesupi dvīsūti** etenāti.

Saccavibhaṅgavaṇṇanā niṭṭhitā.

---

1. Abhi-Ṭṭha 2. 110 piṭṭhe. 2. Maggakāle (Aṭṭhakathāyaṃ) Abhi-Ṭṭha 2. 107 piṭṭhe.

## 5. Indriyavibhaṅga

### 1. Abhidhammabhājanīyavaṇṇanā

219. **Cakkhudvāre indaṭṭham kāretīti** cakkhudvārabhāve taṃdvārikehi attano indabhāvaṃ paramissarabhāvaṃ kārayatīti attho. Tañhi te rūpaggahaṇe attānaṃ anuvatteti, te ca taṃ anuvattantīti. Esa nayo itaresupi. Yena taṃsamaṅgīpuggalo taṃsampayuttadhammā vā aññātāvino honti, so aññātāvibhāvo pariniṭṭhitakiccajānaṃ.

**Katthaci dveti** “dvinnaṃ kho bhikkhave indriyānaṃ bhāvitattā bahulīkatattā khīṇāsavo bhikkhu aññaṃ byākaroti -pa- ariyāya ca paññāya ariyāya ca vimuttiyā. Yā hissa bhikkhave ariyā paññā, tadassa paññindriyaṃ. Yā hissa ariyā vimutti, tadassa samādhindriyaṃ”<sup>1</sup> ti dve, “tīṇṇaṃ kho bhikkhave indriyānaṃ bhāvitattā bahulīkatattā piṇḍolabhāradvājena bhikkhunā añña byākatā -pa- satindriyassa samādhindriyassa paññindriyassa”<sup>2</sup> ti, “tīṇimāni bhikkhave indriyāni. Katamāni tīṇi? Anaññātāññassāmītindriyaṃ aññindriyaṃ aññātāvindriyaṃ”<sup>3</sup> ti, “tīṇimāni -pa- itthindriyaṃ purisindriyaṃ jīvitindriyaṃ”<sup>4</sup> ti ca evamādisu tīṇi, “pañcimāni brāhmaṇa indriyāni nānāvisayāni -pa- cakkhundriyaṃ -pa- kāyindriyaṃ”<sup>5</sup> ti, “pañci -pa- sukhindriyaṃ -pa- upekkhindriyaṃ”<sup>6</sup> ti, “pañci -pa- saddhindriyaṃ -pa- aññindriyaṃ”<sup>7</sup> ti ca evamādisu pañca. Tattha suttante dukādivacanaṃ nissaraṇupāyādibhāvato dukādīnaṃ. Sabbāni pana indriyāni abhiññeyyāni, abhiññeyyadhammadesanā ca abhidhammoti idha sabbāni ekato vuttāni.

Khīṇāsavassa bhāvabhūto hutvā uppattito “**khīṇāsavasseva uppajjanato**”<sup>1</sup> ti vuttaṃ.

Liṅgeti gameti ñāpetīti liṅgaṃ, liṅgīyati vā etenāti liṅgaṃ, kiṃ liṅgeti, kiñca vā liṅgīyatīti? Indaṃ, indo vā, indassa liṅgaṃ indaliṅgaṃ, indaliṅgassa attho taṃsabhāvo **indaliṅgaṭṭho**, indaliṅgameva

1. Saṃ 3. 195 piṭṭhe.

2. Saṃ 3. 197 piṭṭhe.

3. Saṃ 3. 180 piṭṭhe.

4. Saṃ 3. 179 piṭṭhe.

5. Saṃ 3. 191 piṭṭhe.

6. Saṃ 3. 183 piṭṭhe.

7. Saṃ 3. 177, 180 piṭṭhesu.

vā indriya-saddassa attho **indaliṅgaṭṭho**. Sajjitaṃ uppāditanti siṭṭhaṃ, indena siṭṭhaṃ **indasiṭṭhaṃ**. **Juṭṭhaṃ** sevitāṃ. Kammasaṅkhātassa indassa liṅgāni, tena ca siṭṭhānīti kammajāneva yojetabbāni, na aññāni. Te ca dve atthā kamme eva yojetabbā, itare ca bhagavati evāti “**yathāyogan**”ti āha. **Tenāti** bhagavato kamma ca indattā. **Etthāti** etesu indriyesu. **Ullīgenti** pakāsentī phalasampattivipattīhi kāraṇasampattivipatti-avabodhato. “So taṃ nimittaṃ āsevati”ti-ādīsu<sup>1</sup> gocarakaṇampi āsevanāti vuttāti āha “**kānici gocarāsevanāyā**”ti. Tattha sabbesaṃ gocarikātabbattepi “kānici”ti vacanaṃ avipassitabbānaṃ bahulīmanasikaraṇena anāsevanīyattā.

Paccavekkhaṇāmattameva hi tesu hotīti. “Tassa taṃ maggaṃ āsevato”ti-ādīsu<sup>2</sup> bhāvanā “āsevanā”ti vuttāti bhāvetabbāni saddhādīni sandhāyāha “**kānici bhāvanāsevanāyā**”ti. **Ādhipaccaṃ** indriyapaccayabhāvo, asati ca indriyapaccayabhāve itthipurisindriyānaṃ attano paccayavasena pavattamānehi taṃsahitasantāne aññākārena anuppajjamānehi liṅgādīhi anuvattanīyabhāvo, imasmiñcatthe indanti paramissariyaṃ karonticceva indriyāni. Cakkhādīsu dassitena nayena aññesaṅca tadanuvattīsu ādhipaccaṃ yathārahaṃ yojetabbānaṃ.

**Heṭṭhāti** aṭṭhasālīniyaṃ<sup>3</sup>. **Amoho eva**, na visuṃ cattāro dhammā, tasmā amohassa paññindriyapade vibhāvitāni lakkhaṇādīni tesaṅca veditabbānīti adhippāyo. **Sesāni** aṭṭhasālīniyaṃ lakkhaṇādīhi **sarūpeneva āgatāni**. Nanu ca sukhindriyadukkhindriyānaṃ tattha lakkhaṇādīni na vuttānīti? Kiñcāpi na vuttāni, somanassadomanassindriyānaṃ pana vuttalakkhāṇādivasena viññeyyato etesampi vuttāneva honti. Kathaṃ?

Iṭṭhaphoṭṭhabbānubhavanalakkhaṇaṃ sukhindriyaṃ,  
iṭṭhākārasambhogarasaṃ, kāyikassādapaccupaṭṭhānaṃ,  
kāyindriyapadaṭṭhānaṃ. Anīṭṭhaphoṭṭhabbānubhavanalakkhaṇaṃ  
dukkhindriyaṃ, anīṭṭhākārasambhogarasaṃ, kāyikābādhapaccupaṭṭhānaṃ,  
kāyindriyapadaṭṭhānanti. Ettha ca iṭṭhānīṭṭhākārāneva ārammaṇānaṃ  
sambhogarasatā veditabbā, na viparītepi iṭṭhākārena anīṭṭhākārena ca  
sambhogarasatāti.

1. Am 3. 217 piṭṭhe.

2. Am 1. 475 piṭṭhe.

3. Abhi-Ṭṭha 1. 349 piṭṭhe.

Sattānaṃ ariyabhūmiṭṭhābhō bhagavato desanāya sādharāṇaṃ padhānaṃca payoṇanti āha “**ajjhataḍḍhammaṃ pariññāyā**”ti-ādi. Aṭṭhakathāyaṃ itthipurisindriyānantaraṃ jīvitindriyadesanakkamo vutto, so indriyayamakadesanāya sameti. Idha pana indriyavibhaṅge manindriyānantaraṃ jīvitindriyaṃ vuttaṃ, taṃ purimapakchīmānaṃ ajjhataḍḍikabāhirānaṃ anupālakattena tesāṃ majjhe vuttanti veditabbaṃ. Yaṅca kiñci vedayitaṃ, sabbaṃ taṃ dukkhaṃ. Yāva ca duvidhattabhāvānupālakassa jīvitindriyassa pavatti, tāva dukkhabhūtānaṃ etesaṃ vedayitānaṃ anivattīti **ñāpanattham**. Tena ca cakkhādīnaṃ dukkhānubandhatāya pariññeyyataṃ ñāpeti. **Tato anantaraṃ bhāvetabbattāti** bhāvanāmaggasampayuttaṃ aññindriyaṃ sandhāya vuttaṃ. Dassanānantarā hi bhāvanāti.

Satipi purejātāḍḍipaccayabhāve indriyapaccayabhāvena sādhetabbameva kiccaṃ “**kiccaṃ**”ti āha tassa anaññasādharāṇattā indriyakathāya ca pavattattā. Pubbaṅgamabhāvena manindriyassa **vasavattāpanaṃ** hoti, nāññesaṃ. Taṃsāmpayuttānīpi hi indriyāni sādhetabbabhūtāneva attano attano indriyakiccaṃ sādheti cetāsikkattāti. “Sabbattha ca indriyapaccayabhāvena sādhetabban”ti ayaṃ adhikāro anuvattatīti daṭṭhabbo. Anuppādane anupatthambhe ca tappaccayānaṃ tappavattane nimittabhāvo **anuviddhānaṃ**. Chādetvā pharivā uppajjamānā sukhadukkavedanā sahaṇṇe abhibhavivā sayameva pākaṭā hoti, sahaṇṇā ca tabbasena sukhadukkhabhāvappattā viyāti āha “**yathāsakaṃ oḷārikākārānupāpanaṃ**”ti. Asantassa apanītassapi akusalatābbipākādisampayuttassa majjhataḍḍikākārānupāpanaṃ yojetabbaṃ, samānaṇṇatīyaṃ vā sukhadukkhehi santapaṇītākārānupāpanaṃca. Pasannapaggahita-upaṭṭhitasamāhitadassanākārānupāpanaṃ yathākkamaṃ saddhādīnaṃ. **Ādi**-saddena uddhambhāgiyasaṃyojanāni gahitāni, maggasāmpayuttasseva ca indriyassa kiccaṃ dassitaṃ, teneva phalasāmpayuttassa taṃtaṃsaṃyojanānaṃyeva paṭippassaddhipahānakiccatā dassitā hotīti. Sabbakatakkiccaṃ aññātāvindriyaṃ aññassa kātabbassa abhāvā amatābhīmukhameva tabbhāvapaccayo ca hoti, na itarāni viya kiccantarapasutaṅca. Tenāha “**amatābhīmukhābhāvapaccayatā cā**”ti.

220. **Evaṃ santepīti** satipi sabbasaṅgāhakatte vīriyindriyapadādīhi saṅgahetabbāni kusalākusalavīriyādīni, cakkhundriyapadādīhi saṅgahetabbāni kālapuggalapaccayādibhedena bhinnāni cakkhādīni saṅgaṇhanticceva **sabbasaṅgāhakāni**, na yassā bhūmiyā yāni na vijjanti, tesam saṅgāhakattāti attho. Tena ca avisesitattā sabbesaṃ sabbabhūmikattagahaṇappasaṅge taṃnivattanena sabbasaṅgāhakavacanaṃ avijjamānassa saṅgāhakattadīpakam na hotīti dasseti.

Abhidhamabhājanīyavaṇṇanā niṭṭhitā.

## 2. Pañhapucchakavaṇṇanā

223. **Idha anābhaṭṭhanti** ekantānārammaṇattena bhāsitaṃ. “**Rūpamissakattā anārammaṇesu rūpadhammesu saṅgahitan**”ti kasmā vuttaṃ, nanu missakattā eva jīvitindriyaṃ anārammaṇesu asaṅgahitaṃ. Na hi aṭṭhindriyā anārammaṇāti vuttāti? Saccametaṃ, jīvitindriya-ekadesassa pana anārammaṇesu rūpadhammesu saṅgahitaṃ sandhāyetaṃ vuttaṃ, arūpakoṭṭhāsena parittārammaṇādītā atthīti siyāpakkhe saṅgahitanti adhippāyo. Arūpakoṭṭhāsena pana parittārammaṇādītā, rūpakoṭṭhāsena ca navattabbatā atthīti missakassa samudāyasseva vasena siyāpakkhe saṅgahitaṃ, na ekadesavasenāti daṭṭhabbaṃ. Na hi anārammaṇaṃ parittārammaṇādibhāvena navattabbaṃ na hotīti. “Rūpañca nibbānañca anārammaṇā, sattindriyā anārammaṇā”ti-ādivacanañca avijjamānārammaṇānārammaṇesu na vattabbesu anārammaṇattā navattabbataṃ dasseti, na sārammaṇasseva navattabbataṃ, navattabbassa vā sārammaṇataṃ. Na hi navattabba-saddo sārammaṇe niruḷho. Yādipi siyā, “tisso ca vedanā rūpañca nibbānañca ime dhammā navattabbā sukhāya vedanāya sampayuttā”ti-ādi na vucceyya, athāpi parittārammaṇādisambandho navattabba-saddo sārammaṇesveva vattati, “dvāyatanā siyā parittārammaṇā”ti-ādiṃ avatvā “manāyatanam siyā parittārammaṇam -pa- appamāṇārammaṇan”tipi, “dhammāyatanam siyā parittārammaṇam -pa- appamāṇārammaṇan”tipi, “siyā anārammaṇan”tipi vattabbaṃ siyā. Na hi pañhapucchake sāvasesā desanā



atthīti. “Aṭṭhindriyā siyā ajjhattārammaṇā”ti ettha ca jīvitindriyassa ākiñcaññāyatanakāle arūpassa rūpassa ca anārammaṇattā navattabbatā veditabbā.

Indriyavibhaṅgavaṇṇanā niṭṭhitā.

## 6. Paṭiccasamuppādavibhaṅga

### 1. Suttantabhājanīya

#### Uddesavāraṇṇanā

225. “Kim vādī bhante sammāsambuddhoti? Vibhajjavādī mahārāja”<sup>1</sup>ti Moggaliputtatissattherena vuttattā sammāsambuddhasāvaka vibhajjavādino. Te hi venayikādibhāvaṃ vibhajja vadanti, cīvarādīnaṃ sevitabbāsevitabbabhāvaṃ vā sassatucchedavāde vā vibhajja vadanti “sassato attā ca loko cā”<sup>2</sup>ti-ādīnaṃ ṭhapanīyānaṃ ṭhapanato rāgādikkhayassa sassatassa rāgādikāyaduccarītādi-ucchedassa ca vacanato, na pana ekamsabyākaraṇīyādayo tayo pañhe apanetvā vibhajjabyākaraṇīyameva vadantīti. Vibhajjavādīnaṃ maṅḍalaṃ samūho **vibhajjavādimaṅḍalaṃ**, vibhajjavādino vā bhagavato parisā **vibhajjavādimaṅḍalanti** vadanti. Ācariyehi vutta-aviparītattadīpanena te **anabbhācikkhantena**. “Avijjā puññāneñjābhisaṅkhārānaṃ hetupaccayo hotī”<sup>3</sup>ti-ādīnaṃ vadanto kathāvattumhi paṭikkhitte puggalavādādike ca vadanto sakasamayāṃ vakkamati nāma, tathā **avokkamantena**. Parasamayāṃ dosāropanabyāpāravirahena **anāyūhantena**. “Idampi yuttaṃ gahetabban”<sup>3</sup>ti parasamayāṃ asampiṇḍentenāti keci vadanti.

“Tathāhaṃ bhagavatā dhammaṃ desitaṃ ājānāmi, yathā tadevidaṃ viññānaṃ sandhāvati saṃsarati anaññaṃ”<sup>2</sup>ti-ādīnaṃ<sup>2</sup> vadanto suttāṃ paṭibāhati nāma, tathā **appaṭibāhantena**. “Tathāhaṃ bhagavatā dhammaṃ desitaṃ ājānāmi, yathā yeme antarāyikā dhammā vuttā bhagavatā, te paṭisevato nālaṃ antarāyāyā”<sup>3</sup>ti<sup>3</sup>, “supinantekato vītikkamo āpattikaro hotī”<sup>3</sup>ti ca evamādiṃ vadanto vinayāṃ paṭilometi nāma, tabbipariyāyena taṃ **anulomentena**. Paṭilomento hi kammantaraṃ bhindanto dhammataṅga vilometi. Suttante vutte cattāro **mahāpadese**, aṭṭhakathāyaṅga vutte suttasuttānuloma-ācariyavāda-attanomatim**mahāpadese olokontena**. Tamolokanena hi

---

1. Vi-Ṭṭha 1. 45 piṭṭhe. 2. Ma 1. 323 piṭṭhe. 3. Ma 1. 182; Vi 2. 177, 183 piṭṭhesu.

sutte vinaye ca santiṭṭhati nātidhāvati. **Dhammanti** paṭiccasamuppādapālīn. **Atthanti** tadattham. Hetuhetuphalāni idha nādhippetāni. “Dukkhādīsu aññāṇam avijjā”ti vuttamattham parivattivā puna “pubbante aññāṇan”ti-ādīhi **aparehipi pariyāyehi niddisantena**. “Saṅkhārā iminā pariyāyena bhavoti vuccanti, taṅhā iminā pariyāyena upādānan”ti-ādinā **niddisantenā**ti vadanti.

**Sattoti** sattasuññatāti vadanti, sattasuññesu vā saṅkhāresu sattavohāro. **Paccayākārameva cāti** paccayākāro eva ca, **ma-kāro** padasandhikaro.

**Tasmāti** vuttanayena atthavaṇṇanāya kātabbattā dukkarattā ca.

**Patiṭṭham nādhigacchāmīti** yattha ṭhitassa vaṇṇanā sukarā hoti, tam nayam attanoyeva nāṇabalena nādhigacchāmīti attho. Nissayam pana ācikkhanto āha “**sāsanam panidan**”ti-ādi. Idha **sāsananti** pāḷidhammamaḥa, paṭiccasamuppādameva vā. So hi anulomapaṭilomādinānādesanāyamaṇḍito abbochinno ajjāpi pavattatīti nissayo hoti. Tadaṭṭhakathāsaṅkhāto ca **pubbācariyamaggoti**.

“Tam suṇātha samāhitā”ti ādarajanane kim payojananti tam dassento āha “**vuttañhetan**”ti-ādi. **Aṭṭhim katvāti** attham katvā, yathā vā na nassati, evam aṭṭhigatam viya karonto aṭṭhim katvā. Pubbakālato aparakāle bhavam **pubbāpariyam**. Paṭhamārambhādito pabhuti khaṇe khaṇe nāṇavisesam kilesakkhayavisesaṅca labhatīti attho.

Kammavipākakilesavaṭṭānam mūlakāraṇattā ādito vuttattā ca avijjā paṭiccasamuppādassa mūlam. Tattha vallyiā mūle diṭṭhe tato pabhuti vallyiā haraṇam viya paṭiccasamuppādassa mūle diṭṭhe tato pabhuti paṭiccasamuppādadesanāti upamāsaṃsandanā na kātabbā. Na hi bhagavato “idameva diṭṭham, itaram adiṭṭhan”ti vibhajanīyam atthi sabbassa diṭṭhattā. Mūlato pabhuti pana vallyiā haraṇam viya mūlato pabhuti paṭiccasamuppādadesanā katātīti idamettha sāmāññamadhippetam, bodhaneyyajjhāsayavasena vā bodhetabbabhāvena mūlādidassanasāmāññaṅca yojetabban.

**Tassāti—**

“Sa kho so bhikkhave kumāro vuddhimanvāya indriyānaṃ paripākamanvāya pañcahi kāmagaṇehi samappito -pa- rajanīyehi, so cakkhunā rūpaṃ disvā piyarūpe rūpe sārājati, apiyarūpe rūpe byāpajati, anupaṭṭhitakāyasatī ca viharati parittacetaso. So taṃ ca cetovimuttim paññāvimuttim yathābhūtaṃ nappajānāti. Yatthassa te uppannā pāpakā akusalā dhammā aparisesā nirujjhanti, so evaṃ anurodhavirodhaṃ samāpanno yaṃ kiñci vedanaṃ vedeti sukhaṃ vā dukkhaṃ vā adukkhamasukhaṃ vā, so taṃ vedanaṃ abhinandati abhivadati ajjhosāya tiṭṭhati”<sup>1</sup>—

evaṃ vuttassa. Evaṃ sotadvārādīsipi. **Abhivadati** “aho sukhaṃ, aho sukhaṃ”<sup>ti</sup> vacībhedakarappattāya balavataṇhāya “ahaṃ mamā”<sup>ti</sup> abhivadato. Tato balavatiyā mocetuṃ asakkuṇeyyabhāvena **ajjhosāya tiṭṭhato**. Tatopi balavatī upādānabhūtā taṇhā **nandī**. Ettha ca abhinandanādīnā taṇhā vuttā, nandīvacanena tappaccayaṃ upādānaṃ catubbidhampi nanditātadavippayogatāhi taṇhādiṭṭhābhinandanabhāvehi cāti veditabbaṃ. **“Jātipaccayā jarāmarāṇaṃ”**<sup>ti</sup>-ādikañca tattheva **mahātaṇhāsāṅkhayavimuttisutte**<sup>2</sup> vuttam.

Vipākavaṭṭabhūte paṭisandhipavattiphassādayo kammaṣamuṭṭhānañca ojaṃ sandhāya **“cattāro āhārā taṇhānidānā”**<sup>ti</sup>-ādi vuttam, vaṭṭupatthambhakā pana itarepi āhārā taṇhāpabhāve tasmim avijjamāne na vijjantīti “taṇhānidānā”<sup>ti</sup> vuttuṃ vaṭṭanti.

**Tato tatoti** catubbidhāsu desanāsu tato tato desanāto. **Ñāyappaṭivedhāya saṃvattatīti ñāyoti** maggo, soyeva vā paṭiccasamuppādo “ariyo cassa ñāyo paññāya sudiṭṭho hotī”<sup>ti</sup><sup>3</sup> vacanato. Sayameva hi samantabhadrakattā tathā tathā paṭivijjhatabbattā tāya tāya desanāya attano paṭivedhāya saṃvattatīti. Samantabhadrakattaṃ desanāvīlāsappatti ca catunnampi desanānaṃ samānaṃ kāraṇanti

1. Ma 1. 333 piṭṭhe.

2. Ma 1. 328 piṭṭhe.

3. Saṃ 1. 297 piṭṭhe.

visesakāraṇaṃ vattukāmo āha “**visesato**”ti. Assa bhagavato desanā, **assa** vā paṭiccasamuppādassa desanāti yojetabbaṃ. **Pavattikāraṇavibhāgo** avijjādikova, kāraṇanti vā gahitānaṃ pakati-ādīnaṃ avijjādīnañca akāraṇatā kāraṇatā ca. Tattha sammūlha keci akāraṇaṃ “kāraṇaṃ”ti gaṇhanti, keci na kiñci kāraṇaṃ bujjhantīti tesaṃ yathāsakehi anurūpehi kāraṇehi **saṅkhārādipavattisandassanatthaṃ** anulomadesanā pavattā, itarāsaṃ tadatthātāsambhavepi na tāsāṃ tadatthameva pavatti atthantarasabbhāvato. Ayamā pana tadatthā evāti etissā tadatthatā vuttā. Pavatti-ādīnavapaṭicchādikā avijjā ādi, tato saṅkhārā uppajjanti tato viññāṇanti evaṃ pavattiyā **uppattikkamasandassanatthañca**.

Anuvilokayato yo sambodhito pubbhāge taṃtaṃphalapaṭivedho pavatto, tadanusārena tadanugamena jarāmarañādikassa jāti-ādikāraṇaṃ yaṃ adhigataṃ, tassa sandassanatthaṃ assa paṭilomadesanā pavattā, anuvilokayato paṭilomadesanā pavattāti vā sambandho. Desentopi hi bhagavā kicchāpannaṃ lokaṃ anuviloketvā **pubbhāga -pa-sandassanatthaṃ** desetīti. Āhārataṇhādayo paccuppannaddhā, saṅkhārāvijjā atītaddhāti iminā adhippāyenāha “**yāva atītaṃ addhānaṃ atiharitvā**”ti, āhārā vā taṇhāya pabhāvetabbā anāgato addhā, taṇhādayo paccuppanno, saṅkhārāvijjā atītoti. Paccakkhaṃ pana phalaṃ dassetvā taṃnidānadassanavasena phalakāraṇaparamparāya dassanaṃ yujjatīti āhārā purimataṇhāya uppāditā paccuppanno addhā, taṇhādayo atīto, saṅkhārāvijjā tatopi atītataro saṃsārassa anādībhāvadassanatthaṃ vuttoti **yāva atītaṃ addhānanti** yāva atītatarāṃ addhānanti attho yutto.

Āyatim punabbhavābhiniḃbatti-āhārakā vā cattāro āhārā—

“Āhāretīti ahaṃ na vadāmi, āhāretīti cāhaṃ vadeyyaṃ, tatrassa kallo pañho ‘ko nu kho bhante āhāretī’ti. Evaṃ cāhaṃ na vadāmi, evaṃ pana avadantaṃ maṃ yo evaṃ puccheyya ‘kissa nu kho bhante viññāṇāhāro’ti. Esa

kallo pañho, tatra kallaṃ veyyākaraṇaṃ, viññāṇāhāro āyatim  
punabbhavābhiniḅattiyā”ti<sup>1</sup>—

vacanato taṃsampayuttatā phassacetanānaṃ tappavattihettutā ca  
kabaḷīkārahārassa. Tena hi upatthambhitarūpakāyassa, tañca icchantassa  
kammaviññāṇāyūhanaṃ hoti. Bhojanañhi saddhādīnaṃ rāgādīnañca  
upanissayoti vuttanti. Tasmā “te kammavaṭṭasaṅghitā āhārā paccuppanno  
addhā”ti imasmim̐ pariyāye purimoyevattho yutto. Atītaddhuto pabhuti “iti  
kho bhikkhave avijjāpaccayā saṅkhārā”ti-ādīna<sup>2</sup> atīte tato parañca  
hetuphalapaṭipāṭim̐ paccakkhānaṃ āhārānaṃ nidānadassanavasena ārohitvā  
nivattanena vinā abujjhantānaṃ taṃsandassanattamaṃ sā ayam̐ desanā  
pavattāti attho. **Anāgataddhuno sandassanattanti** anāgataddhuno  
duppaṭivijjhantānaṃ apassantānaṃ paccakkhamaṃ paccuppannaṃ hetum̐  
dassetvā hetuphalaparamparāya tassa sandassanattanti attho.

Mūlakāraṇasaddamaṃ apekkhitvā “**na akāraṇaṃ**”ti napuṃsakaniddeso  
kato. Akāraṇaṃ yadi siyā, suttaṃ paṭibāhitaṃ siyāti dassento suttaṃ āharati.  
**Vatṭakathāya sīsabhāvo** vaṭṭahetuno kammassapi hetubhāvo. Tattha  
bhavataṇhāyapi hetubhūtā avijjā, tāya paṭicchādītādīnave bhava  
taṇhuppattitoti avijjā visesena sīsabhūtāti “**mūlakāraṇaṃ**”ti vuttā. Purimāya  
koṭiyā apaññāyamānāya uppādavirahato niccataṃ gaṇheyyāti āha  
“**evañcetaṃ bhikkhave vuccati**”ti-ādī. Tena ito pubbe uppannapubbatā  
natthīti apaññāyanato purimakoti-apaññāyanaṃ vuttanti imamatthaṃ dasseti.

Avijjātaṇhāhetukkamena phalesu vattabbesu “**sugatiduggatigāmino**”ti  
vacanaṃ saddalakkhaṇāvirodhanattamaṃ. Dvande hi pūjitassa pubbanipātoti.  
Savarā kira maṃsassa aṭṭhinā alagganattamaṃ punappunaṃ tāpetvā koṭṭetvā  
uṇhodakaṃ pāyevā virittaṃ sūnaṃ aṭṭhito muttamaṃsaṃ gāvim̐ mārenti.  
Tenāha “**aggisantāpi**”ccādi. Tattha yathā vajjhā gāvī ca avijjābhībhūtātāya  
yathāvuttaṃ uṇhodakapānaṃ ārabhati, evaṃ puthujjano yathāvuttaṃ  
duggatigāmikammaṃ. Yathā pana sā uṇhodakapāne ādīnavaṃ

1. Saṃ 1. 254 piṭṭhe.

2. Saṃ 1. 246 piṭṭhe.

disvā taṇhāvasena sītudakapānaṃ ārabhati, evamayāṃ avijjāya mandattā duggatigāmikamme ādīnaṃ disvā taṇhāvasena sugatigāmikammaṃ ārabhati. Dukkhe hi avijjāṃ taṇhā anuvattati, sukhe taṇhāṃ avijjāti.

**Evanti** avijjāya nivuttattā taṇhāya saṃyuttattā ca. **Ayaṃ kāyoti** saviññāṇakakāyo khandhapañcakaṃ, “saḷāyatanapaccayā phasso”ti vacanato phassakāraṇaṇcetaṃ vuccatīti āyatanachakkaṃ vā. **Samudāgatoti** uppanno. **Bahiddhā ca nāmarūpani** bahiddhā saviññāṇakakāyo khandhapañcakaṃ, saḷāyatanāni vā. **Itthetanti** itthaṃ etaṃ. Attano ca paresaṇca pañcakkhandhā dvādasāyatanāni ca dvārārammaṇabhāvena vavatthitāni dvayanāmānīti attho. **“Dvayaṃ paṭicca phassoti aññattha** cakkhurūpādīni dvayāni paṭicca cakkhusamphassādayo vuttā, idha pana ajjhattikabāhirāni āyatanāni. Mahādvayaṃ nāma kiretan”ti<sup>1</sup> vuttaṃ. Ayamettha adhippāyo—aññattha “cakkhuṇca paṭicca rūpe ca uppajjati cakkhuviññāṇaṃ, tiṇṇaṃ saṅgati phasso”ti-ādinā<sup>2</sup> “cakkhu ceva rūpā ca -pa- mano ceva dhammā cā”ti vuttāni dvayāni paṭicca cakkhusamphassādayo vuttā, idha pana “ayaṇceva kāyo”ti cakkhādinissaye sesadhamme cakkhādinissite eva katvā vuttaṃ, cakkhādikāyaṃ ekattena “ajjhattikāyatanan”ti gahetvā “bahiddhā nāmarūpan”ti vuttaṃ rūpādi-ārammaṇaṃ ekatteneva bāhirāyatananti tāni ajjhattikabāhirāni āyatanāni paṭicca phasso vutto, tasmā mahādvayaṃ nāmetanti. Evaṇca katvā “attano ca parassa ca pañcahi khandhehi chahāyatanehi cāpi ayamatto dīpetabovā”ti<sup>3</sup> vuttaṃ. “Ayaṃ kāyo”ti hi vuttāni sanissayāni cakkhādinī attano pañcakkhandhā, “bahiddhā nāmarūpan”ti vuttāni rūpādīni paresaṃ. Tathā ayaṃ kāyo attanova ajjhattikāni āyatanāni, bahiddhā nāmarūpaṃ paresaṃ bāhirānīti. Aññathā ajjhattikāyatanamate eva “ayaṃ kāyo”ti vutte na ajjhattikāyatanāneva attano pañcakkhandhā hontīti attano ca paresaṇca pañcakkhandhehi dīpanā na sambhaveyyāti. **Saḷevāyatanānīti** saḷeva samphassakāraṇāni, yehi kāraṇabhūtehi āyatanehi uppanna phassena phuṭṭho bālo sukhadhukkaṃ paṭisaṃvedeti.

1. Saṃ-Ṭṭha 2. 37 piṭṭhe.

2. Saṃ 1. 300 piṭṭhe.

3. Saṃ-Ṭṭha 2. 36 piṭṭhe.

Ādi-saddena “etesam̐ vā aññatarena avijjānīvaraṇassa bhikkhave paṇḍitassa taṇhāya saṃyuttassā”ti-ādi<sup>1</sup> yojetabbaṃ. Tasmiṃhi sutte saṅkhāre avijjātaṇhānissite eva katvā kāyaggahaṇena viññāṇanāmarūpasalāyatanāni gahetvā etasmiṃca kāye salāyatanānaṃ phassaṃ taṃnissitameva katvā vedanāya visesapaccayabhāvaṃ dassentena bhagavatā bālapaṇḍitānaṃ atītaddhāvijjātaṇhāmūlako vedanānto paṭiccasamuppādo dassito. Puna ca bālapaṇḍitānaṃ visesaṃ dassentena—

“Yāya ca bhikkhave avijjāya nivutassa bālassa yāya ca taṇhāya saṃyuttassa ayaṃ kāyo samudāgato, sā ceva avijjā bālassa appahinā, sā ca taṇhā aparikkhīṇā. Taṃ kissa hetu? Na bhikkhave bālo acari brahmacariyaṃ sammā dukkhakkhayāya, tasmā bālo kāyassa bheda kāyūpago hoti, so kāyūpago samāno na parimuccati jātiyā -pa-dukkhasmāti vadāmi”ti<sup>1</sup>—

vedanāpabhavaṃ sāvijjānaṃ taṇhaṃ dassetvā upādānabhava ca taṃnissite katvā “kāyūpago hoti”ti-ādinaṃ jāti-ādike dassentena paccuppanahetusamuṭṭhānato pabhuti ubhayamūlova paṭiccasamuppādo vutto, tabbipariyāyena ca paṇḍitassa paccuppanahetuparikkhayato pabhuti ubhayamūlako paṭilomapaṭiccasamuppādoti.

Duggatigāmikammaṃ visesapaccayattā avijjā “**avindiyam̐ vindati**”ti vuttā, tathā visesapaccayo vindiyassa na hotīti “**vindiyam̐ na vindati**”ti ca. Attani nissitānaṃ cakkhuviññāṇādīnaṃ pavattanaṃ uppādanaṃ āyatanānaṃ. Sammohabhāveneva anabhisamayabhūtattā **aviditam̐** aññātaṃ **karoti**. **Antavirahite javāpetīti** ca vaṇṇāgamavipariyāyavikāravinaśadhātu-atthavisesayogehi pañcavidhassa niruttalakkhaṇassa vasena tīsupi padesu a-kāra vi-kāra ja-kāre gahetvā aññesaṃ vaṇṇānaṃ lopaṃ katvā ja-kāraṃ ca dutiyassa āgamaṃ katvā “**avijjā**”ti vuttā. Byañjanatthaṃ dassetvā sabhāvatthaṃ dassetuṃ “**apicā**”ti-ādimaṃha. Cakkhuviññāṇādīnaṃ vatthārammaṇāni “idaṃ vatthu, idamārammaṇaṃ”ti avijjāya

---

1. Saṃ 1. 263 piṭṭhe.



ñāturū na sakkāti avijjā tappāṭicchādikā vuttā.

Vatthārammaṇasabhāvachchādanato eva avijjādīnaṃ  
paṭiccasamuppādabhāvassa, jarāmarañādīnaṃ paṭiccasamuppānabhāvassa  
ca chādanato paṭiccasamuppādapaṭiccasamuppānāchādanānaṃ veditabbānaṃ.

Saṅkhāra-saddaggaḥaṇena āgatā saṅkhārā **saṅkhāra-saddena āgatasāṅkhārā**. Yādipi avijjāpaccayā saṅkhārāpi saṅkhāra-saddena āgatā, te pana imissā desanāya padhānāti visum vuttā. Tasmā **“duvidhā”**ti ettha abhisāṅkharaṇakasāṅkhārānaṃ saṅkhāra-saddenāgatānaṃ sandhāya tattha vuttampi vajjetvā saṅkhārasaddena āgatasāṅkhārā yojetabbā. “Saṅkhāra-saddenāgatasāṅkhārā”ti vā samudāyo vutto, tadekadeso ca idha vaṇṇitabbabhāvena “avijjāpaccayā saṅkhārā”ti, tasmā vaṇṇitabbasabbasaṅgahaṇavasena duvidhatā vuttāti veditabbā. **Paṭhamānaṃ nirujjhati vacīsāṅkhāro**ti-ādinā vitakkavicāra-assāsapassāsasaññāvedanāvācīsāṅkhārādayo vuttā, na avijjāsāṅkhāresu vuttā kāyasañcetanādayo.

**Paritassatī**ti pipāsati. **Bhavatī**ti upapattibhavaṃ sandhāya vuttaṃ, **bhāvayatī**ti kammabhavaṃ. Cuti khandhānaṃ maraṇanti **“maranti etenā”**ti vuttaṃ. “Dukkha vedanā uppādadukkhā ṭhitidukkhā”ti<sup>1</sup> vacanato **dvedhā khaṇati**. **Āyāsoti**ti parissamo visādo. Kevala-saddo asammissavācako hoti “kevalā sālāyo”ti, niravasesavācako ca “kevalā aṅgamagadhā”ti, tasmā dvedhāpi atthaṃ vadati. Tattha **asammissassatī**ti sukharahitassa. Na hi ettha kiñci uppādavayarahitaṃ atthīti.

Tamsampayutte, puggalaṃ vā sammohayatīti **sammohanarasā**. Ārammaṇasabhāvassa chādanānaṃ hutvā gayhatīti **chādanapaccupaṭṭhānā**. “Āsavasamudaya avijjāsamudayo”ti<sup>2</sup> vacanato **āsavapadaṭṭhānā**. Paṭisandhijananatthaṃ āyūhanti byāpāraṃ karontīti **āyūhanarasā**, rāsikaraṇānaṃ vā **āyūhanānaṃ**. Nāmarūpassa purecārikabhāvena pavattatīti **pubbaṅgamarasānaṃ**. Purimabhavena saddhim ghaṭanaṃ hutvā gayhatīti **paṭisandhipaccupaṭṭhānaṃ**. Viññāṇena saha sampayujjatīti **sampayogarasānaṃ**. Aññamaññaṃ sampayogābhāvato rūpaṃ vikiratīti **vikiraṇarasānaṃ**. Evañca katvā pisiyamānā taṇḍulādayo vikiranti cuṇṇī bhavantīti. Nāmassa kadāci kusalādibhāvo ca atthīti

1. Ma 1. 377 piṭṭhe.

2. Ma 1. 67 piṭṭhe.

tato viṣesaṇatthaṃ **“abyākatapaccupaṭṭhānaṃ”**ti āha. “Acetanā abyākatā”ti ettha viya anārammaṇatā vā **abyākatatā** daṭṭhabbā. **Āyatanalakkhaṇanti** ghaṭṭanalakkhaṇaṃ, āyānaṃ tananalakkhaṇaṃ vā. Dassanādīnaṃ kāraṇabhāvo<sup>1</sup> **dassanādirasatā**. Akusalavipākupekkhāya anitṭhabhāvato dukkhena itarāya ca itṭhabhāvato sukkena saṅgahitattā **“sukhadukkhapaccupaṭṭhānā”**ti āha. Dukkhasamudayattā **hetulakkhaṇaṃ taṇhā**. “Tatratatrābhiniṇṇā”ti<sup>2</sup> vacanato **abhinandanarasā**. Cittassa, puggalassa vā rūpādīsu atittabhāvo hutvā gayhatīti **atittabhāvapaccupaṭṭhānā**. Taṇhādaḷhattaṃ hutvā kāmupādānaṃ, sesāni diṭṭhi hutvā upaṭṭhahantīti **taṇhādaḷhattadiṭṭhipaccupaṭṭhānā**. Kammupapattibhavavasena bhavassa lakkhaṇādayo yojetabbā.

**Ādi-saddena** anubodhādibhāvaggahaṇaṃ<sup>3</sup>. Dukkhadīsu aññānaṃ **appaṭipatti**, asubhādīsu subhādivipallāsā **micchāpaṭipatti**. Diṭṭhivippayuttā vā **appaṭipatti**, diṭṭhisampayuttā **micchāpaṭipatti**. Na avijjāya eva chadvārikatā chaḷārammaṇatā ca, atha kho aññesupi paṭiccasamuppādaṅgesu arūpadhammānanti āha **“sabbesupī”**ti. **Nobhayagocaranti** manāyatanamāha. Na hi arūpadhammānaṃ desavasena āsannaṭā dūratā ca atthi asaṅṭhānattā, tasmā manāyatanassa gocaro na manāyatanam sampatto asampatto vāti vuccatīti.

Sokādīnaṃ sabbhāvā aṅgabahuttappasaṅge “dvādasevā”ti aṅgānaṃ vavatthānaṃ veditabbaṃ. Na hi sokādayo aṅgabhāvena vuttā, phalena pana kāraṇaṃ avijjāṃ mūlaṅgaṃ dassetuṃ te vuttāti. Jarāmaṇaṅgabhāhatassa hi bālassa te sambhavantīti sokādīnaṃ jarāmaṇakāraṇatā vuttā. “Sārīrikāya dukkhāya vedanāya phuṭṭho”ti<sup>4</sup> ca **sutte** jarāmaṇanimittaṅca dukkhaṃ saṅgahitanti taṃtaṃnimittānaṃ sādhaḅbhāvena vuttaṃ. Yasmā pana jarāmaṇeneva sokādīnaṃ ekasaṅkhepo kato, tasmā tesam jātipaccayatā yujjati. Jarāmaṇapaccayabhāve hi avijjāya ekasaṅkhepo kātabbo siyā, jātipaccayā pana jarāmaṇaṃ sokādayo ca sambhavantīti. Tattha jarāmaṇaṃ ekantikaṃ aṅgabhāvene va gahitaṃ,

1. Kāraḅbhāvo (?)

2. Dī 1. 246; Ma 1. 84, 373; Abbi 2. 106 piṭṭhesu.

3. Ananubodhādibhāvaggahaṇaṃ (?)

4. Saṃ 2. 408 piṭṭhe.

sokādayo pana rūpabhavādisu abhāvato anekantikā kevalam pākaṭena phalena avijjānidassanattham gahitā. Tena anāgate jātiyā sati tato parāya paṭisandhiyā hetuhetubhūtā avijjā dassitāti bhavacakkassa avicchedo dassito hotīti. Suttañca sokādīnam avijjā kāraṇanti etassevatthassa sādhamam daṭṭhabbam, na sokādīnam bālassa jarāmarañanimittatāmattassa. “Assutavā puthujjano”<sup>1</sup> hi vacanena avijjā sokādīnam kāraṇanti dassitā, na ca jarāmarañanimittameva dukkham dukkhanti.

Uddesavāraṇṇanā niṭṭhitā.

### Avijjāpadaniddesavaṇṇanā

226. “**Avijjāpaccayā saṅkhārā**”<sup>ti</sup> hi vuttanti etena avijjāya visesanabhāvena saṅkhārānañca padhānabhāvena vuttattā saṅkhārānam niddisatabbabhāvassa kāraṇam dasseti. **Pitā kathīyati** “dīgho sāmo, mitto rasso, odāto datto”<sup>ti</sup>.

Rasitabbo paṭivijjhitabbo sabhāvo raso, attano raso saraso, yāthāvo saraso yāthāvasaraso, so eva lakkhitabbattā lakkhaṇanti **yāthāvasarasalakkhaṇam**. “Katamā ca bhikkhave avijjā? Dukkhe aññāṇan”<sup>ti</sup>-ādinā<sup>2</sup> sutte cattāreva vuttānīti “**suttantikapariyāyenā**”<sup>ti</sup> āha. **Nikkhepaṇḍe panāti**-ādinā idha catūsu ṭhānesu kathitāya eva avijjāya nikkhepaṇḍe aṭṭhasu ṭhānesu kiccajātito pañcavīsatiyā padehi lakkhaṇato ca kathitattā tadatthasamvaṇṇanāvasena vibhāvanam karoti. Ahāpetvā vibhajitabbavibhajanañhi **abhidhammapariyāyo**.

Jāyati etthāti **jāti**, uppattiṭṭhānam. Yādipi nirodhamagge avijjā ārammaṇam na karoti, te pana jānitukāmassa tappaṭicchādanavasena anirodhamaggesu nirodhamaggaggahaṇakāraṇavasena ca pavattamānā tattha uppajjātīti vuccatīti tesampi avijjāya uppattiṭṭhānatā hoti, itaresam

1. Sam 2. 408 piṭṭhe.

2. Sam 1. 245; Ma 1. 67 piṭṭhesu.

ārammaṇabhāvena cāti. Saṅghikabaladevagoṇādīnaṃ saṅghāṭīnaṅgalādīni viya aññasetādīnaṃ avijjāya dukkhādivisayānaṃ andhattakarānaṃ lobhādīnaṃ nivattako aññāṇādisabhāvo lakkhaṇanti daṭṭhabbaṃ.

**Atthattanti** phalaphalaṃ. Āmedītavacanañhi sabbesaṃ atthānaṃ visum visum pākaṭakaraṇabhāvappakāsanatthaṃ. Attho eva vā attho **atthattoti** atthassa aviparītātādassanatthaṃ atthenevatthaṃ visesayati. Na hi ñāṇaṃ anattaṃ atthoti gaṇhātīti. Evaṃ **kāraṇakāraṇanti** etthāpi daṭṭhabbaṃ. **Taṃ ākāraṇanti** atthattādi-ākāraṇaṃ. **Gahetvāti** citte pavesetvā, cittena, puggalena vā gahitaṃ katvā. Paṭividdhassa puna avekkhaṇā **paccavekkhaṇā**. Duccintitacintitādīlakkhaṇassa bālassa bhāvo **bālyāṃ**. **Pajānātīti** pakārehi jānāti. Balavamohanaṃ **pamoho**. Samantato mohanaṃ **sammoho**.

**Dukkhārammaṇatāti** dukkhārammaṇatāya, yāya vā avijjāya chādentiyā dukkhārammaṇā taṃsampayuttadhammā, sā tesāṃ bhāvoti **dukkhārammaṇatā**, ārammaṇameva vā ārammaṇatā, dukkhaṃ ārammaṇatā etissāti **dukkhārammaṇatā**.

**Duddasattā gambhīrā** na sabhāvato, tasmā tadārammaṇatā avijjā uppajjati, itaresāṃ sabhāvato gambhīrattā tadārammaṇatā nuppajjātīti adhippāyo. **Apica kho panāti** maggassa saṅkhatasabhāvattā tatopi nirodhassa gambhīratarataṃ dasseti.

Avijjāpadaniddesavaṇṇanā niṭṭhitā.

### Saṅkhārapadaniddesavaṇṇanā

**Punātīti** sodheti apuññaphalato dukkhasaṃkilesato ca, hitasukhajjhāsayena puññaṃ karotīti taṃnipphādanena kārakassajjhāsayāṃ pūreṭīti **puñño**, pūraḷo puḷḷanibbattako ca niruttīlakkhaṇena “**puñño**”ti vedītabbo. Saṃādhipaccanīkānaṃ atīdūrātāya **na iñjati** na calātīti attho. **Kāyassāti** dvārassa sāmībhāvena niddeso kato.

**Puññupaganti** bhavasampattupagam. **Tatthā**ti vibhaṅgasutte<sup>1</sup>. Tañhi padhānabhāvena gahitanti. **Sammādiṭṭhisutte**<sup>2</sup> pana “tayome āvuso saṅkhārā”ti āgatanti. **Sabbaññujinabhāsito pana ayam**, na paccekajinabhāsito, imassatthassa dīpanattham etesaṃ sutānaṃ vasena te gahitā. Kathaṃ panetena gahaṇenāyamattho dīpito hotīti taṃdassanattamāha “**abhidhamme pi hi sutte pi ekasadisāva tanti niddiṭṭhā**”ti. **Sabbaññubhāsitoti** pākaṭena suttantena sadisattā ayampi sabbaññubhāsitoti ñāyatīti vuttaṃ hotīti.

“**Terasāpi**”ti vuttaṃ, tattha ñāṇavippayuttānaṃ na bhāvanāmayatā pākaṭāti “**yathā hi**”ti-ādīmāha. Pathavī pathavīti-ādibhāvanā ca kaṣiṇaparikkammakaraṇaṃ maṇḍalakaraṇaṃca bhāvanāṃ bhajāpenti.

Dānavasena pavattā cittacetāsikā dhammā **dānaṃ**. Tattha byāpārabhūtā āyūhanacetanā **dānaṃ ārabha dānaṃ adhikicca uppajjati**ti vuccati, evaṃ itaresu. **Somanassacittena**ti anumodanāpavattinidassanamattametam daṭṭhabbaṃ. Upekkhāsahagatenapi hi anussarati evāti.

**Asarikkhakampi** sarikkhakena catutthajjhānavipākena vehapphalādīsu vināpi asaññesu kaṭattārūpaṃ. Rūpameva saphandanattā “**sa-iñjanan**”ti vuttaṃ iñjanakaraṇīvaraṇādīnaṃ avikkhambhanato, rūpaṇhāsāṅkhātassa iñjanakassa kāraṇattā vā. Teneva rūpārammaṇaṃ nimittārammaṇaṃca sabbampi catutthajjhānaṃ nippariyāyena “**aniñjanan**”ti na vuccatīti. Mahātulāya dhārayamāno nāḷiyā minamāno ca samudāyameva dhāreti minati ca, na ekekaṃ guñjaṃ, ekekaṃ taṇḍulaṃ vā, evaṃ bhagavāpi aparimāṇā paṭhamakusalacetanāyo samudāyavaseneva gahetvā ekajātikattā ekameva katvā dasseti. Evaṃ dutiyādayopīti.

“Kāyadvāre pavattā”ti avatvā “**ādānaggahaṇacopanaṃ pāpayamānā uppannā**”tipi vuttuṃ vaṭṭatīti vacanavisesamattameva dasseti. Kāyadvāre pavatti eva hi ādānādipāpanāti. Purimena vā dvārassa upalakkhaṇabhāvo vutto, pacchimena cetanāya saviññattirūpasamuṭṭhāpanaṃ. Tattha ākaḍḍhitvā gahaṇaṃ **ādānaṃ**, sampayuttassa gahaṇaṃ **gahaṇaṃ**, phandaṇaṃ **copanaṃ**.

1. Saṃ 1. 245 piṭṭhe.

2. Ma 1. 67 piṭṭhe.

**Etthāti** kāyavacīsaṅkhāraggaṇe, kāyavacīsaṅcetanāgahaṇe vā. Aṭṭhakathāyaṃ abhiññācetanā na gahitā viññāṇassa paccayo na hotīti. Kasmā pana na hoti, nanu sāpi kusalā vipākadhammā cāti? Saccam, anupacchinnataṇhāvijjāmāne pana santāne sabyāpārappavattiyā tassā kusalatā vipākadhammatā ca vuttā, na vipākuppādanena, sā pana vipākaṃ uppādayanti rūpāvacarameva uppādeyya. Na hi aññabhūmikaṃ kammaṃ aññabhūmikaṃ vipākaṃ uppādetīti. Attanā sadisārammaṇaṇca tiṭṭhānikaṃ tam uppādeyya cittuppādakaṇḍe rūpāvacaravipākassa kammaśadisārammaṇasseva vuttattā, na ca rūpāvacaravipāko parittādi-ārammaṇo atthi, abhiññācetanā ca parittādi-ārammaṇāva hoti, tasmā vipākaṃ na uppādetīti viññāyati. Kasiṇesu ca uppāditassa catutthajjhānasamādhissa ānisaṃsabhūtā abhiññā. Yathāha “so evaṃ samāhite citte”ti-ādi<sup>1</sup>. Tasmā samādhiphalasadisā sā, na ca phalaṃ detīti dānasīlānisamso tasmim bhave paccayalābho viya sāpi vipākaṃ na uppādeti. **Yathā ca abhiññācetanā, evaṃ uddhaccacetanāpi na hotīti** idam uddhaccasahagata dhamme visuṃ uddharitvā “tesaṃ vipāke ñāṇaṃ atthapaṭisambhidā”ti<sup>2</sup> vuttattā vicāretabbaṃ.

Ayaṃ panettha amataggaṭṭhānugato vinicchayo—dassanabhāvanānaṃ abhāvepi yesaṃ puthujjanānaṃ sekkhānaṇca dassanabhāvanāhi bhavitabbaṃ, tesaṃ taduppattikāle tehi pahātuṃ sakkuṇeyyā akusalā “dassanena pahātabbā bhāvanāya pahātabbā”ti ca vuccanti, puthujjanānaṃ pana bhāvanāya abhāvā bhāvanāya pahātabbacintā natthi. Tena tesaṃ pavattamānā te dassanena pahātuṃ asakkuṇeyyāpi “bhāvanāya pahātabbā”ti na vuccanti. Yadi vucceyyuṃ, dassanena pahātabbā bhāvanāya pahātabbānaṃ kesañci keci kadāci ārammaṇārammaṇādhipati-upanissayapaccayehi paccayo bhaveyyuṃ, na ca paṭṭhāne “dassanena pahātabbā bhāvanāya pahātabbānaṃ kesañci kenaci paccayena paccayo”ti vuttā. Sekkhānaṃ pana vijjāmānā bhāvanāya pahātuṃ sakkuṇeyyā bhāvanāya pahātabbā. Teneva sekkhānaṃ dassanena pahātabbā cattattā vantattā muttattā pahīnattā paṭinissaṭṭhattā ukkheṭitattā samukkheṭitattā assāditabbā

1. Dī 1. 76, 77; Ma 1. 314, 315 piṭṭhādīsu.

2. Abhi 2. 309 piṭṭhe.

abhinanditabbā ca na honti, pahīnatāya eva somanassahetubhūtā  
avikkhepahetubhūtā ca na domanassam uddhaccañca uppādentīti na te tesam  
ārammaṇārammaṇādhipatibhāvaṃ pakatūpanissayabhāvañca gacchanti. Na  
hi pahīne upanissāya ariyo rāgādikilese uppādeti.

Vuttañca “sotāpattimaggena ye kilesā pahīnā, te kilese na puneti na  
pacceti na paccāgacchati -pa- arahattamaggena -pa- na paccāgacchati”<sup>1</sup>, na  
ca puthujjanānaṃ dassanena pahātuṃ sakkuṇeyyā itaresaṃ na kenaci  
paccayena paccayo hontīti sakkā vuttuṃ “diṭṭhim assādeti abhinandati, tam  
ārabba rāgo uppajjati, diṭṭhi vicikicchā uddhaccaṃ uppajjati. Vicikiccham  
ārabba vicikicchā diṭṭhi uddhaccaṃ uppajjati”<sup>2</sup> ti diṭṭhivicikicchānaṃ  
uddhaccārammaṇapaccayabhāvassa vuttattā. Ettha hi **uddhaccanti**  
uddhaccasahagataṃ cittuppādaṃ sandhāya vuttaṃ. Evañca katvā  
adhipatipaccayaniddese “diṭṭhim garuṃ katvā assādeti abhinandati, tam  
garuṃ katvā rāgo uppajjati, diṭṭhi uppajjati”<sup>2</sup> ettakameva vuttaṃ, na  
vuttaṃ “uddhaccaṃ uppajjati”<sup>2</sup> ti. Tasmā dassanabhāvanāhi pahātabbānaṃ  
atītādibhāvena navattabbattepi yādisānaṃ tāhi anuppattidhammatā  
āpādetabbā, tesu puthujjanesu vattamānā dassanaṃ apekkhitvā tena pahātuṃ  
sakkuṇeyyā dassanena pahātabbā, sekkhesu vattamānā bhāvanaṃ apekkhitvā  
tāya pahātuṃ sakkuṇeyyā bhāvanāya pahātabbā. Tesu bhāvanāya pahātabbā  
sahāyavirahā vipākaṃ na janayantīti bhāvanāya pahātabbacetanāya  
nānākkhaṇikakammapaccayabhāvo na vutto,  
apekkhitabbadassanabhāvanārahitānaṃ pana puthujjanesu uppajjamānānaṃ  
sakabhaṇḍe chandarāgādīnaṃ uddhaccasahagatacittuppādassa ca  
saṃyojanattayatadekaṭṭhakilesānaṃ anupacchinnatāya  
aparikkhīṇasahāyānaṃ vipākuppādanaṃ na sakkā paṭikkhipitunti  
uddhaccasahagatadhammānaṃ vipāko **vibhaṅge** vuttoti.

Yadi evaṃ apekkhitabbadassanabhāvanārahitānaṃ akusalānaṃ  
nevadassanena nabhāvanāyapahātabbatā āpajjati? Nāpajjati  
appahātabbānaṃ “neva dassanena na bhāvanāya pahātabbā”<sup>3</sup> ti<sup>3</sup> vuttattā,  
appahātabbaviruddhasabhāvattā ca akusalānaṃ. Evampi tesam imasmim  
tikenavattabbatā āpajjati? Nāpajjati cittuppādakaṇḍe dassitānaṃ dvādasa-  
akusalacittuppādānaṃ dvīhi padehi saṅgahitattā. Yathā hi dhammavasena

1. Khu 7. 156; Khu 8. 83 piṭṭhesu.      2. Abhi 8. 134 piṭṭhe.      3. Abhi 1. 2 piṭṭhe.

saṅkhatadhammā sabbe saṅgahitāti uppannattike kālavasena asaṅgahitāpi atītā navattabbāti na vuttā cittuppādarūpabhāvena gahitesu navattabbassa abhāvā, evamidhāpi cittuppādabhāvena gahitesu navattabbassa abhāvā navattabbatā na vuttāti vedittabbā. Yattha hi cittuppādo koci niyogato navattabbo atthi, tattha tesam catuttho koṭṭhāso atthīti yathāvuttapadesu viya tattāpi bhinditvā bhajāpetabbe cittuppāde bhinditvā bhajāpeti “siyā navattabbā parittārammaṇā”ti-ādinā. Tadabhāvā uppannattike idha ca tathā na vuttā.

Atha vā yathā sappāṭighēhi samānasabhāvattā rūpadhātuyam tayo mahābhūtā “sappāṭighā”ti vuttā. Yathāha “asaññasattānam anidassanam sappāṭigham ekam mahābhūtam paṭicca dve mahābhūtā, dve mahābhūte paṭicca ekam mahābhūtan”ti<sup>1</sup>. Evaṃ puthujjanānam pavattamānā bhāvanāya pahātābbasamānasabhāvā “bhāvanāya pahātābbā”ti vucceyyunti natthi navattabbatāpasaṅgo. Evañca sati puthujjanānam pavattamānāpi bhāvanāya pahātābbā sakabhaṅḍe chandarāgādayo parabhaṅḍe chandarāgādīnam upanissayapaccayo, rāgo ca rāgadiṭṭhīnam adhipatipaccayoti ayamattho laddho hoti. Yathā pana aphoṭṭhabbattā rūpadhātuyam tayo mahābhūtā na paramatthato sappāṭighā, evaṃ apekkhitābbabhāvanārahitā puthujjanesu pavattamānā sakabhaṅḍe chandarāgādayo na paramatthato bhāvanāya pahātābbāti bhāvanāya pahātābbānam nānākkhaṇīkakkammapaccayatā na vuttā, na ca “dassanena pahātābbā bhāvanāya pahātābbānam kenaci paccayena paccayo”ti vuttā. Ye hi dassanena pahātābbapaccayā kilesā, na te dassanato uddham pavattanti, dassanena pahātābbapaccayassapi pana uddhaccasahagatassa sahāyavekallamattameva dassanena katam, na tassa koci bhāvo dassanena anuppattidhammatam āpāditoti tassa ekantabhāvanāya pahātābbatā vuttā. Tasmā tassa tādisasseva sati sahāye vipākuppādanavacanam, asati ca vipākānuppādanavacanam na virujjhatīti.

Sāpi viññāpaccayabhāve yadi apanetābbā, kasmā “samavīsati cetanā”ti vuttanti tassa kāraṇam dassento āha “**avijjāpaccayā**

---

1. Abhi 9. 470 piṭṭhe.



**pana sabbāpetā hontī**”ti. Yadi evaṃ abhiññācetanāya saha “ekavīsati”ti vattabbanti? Na, avacanassa vuttakāraṇattā, taṃ pana itarāvacanassapi kāraṇanti samānacetanāvacanakāraṇavacanena yaṃ kāraṇaṃ apekkhitvā ekā vuttā, tena kāraṇena itarāyapi vattabbataṃ, yañca kāraṇaṃ apekkhitvā itarā na vuttā, tena kāraṇena vuttāyapi avattabbataṃ dasseti. Āneñjābhisaṅkhāro cittasaṅkhāro evāti bhedābhāvā pākaṭoti na tassa saṃyogo dassito.

**Sukhasaññāya gahetvā**ti etena taṇhāpavattiṃ dasseti. **Taṇhāparikkhāreti** taṇhāya parivāre, taṇhāya “sukhaṃ subhan”ti-ādinā saṅkhate vā alaṅkateti attho. Taṇhā hi dukkhassa samudayoti ajānanto “aho vatāhaṃ kāyassa bhedā paraṃ maraṇā khattiyamahāsālānaṃ vā sahabyataṃ upapajjeyyan”ti saṅkhāre parikkharotīti. Amaraṇatthāti gahitā dukkarakiriya **amaratapo**, devabhāvatthaṃ tapo vā, dukkhattā vā maro māraṅko tapo **amaratapo**. Diṭṭhe adiṭṭha-saddo viya maresu amara-saddo daṭṭhabbo.

Jāti-ādipapātadukkhajananato **marupapātasadisatā** puññābhisaṅkhārassa vuttā. Ramaṇiyabhāvena ca assādabhāvena ca gayhamānaṃ puññaphalaṃ **dīpasikhāmadhulittasatthadhārāsadisaraṃ**, tadattho ca puññābhisaṅkhāro taṃnipātalehanasadiso.

“Sukho imissā paribbājikāya taruṇāya mudukāya lomasāya bāhāya samphasso”ti-ādinā<sup>1</sup> sukhasaññāya **bālo viya gūthakīḷanaṃ** kilesābhībhūtātāya kodhārati-abhībhūto asavaso **maritukāmo viya visakhādānaṃ** karaṇaphalakkhaṇesu jigucchānīyaṃ dukkhañca **apuññābhisaṅkhāraṃ ārabhati**. Lobhasahagatassa vā gūthakīḷanasadisatā, dosahagatassa visakhādanasadisatā yojetabbā. Kāmaguṇasamiddhiyā sabhayassapi pisācanagarassa sukhavipallāsahetubhāvo viya arūpavipākānaṃ nirantarātāya anupalakkhiyamāna-uppādavayānaṃ, dīghasantānatāya agayhamānavipariṇāmānaṃ, saṅkhāravipariṇāmadukkhabhūtānampi niccādivipallāsahetubhāvoti tesam **pisācanagarasadisatā, tadabhimukhagamanasadisatā** ca āneñjābhisaṅkhārassa yojetabbā.

---

1. Ma 1. 380 piṭṭhe.

**Tāvāti** vattabbantarāpekkho nipāto, tasmā avijjā saṅkhārānaṃ paccayoti idaṃ tāva siddham, idaṃ pana aparam vattabbanti attho. Avijjāpaccayā pana sabbāpetā hontīti vuttanti abhiññācetanānaṃ paccayabhāvaṃ dasseti. Cetopariyapubbenivāsa-anāgataṃsaññāṇehi paresaṃ attano ca samohacittajānanakāleti yojetabbā.

**Avijjāsammūḷhattāti** bhavādīnavapaṭicchādikāya avijjāya sammūḷhattā. **Rāgādīnanti** rāgadiṭṭhivicikicchuddhaccadomanassānaṃ avijjāsampayuttarāgādi-assādanakālesu avijjānaṃ ārabba uppatti veditabbā. Garuṃ katvā assādanānaṃ rāgadiṭṭhisampayuttāya eva avijjāya yojetabbānaṃ, assādanaṅca rāgo, tadavippayuttā ca diṭṭhīti assādanavacaneneva yathāvuttaṃ avijjānaṃ garuṃ karontī diṭṭhi ca vuttāti veditabbā. Rāgādīhi ca pāḷiyānaṃ sarūpena vuttehi taṃsāmpayuttasaṅkhārassa avijjārammaṇādītaṃ dasseti. Anavijjārammaṇassa paṭhamajavanassa ārammaṇādhipati-anantarādīpaccayavacanesu avuttassa vuttassa ca sabbassa saṅgaṇhanatthaṃ “**yaṃ kiñci**”ti āha. **Vuttanayenāti** samatikkamabhavapatthanāvasena vuttanayena.

**Ekakāraṇavādo āpajjāti**ti dosappasaṅgo vutto. Aniṭṭho hi ekakāraṇavādo sabbassa sabbakāle sambhavāpattito ekasadisasabhāvāpattito ca. Yasmā tīsu pakāresu avijjāmaṅesu pārisesena catutthe eva ca vijjāmaṅe ekahetuphaladīpane attho atthi, tasmā na nupapajjati.

**Yathāphassaṃ vedanāvavathānatoti** “sukhavedanīyaṃ bhikkhave phassaṃ paṭicca uppajjati sukhā vedanā”ti-ādinā<sup>1</sup> “cakkhuṅca paṭicca -pa-tiṇṇaṃ saṅgati phasso, phassapaccayā vedanā”ti-ādinā<sup>2</sup> ca sukhavedanīyādicakkhusamphassādi-anurūpena sukhavedanādicakkhusamphassajāvedanādīnaṃ vavathānato, samānesu cakkhurūpādīsu phassavasena sukhādivipariyāyābhāvato, samānesu ca rūpamanasikārādīsu cakkhādīsaṅghaṭṭānavasena cakkhusamphassajādivipariyāyābhāvato, aññapaccayasāmaññepi phassavasena sukhādicakkhusamphassajādīnaṃ oḷārikasukhumādīsaṅkarābhāvato cāti attho. Sukhādīnaṃ yathāvuttasamphassassa aviparīto paccayabhāvo

1. Saṃ 1. 321 piṭṭhe.

2. Saṃ 1. 300 piṭṭhe.

eva **yathāvedanaṃ phassavavatthānaṃ**, kāraṇaphalavisesena vā phalakāraṇavisesanicchayo hotīti ubhayatthāpi nicchayo vavatthānanti vutto. **Kammādayoti** kammāhāra-utu-ādayo apākaṭā semhapaṭikārena rogavūpasamato.

“**Assādānupassino taṇhā pavaḍḍhati**”ti vacanatoti “saṃyojanīyesu bhikkhave dhammesu assādānupassino viharato taṇhā pavaḍḍhati, taṇhāpaccayā upādānaṃ, upādānapaccayā bhavo”ti<sup>1</sup> iminā suttena taṇhāya saṅkhārakāraṇabhāvassa vuttattāti attho. Puna tassāpi avijjā kāraṇanti dassanattham **“avijjāsamudayā āsavasamudayoti vacanato**”ti āha. Taṇhā vā caturupādānabhūtā kāmabhavadiṭṭhāsavā ca saṅkhārassa kāraṇanti pākaṭāti suddhavyenapi avijjāya saṅkhārakāraṇabhāvameva dasseti. **Assādānupassinoti** hi vacanena ādīnavapaṭicchādānakiccā avijjā taṇhāya kāraṇanti dassitā hotīti. Yasmā avidvā, tasmā puññābhisaṅkhārādike abhisaṅkharotīti avijjāya saṅkhārakāraṇabhāvassa **pākaṭattā** aviddasubhāvo saṅkhārakāraṇabhāvena vutto khīṇāsavassa saṅkhārābhāvato **asādhāraṇattā** ca. Puññābhisaṅkhārādīnaṃ sādharmaṇāni vatthārammaṇādīnīti puññabhavādi-ādīnavapaṭicchādikā avijjā puññābhisaṅkhārādīnaṃ asādhāraṇam kāraṇanti vā attho daṭṭhabbo.

**Ṭhānaviruddhoti** atthitāviruddho. Keci pana “paṭisandhi-ādīni ṭhānāni”ti vadanti, evaṃ sati purimacittam pacchimacittassa ṭhānaviruddho paccayoti na idaṃ ekantikaṃ siyā. Bhavaṅgampi hi bhavaṅgassa anantarapaccayo, javanaṃ javanassāti, na ca sippādīnaṃ paṭisandhi-ādīṭhānaṃ atthīti na taṃ idha adhippetam. Kamman rūpassa namanaruppanavirodhā sārammaṇānārammaṇavirodhā ca **sabhāvaviruddho paccayo, khīrādīni dadhi-ādīnaṃ** madhurambilarasādisabhāvavirodhā. Avijānanakicco **āloko** vijānanakiccassa **viññāṇassa**, amadanakiccā ca **gulādayo** madanakiccassa **āsavassa**.

**Golomāvilomāni dabbāya** paccayo, **dadhi-ādīni bhūtiṇakassa**. Ettha ca **avīti** rattā eḷakā vuccanti. Vipākāyeva te ca na, tasmā

---

1. Saṃ 1. 313 piṭṭhe.

dukkhavipākāyapi avijjāya tadavipākānaṃ puññāneñjābhisaṅkhārānaṃ paccayattaṃ na na yujjatīti attho. Tadavipākattepi sāvajjatāya tadaviruddhānaṃ taṃsadisānañca apuññābhisaṅkhārānameva paccayo, na itaresanti etassa pasaṅgassa nivāraṇatthaṃ “viruddho cāviruddho ca, sadisāsadiso tathā. Dhammānaṃ paccayo siddho”ti vuttaṃ, tasmā tamatthaṃ pākaṭaṃ karonto “**iti ayaṃ avijjā**”ti-ādimāha.

Acchejjasuttāvutābhejjamaṇīnaṃ viya pubbāpariyavatthānaṃ niyati, niyatiyā, niyati eva vā saṅgati samāgamo niyatisaṅgati, tāya bhāvesu pariṇatā manussadevavihaṅgādibhāvaṃ pattā **niyatisaṅgati bhāvaparīṇatā**. Niyatiyā saṅgatiyā bhāvena ca pariṇatā nānappakārataṃ pattā **niyatisaṅgati bhāvaparīṇatā**ti ca atthaṃ vadanti. Etehi ca vikappānehi avijjā akusalaṃ cittaṃ katvā puññādisu yattha katthaci pavattatīti imamatthaṃ dassento āha “**so evaṃ avijjāyā**”ti-ādi.

**Aparīṇāyako bāloti** arahattamaggasampañjipādakakalyāṇamittarahitoti attho. Arahattamaggāvasānaṃ vā ñāṇaṃ samavisamaṃ dassetvā nibbānaṃ nayatīti pariṇāyakanti vuttaṃ, tena rahito **aparīṇāyako**. **Dhammaṃ ñatvā**ti sappurīsupānissayena catusaccappakāsakasuttādidhammaṃ ñatvā, maggañāṇeneva vā sabbadhammapavaraṃ nibbānaṃ ñatvā, taṃjānaṇāyattattā pana sesasaccābhisaṃmayassa samānakālampi taṃ purimakālaṃ viya katvā vuttaṃ.

Saṅkhārapadaniddesavaṇṇanā niṭṭhitā.

### Viññānapadaniddesavaṇṇanā

227. Yathāvuttasaṅkhārapaccayā uppajjamānaṃ taṃkammanibbattameva viññāṇaṃ bhavituṃ arahatīti “**bāttimsa lokiya vipākaviññāṇāni saṅgahitāni hontī**”ti āha. **Dhātukathāyaṃ**<sup>1</sup> pana vipayuttēna saṅgahitāsaṅgahitapadaniddese—

1. Abhi 3. 90 piṭṭhe.

“Saṅkhārapaccayā viññāṇena ye dhammā -pa- saḷāyatanapaccayā phassena, phassapaccayā vedanāya ye dhammā vippayuttā, te dhammā katihi khandhehi -pa- saṅgahitā? Te dhammā asaṅkhatam khandhato ṭhapetvā ekena khandhena ekādasahāyatanehi ekādasahi dhātūhi saṅgahitā. Katihi asaṅgahitā? Catūhi khandhehi ekenāyatanena sattahi dhātūhi asaṅgahitā”ti—

vacanato sabbaviññāṇaphassavedanāpariggaho kato. Yadi hi ettha viññāṇaphassavedanā sappadesā siyūm, “vipākā dhammā”ti imassa viya vissajjanam siyā, tasmā tattha abhidhammabhājanīyavasena saṅkhārapaccayā viññāṇādayo gahitāti veditabbā. Avijjāpaccayā saṅkhārā ca abhidhammabhājanīye catubhūmakakusalasaṅkhāro akusalasaṅkhāro ca vuttoti so eva dhātukathāyam gahitoti daṭṭhabbo. Bhavo pana **dhātukathāyam** kammupapattibhavavisesadassanattham na abhidhammabhājanīyavasena gahito. Evañca katvā tattha “upādānapaccayā bhavo”ti anuddharitvā “kammabhavo”ti-ādināva nayena bhavo uddhaṭo. **Vipākāñhetanti** viññāṇassa vipākattā saṅkhārapaccayattam sādheti, tassa pana sādhanattham “upacitakammābhāve vipākābhāvato”ti vuttanti tam vivaranto “**vipākāñcā**”ti-ādimāha.

**Yebhuyyena lobhasampayuttajavanāvasāneti** javanena tadārammaṇaniyame somanassasahagatānantaram somanassasahagatatadārammaṇassa vuttattā somanassasahagatāneva sandhāya vuttanti veditabbam. Yasmā pana tihetukajavanāvasāne ca kadāci ahetukam tadārammaṇam hoti, tasmā “**yebhuyyenā**”ti āha. **Sakim vāti** “dirattatirattā”dīsu viya veditabbam. Dvikkhattumeva pana uppajantīti vadanti. “Dirattatirattan”ti ettha pana vā-saddassa abhāvā vacanasiliṭṭhatāmattena dirattaggahaṇam katanti yujjati, “nirantaratirattadassanattham vā”ti. Idha pana vā-saddo vikappanatto vuttoti sakimeva ca kadāci pavattim sandhāya “**sakim vā**”ti vuttanti daṭṭhabbam. Teneva hi sakim tadārammaṇappavattiyā vicāretabbatam dassento “**cittappavattigaṇanāyam panā**”ti-ādimāha. Tattha **cittappavattigaṇanāyanti** vipākakathāyam balavarūpādike ārammaṇe vuttam cittappavattigaṇanam sandhāyāha. Tattha hi dveva tadārammaṇuppattivārā āgatā. Javanavisayānubhavanañhi

tadārammaṇaṃ āsannabhede tasmim̐ visaye ekacittakkhaṇāvasiṭṭhāyuke na uppajjeyyāti adhippāyo. **Anurūpāya paṭisandhiyāti** akusalavipākassa apāyapaṭisandhi, kāmāvacarādikusalavipākānaṃ kāmārūpārūpasugatipaṭisandhiyo yathākammaṃ anurūpā.

Paṭisandhikathā mahāvisayāti katvā pavattimeva tāva dassento **“pavattiyam̐ panā”**ti-ādimāha. Ahetukadvayādīnaṃ dvāraniyamāniyamāvacaṇaṃ bhavaṅgabhūtānaṃ sayameva dvārattā cutipaṭisandhibhūtānaṃca bhavaṅgasāṅkhātena aññena ca dvārena anuppattito niyataṃ aniyataṃ vā dvāraṃ etesanti vattum̐ asakkuṇeyyattā. Ekassa sattassa pavattarūpāvacaṇavipāko pathavīkaṣiṇādīsu yasmiṃ ārammaṇe pavatto, tato aññasmiṃ tassa pavatti natthīti rūpāvacaṇaṃ niyatārammaṇatā vuttā. **Tatrassāti** pavattiyam̐ bāttimsavidhassa.

Indriyappavatti-ānubhāvato eva cakkhusotadvārabhedena, tassa ca viññāṇavīthibhedāyattattā vīthibhedena ca bhavitabbaṃ, tasmīṇca sati **“āvajjanānantaraṃ dassanaṃ savanaṃ vā tadanantaraṃ sampaṭicchanan”**ti-ādinā cittaniyamena bhavitabbaṃ. Tathā ca sati sampaṭicchanasantīraṇānampi bhāvo siddho hoti, na indriyappavatti-ānubhāvena dassanasavanamattasseva, nāpi indriyānaṃ eva dassanasavanakiccatāti imamatthaṃ dassento āha **“dvāravīthibhede cittaniyamato cā”**ti. Paṭhamakusalena ce tadārammaṇassa uppatti hoti, taṃ paṭhamakusalānantaraṃ uppajjamānaṃ janakaṃ anubandhati nāma, dutiyakusalādi-anantaraṃ uppajjamānaṃ janakasadiṣaṃ anubandhati nāma, akusalānantaraṃ uppajjamānaṃca kāmāvacaratāya janakasadisanti.

**Ekādasa tadārammaṇacittāni -pa-** tadārammaṇaṃ na gaṇhantīti tadārammaṇabhāvatāya **“tadārammaṇan”**ti laddhanāmāni tadārammaṇabhāvaṃ na gaṇhanti, tadārammaṇabhāvena nappavattantīti attho. Atha vā nāmagottaṃ ārabha javane javite tadārammaṇaṃ tassa javanassa ārammaṇaṃ na gaṇhanti, nālambantīti attho. **“Rūpārūpadhammeti rūpārūpāvacaṇe dhamme. Idaṃ pana vatvā “abhiññāṇaṃ ārabhā”**ti visesaṃ parittādi-ārammaṇatāya kāmāvacarasadisesu ceva tadārammaṇānuppattidassanatthaṃ. Micchattaniyatā dhammā maggo viya bhāvanāya siddhā mahābalā cāti tattha javanena pavattamānena sānubandhanena na bhavitabbanti tesu tadārammaṇaṃ paṭikkhittaṃ.

**Lokuttaradhamme ārabbhāti** eteneva siddhe “**sammattaniyatadhammesū**”ti visum uddharaṇam sammattamicchattaniyatadhammānam aññamaññaṇapaṭipakkhāti balavabhāvena tadārammaṇassa avatthubhāvadassanattam.

Evam pavattiyam viññāṇappavattiṃ dassetvā paṭisandhiyam dassetuṃ “**yaṃ pana vuttan**”ti-ādimāha. **Kena katthāti** kena cittena kasmiṃ bhava. Ekūnavīsati paṭisandhiyo tena tena cittena pavattamānā paṭisandhikkhaṇe rūpārūpadhammāti tena tena cittena sā sā tattha tattha paṭisandhi hotīti vuttā. **Tassāti** cittassa.

**Āgantvāti** āgataṃ viya hutvā. **Gopakasīvalīti** rañño hitārakkhe gopakakule jāto sīvalināmako. Kammādi-anussaraṇabyāpārarahitattā “**sammūḥhakālakiriya**”ti vuttā. Abyāpārenea hi tattha kammādi-upaṭṭhānam hotīti. “Pisiyamānāya makkhikāya paṭhamam kāyadvārāvajjanam bhavaṅgam nāvatteti attanā cintiyamānassa kassaci atthitāyā”ti keci kāraṇam vadanti, tadetam akāraṇam bhavaṅgavisayato aññasa cintiyamānassa abhāvā aññacittappavattakāle ca bhavaṅgāvaṭṭanasseva asambhavato. idam panettha kāraṇam siyā—“tānissa tamhi samaye olambhanti ajjholambanti abhippalambantī”ti<sup>1</sup> vacanato tisu javanavāresu appavattesveva kammādi-upaṭṭhānena bhavitabbam. Anekajavanavārappavattiyā hi ajjholambanam abhippalambanaṇca hotīti. Tasmā kāyadvārāvajjanam anāvattetvā manodvārāvajjanameva kammādi-ālambanam paṭhamam bhavaṅgam āvaṭṭeti, tato phoṭṭhabbassa balavattā dutiyavāre kāyaviññānavīthi paccuppanne phoṭṭhabbe pavattati, tato purimajavanavāragahitesveva kammādīsu kamena manodvārajavanam javitvā mūlabhavaṅgasaṅkhātam āgantukabhavaṅgasaṅkhātam vā tadārammaṇam bhavaṅgam otarati, tadārammaṇābhāve vā bhavaṅgameva. **Etasmim ṭhāne kālam karotīti** tadārammaṇānantarena cuticittena, tadārammaṇābhāve vā bhavaṅgasaṅkhāteneva cuticittena cavatīti attho. Bhavaṅgameva hi cuticittam hutvā pavattatīti cuticittam idha “bhavaṅgan”ti vuttanti. Manodvāravisayo lahukoti lahukapaccupaṭṭhānam sandhāya vuttam “**arūpadhammānam -pa- lahuko**”ti. Arūpadhammassa hi manodvārassa visayo lahukapaccupaṭṭhānoti. Balavati ca rūpadhammassa

---

1. Ma 3. 203 piṭṭhe.

kāyadvārassa visaye appavattitvā manodvāra-visaye kammādimhi paṭhamāṃ cittappavattidassanena arūpadhammānaṃ visayassa lahukatā dīpitāti. Rūpānaṃ visayābhāvepi vā “arūpadhammānaṃ”ti vacanaṃ yesaṃ visayo atthi, taṃdassanattamevāti daṭṭhabbaṃ. Tena lahukammādīsu cittappavattito lahugahaṇīyatā visayassa lahukatā.

Kammādīnaṃ bhūmicittupādādivasena vitthārato ananto pabhedoti “saṅkhepato”ti āha.

Avijjātaṇhādikilesesu anupacchinnesveva kammādīno upaṭṭhānaṃ, tañcārabbha cittasantānaṃ bhavantarāninnapoṇapabbhārātā hotīti āha “anupacchinnakilesabalavināmitan”ti. Santāne hi vināmite tadekadesabhūtaṃ paṭisandhicittaṅca vināmitameva hoti, na ca ekadesavināmitabhāvena vinā santānavināmitatā atthīti. Sabbattha pana “duggatipaṭisandhininnāya cutiyā purimajavanāni akusalāni, itarāya ca kusalāni”ti nicchinanti. “Nimittassādagadhitā vā bhikkhave viññānaṃ tiṭṭhamānaṃ tiṭṭhati anubyañjanassādagadhitā vā. Tasmim ce samaye kālaṃ karoti, ṭhānametaṃ vijjati, yaṃ dvinnaṃ gatīnaṃ aññataraṃ gatīṃ upapajjeyya nirayaṃ vā tiracchānayaṇiṃ vā”ti<sup>1</sup> hi vuttaṃ. Tasmā āsannaṃ akusalaṃ duggatīyaṃ, kusalaṅca sugatīyaṃ paṭisandhiyā upanissayo hotīti.

**Rāgādihetubhūtaṃ hīnamārammaṇanti** akusalavipākassa ārammaṇaṃ bhavituṃ yuttaṃ aniṭṭhārammaṇaṃ āha. Tampi hi saṅkappavasena rāgassapi hetu hotīti. Akusalavipākajanakakammasahajātānaṃ vā taṃsadisāsannacutijavanacetanāsahajātānaṅca rāgādīnaṃ hetubhāvo eva hīnatā. Tañhi pacchānutāpajanakakammānaṃ ārammaṇaṃ kammavasena aniṭṭhaṃ akusalavipākassa ārammaṇaṃ bhaveyya, aññathā ca iṭṭhārammaṇe pavattassa akusalakammassa vipāko kammanimittārammaṇo na bhaveyya. Na hi akusalavipāko iṭṭhārammaṇo bhavitumarahatīti. Pañcadvāre ca āpāthamāgacchantaṃ paccuppannaṃ kammanimittānaṃ āsannakatakammārammaṇasantatīyaṃ uppannaṃ taṃsadisānaṅca daṭṭhabbaṃ, aññathā tadeva paṭisandhi-ārammaṇūpaṭṭhāpakaṃ tadeva ca paṭisandhijanaṅkaṃ bhaveyya, na ca paṭisandhiyā upacārābhūtāni viya “etasmim

1. Saṃ 2. 377 piṭṭhe.



tayā pavattitabban”ti paṭisandhiyā ārammaṇaṃ anupādentāni viya ca pavattāni cuti-āsannāni javanāni paṭisandhijanakāni bhavyeyum. “Katattā upacittā”ti<sup>1</sup> hi vuttam. Tadā ca taṃsamānavīthiyam viya pavattamānāni katham katūpacittāni siyum, na ca assāditāni tadā, na ca lokiyāni lokuttarāni viya samānavīthiphalāni honti.

“Pubbe vāssa taṃ kataṃ hoti pāpakammaṃ dukkhavedanīyam,  
pacchā vāssa taṃ kataṃ hoti pāpakammaṃ dukkhavedanīyam,  
maraṇakāle vāssa hoti micchādīṭṭhi samattā samādinā, tena so kāyassa  
bhedā paraṃ maraṇā apāyam duggatiṃ vinipātaṃ nirayaṃ  
upapajjati”ti<sup>2</sup>—

ādinā sutte maraṇakāle samattāya samādināya micchādīṭṭhiyā  
sammādīṭṭhiyā ca sahaajācetanāya paṭisandhidānaṃ vuttam, na ca dubbalehi  
pañcadvārikajavanehi micchādīṭṭhi sammādīṭṭhi vā samattā hoti samādinā.  
Vakkhati ca—

“Sabbampi hetam

kusalākusaladhammaṇḍivijānanādicavanapariyosānaṃ kiccaṃ  
manodvārikacitteneva hoti, na pañcadvārikenāti sabbassapetassa  
kiccassa karaṇe sahajavanakāni vīthiccittāni paṭikkhittāni”ti<sup>3</sup>.

Tattha hi “na kiñci dhammaṃ paṭivijānātīti ‘manopubbaṅgamā  
dhammā’ti<sup>4</sup> evam vuttam ekampi kusalam vā akusalam vā na paṭivijānātīti”<sup>5</sup>  
ca vuttam. Yesam paṭivibhāvanappavattiyā sukham vā dukkham vā anveti,  
tesam sā pavatti pañcadvāre paṭikkhittā, kusalākusalakammasamādānañca  
tādisamevāti. Tadārammaṇānantaram pana cavanam, tadanantarā ca upapatti  
manodvārikā eva hoti, na sahajavanakavīthiccitte pariyāpannāti iminā  
adhippāyena idha pañcadvārikatadārammaṇānantaram cuti, tadanantarām  
paṭisandhi ca vuttāti daṭṭhabbam. Tattha avasesapañcacittakkhaṇāyuke  
rūpādīmhi uppannam paṭisandhiṃ sandhāyeva “paccuppannārammaṇam  
upapatticittam paccuppannārammaṇassa bhavaṅgassa anantarapaccayena  
paccayo”ti<sup>6</sup>, avasesekacittakkhaṇāyuke ca uppannam sandhāya

1. Abhi 1. 104 piṭṭhe.

2. Ma 3. 257 piṭṭhe.

3. Abhi-Ṭṭha 2. 388 piṭṭhe.

4. Khu 1. 13 piṭṭhe.

5. Abhi-Ṭṭha 2. 387 piṭṭhe.

6. Abhi 9. 428 piṭṭhe.

“paccuppannārammaṇaṃ upapatticittaṃ atītārammaṇassa bhavaṅgassa anantarapaccayena paccayo”ti vuttanti veditabbaṃ.

**Suddhāya vāti** mahaggatakammanimittārammaṇāya javanavīthiyā tadārammaṇarahitāyāti attho. Sā pana javanavīthi mahaggatavipākassa upacāro viya daṭṭhabbā. Keci pana taṃ vīthim mahaggatāvasānaṃ vadanti. Atītārammaṇā ekādasavidhā, navattabbārammaṇā sattavidhā.

**Etenānusārena āruppacutiyāpi anantarā paṭisandhi veditabbāti** idaṃ kasmā vuttaṃ, nanu “pathavīkasiṇajjhānādivasena paṭiladdhamahaggatasugatiyaṃ ṭhitassā”ti evamādi ke eva naye ayampi paṭisandhi avaruddhāti? Na, tattha rūpāvacaracuti-anantarāya eva paṭisandhiyā vuttatā. Tattha hi “pathavīkasiṇādikaṃ vā nimittaṃ mahaggatacittaṃ vā manodvāre āpāthamāgacchati. Cakkhusotānaṃ vā”ti-ādikena rūpāvacaracutiyā eva anantarā paṭisandhi vuttāti viññāyati. Athāpi yathāsambhavayojanāya ayampi paṭisandhi tattheva avaruddhā, arūpāvacaracuti-anantarā pana rūpāvacarapaṭisandhi natthi, arūpāvacare ca uparūparicutiyā heṭṭhimā heṭṭhimā paṭisandhīti catutthārūppacutiyā navattabbārammaṇā paṭisandhi natthi. Tena tato tattheva atītārammaṇā kāmāvacare ca atītapaccuppannārammaṇā paṭisandhi itarāhi ca yathāsambhavaṃ atītanavattabbārammaṇā āruppapaṭisandhi, atītapaccuppannārammaṇā ca kāmāvacarapaṭisandhi yojetabbāti imassa visesassa dassanattamaṃ visumaṃ uddharaṇaṃ kataṃ.

Evam ārammaṇavasena ekavidhāya kāmāvacarasugaticutiyā duvidhā duggatipaṭisandhi, duggaticutiyā duvidhā sugatipaṭisandhi, kāmāvacarasugaticutiyā dvi-ekadvippakārānaṃ kāmarūpārūppānaṃ vasena pañcavidhā sugatipaṭisandhi, rūpāvacaracutiyā ca tattheva pañcavidhā, duvidhāya āruppacutiyā paccakaṃ dvinnāṃ dvinnāṃ kāmārūppānaṃ vasena aṭṭhavidhā ca paṭisandhi dassitā, duggaticutiyā pana ekavidhāya duggatipaṭisandhi duvidhā na dassitā, taṃ dassetuṃ “**duggatiyaṃ ṭhitassa panā**”ti-ādimāha. Yathāvuttā pana—

Dvidvipañcappakārā ca, pañcāṭṭhaduvidhāpi ca.

Catuvīsati sabbāpi, tā honti paṭisandhiyo.

“Kāmāvacarassa kusalassa kammassa katattā”ti-ādinā<sup>1</sup>  
nānākkhaṇīkakkammappaccayabhāvo dassitappakāroti  
upanissayapaccayabhāvameva dassento “**vuttañhetan**”ti-ādimāha.

**Ādinā sahāti**-ādinā vimissaviññāṇena saha. **Omato dve vā tayo vā dasakā uppajjantīti** gabbhaseyyakānaṃ vasena vuttaṃ. Aññattha hi aneke kalāpā saha uppajjanti. Brahmattabhāvepi hi anekagāvutappamaṇe aneke kalāpā sahuppajjantīti tiṃsato adhikāneva rūpāni honti gandharasāhārānaṃ paṭikkhittatā cakkhusotavattthusattakajīvitachakkabhāvepi tesam bahuttā. **Aṭṭhakathāyaṃ** pana tatthapi cakkhusotavattthudasakānaṃ jīvitanaṃvakaṃ ca uppatti vuttā, **pāliyaṃ** pana “rūpadhātuyā upapattikkhaṇe ṭhapetvā asaññasattānaṃ devānaṃ pañcāyatanāni pātubhavanti, pañca dhātuyo pātubhavanti”ti vuttaṃ, tathā “rūpadhātuyā cha āyatanāni nava dhātuyo”ti sabbasaṅgahavasena tattha vijjamānāyatanadhātuyo dassetuṃ vuttaṃ. **Kathāvattthumhi** ca ghānāyatanādīnaṃ viya gandhāyatanādīnaṃca tattha bhāvo paṭikkhitto “atthi tattha ghānāyatananti? Āmantā, atthi tattha gandhāyatananti? Na hevaṃ vattabbe”ti-ādinā<sup>2</sup>, na ca aphoṭṭhabbāyatanānaṃ pathavīdhātu-ādināṃ viya agandharasāyatanānaṃ gandharasānaṃ tattha bhāvo sakkā vattuṃ phusituṃ asakkuṇeyyatāvinimuttassa pathavī-ādisabhāvassa viya gandharasabhāvavinimuttassa gandharasasabhāvassa abhāvā.

Yadi ca ghānasamphassādīnaṃ kāraṇabhāvo natthīti āyatanānīti te na vucceyyuṃ, dhātu-saddo pana nissattanijjīvavācakoti gandhadhāturasadhātūti avacane natthi kāraṇaṃ, dhammabhāvo ca tesam ekantena icchitabbo sabhāvadhāraṇādīlakkhaṇato aññassa abhāvā, dhammānaṃca āyatanabhāvo ekantato **yamake**<sup>3</sup> vutto “dhammo āyatananti? Āmantā”ti. Tasmā tesam gandharasāyatanabhāvābhāvepi koci āyatanasabhāvo vattabbo. Yadi ca phoṭṭhabbabhāvato añño pathavīdhātu-ādībhāvo viya gandharasabhāvato añño tesam koci sabhāvo siyā, tesam dhammāyatane saṅgaho. Gandharasabhāve pana āyatanabhāve ca sati gandho ca so āyatanaṃca gandhāyatanāṃ,

1. Abhi 1. 104, 108, 116 piṭṭhesu. 2. Abhi 4. 278 piṭṭhe. 3. Abhi 5. 79 piṭṭhe.

raso ca so āyatanañca rasāyatananti idamāpannamevāti  
gandharasāyatanabhāvo ca na sakkā nivāretum, “tayo āhārā”<sup>1</sup>ti ca vacanato  
kabaḷikārāhārassa tattha abhāvo viññāyati. Tasmā yathā pāḷiyā avirodho  
hoti, tathā rūpagaṇanā kātabbā. Evañhi dhammatā na vilomitā hotīti.

**Jāti-uṇṇāyāti** gabbhaṃ phāletvā gahita-uṇṇāyātipi vadanti.

**Sambhavabhedoti** atthitābhedo. Nijjhāmatanḥikā kiri niccaṃ dukkhāturatāya  
kāmaṃ sevivā gabbhaṃ na gaṇhanti.

**Rūpībrahmesu tāva opapātikayonikesūti** opapātikayonikehi rūpībrahme  
niddhāreti. “Saṃsedajopapātīsu avakaṃsato tiṃsā”ti etaṃ vivaranto āha  
“**avakaṃsato panā**”ti-ādi, taṃ panetaṃ pāḷiyā na sameti. Na hi pāḷiyaṃ  
kāmaṃvacarānaṃ saṃsedajopapātikānaṃ aghānakānaṃ upapatti vuttā.

**Dhammahadayavibhaṅge**<sup>2</sup> hi—

“Kāmadhātuyā upapattikkhaṇe kassaci ekādasāyatanāni  
pātubhavanti, kassaci dasāyatanāni, kassaci aparāni dasāyatanāni,  
kassaci navāyatanāni, kassaci sattāyatanāni pātubhavanti”ti—

vuttaṃ, na vuttaṃ “aṭṭhāyatanāni pātubhavanti”ti. Tathā “dasāyatanāni  
pātubhavanti”ti tikkhattum vattabbaṃ siyā, aghānaka-upapattiyā  
vijjamāyā tikkhattuñca “navāyatanāni pātubhavanti”ti, na ca taṃ vuttaṃ.  
Evaṃ dhātupātubhāvādīpañhesu yamakepi ghānajivhākāyānaṃ saha-caritā  
vuttāti.

Cutiṭṭhisandhīnaṃ khandhādīhi aññamaññaṃ samānatā **abhedo**,  
asamānatā **bhedo**. Nayamukhamattaṃ dassetvā vuttaṃ avuttañca sabbhaṃ  
saṅgaṇhitvā āha “**ayaṃ tāva arūpabhūmīsuyeva nayo**”ti.  
Rūpārūpāvacarānaṃ upacārassa balavatāya tato cavitvā duggatīyaṃ upapatti  
natthīti “**ekaccasugaticutiya**”ti āha. **Ekaccaduggatīṭṭhisandhīti** ettha  
**ekaccaggahaṇassa** payojanaṃ maggitabbaṃ. Ayaṃ panetthādhīppāyo siyā—  
nānattakāyanānattasaññīsu vuttā ekacce vinipātikā tihetukādīpaṭṭhisandhikā,  
tesaṃ taṃ ṭṭhisandhīm vinipātabhāvena duggatīṭṭhisandhīti gahetvā  
sabbasugaticutiya

1. Abhi 2. 419 piṭṭhe.

2. Abhi 2. 426 piṭṭhe.

sā paṭisandhi hoti, na ekaccasugaticutiya evāti tamnivattanattham ekaccaduggatiggahaṇam kataṃ. Apāyapaṭisandhi eva hi ekaccasugaticutiya hoti, na sabbasugaticutiya. Atha vā duggatipaṭisandhi duvidhā ekaccasugaticutiya anantarā duggaticutiya cāti. Tattha pacchimaṃ vajjetvā purimaṃ eva gaṇhitum āha “**ekaccaduggatipaṭisandhi**”ti. **Ahetukacutiya sahetukapaṭisandhi**ti duhetukā tihetukā ca yojetabbā.

Maṇḍukadevaputtādīnaṃ viya hi ahetukacutiya tihetukapaṭisandhipi hotīti.

**Tassa tassa viparītato ca yathāyogaṃ yojetabbanti** “ekaccasugaticutiya ekaccaduggatipaṭisandhi”ti-ādīsu bhedavisesesu “ekaccaduggaticutiya ekaccasugatipaṭisandhi”ti-ādīnaṃ yaṃ yaṃ yujjati, taṃ taṃ yojetabbanti attho. Yujjamānamattāpekkhanavasena napuṃsakaniddeso kato, yojetabbanti vā bhāvatto daṭṭhabbo. Amahaggatabhiddhārammaṇāya mahaggata-ajjhattārammaṇāti-ādīsu pana viparītayojanā na kātabbā. Na hi mahaggata-ajjhattārammaṇāya cutiya arūpabhūmīsu amahaggatabhiddhārammaṇā paṭisandhi atthi. Catukkhandhāya arūpacutiya pañcakkhandhā kāmāvacarapaṭisandhīti etassa vipariyāyo sayameva yojito. Atītārammaṇacutiya paccuppannārammaṇā paṭisandhīti etassa ca vipariyāyo natthi evāti. Bhedaviseso eva ca evaṃ vitthārena dassito, abhedaviseso pana ekekasmim bhede tattha tattheva cutipaṭisandhiyojanāvasena yojetabbo “pañcakkhandhāya kāmāvacarāya pañcakkhandhā kāmāvacarā -pa-avitakka-avicārāya avitakka-avicārā”ti, catukkhandhāya pana catukkhandhā sayameva yojitā. Eteneva nayena sakkā nātunti pañcakkhandhādīsu abhedaviseso na dassitoti. **Tato hetum vināti** tattha hetum vinā.

Aṅgapaccaṅgasandhīnaṃ bandhanāni **aṅgapaccaṅgasandhibandhanāni**, tesam **chedakānaṃ. Niruddhesu cakkhādīsūti** atimandabhāvūpagamaṇaṃ sandhāya vuttanti vedittabbaṃ. Pañcadvārikaviññāṇānantarampi hi pubbe cuti dassitā. **Yamake**<sup>1</sup> ca—

---

1. Abhi 5. 132 piṭṭhe.

“Yassa cakkhāyatanaṃ nirujjhati, tassa manāyatanaṃ nirujjhatīti? Āmantā. Yassa vā pana manāyatanaṃ nirujjhati, tassa cakkhāyatanaṃ nirujjhatī ti? Sacittakānaṃ acakkhukānaṃ cavantānaṃ tesam manāyatanaṃ nirujjhati, no ca tesam cakkhāyatanaṃ nirujjhati. Sacakkhukānaṃ cavantānaṃ tesam manāyatanañca nirujjhati, cakkhāyatanañca nirujjhatī”ti—

ādinā cakkhāyanādīnaṃ cuticittena saha nirodho vuttoti. Laddho avaseso avijjādiko viññāṇassa paccayo etenāti **laddhāvasesapaccayo**, saṅkhāro. Avijjāpaṭicchādītādīnave tasmim kammādivisaye paṭisandhiviññāṇassa ārammaṇabhāvena uppattiṭṭhānabhūte taṇhāya appahīnattā eva purimuppannāya ca santatiyā pariṇatattā paṭisandhiṭṭhānābhikumhaṃ viññāṇaṃ ninnapoṇapabbhāraṃ hutvā pavattatīti āha “**taṇhā nāmetī**”ti. **Sahajātasāṅkhārā**ti cuti-āsannajavanaviññāṇasahajātacetanā, sabbepi vā phassādayo. Tasmim paṭisandhiṭṭhāne kammādivisaye viññāṇaṃ **kipanti**, kipantā viya tasmim visaye paṭisandhivasena viññāṇapatiṭṭhānassa hetubhāvena pavattantīti attho.

**Tanti** taṃ viññāṇaṃ, cutipaṭisandhitadāsannaviññāṇaṃ santativasena viññāṇanti upanītekattaṃ. **Taṇhāya nāmiyamānaṃ -pa- pavattatīti** namanakhipanapurimanissayajahanāparanissayassādananissayarāhitapavatta nāni santativasena tassevekassa viññāṇassa honti, na aññassāti dasseti. **Santativasenā**ti ca vadanto “tadevidaṃ viññāṇaṃ sandhāvati saṃsarati anaññaṃ”ti<sup>1</sup> idaṅca micchāgāhaṃ paṭikkhipati. Sati hi nānattanaye santativasena ekattanayo hotīti. Orimatīrarukkhavinibaddharajju viya purimabhavattabhāvavinibandhaṃ kammādi-ārammaṇaṃ daṭṭhabbaṃ, puriso viya viññāṇaṃ, tassa mātikātikkaṃnicchā viya taṇhā, atikkamanapayogo viya khipanakasaṅkhārā. Yathā ca so puriso paratīre patiṭṭhahamāno paratīrarukkhavinibaddhaṃ kiñci assādayamāno anassādayamāno vā kevalaṃ pathaviyaṃ sabalapayogeheva patiṭṭhāti, evamidampi bhavantarattabhāvavinibaddhaṃ hadayavatthunissayaṃ pañcavokārabhave assādayamānaṃ catuvokārabhave anassādayamānaṃ vā kevalaṃ ārammaṇasampayuttakammeheva pavattati. Tattha **assādayamānanti** pāpuṇantaṃ, paṭilabhamānanti attho.

1. Ma 1. 323 piṭṭhe.

**Bhavantarādipaṭisandhānatoti** bhavantarassa ādisambandhanato, bhavantarādayo vā bhavayonigativinñāṇaṭṭhitisattāvāsantarā, tesam paṭisandhānatoti attho. **Kammanti** paṭisandhijanakaṃ kammaṃ. **Saṅkhārāti** cuti-āsannajavanavinñāṇasahagatā khipanakasaṅkhārā.

**Saddādihetukāti** ettha paṭighoso saddahetuko, padīpo padīpantarādihetuko, muddā lañchanahetukā, chāyā ādāsādīgatamukhādihetukā. **Aññatra agantvā hontīti** saddādīpaccayadesaṃ agantvā saddādihetukā honti tato pubbe abhāvā, evamidampi paṭisandhi vinñāṇaṃ na hetudesam gantvā tamhetukaṃ hoti tato pubbe abhāvā, tasmā na idaṃ hetudesato purimabhavato āgataṃ paṭighosādayo viya saddādidesato, nāpi tattha hetunā vinā uppannaṃ saddādīhi vinā paṭighosādayo viyāti attho. Atha vā **aññatra agantvā hontīti** pubbe paccayadese sannihitā hutvā tato aññatra gantvā tappaccayā na honti uppattito pubbe abhāvā, nāpi saddādīpaccayā na honti, evamidampīti vuttanayena yojetabbaṃ. **Esa nayoti** bījaṅkurādīsu sabbahetuhetusamuppannesu yathāsambhavaṃ yojanā kātabbāti dasseti. Idhāpi hi hetuhetusamuppannavinñāṇaṇaṃ ekantamekatte sati na manussagatiko devagatibhūto siyā, ekantanānatte na kammavato phalaṃ siyā. Tato “rattassa bījaṃ, rattassa phalaṃ”ti-ādikassa viya “bhūtapubbāhaṃ bhante rohitasso nāma isi”ti-ādikassa<sup>1</sup> vohārassa lopo siyā, tasmā ettha santānabandhe sati hetuhetusamuppannesu na ekantameva ekatā vā nānatā vā upagantabbā. Ettha ca ekanta-ekatāpaṭisedhena “sayamkataṃ sukhaṃ dukkhaṃ”ti imaṃ diṭṭhiṃ nivāreti, ekantanānatāpaṭisedhena “paramkataṃ sukhaṃ dukkhaṃ”ti, hetuhetusamuppannabhāvavacanena “adhiccasamuppannaṃ”ti. **Etthāti** ekasantāne.

Catumadhura-alattakarasādibhāvanā ambamātuluṅgādibījanaṃ **abhisāṅkhāro**. Ettha bījaṃ viya kammavā satto, abhisāṅkhāro viya kammaṃ, bījassa aṅkurādīpabandho viya sattassa paṭisandhivinñāṇādīpabandho, tathuppannassa madhurassa rattakesarassa vā phalassa vā tasseva bījassa, tato eva ca abhisāṅkhārato bhāvo viya kammakārakasseva sattassa, taṃkammato

---

1. Saṃ 1. 61 piṭṭhe.

eva ca phalassa bhāvo veditabbo. Bālasarīre kataṃ vijjāpariyāpuṇaṇaṃ sippasikkhanaṃ osadhappayogo ca na vuḍḍhasarīraṃ gacchanti. Atha ca taṇṇimittaṃ vijjāpāṭavaṃ sippajānanaṃ anāmayatā ca vuḍḍhasarīre hoti, na ca taṃ aññassa hoti taṃsantatipariyāpanne eva vuḍḍhasarīre uppajjanato, na ca yathāpayuttena vijjāpariyāpuṇanādinā vinā aññato hoti tadabhāve abhāvato. Evamidhāpi santāne yaṃ phalaṃ, etaṃ nāññassa, na ca aññatoti yojetabbaṃ. **Na aññatoti** etena ca saṅkhārābhāve phalābhāvameva dasseti, nāññapaccayanivāraṇaṃ karoti.

Yampi vuttaṃ, tattha vadāmāti vacanaseso. Tattha vā upabhuñjake asati siddhā bhuñjakasammutīti sambandho. Phalatīti sammuti **phalatisammuti**.

**Evam santepīti** asaṅkantipātubhāve, tattha ca yathāvuttadosapariharāṇe sati siddheti attho. **Pavattito pubbeti** kammāyūhanakkhaṇato pubbe. **Pacchā cāti** vipaccanapavattito pacchā ca. Avipakkavipākā katattā ce paccayā, vipakkavipākānampi katattaṃ samānanti tesampi phalāvahatā siyāti āsaṅkānivattanatthaṃ āha “**na ca niccaṃ phalāvahā**”ti. **Na vijjamānattā vā avijjamānattā vāti** etena vijjamānattaṃ avijjamānattañca nissāya vuttadoseva pariharati.

Tassā paṭibhogakiriyāya, bhaṇḍakīṇanakiriyāya, iṇagahaṇādikiriyāya vā karaṇamattaṃ **taṅkiriyaḱaraṇamattaṃ**. Tadeva **tadatthaniyyātane** paṭibhaṇḍadāne iṇadāne ca paccayo hoti, aphaḷitaniyyātanādiphalanti attho.

**Avisesenāti** “tīhetuko tīhetukassā”ti-ādikaṃ bhedaṃ akatvāva sāmāññato, piṇḍavasenaṇāti attho. Sabbattha upanissayapaccayo balavakammasa vasena yojetabbo. “Dubbalañhi upanissayapaccayo na hoti”ti vakkhamānamevetam paṭṭhānavaṇṇanāyanti. **Avisesenāti** sabbapuññābhisaṅkhāraṃ saha saṅgaṇhāti. **Dvādasākusalacetanābhedoti** ettha uddhaccasahagatā kasmā gahitāti vicāretabbametam. **Ekassa viññāṇassa tatheva paccayo paṭisandhiyaṃ, no pavatteti** ekasseva paccayabhāvaniyamo paṭisandhiyaṃ, no pavatte. Pavatte hi sattannampi paccayoti adhippāyo. “Tathā kāmāvacaradevalokepi anīṭṭhā rūpādayo



natthī”ti vuttaṃ, devānaṃ pana pubbanimittapātubhāvakāle milātamaḷādīnaṃ aniṭṭhatā kathaṃ na siyā.

**Sveva dvīsu bhavesūti** ettha ekūnatimsacetanābhedampi cittasaṅkhāraṃ cittasaṅkhārabhāvena ekattaṃ upanetvā “**svevā**”ti vuttaṃ. Tadekadeso pana kāmāvacaracittasaṅkhārova terasannaṃ navannaṃca paccayo daṭṭhabbo. Ekadesapaccayabhāvena hi samudāyo vuttoti.

Yattha ca vitthārappakāsaṇaṃ kataṃ, tato bhavato paṭṭhāya mukhamattappakāsaṇaṃ kātukāmo āha “**ādito paṭṭhāyā**”ti. Tena “dvīsu bhavesū”ti-ādi vuttaṃ. **Tatiyajjhānabhūmivasenā**ti etena ekattakāya-ekattasaññīsāmaññena catutthajjhānabhūmi ca asaññāruppavajjā gahitāti veditabbā. **Yathāsambhavanti** ekavīsatiyā kāmāvacararūpāvacarakusalavipākesu cuddasannaṃ paṭisandhiyaṃ pavatte ca, sattannaṃ pavatte eva. Ayaṃ yathāsambhavo.

**Catunnaṃ viññāṇānanti** bhavādayo apekkhitvā vuttaṃ, catūsu antogadhānaṃ pana tiṇṇaṃ viññāṇānaṃ tīsu viññāṇaṭṭhitīsu ca paccayabhāvo yojetabbo, aviññāṇake sattāvāse saṅkhārapaccayā viññāṇe avijjamānepi tassa saṅkhārahetukattaṃ dassetuṃ “**apicā**”ti-ādimāha. Etasmiṃca mukhamattappakāsaṇe puññābhisaṅkhārādīnaṃ duggati-ādīsu pavattiyaṃ kusalavipākādiviññāṇānaṃ paccayabhāvo bhavesu vuttanayeneva viññāyatīti na vuttoti veditabbo.

Viññāṇapadaniddesavaṇṇanā niṭṭhitā.

### Nāmarūpapadaniddesavaṇṇanā

228. Suttantābhidhammesu nāmarūpadesanāviseso **desanābhedo**. **Tayo khandhā**ti etaṃ yadipi pāḷiyaṃ natthi, atthato pana vuttameva hotīti katvā vuttanti veditabbaṃ.

Aṇḍajānaṃca abhāvakānanti yojetabbaṃ. **Santatisīsānī**ti kalāpasantānamūlāni. Yadiipi vikārarūpāni paṭisandhikkhaṇe na santi,

lakkaṇaparicchedarūpāni pana santīti tāni aparinipphannāni paramatthato vivajjento āha “**rūparūpato**”ti.

**Kāmabhava pana yasmā sesa-opapātikānanti** ettha kiñcāpi kāmabhava “opapātikā”ti vuttā na santi, yena sesaggahaṇaṃ sātthakaṃ bhaveyya, aṇḍajagabbhaseyyakehi pana opapātikasamsedajā sesā hontīti sesaggahaṇaṃ katanti veditabbaṃ. Atha vā brahmakāyikādikehi opapātikehi vutthehi sese sandhāya “**sesa-opapātikānan**”ti āha. Te pana arūpinopi santīti “**kāmabhava**”ti vuttaṃ, aparipuṇṇāyatanānaṃ pana nāmarūpaṃ yathāsambhavaṃ rūpamissakaviññānaniddese vuttanayena sakkā dhammagahaṇāto viññātunti na vuttanti daṭṭhabbaṃ.

Avakāmsato dve aṭṭhakāneva utucittasamuṭṭhānāni hontīti sasaddakālaṃ sandhāya “**ukkāmsato dvinnāṃ navakānan**”ti vuttaṃ. **Pubbeti** khandhavibhaṅgeti vadanti. Tattha hi “ekekacittakkaṇe tikkhattuṃ uppajjamānaṃ”ti vuttaṃ. Idheva vā vuttaṃ santatidvayādikaṃ sattakapariyosānaṃ sandhāyāha “**pubbe vuttaṃ kammamamuṭṭhānaṃ sattatidvayānaṃ**”ti, taṃ panuppajjamānaṃ ekekacittakkaṇe tikkhattuṃ uppajjatīti iminādhippāyena vuttaṃ “ekekacittakkaṇe tikkhattuṃ uppajjamānaṃ”ti. **Catuddisā vavattthāpitā** aññamaññaṃsaṃsaṭṭhasisā mūlena catūsu disāsu vavattthāpitā aññamaññaṃ āliṅgetvā ṭhitā bhinnavāhanikā viya.

**Pañcavokārabhave ca pavattiyanti** rūpājanakakammajaṃ pañcaviññāṇappavattikālaṃ sahaṇṇaviññāṇapaccayaṃca sandhāyāha. Tadā hi tato nāmameva hotīti, kammaviññāṇapaccayā pana sadāpi ubhayaṃ hotīti sakkā vattum, pacchāṇṇaviññāṇapaccayā ca rūpaṃ upatthaddhaṃ hotīti. “**Asaññesūti**-ādi kammaviññāṇapaccayaṃ sandhāya vuttaṃ, **pañcavokārabhave ca pavattiyanti** bhavaṅgādijanakakammato aññena rūpupattikālaṃ nirodhasamāpattikālaṃ bhavaṅgādi-uppattikālaṃ aññakālaṃca sandhāya vuttanti yuttaṃ. Bhavaṅgādi-uppattikāle hi taṃjanakeneva kammunā uppajjamānaṃ rūpaṃ, so ca vipāko kammaviññāṇapaccayo hotīti sakkā vattum. Sahaṇṇaviññāṇapaccayānapekkhampi hi pavattiyāṃ kammena pavattamānaṃ rūpaṃ nāmaṃca na kammaviññāṇapaccayaṃca hotīti. **Sabbatthāti** paṭisandhiyaṃ pavatte ca. Sahaṇṇaviññāṇapaccayā nāmarūpaṃ, kammaviññāṇapaccayā ca nāmarūpaṃca yathāsambhavaṃ yojetabbaṃ.

**Nāmañca rūpañca nāmarūpañca nāmarūpanti** ettha nāmarūpa-saddo attano ekadesena nāma-saddena nāma-saddassa sarūpo, rūpa-saddena ca rūpa-saddassa, tasmā “sarūpānaṃ ekaseso”ti nāmarūpa-saddassa ṭhānaṃ itaresañca nāmarūpa-saddānaṃ adassanaṃ daṭṭhabbaṃ.

Vipākato aññaṃ **avipākam**. Yato dvidhā mataṃ, tato yuttameva idanti yojetabbaṃ. **Kusalādicittakkhaṇeti ādi**-saddena akusalakiriyacittakkhaṇe viya vipākacittakkhaṇepi vipākājanakakammasamuṭṭhānaṃ saṅgahitanti veditabbaṃ. Vipākacittakkhaṇe pana abhisāṅkhāraviññāṇapaccayā pubbe vuttanayena ubhayañca upalabbhatīti tādisavipākacittakkhaṇavajjanatthaṃ “**kusalādicittakkhaṇe**”ti vuttaṃ.

**Suttantikapariyāyenā**ti paṭṭhāne rūpānaṃ upanissayapaccayassa avuttattā vuttaṃ, suttante pana “yasmim sati yaṃ hoti, asati ca na hoti, so tassa upanissayo nidānaṃ hetu pabhavo”ti katvā “viññāṇūpanisaṃ nāmarūpan”ti rūpassa ca viññāṇūpanissayatā vuttā. Vanapatthapariyāye ca vanasaṇḍagāmanigamanagara janapadapuggalūpanissayo iriyāpathavihāro, tato ca cīvarādīnaṃ jīvitaparikkhārānaṃ kasirena ca appakasirena ca samudāgamaṇaṃ vuttaṃ, na ca vanasaṇḍādayo ārammaṇūpanissayādibhāvaṃ iriyāpathānaṃ cīvarādisamudāgamaṇassa ca bhajanti, tasmā vinā abhāvo eva ca suttantapariyāyato upanissayabhāvo daṭṭhabbo. Nāmassa abhisāṅkhāraviññāṇaṃ kammārammaṇapaṭisaṅgādhikāle ārammaṇapaccayova hotīti vattabbameva natthīti rūpasseva suttantikapariyāyato ekadhā paccayabhāvo vutto. Sasaṃsayassa hi rūpassa taṃpaccayo hotīti vutte nāmassa hotīti vattabbameva natthīti.

Pavattassa pākaṭattā apākaṭaṃ paṭisaṅgādhim gahetvā pucchati “**katham panetan**”ti-ādinā. Suttato nāmaṃ, yuttito rūpaṃ viññāṇapaccayā hotīti jānitabbaṃ. Yuttito sādhetvā suttana taṃ daḷhaṃ karonto “**kammasamuṭṭhānassapi hī**”ti-ādimāha. **Cittasamuṭṭhānassevā**ti cittasamuṭṭhānassa viya. Yasmā nāmarūpameva pavattamānaṃ dissati, tasmā tadeva vadantena anuttaraṃ dhammacakkaṃ pavattitaṃ. Suññatāpakāsanāñhi dhammacakkappavattananti adhippāyo. Nāmarūpamattatāvacaneneva vā pavattiyā dukkhasaccamattatā vuttā, dukkhasaccappakāsanena ca tassa samudayo, tassa

ca nirodho, nirodhagāmī ca maggo pakāsito eva hoti. Ahetukassa dukkhassa hetunirodhā, anirujjhanakassa ca abhāvā, nirodhassa ca upāyena vinā anadhigantabbattāti catusaccappakāsanam dhammacakkappavattanam yojetabbanam.

Nāmarūpapadaniddesavaṇṇanā niṭṭhitā.

### Salāyatanapadaniddesavaṇṇanā

229. **Niyamatoti** ca idam catunnam bhūtānam, channam vatthūnam, jīvitassa ca yathāsambhavam saha jātānissayapurejāta-indriyādinā ekantena salāyatanassa pavattamānassa paccayabhāvam sandhāya vuttam. Rūpāyatanādīnam pana saha jātānissayānupālanabhāvo natthīti aggahaṇam veditabbanam. Ārammaṇārammaṇapurejātādibhāvo ca tesam na santipariyāpannānameva, na ca cakkhādīnam viya ekappakārenevāti aniyamato paccayabhāvo. **Niyamato -pa- jīvitindriyanti evanti** ettha **evam-**saddena vā rūpāyatanādīnampi saṅgaho veditabbo. **Chaṭṭhāyatanañca salāyatanañca salāyatananti** ettha yadipi chaṭṭhāyatanasalaṭṭhāyatana-saddānam saddato sarūpatā natthi, atthato pana salāyatane kadesova chaṭṭhāyatananti ekadesasarūpatā atthīti ekadesasarūpekaseso katoti veditabbo. Atthatopi hi sarūpānam ekadesasarūpekasesam icchanti “vaṅko ca kuṭilo ca kuṭilā”ti, tasmā atthato ekadesasarūpānañca ekasesena bhavitabbanti.

Atha vā chaṭṭhāyatanañca manāyatanañca chaṭṭhāyatananti vā, manāyatanañca vā, chaṭṭhāyatanañca chaṭṭhāyatanañca chaṭṭhāyatananti vā, manāyatanañca manāyatanañca manāyatanañca vā ekasesam katvā cakkhādīhi saha “salāyatanan”ti vuttanti tameva ekasesam nāmamattapaccayassa, nāmarūpapaccayassa ca manāyatanañca vasena kataṃ atthato dassento āha “**chaṭṭhāyatanañca salāyatanañca salāyatananti evam katekasesassā**”ti. Yathāvuttopi hi ekaseso atthato chaṭṭhāyatanañca salāyatanañcāti evam kato nāma hotīti. Sabbattha ca ekaseso

kate ekavacananiddeso katekasesānaṃ  
 saḷāyatanādisaddavacanīyatāsāmaññavasena katoti daṭṭhabbo. **Abyākatavāre vakkhatīti** kiñcāpi akusalavāre kuslavāre ca “nāmapaccayā chaṭṭhāyatanan”ti vuttam, suttantabhājanīye pana vipākachaṭṭhāyatanameva gahitanti adhippāyena abyākatavārameva sādhakabhāvena udāhaṭanti daṭṭhabbam. Paccayanaye pana “chaṭṭhā<sup>1</sup> hoti taṃ avakaṃsato”ti-ādinā avipākassapi paccayo uddhaṭo, so niravasesam vattukāmatāya uddhaṭoti veditabbo. **Idha saṅgahitanti** idha ekasesanayena saṅgahitam, tattha abyākatavāre lokiyavipākabhājanīye vibhattanti veditabbanti adhippāyo.

**Neyyanti** ñeyyam. **Ukkaṃsāvakaṃsoti** ettha sattadhā paccayabhāvato ukkaṃso aṭṭhadhā paccayabhāvo, tato pana navadhā tato vā dasadhāti ayam ukkaṃso, avakaṃso pana dasadhā paccayabhāvato navadhā paccayabhāvo, tato aṭṭhadhā, tato sattadhāti evam veditabbo, na pana sattadhā paccayabhāvato eva dvepi ukkaṃsāvakaṃsā yojetabbā tato avakaṃsābhāvatoti.

**Hadayavatthuno sahāyam hutvāti** etena arūpe viya asahāyam nāmaṃ na hoti, hadayavatthu ca nāmena saha chaṭṭhāyatanassa paccayo hotīti ettakameva dasseti, na pana yathā hadayavatthu paccayo hoti, tathā nāmampīti ayamattho adhippeto. Vatthu hi vippayuttapaccayo hoti, na nāmaṃ, nāmañca vipākahetādapaccayo hoti, na vatthūti. Pavatte arūpadhammā kammajarūpassa ṭhittipattasseva paccayā honti, na uppajjamānassāti vippayutta-atthi-avigatā ca pacchājātavippayuttādayo eva cakkhādīnaṃ yojetabbā.

**Avasesamanāyatanassāti** ettha “pañcakkhandhabhave panā”ti etassa anuvattamānattā pañcavokārabhave eva pavattamānaṃ pañcaviññāṇehi avasesamanāyatanam vuttanti daṭṭhabbam. Nāmarūpassa sahaṭādisādhāraṇapaccayabhāvo sampayuttādi-asādhāraṇapaccayabhāvo ca yathāsambhavam yojetabbo.

Saḷāyatanapadaniddesavaṇṇanā niṭṭhitā.

**Phassapadaniddesavaṇṇanā**

230. “Chaṭṭhāyatanapaccayā phasso”ti abhidhammabhājanīyapāḷi āruppaṃ sandhāya vuttāti **“chaṭṭhāyatanapaccayā phassoti pāḷi-anusarato”**ti āha. **Ajjhattanti** sasantatipariyāpannameva gaṇhāti. Tañhi sasantatipariyāpannakammanibbattaṃ tādissa phassassa paccayo hoti, rūpādīni pana bahiddhā anupādināni ca phassassa ārammaṇaṃ honti, na tāni cakkhādīni viya sasantatipariyāpannakammakilesanimittapavattibhāvena phassassa paccayoti paṭhamācariyavāde na gahitāni, dutiyācariyavāde pana yathā tathā vā paccayabhāve sati na sakkā vajjetunti gahitānīti.

Yadi sabbāyatanehi eko phasso sambhaveyya, “saḷāyatanapaccayā phasso”ti ekassa vacanaṃ yujjeyya. Athāpi ekamhā āyatanā sabbe phassā sambhaveyyuṃ, tathāpi sabbāyatanehi sabbaphassasambhavato āyatanabhedena phassabhedo natthīti tadabhedavasena ekassa vacanaṃ yujjeyya, tathā pana asambhavato na yuttanti codeti **“na sabbāyatanehi”**ti-ādinā. Aññassapi vā asambhavantassa vidhānassa bodhanatthameva **“nāpi ekamhā āyatanā sabbe phasso”**ti vuttaṃ, “na sabbāyatanehi eko phasso sambhoti”ti idameva pana ekaphassavacanassa ayuttadīpakaṃ kāraṇanti veditabbaṃ. Nidassanavasena vā etaṃ vuttaṃ, nāpi ekamhā āyatanā sabbe phassā sambhonti, evaṃ na sabbāyatanehi eko phasso sambhoti, tasmā ekassa vacanaṃ ayuttanti. Parihāraṃ pana anekāyatanehi ekaphassassa sambhavatoti dassento **“tatrīdaṃ vissajjanaṃ”**ti-ādimāha. Ekopi anekāyatanappabhavo **ekopanekāyatanappabhavo**. Chadhā paccayatte pañca vibhāvayeti evaṃ sesesupi yojanā. **Tathā cāti** paccuppannāni rūpādīni paccuppannañca dhammāyatanapariyāpannaṃ rūparūpaṃ sandhāya vuttaṃ. **Ārammaṇapaccayamattenāti** taṃ sabbaṃ apaccuppannaṃ aññañca dhammāyatanā sandhāya vuttaṃ.

Phassapadaniddesavaṇṇanā niṭṭhitā.

### Vedanāpadaniddesavaṇṇanā

231. “Sesānan”ti ettha sampaṭicchana cakkhusamphassādayo pañca yadipi anantarādīhipi paccayā honti, anantarādīnaṃ pana upanissaye antogadhattā santīraṇatadārammaṇānañca sādharāṇassa tassa vasena “**ekadhā**”ti vuttaṃ.

Tebhūmakavipākavedanānampi sahaḥjātamanosamphassasaṅkhāto so phasso aṭṭhadhā paccayo hotīti yojetabbāṃ. Paccayaṃ anupādinnaṃ keci icchantīti “**yā panā**”ti-ādinā manodvārāvajjanaphassassa paccayabhāvo vutto, tañca mukhamattadassanattamaṃ daṭṭhabbāṃ. Etena nayena sabbassa anantarassa anānantarassa ca phassassa tassā tassā vipākavedanāya upanissayatā yojetabbāti.

Vedanāpadaniddesavaṇṇanā niṭṭhitā.

### Tañhāpadaniddesavaṇṇanā

232. **Mamattenā**ti sampiyāyamānena, assādanataṇhāyāti vuttaṃ hoti. Tattha putto viya vedanā daṭṭhabbā, khīrādayo viya vedanāya paccayabhūtā rūpādayo, khīrādidāyikā dhāti viya rūpādichaḷārammaṇadāyikā cittakārādayo cha. Tattha vejjo rasāyanojāvasena tadupatthambhitajīvitavasena ca dhammārammaṇassa dāyakoti daṭṭhabbo. Ārammaṇapaccayo uppajjamānassa ārammaṇamattameva hoti, na upanissayo viya uppādakoti uppādakassa upanissayasseva vasena “**ekadhāvā**”ti vuttaṃ. Upanissayena vā ārammaṇūpanissayo saṅgahito, tena ca ārammaṇabhāvena taṃsabhāvā aññopi ārammaṇabhāvo dīpito hotīti upanissayavaseneva paccayabhāvo vuttoti veditabbo.

**Yasmā vā**ti-ādinā na kevalaṃ vipākasukhavedanā eva, tissopi pana vedanā vipākā viśesena taṇhāya upanissayapaccayo, avisesena itarā cāti dasseti. **Upekkhā pana santattā, sukhamicceva bhāsītāti** tasmā sāpi bhiyyo icchanavasena taṇhāya upanissayoti

adhippāyo. Upekkhā pana akusalavipākabhūtā aniṭṭhattā dukkhe avarodhetabbā, itarā iṭṭhattā sukheti sā dukkhaṃ viya sukhaṃ viya ca upanissayo hotīti sakkā vattunti. “Vedanāpaccayā taṇhā”ti vacanena sabbassa vedanāvato paccayassa atthitāya taṇhuppattippasaṅge taṇnivāraṇatthamāha “**vedanāpaccayā cāpī**”ti-ādi.

Nanu “anusayasahāyā vedanā taṇhāya paccayo hotī”ti vacanassa abhāvā atippasaṅganivattanaṃ na sakkā kātunti? Na, vaṭṭakathāya pavattattā. Vaṭṭassa hi anusayavirahe abhāvato anusayasahitāyeva paccayoti atthato vuttametaṃ hotīti. Atha vā “avijjāpaccayā”ti anuvattamānattā anusayasahitāva paccayoti viññāyati. “Vedanāpaccayā taṇhā”ti ca ettha vedanāpaccayā eva taṇhā, na vedanāya vināti ayaṃ niyamo viññāyati, na vedanāpaccayā taṇhā hoti evāti, tasmā atippasaṅgo natthi evāti.

**Vusīmatoti** vusitavato, vusitabrahmacariyavāsassāti attho. Vussatīti vā “vusī”ti maggo vuccati, so etassa vattho atthīti **vusīmā**. Aggaphalaṃ vā pariniṭṭhitavāsattā “vusī”ti vuccati, taṃ etassa atthīti **vusīmā**.

Taṇhāpadaniddesavaṇṇanā niṭṭhitā.

### Upādānapadaniddesavaṇṇanā

233. **Sassato attāti** idaṃ purimadiṭṭhiṃ upādiyamānaṃ uttaradiṭṭhiṃ nidassetuṃ vuttaṃ. Yathā hi esā diṭṭhi daḥhikaraṇavasena purimaṃ uttarā upādiyati, evaṃ “natthi dinnan”ti-ādikāpīti. **Attaggahaṇaṃ** pana attavādupādānanti na idaṃ diṭṭhupādānadassananti daṭṭhabbaṃ. **Loko cāti** vā attaggahaṇavinimuttaṃ gahaṇaṃ diṭṭhupādānabhūtaṃ idha purimadiṭṭhi-uttaradiṭṭhivacanehi vuttanti veditabbaṃ. “Dhammasaṅkhepavithhāre pana saṅkhepato taṇhādaḥhattaṃ, saṅkhepato diṭṭhimattameva, vitthārato panā”ti evaṃ dhammasaṅkhepavithhārato saṅkhepaṃ vitthāraṇca niddhāretīti. **Dhammasaṅkhepavithhāreti** niddhāraṇe bhummaṃ daṭṭhabbaṃ.



Pakati-aṇu-ādināṃ sassatagāhapubbaṅgamo, sarīrassa ucchedaggāhapubbaṅgamo ca tesaṃ sāmibhūto koci sassato ucchiḍḍamāno vā attā atthīti attaggāho kadāci hotīti “**yebhuyyenā**”ti vuttam. Yebhuyyena paṭhamamāṃ attavādupādānanti-ādinā vā sambandho.

Yadipi bhavarāgajavanavīthi sabbapaṭhamamāṃ pavattati gahitappaṭṭisandhikassa bhavanikantiyā pavattitabbatā, so pana bhavarāgo taṇhādalhattamāṃ na hotīti maññamāno na kāmupādānassa paṭhamuppattimāha. Taṇhā kāmupādānanti pana vibhāgassa akaraṇe sabbāpi taṇhā kāmupādānanti, karaṇepi kāmārāgato aññāpi taṇhā dalhabhāvamāṃ pattā kāmupādānanti tassa arahattamaggavajjhatā vuttā.

Uppattiṭṭhānabhūtā cittuppādā **visayo**. Pañcupādānakkhandhā ālayo, tattha ramatīti **ālayarāmā**, pajā. Teneva sā ālayarāmatā ca sakasantāne parasantāne ca pākaṭā hotīti. Upanissayavacanena ārammaṇānantarapakatūpanissayā vuttāti anantarapaccayādīnampi saṅgaho kato hoti.

Upādānapadaniddesavaṇṇanā niṭṭhitā.

### Bhavapadaniddesavaṇṇanā

234. Phalavohārena kammabhavo bhavoti vuttoti upapattibhavanibbaccanameva dvayassapi sādharmaṇam katvā vadanto āha “**bhavatīti bhavo**”ti. **Bhavam gacchatīti** nipphādanaphalavasena attano pavattikāle bhavābhimukham hutvā pavattatīti attho, nibbattanameva vā ettha gamanam adhippetam.

**Saññāvataṃ bhavo saññābhavoti** ettha vantū-saddassa lopo daṭṭhabbo, tassa vā atthe akāram katvā “saññābhavo”tipi pāṭho. Vokiriyati pasārīyati vitthārīyatīti vokāro, vokiraṇam vā vokāro, so ekasmiṃ pavattatā **eko vokāro**ti vutto, padesapasaṭṭupattīti attho.

**Cetanāsampayuttā vā -pa- saṅgahitā**ti ācayagāmitāya kammaśaṅkhātataṃ dassetvā kammabhavo saṅgahitabhāvaṃ pariyāyena vadati, nippariyāyena pana cetanāva kammabhavo. Vuttañhi “kammabhavo tīhi khandhehi ekenāyatanena ekāya dhātuyā sampayutto, ekena khandhena ekenāyatanena ekāya dhātuyā kehici sampayutto”<sup>1</sup>. Upapattibhavo tīhipi tikehi vuttā upapattikkhandhāva. Yathāha “upapattibhavo kāmabhavo saññābhavo pañcavokārabhavo pañcahi khandhehi ekādasahāyatanehi sattarasahi dhātūhi saṅgahito”<sup>2</sup>-ādi<sup>2</sup>. Yadi hi anupādinnakānampi gahaṇaṃ siyā, “dvādasahāyatanehi aṭṭhārasahi dhātūhi”<sup>2</sup>ti vattabbaṃ siyāti.

Saṅkhārabhavānaṃ dhammabhedato na saṅkhārā eva puna vuttāti “**sāttakamevidaṃ punavacanaṃ**”<sup>2</sup>ti etaṃ na yuttanti ce? Na, bhavēkadesabhāvena saṅkhārānaṃ bhavoti puna vuttattā. Parena vā dhammavisesaṃ agaṇetvā punavacanaṃ coditanti codakābhilāsavasena “**sāttakamevidaṃ punavacanaṃ**”<sup>2</sup>ti vuttaṃ.

Kāmabhavādinibbattanakassa kammaṣa kāmabhavādibhāvo phalavohārena aṭṭhakathāyaṃ vutto. Antogadhe visum āgaṇetvā abhantaragate eva katvā kāmabhavādike kammupapattibhavavasena duguṇe katvā āha “**cha bhavā**”<sup>2</sup>ti.

**Avisesenā**ti upādānabhedam ākatvāti attho. Upādānabhedākaraṇeṇeva ca dvādasappabhedassa saṅgahasena saṅgahato “**cha bhavā**”<sup>2</sup>ti vuttaṃ.

Gosilena kukkurasilena ca samattena samādinna gunnaṃ kukkurānaṃca saḥabyatā vuttāti silabbatupādānavato jhānabhāvanā na ijjhatīti maññamānā tena **rūpārūpabhavā na hontīti keci vadanti**, vakkhamānena pana pakārena paccayabhāvato “**taṃ na gahetabbaṃ**”<sup>2</sup>ti āha. Asuddhimagge ca suddhimaggaparāmasanaṃ silabbatupādānanti suddhimaggaparāmasanena rūpārūpāvacarajjhānānaṃ nibbattanaṃ na yujjati. Purāṇabhāratasītāharaṇapasubandhavidhi-ādisavanaṃ **asaddhammasavanaṃ**. **Ādi**-saddena asappurisūpanissayaṃ

1. Abhi 3. 45 piṭṭhe.

2. Abhi 3. 13 piṭṭhe.

pubbe ca akatapuññataṃ attamicchāpaṇidhitaṃ saṅgaṇhāti. **Tadantogadhā evāti** tasmim̄ ducaritanibbatte sucaritanibbatte ca kāmabhavā antogadhā evāti attho.

**Antogadhāti** ca saññābhavapañcavokārabhavānaṃ ekadesena antogadhattā vuttam̄. Na hi te niravasesā kāmabhavā antogadhāti. **Sappabhedassāti** sugatiduggatimanussādippabhedavato. Kamena ca avatvā sīlabbatupādānassa ante bhavapaccayabhāvavacanāṃ attavādupādānaṃ viya abhiñham̄ asamudācaraṇato attavādupādānanimittattā ca.

**Hetupaccayappabhedehīti** ettha maggapaccayo ca vattabbo. Diṭṭhupādānādīni hi maggapaccayā hontīti.

Bhavapadaniddesavaṇṇanā niṭṭhitā.

### Jātijarāmarañādipadaniddesavaṇṇanā

235. Upapattibhavupattiyeva jātīti āha “**na upapattibhavo**”ti. Jāyamānassa pana jāti jātīti upapattibhavopi asati abhāvā jātiyā paccayoti sakkā vuttum̄. Jāyamānarūpapadaṭṭhānatāpi hi rūpajātiyā vuttā “upacitarūpapadaṭṭhāno upacayo, anuppabandharūpapadaṭṭhānā santatī”ti<sup>1</sup>.

Khandhānaṃ jātānaṃ uññātātānuññātātāca **hīnapaṇītātā**. **Ādi**-saddena suvaṇṇadubbaṇṇādivisesaṃ saṅgaṇhāti. Ajjhattasantānagatato aññassa visesakārakassa kāraṇassa abhāvā “**ajjhattasantāne**”ti āha.

**Tena tenāti** nātibyasanādinā jarāmarañato aññena dukkhadhammena. **Upanissayakoṭiyāti** upanissayaṃsena, upanissayalesenāti attho. Yo hi paṭṭhāne anāgato sati bhāvā asati ca abhāvā suttantikapariyāyena upanissayo, so “upanissayakoṭī”ti vuccati.

Jātijarāmarañādipadaniddesavaṇṇanā niṭṭhitā.

---

1. Abhi-Ṭṭha 1. 364 piṭṭhe.

**Bhvacakkakathāvaṇṇanā**

242. **Samitanti** saṅgataṃ, abbochinnanti attho. **Kāmayānassāti** kāmayamānassa, kāmo yānaṃ etassāti vā kāmayāno, tassa **kāmayānassa**. **Ruppatīti** sokena ruppati.

Pariyuṭṭhānatāya tiṭṭhanasīlo **pariyuṭṭhānatṭhāyī**. “Pariyuṭṭhatṭhāyino”ti vā pāḷho, tattha pariyuṭṭhātīti pariyuṭṭham, diṭṭhipariyuṭṭham, tena tiṭṭhatīti **pariyuṭṭhatṭhāyīti** attho datṭhabbo. **Pañca pubbanimittānīti** “mālā milāyanti, vatthāni kilissanti, kacchehi sedā muccanti, kāye vevaṇṇiyam okkamati, devā devāsane nābhiraṃatī”ti<sup>1</sup> vuttāni pañca maraṇapubbanimittānīti attho. Tāni hi disvā kammanibbattakkhandhasaṅkhāte upapattibhave bhavachandabalena devānaṃ balavasoko uppajjātīti. **Bāloti** avidvā. Tena avijjāya kāraṇabhāvaṃ dasseti. **Tividhanti** tassārūpakathāsavanakammakāraṇādassanamarāṇakālakammopattṭhānanidānaṃ sokādidukkham. **Āsave sādhetīti** āsave gamenti bodhetīti attho.

**Evam satīti** aviditāditāya anādibhāve sati. **Ādimattakathananti** ādi etassa atthīti ādimam, bhvacakkam. Tassa bhāvo ādimattam, tassa kathanam ādimattakathanam. Visesanivatti-attho vā **matta-saddo**, sati anādibhāve avijjā ādimhi majjhe pariyosāne ca sabbattha siyāti ādimattāya avijjāya kathanam virujjhatīti attho. **Avijjāggahaṇenāti** avijjāya uppādanena kathanena, appahānena vā, attano santāne sannihitabhāvakaraṇenāti attho. **Kammādīnīti** kammavipākavaṭṭāni. Vaṭṭakāraṇabhāvena padhānattā “padhānadhammo”ti avijjā kathitā. Vadaṭṭīti **vado**. Vedeti, vediyaṭṭīti vā **vedeyyo**, sukhādim anubhavati, sabbavisaye vā jānāti, “sukhito”ti-ādinā attanā parehi ca jānāti ñāyati cāti attho. **Brahmādinā vā attanā vāti vā-saddo** ca-saddattho. Tenāha “**kāravēdakarāhitan**”ti ca-saddatthasamāsam.

**Dvādasavidhasuññatāsūññanti** avijjādīnam dvādasavidhānam suññatāya suññam, catubbidhampi vā suññatam ekaṃ katvā dvādasāṅgatāya dvādasavidhātī tāya dvādasavidhāya suññatāya suññanti attho.

---

1. Khu 1. 247 piṭṭhe Itivuttake.

**Pubbantāharaṇatoti** pubbantato paccuppannavipākassa āharaṇato paricchinnavedanāvasānaṃ etaṃ bhavacakkanti attho. Bhavacakkekadesopi hi bhavacakkanti vuccati. Vedanā vā taṇhāsahāyāya avijjāya paccayo hotīti vedanāto avijjā, tato saṅkhārāti sambajjhanato vedanāvasānaṃ bhavacakkanti yuttametam, evaṃ taṇhāmūlake ca yojetabbaṃ. Dvinnampi hi aññaṃaññaṃ anuppaveso hotīti. Avijjā dhammasabhāvaṃ paṭicchādetvā viparītābhinivesaṃ karontī diṭṭhicarite saṃsāre nayati, tesam vā saṃsāraṃ saṅkhārādipavattiṃ nayati pavattetīti **“saṃsāranāyikā”**ti vuttā.

**Phaluppattiyāti** kattuniddeso. Viññāṇādipaccuppannaphaluppatti hi idha diṭṭhā adiṭṭhānaṅca purimabhava attano hetūnaṃ avijjāsaṅkhārānaṃ phalaṃ ajanetvā anupacchijjanaṃ pakāseti. Atha vā purimabhavacakkaṃ dutiyena sambandhaṃ vuttanti vedanāsaṅkhātassa phalassa uppattiyā taṇhādīnaṃ hetūnaṃ anupacchedaṃ pakāseti, tasmā phaluppattiyā kāraṇabhūtāya paṭhamassa bhavacakkassa hetūnaṃ anupacchedappakāsanatoti attho. Saṅkhārādīnameva vā phalānaṃ uppattiyā avijjādīnaṃ hetūnaṃ phalaṃ ajanetvā anupacchedameva, viññāṇādīhetūnaṃ vā saṅkhārādīnaṃ anubandhanameva pakāseti paṭhamam bhavacakkaṃ, na dutiyam viya pariyoṣānampīti **“phaluppattiyā hetūnaṃ anupacchedappakāsanato”**ti vuttaṃ. “Viññāṇapaccayā nāmarūpan”ti ettha aparipuṇṇāyatanakalalarūpaṃ vatvā tato uddham “nāmarūpapaccayā saḷāyatanan”ti saḷāyatanappavatti vuttāti āha **“anupubbapavattidīpanato”**ti. “Bhavapaccayā jāti”ti ettha na āyatanānaṃ kamena uppatti vuttāti āha **“sahuppattidīpanato”**ti.

Hetu-ādipubbakā tayo sandhī etassāti **hetuphalahetupubbakatisandhi**, bhavacakkaṃ. Hetuphalahetuphalavasena catuppabhedo aṅgānaṃ saṅgaho etassāti **catubhedasaṅgahaṃ**. Sarūpato avuttāpi tasmim tasmim saṅgahe ākiriyanti avijjāsaṅkhārādiggahaṇehi pakāsiyantīti **ākārā**, atītahetu-ādīnaṃ vā pakārā **ākārā**. Kilesakammavipākā vipākakilesakammehi sambandhā hutvā punappunaṃ parivattantīti tesu vaṭṭanāmaṃ āropetvā **“tivaṭṭan”**ti vuttaṃ, vaṭṭekadesattā vā “vaṭṭāni”ti vuttāni.

**Sandīnaṃ ādipariyoṣānavavatthitāti** sandhīnaṃ pubbāparavavatthitāti attho.

“Yā kāci vā pana cetanā bhavo, cetanāsampayuttā āyūhanasaṅkhārā”ti idaṃ imissā dhammaṭṭhitiññābhājanīye vuttāya **paṭisambhidāpāliya**<sup>1</sup> vasena vuttaṃ. Ettha hi “cetanā bhavo”ti āgatāti. Bhavaniddese pana “**sāttato**”ti ettha “cetanāva saṅkhārā, bhavo pana cetanāsampayuttāpī”ti vibhaṅgapāliya vasena dassitaṃ. “Tattha katamo puññābhisaṅkhāro? Kusalā cetanā kāmāvacarā”ti-ādinā hi saṅkhārānaṃ cetanābhāvo **vibhaṅgapāliya**<sup>2</sup> vuttoti. Tattha **paṭisambhidāpāliya**<sup>3</sup> “cetanāsampayuttā vipākadhammattā savipākena āyūhanasaṅkhātena saṅkhatābhisaṅkharāṇakiccena saṅkhārā”ti vuttā. **Vibhaṅgapāliya**<sup>4</sup> “sabbampi bhavagāmikammaṃ kammabhavo”ti bhavassa paccayabhāvena bhavagāmi bhāvato kammaśaṣṭhasahāyatāya kammabhāvato ca upapattibhavaṃ bhāventīti bhavoti vuttā, upapattibhavabhāvanakiccaṃ pana cetanāya sātīsayanti **paṭisambhidāpāliya**<sup>1</sup> cetanā “bhavo”ti vuttā, bhavābhisaṅkharāṇakiccaṃ cetanāya sātīsayanti **vibhaṅgapāliya**<sup>2</sup> “kusalā cetanā”ti-ādinā cetanā “saṅkhārā”ti vuttā, tasmā tena tena pariyāyena ubhayaṃ ubhayattha vattuṃ yuttanti natthettha virodho. **Gahaṇanti** kumupādānaṃ kiccenāha. **Parāmasananti** itarāni. **Āyūhanāvasāneti** tīsupi atthavikappesu vuttassa āyūhanassa avasāne.

Dvīsu atthavikappesu vutte āyūhanasaṅkhāre “**tassa pubbhāgā**”ti āha, tatiye vutte “**taṃ sampayuttā**”ti. Daharassa cittappavatti bhavaṅgabahulā yebhuyyena bhavantarajanakakammāyūhanasamatthā na hotīti “**idha paripakkattā āyatanāna**”ti vuttaṃ. **Kammakaraṇakāle sammohoti** etena kammassa paccayabhūtaṃ sammohaṃ dasseti, na kammaśampayuttameva.

Kammāneva vipākaṃ sambharanti vaḍḍhentīti **kammasambhārā**, kammaṃ vā saṅkhārābhavā, tadupakāraṇāni avijjātaṇhupādānāni **kammasambhārā**, paṭisandhidāyako vā bhavo kammaṃ, tadupakāraṇā yathāvutta-āyūhanasaṅkhārā avijjādayo ca **kammasambhārā**ti kammaṇca kammasambhārā ca kammasambhārāti ekasesaṃ katvā “**kammasambhārā**”ti āha. **Dasa dhammā kammanti** avijjādayopi kammaśahāyatāya kammasarikkhā kā tadupakāraṇā cāti “kamman”ti vuttā.

1. Khu 9. 50 piṭṭhe.

3. Khu 9. 134 piṭṭhe.

2. Abhi 2. 142 piṭṭhe.

4. Abhi 2. 143 piṭṭhe.

saṅkhippanti ettha vijjādayo viññāṇādayo cāti saṅkhepo, kammaṃ vipāko ca. Kammaṃ vipākoti evaṃ saṅkhipīyatīti vā saṅkhepo, avijjādayo viññāṇādayo ca. Saṅkhepabhāvasāmaññena pana ekavacanaṃ katanti daṭṭhabbaṃ. Saṅkhepasaddo vā bhāgādhivacanaṃti kammabhāgo **kammasaṅkhepo**.

**Evaṃ samuppannanti** kammato vipāko. Tatthāpi avijjāto saṅkhārāti evaṃ samuppannaṃ, tisandi-ādivasena vā samuppannaṃ idaṃ bhavacakkanti attho. **Ittaranti** gamanadhammaṃ, vinassadhammanti attho. Tena uppādavayavantatādīpakena **anicca**-saddena vikārāpattidīpakena **cala**-saddena ca adīpitaṃ kālantaraṭṭhāyitapaṭikkhepaṃ dīpeti, **adhuvaṃti** etena thirabhāvapaṭikkhepaṃ nissāraṃ. Hetū eva sambhārā **hetusambhārā**. “Ṭhānaso hetuso”ti ettha evaṃ vuttaṃ vā ṭhānaṃ, aññampi tassa tassa sādharmaṇaṃ kāraṇaṃ **sambhāro**, asādharmaṇaṃ **hetu**. **Evanti** evaṃ hetuto dhammamattasambhave hetunirodhā ca vaṭṭupacchede dhamme ca taṃnīrodhāya desite satīti attho. Brahmācariyaṃ idha **brahmācariyidha**. **Satte cāti** ettha **ca**-saddo evaṃ brahmācariyañca vijjati, sassatucchedā ca na hotīti samuccayattho. Evañhi hetu-āyatte dhammamattasambhave satto nupalabbhati, tasmīñca upalabbhante sassato ucchedo vā siyā, nupalabbhante tasmīñ nevuçchedo na sassatanti vuttaṃ hoti.

**Saccappabhavatoti** saccato, saccānaṃ vā pabhavato. **Kusalākusalaṃ kammani** vaṭṭakathāya vattamānattā sāsavanti viññāyati. **Avisesenāti** cetanā cetanāsampayuttakāti viśesaṃ akatvā sabbampi taṃ kusalākusalaṃ kammaṃ “samudayasaccaṃ”ti vuttanti attho. “Taṇhā ca -pa- avasesā ca sāsavā kusalā dhammā”ti hi cetanācetanāsampayuttavisesaṃ akatvā vuttanti, ariyasaccavisesaṃ vā akatvā samudayasaccanti vuttanti attho.

**Vatthūsūti** ārammaṇesu, cakkhādīsu vā paṭicchādetabbesu vatthūsu. **Sokādīnaṃ adhiṭṭhānattāti** tesam kāraṇattā, tehi siddhāya avijjāya sahitehi saṅkhārehi paccayo ca hoti bhavantarapātubhāvāyāti adhippāyo. Cuticittaṃ vā paṭisandhiviññāṇassa anantarapaccayo hotīti “**paccayo ca hoti bhavantarapātubhāvāyā**”ti

vuttaṃ. Taṃ pana cuticittaṃ avijjāsaṅkhārarahitaṃ bhavantarassa paccayo na hotīti tassa sahāyadassanattamāha “**sokādīnaṃ adhiṭṭhānattā**”ti.

**Dvidhāti** attanoyeva sarasena dhammantarapaccayabhāvena cāti dvidhā.

**Avijjāpaccayā saṅkhārāti** etena saṅkhārānaṃ paccayuppannatādassanena “ko nu kho abhisāṅkharotīti esa no kallo pañho”ti dasseti. Tenetaṃ kārakadassananivāraṇanti.

**Evamādidassananivāraṇanti** etena “socati paridevati dukkhito”ti-ādidassananivāraṇamāha. Sokādayopi hi paccayāyattā avasavattinoti “jātipaccayā jarāmaraṇaṃ soka -pa- sambhavanti”ti etena vuttanti.

**Gaṇḍabhedapīlakā viyāti** gaṇḍabhedanattamā paccamāne gaṇḍe tassapi upari jāyamānakhuddakapīlakā viya, gaṇḍassa vā anekadhābhede pīlakā viya. **Gaṇḍavikārā** sūnatāsarāgapubbagaṇādayo.

Paṭalābhibhūtacakkhuko rūpāni na passati, kiñcīpi passanto ca viparītaṃ passati, evaṃ avijjābhibhūto dukkhādīni na paṭipajjati na passati, micchā vā paṭipajjati **paṭalaṃ viya avijjā**, kiminā viya attanā katattā vaṭṭassa attanoyeva paribbhamanakāraṇattā ca **kosappadesā viya saṅkhārā**, saṅkhārapariggahaṃ vinā patiṭṭhaṃ alabhamānaṃ **viññānaṃ** pariñāyakapariggahaṃ vinā patiṭṭhaṃ alabhamāno **rājakumāro viyāti** pariggahena vinā patiṭṭhālābho ettha sāmāññaṃ. **Upapattinimittanti** kammādi-ārammaṇamāha. **Parikappanatoti** ārammaṇakaraṇato, sampayuttena vā vitakkena vitakkanato.

Devamanussamigavihaṅgādivividhappakāratāya **māyā viya nāmarūpaṃ**, patiṭṭhāvisesena vuḍḍhivisesāpattito **vanappagumbo viya saḷāyatanāṃ**. Āyatanānaṃ visayivisayabhūtānaṃ aññamaññābhimukhabhāvato **āyatanaghaṭṭanato**. Ettha ca saṅkhārādīnaṃ kosappadesapariñāyakādīhi dvīhi dvīhi sadisatāya dve dve upamā vuttāti daṭṭhabbā.

Gambhīro eva hutvā obhāsati pakāsati dissatīti **gambhīrāvabhāso**. **Jātipaccayasambhūtasamudāgataṭṭhoti** jātipaccayā sambhūtaṃ hutvā sahitassa attano paccayānurūpassa uddhaṃ uddhaṃ āgatabhāvo, anuppabandhoti attho. Atha vā sambhūtaṭṭho ca samudāgataṭṭho ca **sambhūtasamudāgataṭṭho**. “Na jātito jarāmaraṇaṃ na hoti, na ca jātim



vinā aññato hotī”ti hi jātipaccayasambhūtaṭṭho vutto. **Itthañca jātito samudāgacchatī**ti paccayasamudāgataṭṭho, yā yā jāti yathā yathā paccayo hoti, tadanurūpapātubhāvoti attho.

**Anulomapaṭilomatoti** idha pana paccayuppādā paccayuppannuppādasāṅkhātāṃ anulomaṃ, nirodhā nirodhasāṅkhātāṃ paṭilomañcāha. Ādito pana antagamanāṃ anulomaṃ, antato ca ādigamaṃ paṭilomamāhāti. “Ime cattāro āhārā kimnidānā”ti-ādikāya<sup>1</sup> vemajjhato paṭṭhāya paṭilomadesanāya, “cakkhum paṭicca rūpe ca upajjati cakkhuviññāṇaṃ, tiṇṇaṃ saṅgati phasso, phassapaccayā vedanā”ti-ādikāya<sup>2</sup> anulomadesanāya ca **dvisandhitisaṅkhepaṃ**, “saṃyojanīyesu bhikkhave dhammesu assādānupassino viharato taṇhā pavaḍḍhati, taṇhāpaccayā upādānaṃ”ti-ādīsu<sup>3</sup> **ekasandhidvisaṅkhepaṃ**.

Avijjādīnaṃ sabhāvo paṭivijjhīyatīti **paṭivedho**. Vuttañhi “tesaṃ tesaṃ vā tattha tattha vuttadhammānaṃ paṭivijjhitaṃ salakkhaṇasaṅkhāto aviparītasabhāvo paṭivedho”ti<sup>4</sup>. Apuññābhisaṅkhārekadeso **sarāgo**, añño **virāgo**, rāgassa vā apaṭipakkhabhāvato rāgappavaḍḍhako sabbopi apuññābhisaṅkhāro **sarāgo**, itaro paṭipakkhabhāvato **virāgo**. “Dīgharattaṃ hetāṃ bhikkhave assutavato puthujjanassa ajjhositaṃ mamāyitaṃ parāmaṭṭhaṃ ‘etaṃ mama, esohamasmi, eso me attā’ti”<sup>5</sup> attaparāmāsassa viññāṇaṃ viṣiṭṭhaṃ vutthu vuttanti viññāṇassa **suññataṭṭho** gambhīro, attā vijānāti saṃsaratīti sabyāpārātāsaṅkanti-abhinivesabalavatāya **abyāpārattāsaṅkanti paṭisandhipātubhāvattā** ca gambhīrā, nāmassa rūpena, rūpassa ca nāmena asampayogato **vinibbhogo**, nāmassa nāmena **avinibbhogo** yojetabbo. Ekuppādekanirodhehi avinibbhoge adhippete rūpassa ca rūpena labbhati. Atha vā ekacatuvoḷkārabhavesu nāmarūpānaṃ asahavattanato aññamaññavinibbhogo, pañcavoḷkārabhavesu saḥavattanato avinibbhogo ca veditaṃ.

1. Saṃ 1. 253 piṭṭhe.

3. Saṃ 1. 313, 315 piṭṭhesu.

5. Saṃ 1. 321 piṭṭhe.

2. Saṃ 1. 300; Saṃ 2. 261 piṭṭhesu.

4. Abhi-Ṭṭha 1. 23 piṭṭhe.

**Adhipatiyaṭṭho** nāma indriyapaccayabhāvo. “Lokopeso dvārāpesā khetampetan”<sup>1</sup>ti vuttā **lokādi-atthā** cakkhādīsu pañcasu yojetabbā. Manāyatanassapi lujjanato manosamphassādīnaṃ dvārakhettabhāvato ca ete atthā sambhavanteva. Āpāthagatānaṃ rūpādīnaṃ pakāsanayogyatālakkaṇaṃ obhāsanāṃ cakkhādīnaṃ **visayibhāvo**, manāyatanassa vijānaṃ. **Samghaṭṭanaṭṭho** viśesena cakkhusamphassādīnaṃ pañcannaṃ, itare channampi yojetabbo. Phusanañca phassassa sabhāvo, saṅghaṭṭanaṃ raso, itare upaṭṭhānākārā. **Ārammaṇarasānubhavanaṭṭho** rasavasena vutto, **vedayaṭṭho** lakkaṇavasena. Attā vedayatīti abhinivesassa balavatāya **nijjivāṭṭho** vedanāya gambhīro. Nijjivāya vedanāya vedayitaṃ nijjivavedayitaṃ, nijjivavedayitameva attho **nijjivavedayaṭṭho**.

**Ādānaṭṭho** catunnampi upādānaṃ samāno, **gahaṇaṭṭho** kāmupādanassa, itaresaṃ tiṇṇaṃ **abhinivesādi-attho**. “Ditthikantāro”<sup>2</sup>ti hi vacanato ditthīnaṃ **duratikkamaṇaṭṭhopīti**. Daḷhagahaṇattā vā catunnampi **duratikkamaṇaṭṭho** yojetabbo. **Yonigatiṭṭhinivāsesukhipananti** samāse bhummavacanassa alopo daṭṭhabbo, tasmā tena āyūhanābhisaṅkharapaḍānaṃ samāso hoti. Jarāmarāṇaṅgaṃ maraṇappadhānanti maraṇaṭṭhā eva **khayādayo** gambhīrā dassitā. Navanavānañhi parikkhayena khaṇḍiccādi paripakkappavatti jarāti, **khayaṭṭho** vā jarāya vuttoti daṭṭhabbo. Navabhāvāpagamo hi khayoti vattum vuttoti. **Vipariṇāmaṭṭho** dvinnampi. Santativasena vā jarāya khayavayabhāvo, sammutikhaṇikavasena maraṇassa bheda vipariṇāmatā yojetabbā.

**Atthanayāti** atthānaṃ nayā. Avijjādi-atthehi ekattādī sena bhāvena nīyanti gammentīti ekattādayo tesāṃ nayāti vuttā. Nīyanti hi nayāti. Atthā eva vā ekattādibhāvena nīyamānā nāyamānā “**atthanayā**”<sup>3</sup>ti vuttā. Nīyanti etehīti vā nayā, ekattādīhi ca atthā “ekan”<sup>4</sup>ti-ādīnā nīyanti, tasmā ekattādayo atthānaṃ nayāti **atthanayā**. Santānānupacchedena bījaṃ rukkhabhāvaṃ pattāṃ rukkhabhāvena pavattanti ekattena vuccatīti santānānupacchedo ekattam, evamidhāpi avijjādīnaṃ **santānānupacchedo ekattanti** dasseti.

**Bhinnasantānassevā**ti sambandharahitassa nānattassa gahaṇato sattantaro ucchinno sattantaro uppannoti gaṇhanto ucchedadiṭṭhimupādiyati.

**Yato kutocī**ti yadi aññasmā aññassuppatti siyā, vālikato telassa, ucchuto khīrassa kasmā uppatti na siyā, tasmā na koci kassaci hetu atthīti **ahetukadiṭṭhim**, avijjamānēpi hetumhi niyatatāya tilagāvisukkasoṇitādīhi telakhīrasarīrādīni pavattantīti **niyativādañca upādiyati viññātabbān yathārahān**.

Kasmā? Yasmā idañhi bhavacakkam apadāletvā saṃsārabhayamatīto na koci supinantarepi atthīti sambandho. **Durabhiyānanti** duratikkamañ. **Asanivicakkamivā**ti asanimaṇḍalamiva. Tañhi nimmathanameva, nānimmathanam pavattamānam atthi, evam bhavacakkampi ekantaṃ dukkhuppādanato **“niccanimmathanan”**ti vuttaṃ.

Ñāṇāsina apadāletvā saṃsārabhayaṃ atīto natthīti etassa sādhaṃ dassento āha **“vuttampi cetan”**ti-ādi. Tantūnam ākulakam tantākulakam, tantākulakamiva jātā **tantākulakajātā**, kilesakammavipākehi atīva jaṭitāti attho. Guṇāya sakuṇiyā nīḍam **guṇāguṇḍikam**<sup>1</sup>. Vaḍḍhi-abhāvato **apāyam** dukkhagatibhāvato **duggatim** sukhasamussayato vinipātattā **vinipātañca** catubbidham **apāyam**, “khandhānañca paṭipāṭi”ti-ādinā vuttaṃ **saṃsārañca nātivattati**. Saṃsāro eva vā sabbo idha vaḍḍhi-apagamādīhi atthehi apāyādināmako vutto kevalam dukkhakkhandhabhāvato.

Bhavacakkakathāvaṇṇanā niṭṭhitā.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

243. Pathavī-ākāsā viya paṭiccasamuppādo mahāpatthaṭavithhāritānam atthānam parikappavasena kathito. Tañhi apatthaṭam avithhatañca pathavim ākāsañca pattharanto vitthārayanto viya ca ekekacittāvaruddham

---

1. Kulagaṇṭhikam (Aṭṭhakathāyam)

akatvā sabbasattasabbacittasādhāraṇavasena patthaṭṭavittataṃ katvā suttantabhājanīyena bhagavā dasseti. Tattha **nānācittavasenā**ti asahajātānaṃ sahajātānaṃ paccayapaccayuppannānaṃ nānācittagātānaṃ dassitabhāvaṃ sandhāya vuttaṃ. Nava mūlapadāni etesanti **navamūlapadā**, nayā. “Ekekena nayena catunnaṃ catunnaṃ vārānaṃ saṅgahitattā”ti vuttaṃ, ettha “ekekena catukkenā”ti vattabbaṃ. nayacatukkavārā hi ettha vavatthitā dassitānaṃ catukkānaṃ nayabhāvāti.

### 1. Paccayacatukkavaṇṇanā

Avijjānaṃ aṅgaṃ aggahetvā tato paraṃ “avijjāpaccayā saṅkhāro”ti-ādīni paccayasahitāni paccayuppannāni aṅgabhāvena vuttānīti āha “**na, tassa anaṅgattā**”ti. Evaṃca katvā **niddese**<sup>1</sup> “tattha katamā avijjā”ti avijjānaṃ visum viṣajjetvā “tattha katamo avijjāpaccayā saṅkhāro”ti-ādīnā taṃtaṃpaccayavanto saṅkhārādayo viṣajjitāti. Tīsu pakāresu paṭhamapaṭhamavāro dutiyavārādīsu pavisanto paccayavisesādisabbanānattasādhāraṇattā te vāravisesa gaṇhātīti “**sabbasaṅgāhako**”ti vutto. Paṭhamavāro eva hi na kevalaṃ chaṭṭhāyatanaṃ, atha kho nāmaṃca phassassa paccayo, nāmaṃ vā na kevalaṃ chaṭṭhāyatanaṃ, atha kho phassassāpīti paccayavisesadassanattānaṃ, yena atthavisesena mahānidānasuttadesanā pavattā, taṃdassanattānaṃ chaṭṭhāyatanaṃ parihāpetvā vuttoti tassa dutiyavāre ca paveso vutto, na sabbaṅgasamorodhato.

**Yatthāti** vāracatukke ekekaṃ vāre ca. **Aññathāti** suttantabhājanīyato aññathā saṅkhāroti vuttaṃ. **Avuttanti** “rūpaṃsaṅgāyatanaṃ”ti, tesupi ca vāresu catūsipi sokādayo avuttā suttantabhājanīyesu vuttā. Tattha ca vuttameva idha “chaṭṭhāyatanaṃ”ti aññathā vuttanti daṭṭhabbaṃ.

**Sabbatṭhānasādhāraṇatoti** vuttanayena sabbavārasādhāraṇato, sabbaviññāṇapavattiṭṭhānabhavasādhāraṇato vā. Vinā abhāvena viññāṇassa khandhattayampi samānaṃ phalaṃ paccayo cāti āha “**avisesenā**”ti. “Tiṇṇaṃ saṅgati phasso”ti<sup>2</sup> vacanato pana viññāṇaṃ phassassa

1. Abhi 2. 142 piṭṭhe.

2. Ma 1. 158, 326; Saṃ 1. 300; Saṃ 2. 216; Abhi 4. 248 piṭṭhesu.

visesapaccayoti tassa phasso visiṭṭhaṃ phalaṃ, satipi paccayasampayuttānaṃ āhārapaccayabhāve manosañcetanāya viññāṇāharaṇaṃ visiṭṭhaṃ kiccanti saṅkhāro cassa visiṭṭho paccayo. **Acittakkhaṇamattānī**ti cittakkhaṇappamāṇarahitāni. **Tassatthoti** tassa vuttassa avijjādikassa attho suttantabhājanīyavaṇṇanāyaṃ vuttanayeneva veditabbo.

**Hetukādīnī**ti ettha yasmim catukke hetuka-saddo vutto, taṃ hetuka-saddasahacaritattā “hetukan”ti vuttanti veditabbaṃ. Hetu-saddo gatisūcako avigatatā ca vīgatatānivāraṇavasena gati eva hotīti hetukacatukkaṃ avigatapaccayavasena vuttanti vuttaṃ.

**Tidhā catudhā pañcadhā vāti vā**-saddo “chadhā vā”tipi vikappetīti daṭṭhabbo. Samādhi hi sādharmaṇehi tīhi jhānindriyamaggapaccayehi ca paccayoti. **Upādānaṃ bhavassa maggapaccayena cāti sattadhāti** kāmupādānavajjānaṃ vasena vadati. Kāmupādānaṃ pana yathā bhavassa paccayo hoti, so pakāro taṇhāyaṃ vutto evāti na vutto.

**Imasmim catukke saha-jātapaccayena paccayā hontīti** vacanavasenāti adhippāyo. Attho hi na katthaci attano paccayuppannassa yathāsakehi paccayo na hoti, saha-jātapaccayavaseneva pana imassa catukkassa vuttattā soyevettha hotīti vadanti. **Paṭhamavāroti** paṭhama catukkoti evaṃ vattabbaṃ. **Bhavādīnaṃ tathā abhāvanti** yadi saha-jātapaccayavaseneva paṭhamacatukko vutto, bhavo jātiyā, jāti ca maraṇassa saha-jātapaccayo na hotīti yathā avigatacatukkādīsu “bhavapaccayā jāti bhavahetukā”ti-ādi na vuttaṃ bhavādīnaṃ avigatādipaccayatāya abhāvato, evamidhāpi “bhavapaccayā jāti”ti-ādi na vattabbaṃ siyā. Paccayavacanameva hi tesam saha-jātasūcakaṃ āpannaṃ avigatacatukkādīsu viya idha paccayavisesasūcakassa vacanantarassa abhāvā, na ca taṃ na vuttaṃ, na ca bhavādayo saha-jātapaccayā honti, tasmā na saha-jātapaccayavasenevāyaṃ catukko vutto. **Sesapaccayānañca sambhavanti** idaṃ “bhavādīnan”ti etena saha ayojetvā sāmāññena avijjādīnaṃ saha-jātena saha sesapaccayabhāvānañca sambhavaṃ sandhāya vuttaṃ. Ayañhettha attho— paccayavisesasūcakassa vacanantarassa abhāvā saha-jātato aññe paccayabhāvā avijjādīnaṃ na sambhavanti saha-jātapaccayavasenevāyaṃ

catukko āraddhoti vucceyya, na ca te na sambhavanti, tasmā nāyaṃ tathā āraddhoti.

“**Mahānidānasuttante ekādasaṅgiko paṭṭicasamuppādo vutto**”ti vuttam, tattha pana “nāmarūpapaccayā viññānaṃ, viññāṇapaccayā nāmarūpaṃ, nāmapaccayā phasso”ti-ādinā<sup>1</sup> dvikkhattum āgate nāmarūpe ekadhā gahite navaṅgiko, dvidhā gahite dasaṅgiko vutto, aññattha pana vuttesu avijjāsaṅkhāresu addhattayadassanattam yojyamānesu ekādasaṅgiko hotīti katvā evaṃ vuttanti daṭṭhabbam. **Mahānidānasuttanta desanāya pariggahatthanti** tattha hi cakkhāyatanādīni viya rūpe chaṭṭhāyatanañca nāme antogadham katvā phassassa niravasesarūpapaccayaṃ viya niravasesanāmapaccayañca dassetum “**nāmarūpapaccayā phasso**”ti vuttam, evamidhāpi tattha dassitavisesadassanena taṃdesanāpariggahattham ekacittakkaṇike paṭṭicasamuppāde chaṭṭhāyatanaṃ nāmantogadham katvā “nāmapaccayā phasso”ti vuttanti attho.

**Rūpappavattidesam sandhāya desitattā** “imassā”ti vacanaseso, na purimānanti, teneva “**ayañhī**”ti-ādimāha.

**Yonivasena opapātikānanti** cettha saṃsedajayonikāpi paripuṇṇāyatanabhāvena opapātikasaṅgaham katvā vuttāti daṭṭhabbā. Padhānāya vā yoniyā sabbaparipuṇṇāyatanayonim dassetum “**opapātikānan**”ti vuttam. Evaṃ saṅghanidassanavaseneva hi **dhammahadayavibhaṅgepi**<sup>2</sup> “opapātikānam petānaṃ”ti-ādinā opapātikaggahaṇameva kataṃ, na saṃsedajaggahaṇanti. Ekacittakkaṇe chahāyatanehi phassassa pavatti natthi, na cekassa akusalaphassassa chaṭṭhāyatanaṃ vajjam āyatanaṃ samānakkhaṇe pavattamānaṃ paccayabhūtaṃ atthi, ārammaṇapaccayo cettha pavattako na hotīti na gayhati, tasmā “saḷāyatanapaccayā phasso”ti na sakkā vattunti dassanattam “**yasmā paneso**”ti-ādimāha.

Purimayonidvaye sambhavantampi kesañci saḷāyatanaṃ kalalādīkāle na sambhavatīti “**sadā asambhavato**”ti āha. Pacchimayonidvaye pana

1. Dī 2. 48 piṭṭhe.

2. Abhi 2. 427 piṭṭhe.

yesaṃ sambhavati, tesaṃ sadā sambhavatīti. **Itoti** imasmā catukkato, nayato vā, yo viseso.

Paccayacatukkavaṇṇanā niṭṭhitā.

## 2. Hetucatukkavaṇṇanā

244. **Jātikkaṇamatte eva abhāvato**ti tato uddham bhāvato ti attho. **Avigatapaccayaniyamābhāvato** bhave upādānahetukaggahaṇaṃ na kataṃ, **abhāvato avigatapaccayassa** jāti-ādīsu bhavahetukādiggahaṇaṃ na katanti yojetabbaṃ. Yathā pana yāva vatthu, tāva anupalabbhamānassa viññāṇassa vatthu avigatapaccayo hoti viññāṇato uddham pavattanakampi, evaṃ upādānaṃ bhavaśaṅgahitānaṃ jāti-ādīnaṃ, bhavo ca jātiyā avigatapaccayo siyā. Atha na siyā, saṅkhārakkhandhe jāti-ādīnaṃ saṅgahitattā viññāṇaṃ nāmaṃ, nāmaṃ atakkhaṇikasambhavā chaṭṭhāyatanassa avigatapaccayo na siyāti idha viya tathāpi hetukaggahaṇaṃ na kattabbaṃ siyā, tasmā yāva upādānaṃ, tāva jāti-ādīnaṃ anupalabbho, jātikkaṇamatte eva bhavassa abhāvo ca kāraṇanti na sakkā kātuṃ. Saṅkhātalakkhaṇaṃ pana jāti-ādīnaṃ asabhāvadhammānaṃ bhavena saṅgahitattā asabhāvadhammassa ca paramatthato bhavantarassa abhāvato hetu-ādipaccayā na santīti bhavassa upādānaṃ na niyāmena avigatapaccayo, bhavo pana jātiyā, jāti jārāmaṇassa neva avigatapaccayoti avigatapaccayaniyamābhāvato abhāvato ca avigatapaccayassa bhavādīsu hetukaggahaṇaṃ na katanti yuttaṃ.

Nanu evaṃ “nāmaṃ viññāṇahetukaṃ chaṭṭhāyātanaṃ nāmahetukan”ti vacanaṃ na vattabbaṃ. Na hi nāmasaṅgahitānaṃ jāti-ādīnaṃ avigatapaccayo aññaṃ avigatapaccayabhāvo ca atthi asabhāvadhammattāti? Na, tesaṃ nāmena asaṅgahitattā. Namanakiccaparicchinnāñhi nāmaṃ, tañca kiccaṃ sabbhāvadhammānameva hotīti sabbhāvadhammabhūtā eva tayo khandhā “nāmaṃ”ti vuttā, tasmā tatha hetukaggahaṇaṃ yuttaṃ, idha pana bhavatīti bhavo, na ca jāti-ādīni na bhavanti “bhavaccayā jāti sambhavati, jātipaccayā jārāmaṇaṃ sambhavati”ti

yojanato, tasmā saṅkharaṇato saṅkhāre viya bhavanato bhava jāti-ādīni saṅgahitanīti niyamābhāvābhāvehi yathāvuttehi hetukaggahaṇaṃ na katanti.

**Keci panāti-ādinā** revatatheramataṃ vadati. **Arūpakkhandhā hi idha bhavoti āgatā.** Vuttañhi “tattha katamo upādānapaccayā bhavo, ṭhapetvā upādānaṃ vedanākkhandho -pa- viññāṇakkhandho”<sup>1</sup>.

“**Vattabbapadesābhāvato**”<sup>2</sup>ti vuttaṃ, satipi pana padese upādānaṃ viya sabhāvāni jāti-ādīni na hontīti ṭhapetabbassa bhāvantarassa abhāvato eva ṭhapanāṃ na kātabbanti yuttaṃ. Jāyamānānaṃ pana jāti, jātānañca jarāmarāṇanti “bhavapaccayā jāti, jātipaccayā jarāmarāṇaṃ”<sup>2</sup> vuttaṃ. Yathā pana “nāmapaccayā phassoti tattha katamaṃ nāmaṃ? Ṭhapetvā phassaṃ vedanākkhandho -pa- viññāṇakkhandho. Idaṃ vuccati nāmaṃ”<sup>3</sup>, “nāmarūpapaccayā saḷāyatananti atthi nāmaṃ atthi rūpaṃ. Tattha katamaṃ nāmaṃ? Vedanākkhandho saññākkhandho saṅkhārakkhandho. Idaṃ vuccati nāmaṃ. Tattha katamaṃ rūpaṃ? Cattāro mahābhūtā yañca rūpaṃ nissāya manodhātu manoviññāṇadhātu vattati, idaṃ vuccati rūpaṃ”<sup>4</sup> ca yaṃ nāmarūpañca phassassa saḷāyatanassa paccayo, tassa vattabbapadeso niddiṭṭho<sup>5</sup>, evaṃ yo bhavo jātiyā paccayo, tassapi ṭhapetabbagahetabbavisesse sati na sakkā vattabbapadeso natthīti vattunti.

Hetucatukkavaṇṇanā niṭṭhitā.

#### 4. Aññamaññacatukkavaṇṇanā

246. Nippadesattā bhavena upādānaṃ saṅgahitanti paccayuppannaṃ upādānaṃ visum ṭhitassa abhāvā “bhavapaccayāpi upādānaṃ”<sup>1</sup>ti na sakkā vattunti dassetuṃ “**yasmā pana bhavo nippadeso**”<sup>2</sup>ti-ādimāha. Evaṃ sati “nāmapaccayāpi viññāṇaṃ”<sup>3</sup>ti na vattabbaṃ siyā, nāmaṃ pana paccayuppannabhūtaṃ paccayabhūtañca sappadesameva gahitanti adhippāyo. Yathā pana “nāmapaccayā chaṭṭhāyatanāṃ, nāmapaccayā phasso”<sup>4</sup>ti-ādīsu<sup>6</sup> paccayuppannaṃ ṭhapetvā

1. Abhi 2. 151 piṭṭhe.

2. Abhi 2. 142 piṭṭhe.

3. Abhi 2. 156 piṭṭhe.

4. Abhi 2. 157 piṭṭhe.

5. Diṭṭho (?)

6. Abhi 2. 152, 253 piṭṭhesu.



nāmaṃ gahitaṃ, evaṃ “bhavapaccayāpi upādānaṃ”ti idhāpi paccayuppannaṃ ṭhapetvā bhavassa gahaṇaṃ na na sakkā kātuṃ, tasmā upādānaṃ avigatapaccayaniyamābhāvo viya aññamaññapaccayaniyamābhāvo bhava pubbe vuttanayena atthīti “bhavapaccayāpi upādānaṃ”ti na vuttanti veditaḥḥaṃ.

**Aññamaññapaccayoti** cettha sampayuttavippayuttatthipaccayo adhippeto siyā. “Nāmarūpapaccayāpi viññāṇaṃ”ti hi vuttaṃ, na ca vatthu akusalaviññāṇassa aññamaññapaccayo hoti, purejātavippayutto pana hotīti. Tathā “chaṭṭhāyatanapaccayāpi nāmarūpan”ti vuttaṃ, na ca chaṭṭhāyatanam cakkhāyatanupacayādīnaṃ cittasamuṭṭhānarūpassa ca aññamaññapaccayo hoti, pacchājātavippayutto pana hotīti.

Aññamaññacatukkavaṇṇanā niṭṭhitā.

### Saṅkhārādīmūlakanayamātikāvaṇṇanā

247. “Apubbassa aññassa avijjāpaccayassa vattabbassa abhāvato bhavamūlakanayo na vutto”ti vuttaṃ, evaṃ sati “chaṭṭhāyatanapaccayā avijjā”ti-ādikā chaṭṭhāyatanādīmūlakā ca na vattabbā siyuṃ. “Nāmapaccayā avijjā”ti ettha hi avijjāpaccayā sabbe cattāro khandhā nāmantī vuttāti. Tatthāyaṃ adhippāyo siyā—nāmapaccayānaṃ chaṭṭhāyatanādīnaṃ avijjāya paccayabhāvo vattabboti chaṭṭhāyatanādīmūlakā vuttā. Yadeva pana nāmaṃ avijjāya paccayo, tadeva bhavapaccayā avijjāti etthāpi vucceyya, na vattabbaviseso koci, tasmā apubbābhāvato na vuttoti. Bhavaggahaṇena ca idha avijjāya paccayabhūtā sabhāvadhammā gaṇheyyuṃ, na jāti-ādīnīti apubbābhāvato na vuttoti daṭṭhabbo. “Avijjāpaccayā avijjātipi vuttaṃ siyā”ti vuttaṃ, yathā pana “nāmapaccayā phasso”ti vutte “phassapaccayā phasso”ti vuttaṃ na hoti paccayuppannaṃ ṭhapetvā paccayassa gahaṇato, evamidhāpi na siyā, tasmā bhavanavasena sabhāvadhammāsabhāvadhammesu sāmāññena pavatto bhava-saddoti na so avijjāya paccayoti sakkā vattuṃ. Tena bhavamūlakanayo na vuttoti veditaḥḥo.

“Upādānapaccayā bhavo”ti ettha viya bhavekadese visum pubbe  
aggahite  
bhava-saddo paccayasodhanattham ādito vuccamāno niravasesabodhako  
hoti, na  
nāma-saddo. Evaṃsabhāvā hi etā niruttiyoti imināvā<sup>1</sup> adhippāyena  
“**avijjāpaccayā avijjātipi vuttam siyā**”ti āhāti daṭṭhabbam, imināva  
adhippāyena “bhavassa nippadesattā bhavapaccayāpi upādānanti na vuttan”ti  
ayamattho aññamaññapaccayavāre vuttoti daṭṭhabbo. Tattha **pacchinnattā**  
etena jātijarāmarañānam avijjāya paccayabhāvo anuññāto viya hoti.  
Jāyamānānam pana jāti, na jātiyā jāyamānā, jīyamānamīyamānañca  
jarāmarañam, na jarāmarañassa jīyamānamīyamānāti jāti-ādīni  
ekacittakkhaṇe na avijjāya paccayo honti, tasmā asambhavato eva  
tammūlakā nayā na gahitā, pacchedopi pana atthīti “**tattha pacchinnattā**”ti  
vuttanti daṭṭhabbam. Teneva “**apicā**”ti-ādimāha.

Mātikāvaṇṇanā niṭṭhitā.

### Akusalaniddesavaṇṇanā

248-249. **Upādānassa upādānapaccayattam āpajjeyyāti** nanu nāyam  
doso. Kāmupādānañhi diṭṭhupādānassa, tañca itarassa paccayo hotīti?  
Saccam, kāmupādānassa pana taṇhāgahaṇena gahitattā nāme viya  
visesapaccayattābhāvā ca upādānaggahaṇena taṇhāpaccayā bhavassa ca  
paccayabhūtā diṭṭhi eva gahitāti ayam doso vuttoti daṭṭhabbo. Yasmā ca  
upādānaṭṭhāne paccayuppannam paccayo ca ekameva, tasmā “nāmapaccayā  
phasso, nāmarūpapaccayā saḷāyatanan”ti etesam niddesesu viya  
“upādānapaccayā bhavo”ti etassa niddese paccayo visum na vibhatto. Satipi  
vā bhavassa paccayabhāvena kāmupādānassapi gahaṇe “**ṭhapetvā**  
upādānan”ti avuccamāne kāmupādānam kāmupādānassa, diṭṭhi ca diṭṭhiyā  
paccayoti āpajjeyyāti paccayapaccayuppannatānivāraṇattham “**ṭhapetvā**  
**upādānan**”ti vuttanti dasseti.

---

1. Iminā (?)

252. Cakkhāyatanādi-upatthambhakassa cittasamuṭṭhānarūpassa janakaṃ viññāṇaṃ cakkhāyatanupacayādīnaṃ paccayoti vuttam tadajanakampīti adhippāyena “**yassa cittasamuṭṭhānarūpassā**”ti-ādimāha. **Tāsampi hīti** utu-āhārajasantatīnampi hi upatthambhakasamuṭṭhāpanapacchājātapaccayavasena viññāṇaṃ paccayo hoti evāti attho.

254. **Yathānurūpanti** mahābhūtasāṅkhātāṃ pañcannaṃ sahajātādipaccayo, vatthusāṅkhātāṃ chaṭṭhassa purejātādipaccayo, nāmaṃ pañcannaṃ pacchājātādipaccayo, chaṭṭhassa sahajātādipaccayoti esā yathānurūpatā.

264. **Yassāti** yassa paccayuppannaṃ nāmassa viññāṇassa sampayuttapaccayabhāvo hoṭīti yojetabbaṃ.

272. “Phassapaccayāpi nāman”ti phassapaccayabhāvena vattabasseva nāmassa attano paccayuppannaṃ pāvatti dassitāti “**ṭhapetvā phassan**”ti puna vacane koci attho atthīti na vuttanti dassento “**tathāpi**”ti-ādimāha.

280. Yasmā adhimokkhopi natthi, tasmā upādānaṭṭhānaṃ pariḥīnamevāti sambandho. Balavakilesena pana padapūraṇassa kāraṇaṃ taṇhāya abhāvo domanassasahagatesu vutto evāti tassa tena sambandho yojetabbo. **Sabbatthāti** tatiyacittādīsu “taṇhāpaccayā adhimokkho”ti-ādimhi vissajjanaṃ eva viśesaṃ dassetvā pāḷi saṅkhittā. **Heṭṭhāti** cittuppādakaṇḍādīsu.

Akusalaniddesavaṇṇanā niṭṭhitā.

### Kusalābyākataniddesavaṇṇanā

292. **Pasādoti** saddhā.

306. “Alobho nidānaṃ kammānaṃ samudayāyā”ti-ādivacanato<sup>1</sup> sabyāpārāni kusalamūlāni saṅkhārānaṃ nidānāni honti, na

1. Am 1. 134 piṭṭhe.

kammavegakkhittesu vipākesu alobhādisahagatakammaṭṭibimbabhūtā viya pavattamānā alobhādayoti pañcaviññāṇesu viya nidānarahitatā **sotapatitatāti** daṭṭhabbā. Kiriyadhammā kiriyamattattā kammanidānarahitā-icceva parihīnāvijjāṭṭhānā veditabbā.

**Tatiyacatutthavārā asambhavato evāti** kasmā vuttaṃ, kiṃ cakkhuviññāṇādīni cakkhāyanupacayādīnaṃ pacchājātapaccayā na hontīti? Honti, tadupatthambhakassa pana cittasamuṭṭhānassa asamuṭṭhāpanaṃ sandhāya **“asambhavato”**ti vuttanti daṭṭhabbāṃ. Sahajātapacchājātavīññāṇassa pana vasena tadāpi viññāṇapaccayā nāmarūpaṃ, pacchājātasahajātanāmassa sahajātapurejātabhūtacakkhādirūpassa ca vasena nāmarūpapaccayā saḷāyatanañca labbhatīti tatiyacatutthavārā na na sambhavantīti.

Kusalābyākataniddesavaṇṇanā niṭṭhitā.

### Avijjāmūlakakusalaniddesavaṇṇanā

334. **Sammohavasenāti** kusalaphale aniccāditāya sabhaye sādurasavisarukkhābījasadise taṃnibbattakakusale ca anādīnavadassitāvasena. Samatikkamatthaṃ bhāvanā **samatikkamabhāvanā**, tadaṅgavikkhambhanavasena samatikkamabhūtā vā bhāvanā **samatikkamabhāvanā**.

**Tathā idha na labbhantīti** avijjāya eva saṅkhārānaṃ avigatādipaccayattābhāvaṃ sandhāya vuttaṃ, viññāṇādīnaṃ pana saṅkhārādayo avigatādipaccayā hontīti avijjāpaccayā saṅkhāro, saṅkhārapaccayā viññāṇaṃ saṅkhārahetukanti-ādinā yojanā na na sakkā kātunti avigatacatukkādīnīpi na idha labbhanti. Viññāṇapaccayā nāmarūpaṃ viññāṇasampayuttaṃ nāmanti-ādinā hi yathālābhayojanāya nayo dassitoti.

Avijjāmūlakakusalaniddesavaṇṇanā niṭṭhitā.

### Kusalamūlakavipākaniddesavaṇṇanā

343. “**Nānākkhaṇikakammapaccaye pana vattabbameva natthī**”ti vuttaṃ, kiṃ kusalamūlaṃ akusalamūlañca kammapaccayo hotīti? Na hoti, kammapaccayabhūtāya pana cetanāya saṃsaṭṭhaṃ kammaṃ viya paccayo hoti. Tena ekībhāvamiva gatattāti evaṃ vuttanti daṭṭhabbaṃ. Yathā kusalākusalamūlehi vinā kammaṃ vipākaṃ na janetīti tāni vipākassa pariyāyena upanissayoti vuttāni, evaṃ kammaṃ ekībhūtāni saṃsaṭṭhāni hutvā kammajānaṃ paccayā hontīti pariyāyena tesāṃ kammapaccayatā vuttā. **Esāti** esa kusalamūlapaccayo akusalamūlapaccayo cāti yojetabbaṃ.

Kusalākusalavipākānaṃ viya kiriyānaṃ uppādakāni avijjākusalākusalamūlāni ca na hontīti āha “**upanissayataṃ na labhantī**”ti. Manasikāropi javanavīthipaṭipādakamattattā kusalākusalāni viya avijjam upanissayaṃ na karoti, avijjūpanissayānaṃ pana pavatti-atthaṃ bhavaṅgāvaṭṭanamattaṃ hoti, pahīnāvijjānañca kiriyānaṃ avijjā nevuppadikā ārammaṇamattameva pana hoti. Evañca katvā “kusalo dhammo abyākatassa dhammassa upanissayapaccayena paccayo”ti<sup>1</sup>, “vipākadhammadhammo nevavipākanavipākadhammadhammassa upanissayapaccayena paccayo”ti<sup>2</sup> ca evamādīsu kiriyānaṃ akusalā upānissayapaccayabhāvena na uddhaṭṭati. Apica “avijjāpaccayā saṅkhārā”ti etassa vasena avijjāmūlako kusalanayo vutto, “saṅkhārapaccayā viññāṇaṃ”ti etassa vasena kusalākusalāmūlako vipākanayo, kiriyānaṃ pana neva saṅkhāraggahaṇena, na ca viññāṇaggahaṇena gahaṇaṃ gacchatīti taṃmūlako kiriyānayo na labbhatīti na vuttoti daṭṭhabbo.

**Anekabhedatoti** avijjādīnaṃ mūlapadānaṃ ekacittakkhaṇikānaṃ kiriyante paṭhamanaye sahaṭṭādī-anekapaccayabhāvena gahitattā tesāṃ paccayānaṃ vasena navādīmūlapadānaṃ nayānaṃ vasena, anekappakārato catunnaṃ catukkānaṃ vasenāti vā adhippāyo. **Kusalākusalānaṃ pana vipāke cāti** ettha kusalākusalesu kusalākusalānaṃ vipāke cāti vattabbaṃ. Purimappacchimesu hi navesu yathā paccayākāro vutto,

1. Abhi 8. 147 piṭṭhe.

2. Abhi 8. 373 piṭṭhe.

taṁdassanattamaṁ “anekabhedato ekadhāvā”ti vuttaṁ, na ca pacchimanaye kusale anekabhedato paccayākāro vutto, atha kho “**ekadhāvā**”ti. **Ekadhāvā**ti ca mūlapadekapaccayatāvasena, ekasseva vā nayassa vasena ekappakārenāti attho, paḥamacatukkasseva vasenāti vā adhippāyo. **Dhammapaccayabhedeti** avijjādīnaṁ dhammānaṁ paccayabhāvabhede jarāmarañādīnaṁ dhammānaṁ jāti-ādipaccayabhede, taṁtaṁcittuppādasamayaparicchinnaṁ vā phassādīnaṁ dhammānaṁ ekakkhaṇikāvijjādipaccayabhede. Pariyatti-ādīnaṁ kamo **pariyatti -pa- paṭipattikkamo**. Paccayākāre hi pāḷipariyāpuṇanatadatthasavanapāḷi-atthacintanāni “jarāmarañānaṁ aniccaṁ saṅkhataṁ -pa- nirodhadhammaṁ”ti-ādīnā bhāvanāpaṭipatti ca kamena kātabbāti **kama**-ggahaṇaṁ karoti. **Tatoti** ñāṇappabhedajanakato kamato. Aññaṁ karaṇīyataraṁ natthi. Tadāyattā hi dukkhantakiriyāti.

Abhidhammabhājanīyavaṇṇanā niṭṭhitā.

Paṭiccasamuppādavibhaṅgavaṇṇanā niṭṭhitā.

## 7. Satipaṭṭhānavibhaṅga

### 1. Suttantabhājanīya

#### Uddesavāraṇṇanā

355. **Tayo satipaṭṭhānā**ti satipaṭṭhāna-saddassa atthuddhāraṃ karoti, na idha pāḷiyam vuttassa satipaṭṭhāna-saddassa atthadassanam. **Ādisu hi satigocaroti ādi**-saddena “phassasamudayā vedanānam samudayo, nāmarūpasamudayā cittassa samudayo, manasikārasamudayā dhammānam samudayo”<sup>1</sup>ti satipaṭṭhānanti vuttānam satigocarānam dīpake suttappadesa saṅgaṇhāti. Evaṃ paṭisambhidāpāḷiyampi avasesapāḷippadesadassanatto ādi-saddo datṭhabbo. Dānādīnipi karontassa rūpādīni kaṣiṇādīni ca satiyā ṭhānam hotīti taṃnivāraṇatthamāha **“padhānam ṭhānan”**ti. **Pa**-saddo hi padhānatthadīpakoti adhippāyo.

**Ariyoti** ariyam seṭṭham sammāsambuddhamāha. **Etthāti** etasmim saḷāyatanavibhaṅgasutteti attho. Sutteka desena hi suttam dasseti. Tattha hi—

“Tayo satipaṭṭhānā yadariyo -pa- arahatīti iti kho panetaṃ vuttam, kiñcetaṃ paṭicca vuttam. Idha bhikkhave satthā sāvakānam dhammam deseti anukampako hitesī anukampam upādāya ‘idam vo hitāya idam vo sukhāyā’<sup>1</sup>ti. Tassa sāvakā na sussūsanti, na sotam odahanti, na aññā cittaṃ upaṭṭhāpentī, vokkamma ca satthusāsanā vattanti. Tatra bhikkhave tathāgato na ceva anattamano hoti, na ca anattamanataṃ paṭisaṃvedeti, anavassuto ca viharati sato sampajāno. Idam bhikkhave paṭhamam satipaṭṭhānam. Yadariyo -pa- arahati.

Puna caparam bhikkhave satthā -pa- idam vo sukhāyāti. Tassa ekacce sāvakā na sussūsanti -pa- vattanti. Ekacce sāvakā

---

1. Sam 3. 161 piṭṭhe.

sussūsanti -pa- na ca vokkamma satthusāsānā vattanti. Tatra bhikkhave Tathāgato na ceva attamano hoti, na ca attamanataṃ paṭisaṃvedeti. Na ceva anattamano hoti, na ca anattamanataṃ paṭisaṃvedeti. Attamanatañca anattamanatañca tadubhayam abhinivajjetvā upekkhako ca viharati sato sampajāno. Idam bhikkhave dutiyam -pa-.

Puna caparam -pa- sukhāyāti. Tassa sāvakā sussūsanti -pa- vattanti. Tatra bhikkhave tathāgato attamano ceva hoti, attamanatañca paṭisaṃvedeti, anavassuto ca viharati sato sampajāno. Idam bhikkhave tatiyan”ti<sup>1</sup>—

evam paṭighānunayehi anavassutatā, niccam upaṭṭhitasatitā, tadubhayavītivattatā satipaṭṭhānanti vuttā. Buddhānameva kiri niccam upaṭṭhitasatitā hoti, na paccekabuddhādīnanti.

**Pa-saddo ārambham joteti, ārambho ca pavattīti katvā āha “pavattayitabbatoti attho”**ti. Satiyā karaṇabhūtāya paṭṭhānam paṭṭhāpetabham **satipaṭṭhānam**. Ana-saddaṃhi bahulam-vacanena kammattham icchanti saddavidū, tatheva kattu-atthampi icchantīti puna tatiyanaye **“patiṭṭhātīti paṭṭhānan”**ti vuttam. Tattha **pa-saddo** bhusattham pakkhandanam dīpetīti **“okkantivā pakkhanditvā vattatīti attho”**ti āha. Puna bhāvatte sati-saddam paṭṭhāna-saddaṃca vaṇṇento **“atha vā”**ti-ādimāha. Tena purimatthe sati-saddo paṭṭhāna-saddo ca kattu-atthoti viññāyati.

Visesena kāyo ca vedanā ca assādassa kāraṇanti tappahānattham tesam taṇhāvattḥūnam oḷārikasukhumānam asubhadukkhatādassanāni mandatikkhapaññehi taṇhācaritehi sukarānīti tāni tesam visuddhimaggoti vuttāni, evam diṭṭhiyā visesakāraṇesu cittadhammesu aniccānattatādassanāni nātipabhedātipabhedagatesu tesu tappahānattham mandatikkhānam diṭṭhicaritānam sukarānīti tesam tāni visuddhimaggoti. Tikkho samathayāniko oḷārikārammaṇam pariggaṇhanto tattha aṭṭhatvā jhānam samāpajjitvā vuṭṭhāya vedanam pariggaṇhātīti āha **“oḷārikārammaṇe asaṇṭhahanato”**ti.

---

1. Ma 3. 263 piṭṭhe.



vipassanāyānikassa sukhome citte dhammesu ca cittaṃ pakkhandatīti tadanupassanānaṃ taṃvisuddhimaggatā vuttā.

**Tesaṃ tathā**ti ettha **tattha**-saddassa pahānatthanti etena yojanā. Pañca kāmagaṇā savisesā kāye labbhantīti visesena kāyo kāmoghassa vatthu, bhava sukhaggahaṇavasena bhavassādo hotīti bhavoghassa vedanā, santatighanaggahaṇavasena citte attābhiniveso hotīti diṭṭhoghassa cittaṃ, dhammavinibbhogassa dhammānaṃ dhammamattatāya ca duppaṭivijjhataṃ sammoho hotīti avijjoghassa dhammā, tasmā tesu tesaṃ pahānatthaṃ cattārova vuttā, dukkhāya vedanāya paṭighānusayo anusetīti dukkhadukkhavipariṇāmadukkhasaṅkhārdukkhabhūtā vedanā visesena byāpādakāyaganthassa vatthu, citte niccaggahaṇavasena sassatassa attano sīlesa suddhīti-ādiparāmasanaṃ hotīti sīlabbataparāmāsassa cittaṃ nāmarūpaparicchedena bhūtaṃ bhūtato apassantassa bhavavibhavadīṭṭhisāṅkhāto idaṃsaccābhiniveso hotīti tassa dhammā -pa-sukhavedanāssādavasena paralokanirapekkho “natthi dinnan”ti-ādiparāmāsaṃ uppādetīti diṭṭhupādānassa vedanā. Santatighanaggahaṇavasena sarāgādicitte sammoho hotīti mohāgatiyā cittaṃ, dhammasabhāvānavabodhena bhayaṃ hotīti bhayāgatiyā dhammā -pa- avuttānaṃ vuttanayena vatthubhāvo yojetabbo.

“Āhārasamudayā kāyasamudayo, phassasamudayā vedanāsamudayo<sup>1</sup>, saṅkhārapaccayā viññāṇaṃ, viññāṇapaccayā nāmarūpan”ti<sup>2</sup> vacanato kāyādīnaṃ samudayabhūtā kabaḷīkārāhārapphassamanosañcetanāviññāṇāhārā kāyādīparijānanena pariññātā hontīti āha “**catubbidhāhārapariññatthan**”ti. **Pakaraṇanayoti** tambapaṇṇibhāsāya vaṇṇanāyayo. Nettipeṭakappakaraṇe dhammakathikānaṃ yojanāyotipi vadanti.

**Saraṇavasenā**ti kāyādīnaṃ kusalādidhammānaṃca dhāraṇatāvasena. Saranti gacchanti etāyāti satīti imasmim atthe ekatte nibbāne samāgamo **ekattasamosaraṇaṃ**. Etadeva hi dassetuṃ “**yathā hī**”ti-ādīmāha. Ekanibbānappavesahetubhūto vā samānatāya eko

1. Saṃ 3. 161 piṭṭhe.

2. Ma 3. 109; Saṃ 1. 243; Khu 1. 77 piṭṭhesu.

satipaṭṭhānasabhāvo ekattaṃ, tattha samosaraṇaṃ taṃsabhāgatā **ekattasamosaraṇaṃ**. Ekanibbānappavesahetubhāvaṃ pana dassetuṃ “**yathā hī**”ti-ādimāha. Etasmim atthe saraṇekattasamosaraṇāni saha satipaṭṭhānekabhāvassa kāraṇattena vuttānīti daṭṭhabbāni, purimasmim visuṃ. **Saraṇavasenāti** vā gamanavasenāti atthe sati tadeva gamanaṃ samosaraṇanti samosaraṇe vā sati-saddatthavasena avuccamāne dhāraṇatāva satīti sati-saddatthantarābhāvā purimaṃ satibhāvassa kāraṇaṃ, pacchimam ekabhāvassāti nibbānasamosaraṇepi sahitāneva tāni satipaṭṭhānekabhāvassa kāraṇāni.

**Cuddasavidhenāti** idaṃ **mahāsatiṭṭhānasutte**<sup>1</sup> vuttānaṃ ānāpānapabbādīnaṃ vasena. Tathā **pañcavidhena dhammānupassananti** etthāpi daṭṭhabbāni. Ettha ca uṭṭhānakabhaṇḍasadisatā taṃtaṃsatipaṭṭhānabhāvanānubhāvassa daṭṭhabbā. **Bhikkhugocarā hi ete**. Vuttañhi “gocare bhikkhave caratha sake pettike visaye”ti-ādi<sup>2</sup>.

Kāyānupassanādipaṭṭipattiyā bhikkhu hotīti bhikkhuṃ “kāyānupassī viharatī”ti-ādinā dasseti bhikkhumhi taṃniyamato. Tenāha “**paṭṭipattiyā vā bhikkhubhāvadassanato**”ti.

**Samam careyyāti** kāyādivisamacariyaṃ pahāya kāyādīhi samam careyya. Rāgādivūpasamena **santo**, indriyadamanena **danto**, catumagganiyamena **niyato**, seṭṭhacāritāya **brahmacārī**. Kāyadaṇḍādi-oropanena **nidhāya daṇḍam**. So evarūpo bāhitapāpasamitapāpabhinnakilesatāhi **brāhmaṇādisamañño** veditabbo.

### Kāyānupassanā-uddesavaṇṇanā

**Asammissatoti** vedanādayopi ettha sitā, ettha paṭibaddhāti kāye vedanādi-anupassanāpasaṅgepi āpanne tadamissatoti attho. Avayavīgāha-samaññātidhāvanasārādānābhinivesanisedhanattham kāyaṃ aṅgapaccaṅgehi, tāni ca kesādīhi, kesādike ca bhūtopādāyarūpehi

1. Dī 2. 231; Ma 1. 70 piṭṭhesu.

2. Saṃ 3. 128; Dī 3. 48 piṭṭhesu.

vinibbhujjanto **“tathā na kāye”**ti-ādimāha. Pāsādādinagarāvayavasamūhe avayavīvādinopi avayavīgāhaṃ na karonti. Nagarahaṃ nāma koci attho atthīti pana kesañci samaññātidhāvanaṃ siyāti itthipurisādisamaññātidhāvane nagaranidassanaṃ vuttaṃ.

Yaṃ passati itthiṃ vā purisaṃ vā, nanu cakkhunā itthipurisadassanaṃ natthīti? Saccam natthi, “itthiṃ passāmi, purisaṃ passāmī”ti pana pavattasaññāya vasena **“yaṃ passati”**ti vuttaṃ. Micchādassane vā diṭṭhiyā yaṃ passati, na taṃ diṭṭhaṃ, taṃ rūpāyatanam na hoti, rūpāyatanam vā taṃ na hotīti attho. Atha vā taṃ kesādibhūtopādāyasamūhasaṅkhātam diṭṭhaṃ na hoti, diṭṭhaṃ vā yathāvuttaṃ na hotīti attho. **Yaṃ diṭṭham taṃ na passatīti** yaṃ rūpāyatanam, kesādibhūtopādāyasamūhasaṅkhātam vā diṭṭham, taṃ paññācakkhunā bhūtaṃ na passatīti attho.

**Na aññadharmānupassīti** na aññasabhāvānupassī, asubhādito aññākārānupassī na hotīti vuttaṃ hoti. **Pathavīkāyanti** kesādipathaviṃ dhammasamūhattā kāyoti vadati, lakkhaṇapathavimeva vā anekappabhedasakalarāgataṃ pubbāpariyabhāvena pavattamānaṃ samūhavasena gahetvā kāyoti vadati, evaṃ aññatthāpi.

**Ajjhattabahiddhāti** ajjhatabahiddhādhammānaṃ **ghaṭitārammaṇam** ekato ārammaṇabhāvo natthīti attho, ajjhatabahiddhā dhammā vā ghaṭitārammaṇam idaṃ natthīti attho. **Tīsu bhavesu kilesānanti** bhavattayavisayānaṃ kilesānanti attho.

**Sabbatthikanti** sabbattha bhavaṃ. Sabbasmim līne uddhaṭe ca citte icchitabbattā, sabbe vā līne uddhaṭe ca bhāvetabbā bojjaṅgā atthikā etāyāti **sabbatthikā**. **Antosaṅkhepoti** anto-olīyanā kosajjanti attho.

Avisesena dvīhipi nīvaraṇappahānaṃ vuttanti katvā puna ekekena vuttappahānavisesaṃ dassetuṃ **“visesenā”**ti āha, “vineyya nīvaraṇānī”ti avatvā abhiṅghādomanassavinayassa vā payojanaṃ dassento **“visesenā”**ti-ādimāha. Kāyānupassanābhāvanāya ujuvipaccanī kānaṃ anurodhavirodhādīnaṃ pahānadassanañhi etassa payojananti,

**kāyabhāvanāyāti** kāyānupassanābhāvanā adhippetā. **Tenāti** anurodhādippahānavacanena.

**Sabbatthikakammaṭṭhānaṃ** buddhānussati mettā maraṇassati asubhabhāvanā ca. Satisampajaññaena etena yoginā parihariyamānaṃ taṃ sabbatthikakammaṭṭhānaṃ vuttaṃ satisampajaññaabaleṇa avicchinnaṃ tassa pariharitabbatā, satiyā vā samatho vutto samādhikkhandhasaṅgahitattā.

Kāyānupassanā-uddesavaṇṇanā niṭṭhitā.

### Vedanānupassanādi-uddesavaṇṇanā

**Kevalaṃ panidhāti**-ādinā idha ettakaṃ veditabbanti veditabbaṃ paricchedaṃ dasseti. **Addamadakkhīti** dvepi ekatthā. **Sammaddasoti** sammā passako.

**Sukhadukkhato**pi cāti sukhādīnaṃ ṭhitivipariṇāmaññaṇasukhatāya, vipariṇāmaṭṭhiti-aññaṇadukkhataya ca vuttattā tissopi ca sukhato tissopi ca dukkhato anupassitabbāti attho.

Rūpādi ārammaṇa chandādi adhipati ñāṇādi sahaṅgataṃ āvacarādi bhūminānattabhedānaṃ kusalākusalatabbipākakiriyānānattabhedassa ca **ādi-**saddena sasaṅkhārikāsaṅkhārikasavattukāvattukādinānattabhedānaṃ vasenāti yojetabbaṃ. **Suññatādhammassāti** “dhammā honti, khandhā hontī”ti-ādinā<sup>1</sup> suññatāvāre āgatasuññatāsabhāvassa vasena. **Kāmañcettāti**-ādinā pubbe pahīnattā puna pahānaṃ na vattabbanti codanaṃ dasseti, maggacittakkaṇe vā ekattha pahīnaṃ sabbattha pahīnaṃ hotīti visum visum na vattabbanti. Tattha purimacodanāya nānāpuggalaparīhāro, pacchimāya nānācittakkaṇikaparīhāro. Lokiyabhāvanāya hi kāye pahīnaṃ na vedanādīsu vikkhambhitaṃ hoti. Yadipi na pavatteyya, na paṭipakkhabhāvanāya tattha sā abhiṅghādomanassassa appavatti hotīti puna tappahānaṃ vattabbamevāti. Ubhayattha vā ubhayaṃ sambhavato yojetabbaṃ. **Ekattha**

1. Abhi 1. 35 piṭṭhe.

**pahīnaṃ sesesupi pahīnaṃ hotīti** maggasatipaṭṭhānabhāvanānaṃ, lokiyabhāvanāya vā sabbattha appavattimattaṃ sandhāya vuttaṃ. “Pañcapi khandhā loko”ti hi catūsupi vuttanti.

Uddesavāraṇṇanā niṭṭhitā.

### Kāyānupassanāniddesavaṇṇanā

356. Sabbappakāravacanena uddese dassitā ajjhattādi-anupassanā pakārā ca gahitā. Tattha antogadhā cuddasa pakārā, kāyagatāsatisutte vuttā kesādivaṇṇakasīṇārammaṇacatukkajjhānappakārā, lokiyādippakārā cāti tepi gahitā eva. Niddese hi ekappakāraniddesena nidassanamattaṃ katanti, sabbappakāraggahaṇaṅca bāhiresupi ekadesasambhavato katanti daṭṭhabbānaṃ.

**Tiriyaṃ tacaparicchinnaṃ** ettha nanu kesalomanakhānaṃ atacaparicchinnaṃ tacassa ca atthīti? Yadipi atthi, tacaparicchinnaṃ bahulatāya pana tacaparicchinnaṃ na na hoti kāyassāti evaṃ vuttaṃ. Taco pariyaṇṇo assāti tacapariyaṇṇototi vuttoti etena pana vacanena kāyekadesabhūto taco gahito eva. Tappaṭibaddhā ca kesādayo tadanupaviṭṭhamulā tacapariyaṇṇatāva hontīti dvattiṃsākārasamūho sabbopi kāyo tacapariyaṇṇototi vuttoti veditaṃ.

**“Pūraṃ nānappakārassā”**ti vuttaṃ, ke pana te pakārā? Yehi nānappakāraṃ asuci vuttanti kesā lomāti-ādi vuttanti imamatthaṃ dīpento āha **“ete kesādayo ākārā”**ti. Ākārā pakārāti hi eko attho.

Nisinnassa yāva aparipphandaṇisajjāmūlakaṃ dukkhaṃ uppajjati, yāvataṃ uṭṭhāti vā, tāva eko **nisajjavāro**. Yena vidhinā uggahe kusalo hoti, so sattavidho vidhi **“uggahakosallaṃ”**ti vuccati, taṃ nibbattaṃ vā nāṇaṃ.

Pathavīdhātubahulabhāvato matthaluṅgassa karīsāvasāne tanti-āropanamāha. Ettha pana **maṃsaṃ -pa- vakkāṃ -pa- kesāti** evaṃ

vakkapañcakādīsu anulomasajjhāyaṃ vatvā paṭilomasajjhāyo purimehi sambandho vutto. Svāyaṃ ye parato visuṃ tipañcāhaṃ purimehi ekato tipañcāhanti chapañcāhaṃ sajjhāyā vakkhamānā, tesu ādi-antadassanavasena vuttoti daṭṭhabbo. Anulomapaṭilomasajjhāyepi hi paṭilomasajjhāyo antimoti. Sajjhāyappakārantaraṃ vā etampīti veditabbaṃ. **Hatthasaṅkhalikā** aṅgulipanti. **Lakkhaṇapaṭivedhassāti** asubhalakkhaṇapaṭivedhassa, dhātulakkhaṇapaṭivedhassa vā.

Attano bhāgo sabhāgo, sabhāgena paricchedo **sabhāgaparicchedo**, heṭṭhuparitiriyantehi sakakoṭṭhāsikakesantarādīhi ca paricchedoti attho.

**Dhātuvibhaṅgo** pukkusātisuttaṃ<sup>1</sup>. **Sādhāraṇavasenāti** ettakeneva siddhe **sabba**-ggahaṇaṃ vaṇṇakasiṇavasena catukkajjhānikasamathasādhāraṇattassa ca dassanatthaṃ.

**Okkamanavissajjananti** paṭipajjitabbavajjetabbe maggeti attho. **Bahiddhā puthuttārammaṇeti** ettha kāyānupassanaṃ hitvā subhādivasena gayhamānā kesādayopi bahiddhā puthuttārammaṇānevāti veditabbā. **Ukkuṭṭhukkaṭṭhiṭṭhāneyeva uṭṭhahitvāti** pubbe viya ekattha katāya ukkuṭṭhiyā kamena sabbatālesu patitvā uṭṭhahitvā pariyantatālaṃ āditālaṅca agantvā tato tato tattha tattheva katāya ukkuṭṭhiyā uṭṭhahitvāti attho.

**Adhicittanti** samathavipassanācittaṃ. **Anuyuttenāti** yuttapayuttena, bhāventenāti attho. **Samādhinimittaṃ** upalakkhaṇākāro samādhiyeva. **Manasi kātabbanti** citte kātabbaṃ, uppādetabbanti attho. Samādhikāraṇaṃ vā ārammaṇaṃ samādhinimittaṃ āvajjitabbanti attho. Ṭhānaṃ atthīti vacanaseso, taṃ cittaṃ kosajjāya saṃvatteyya, etassa saṃvattanassa kāraṇaṃ atthīti attho. Taṃ vā manasikāraṇaṃ cittaṃ kosajjāya saṃvatteyyāti etassa ṭhānaṃ kāraṇanti attho. **Na ca pabhaṅgūti** kammaniya bhāvūpagamanena ca pabhijjanasabhāvanti attho.

**Ālimpetīti** ādīpeti jāleti. **Tañcāti** taṃ piḷandhanavikatisaṅkhātāṃ atthaṃ payojanaṃ. **Assāti** suvaṇṇakārassa **anubhoti** sambhoti

---

1. Ma 3. 281 piṭṭhe.

sādheti. **Assa** vā suvaṇṇassa **taṃ** atthaṃ suvaṇṇakāro **anubhoti** pāpuṇāti.

Abhiññāya iddhividhādīnāṇena sacchikaraṇīyassa iddhividhapaccanubhavanādikassa **abhiññāsacchikaraṇīyassa**. Paccakkhaṃ yassa atthi, so sakkhi, sakkhino bhabbatā **sakkhibhabbatā**, sakkhibhavanatāti vuttaṃ hoti. Sakkhi ca so bhabbo cāti vā **sakkhibhabbo**. Ayañhi iddhividhādīnaṃ bhabbo, tattha ca sakkhīti sakkhibhabbo, tassa bhāvo **sakkhibhabbatā**, taṃ pāpuṇāti. **Āyataneti** pubbahetādike kāraṇe sati.

**Sītibhāvanti** nibbānaṃ, kilesadarathavūpasamaṃ vā. **Sampahaṃsetīti** samapavattaṃ cittaṃ tathāpavattiyā paññāya toseti uttejeti. Yadā vā nirassādaṃ cittaṃ bhāvanāya na pakkhandati, tadā jāti-ādīni samvegavatthūni paccavekkhitvā **sampahaṃseti** samuttejeti.

**Tiriyāṃ aññamaññaena paricchinnā**, kathaṃ? **Dve kesā ekato natthīti**. **Āsayoti** nissayo, paccayoti attho.

**Nakhā tiriyaṃ aññamaññaena paricchinnāti** visuṃ vavatthitataṃ sandhāya vuttaṃ. Tameva hi atthaṃ dassetuṃ “**dve nakhā ekato natthī**”ti āhāti.

**Sukhumampīti** yathāvutta-oḷārikacammato sukhumanṃ antomukhacammādi. Koṭṭhāsesu<sup>1</sup> vā tacena paricchinnatā yam durupalakkhaṇīyaṃ, taṃ “sukhuman”ti vuttaṃ. Tañhi vuttanayena tacam vivarivā passantassa pākaṇaṃ hotīti.

**Tālaguḷapaṭalam** nāma pakkatālaphalalasikaṃ tālapaṭṭikāya limpivā sukkhāpetvā uddharivā gahitapaṭalam.

**Evaṃ timattānīti** evaṃ-matta-saddehi goppakaṭṭhikādīni<sup>2</sup> avuttānīpi dassetīti veditabbaṃ. **Kīḷagoḷakāni** suttana bandhitvā aññamaññaṃ ghaṭṭetvā kīḷanagoḷakāni.

**Tattha jaṅghaṭṭhikassa paṭiṭṭhitaṭṭhānanti** jaṅghakaṭṭhimhi pavisitvā ṭhitaṭṭhānanti adhippāyo. **Tena aṭṭhinā paṭiṭṭhitaṭṭhānaṃ** yam **kaṭiṭṭhino**, taṃ **aggachinnamahāpunnāgaphalasadisaṃ**. **Sīsakaṭṭhavaṭṭhakam** veṭhetvā ṭhapiṭṭhāsaṃyamaṃ paṭṭakam.

1. Anto sukhumanṃ cammādikokṭṭhāsesu (Ka) antomukhacammādikokṭṭhāsesu (Visuddhi-Ṭī 1. 305 piṭṭhe)

2. Ānisadaṭṭhi-ādīni (Visuddhi-Ṭī 1. 306 piṭṭhe)

suttakantanasalākāviddhā goḷakā vaṭṭanāti vuccanti, vaṭṭanānaṃ āvali  
**vaṭṭanāvali. Avalekhanasatthakaṃ** ucchutacāvalekhanasatthakaṃ.

**Vakkabhāgena paricchinnanti** vakkapariyantabhāgena paricchinnam.

**Sakkharasudhāvaṇṇanti** marumpehi katasudhāvaṇṇam.

“Setasakkharasudhāvaṇṇan”ti ca pāṭham vadanti, setasakkharāvaṇṇam  
sudhāvaṇṇaṅcāti attho.

Yattha annapānaṃ nipatitvā tiṭṭhatīti sambandho.

**Visamacchinnakalāpo** visamaṃ udakaṃ paggharati, evameva sarīraṃ  
kesakūpādivivarehi upari heṭṭhā tiriyaṅca visamaṃ paggharatīti dassetuṃ  
**visamacchinna-ggahaṇam** karoti.

Atikaṭuka-accuṇṇādiko<sup>1</sup> **visabhāgāhāro** uṇhakāle pavattamānānaṃ  
dhātūnaṃ visabhāgattā.

**Ekattārammaṇabaleneva vāti** vikkhambhitanīvaraṇena  
susamāhitacittena upaṭṭhitassa nānārammaṇavipphandanavirahena  
ekasabhāvassa ārammaṇassa vasena. Tañhi ekattārammaṇam  
upaṭṭhahamānameva attani abhiratiṃ, sātisayaṃ pharaṇapītiṃ,  
iṭṭhākārānubhavanaṅca somanassaṃ uppādeti. Na hi abhiratisomanassehi  
vinā anatikkantapītisukhassa ekattupaṭṭhānaṃ atthīti.

**Avisesato pana sādharmaṇavasenāti** paṭikūladhātuvaṇṇavisesaṃ akatvā  
samathavipassanāsādhāraṇavasenāti attho. **Tividhenāti** anulomādinā  
vakkhamānena. **Cha māseti** addhamāse ūnepi māsaparicchedenā  
paricchijjamāne sajjhāye cha māsaṃ paricchadakā hontīti katvā vuttanti  
veditabbaṃ. Paricchijjamānassa māsaragamananivāraṇaṅhi  
chamāsaggahaṇam, na sakalachamāse parivattadassanattam. **Ācariyāti**  
aṭṭhakathācariyā.

**Lakkhaṇanti** dhātupaṭikūlalakkhaṇam. Janam na arahantīti **ajaññā**, jane  
pavesetuṃ ayuttā jigucchaniyāti vuttam hoti.

**Paṭipāṭiyā aṭṭhīnīti** paṭipāṭiyā aṭṭhīni koṭiyā ṭhitāni. Na ettha koci attā  
nāma atthi, aṭṭhīni eva aṭṭhipuñjamatto evāyaṃ saṅghāṭoti

---

1. Atikaṭukacuṇṇādiko (Ka)



dasseti. **Anekasandhiyamitoti** anekehi sandhīhi yamito sambaddho so aṭṭhipuñjoti dasseti. **Na kehicīti** yamentam attānam paṭisedheti. **Codito** jarāya marañābhimukhagamanena codito.

**Mahābhūtam upādārūpena paricchinnam** “nīlam pītam sugandham duggandham”ti-ādinā. **Upādārūpam mahābhūtena** tannissitassa tassa tato bahi abhāvā. Chāyātapānam ātāpapaccayachāyuppādakabhāvo aññamaññaparicchedakatā. Rūpakkhandhassa pariggahitattā tadantogadhānam cakkhādi-āyatanadvārānam vasena taṃtamdvārikā anūpino khandhā pākāṭā hontī, āyatanāni ca dvārāni ca āyatanadvārānīti vā attho. Tena rūpāyatanādīnañca vasaṇāti vuttam hoti.

**Sappaccayāti** sappaccayabhāvā, paccayāyattam hutvā nibbattanti vuttam hoti. Samāno vā sadiso yutto paccayo sappaccayo, tasmā **sappaccayā**.

**Ettakoti** yathāvuttena ākārena paguṇo koṭṭhāso. Uggahova **uggahasandhi**. Vaṇṇādimukhena hi upaṭṭhānam ettha sandhīyati sambajjhatīti “sandhī”ti vuccati.

**Upaṭṭhātīti** vaṇṇādivasena upaṭṭhātīti attho. **Pañcaṅgasamannāgateti** nātidūranāccāsannagamanāgamanasampannanti ekaṅgam, divā abbokiṇṇam rattim appasaddam appanigghosanti ekam, appaḍamsamakasaṅgātapasarīsapasamphassanti ekam, tasmim kho pana senāsane viharantassa appakasirena uppajjati cīvara -pa- parikkhāroti ekam, tasmim pana senāsane therā bhikkhū viharanti bahussutāti ekam<sup>1</sup>. **Pañcaṅgasamannāgatenāti** appābādhāsāṭṭheyasaddhāpaññāvīriyehi padhāniyaṅgehi samannāgatena.

**Uṭṭhānakadāyanti** tehi khettehi uṭṭhānakam, tehi dātābbadhaññanti attho. Ettha ca aṭṭhakumbhadāyakakhettam viya mukhadhovanakiccam, soḷasakumbhadāyakam viya khādanabhuñjanakiccam daṭṭhabbam lahukagarukabhāvato. Tato pana yam dukkham nibbattati, tam aññañca dvattimsākāramanasikārena ca nivattatīti āha “**ettheva kammam kātabban**”ti. **Ettāvatāti** ekadivasam timsa vāre manasikāraṭṭhapanena.

---

1. Am 3. 268 piṭṭhe.

**Sahassuddhāraṃ sādhetvā**ti saḥassavaḍḍhitam iṇam yojetvā. Uddharitabboti **uddhāroti** hi vaḍḍhi vuccatīti. **Suddhacittena**ti vikkhepādikilesavirahitacittena. Kesādīsu tace rajjantā succhavicammaṃ tacoti gahetvā “suvaṇṇādivaṇṇo me taco”ti-ādinā rajjanti.

**Tesu dve ekamaggaṃ paṭipajjamānā nāma na hontīti** yathā tathā vā palāyantīti attho. Tattha rāgādivatthubhāvena dvattimsākārānaṃ corasadisatā anattāhavaḥatā daṭṭhabbā.

Kammameva visesādhigamassa ṭhānanti **kammaṭṭhānaṃ** bhāvanā vuccati. Tenāha “**manasikarontassa appanaṃ pāpuṇātī**”ti. Kammassa vā bhāvanāya ṭhānaṃ ārammaṇaṃ appanārammaṇabhāvūpagamanena appanaṃ pāpuṇātīti vuttaṃ.

**Mānajātikoti** etena laṅghanasamatthātāyogena upasamarahitamaṃ dasseti. Cittampi hi tathā nānārammaṇesu vaḍḍhitam upasamarahitanti dassetabbanti.

**Hatthe gahitapañhavatthu pākatikamevā**ti visuddhimagge vuttatam sandhāyāha. Tattha hi vuttaṃ—

“Mālakatthero kira<sup>1</sup> dīghabhāṇaka-abhayattheraṃ hatthe gahetvā ‘āvuso abhaya imaṃ tāva pañham uggaṇhāhī’ti vatvā āha ‘mālakatthero dvattimsakoṭṭhāsesu dvattimsapaṭhamajjhānalābhī, sace rattim ekaṃ, divā ekaṃ samāpajjati, atirekaḍḍhamāsenā puna sampajjati. Sace pana devasikaṃ ekameva samāpajjati, atirekamāsenā puna sampajjati’ti”.

Idaṃ pana **ekaṃ manasikarontassa ekaṃ pāṭiyekkaṃ manasikarontassa dvattimsāti** etassa sādhanattham nidassanavasena ānīnti daṭṭhabbā.

**Anupādinnaḥkapakkhe ṭhitānī**ti etena cetiyapabbatavāsī mahātissatthero viya, saṅgharakkhitattherupaṭṭhākasāmaṇero viya ca anupādinnaḥkapakkhe ṭhapetvā gahetuṃ sakkontassa dasavidhāsūbhavasena jīvamānakasārīrepi upaṭṭhite upacārappatti dassitā hotīti vedītabbā. “Atthissa kāye”ti pana sattavasena kesādīsu gayhamānesu yathā

---

1. So kirāyasmā (Visuddhi 1. 257 piṭṭhe)

“imasmiṃ kāye”ti satta-ggahaṇarahite ahaṃkāravatthumhi viddhastāhaṃkāre sadā sannihite pākaṭe ca attano kāye upaṭṭhānaṃ hoti, na tathā tatthāti appanaṃ appattā ādīnavānupassanāva tattha hotīti adhippāyenāha “**asubhānupassanāsāṅkhātā pana vipassanābhāvanā hotīti veditabbā**”ti.

357. Ādimhi sevanā **āsevanā**, vaḍḍhanaṃ **bhāvanā**, punappunaṃ karaṇaṃ **bahulikammanti** ayametesariṃ viseso.

362. **Vatthupariññāyāti** abhijjhādomanassānaṃ vatthubhūtaṃ kāyassa pariḷānaṇaṃ. **Appitāti** gamitā, sā ca vināsitatāti āha “**vināsitā**”ti. Appavattiyāṃ ṭhapitātipi **appitāti** ayamatto niruttisiddhiyā vuttoti daṭṭhabbo. **Vigatantā katāti** idāni katabbo anto etesaṃ natthīti vigatantā, evambhūtā katāti attho. Kammameva viśesādhigamassa ṭhānaṃ **kammaṭṭhānaṃ**, kamme vā ṭhānaṃ bhāvanārambho **kammaṭṭhānaṃ**, tañca anupassanāti āha “**anupassanāya kammaṭṭhānaṃ**”ti, anupassanāya vuttanti adhippāyo.

Kāyānupassanāniddesavaṇṇanā niṭṭhitā.

### Vedanānupassanāniddesavaṇṇanā

363. Sampajānassa vediyaṇaṃ **sampajānavediyaṇaṃ**. **Vatthunti** sukhādīnaṃ ārammaṇamāha, tena vatthu ārammaṇaṃ etissāti **vatthu-ārammaṇāti** samāso daṭṭhabbo. **Vohāramattaṃ hotīti** etena “sukhaṃ vedanaṃ vedayāmi”ti idaṃ vohāramattena vuttanti dasseti.

**Vīriyasamādhiraṃ yojetvāti** adhiśāsanavīriyassa adhimattatāya tassa samatāya ubhayaṃ saha yojetvā. **Saha paṭisambhidāhīti** lokuttarapaṭisambhidāhī saha. Lokiyānampi vā sati uppattikāle tattha samatthataṃ sandhāya “**saha paṭisambhidāhī**”ti vuttanti daṭṭhabbaṃ. **Samāsīsīti** vārasamasīsī hutvā paccavekkhaṇavārassa anantaravāre

parinibbāyīti attho. **Saṅkhepamanasikāravasena** mahāsatipañṇāne,  
**vitthāramanasikāravasena** rāhulovādadhātuvibhaṅgādīsu.

**Phassapañcamakevāti eva-saddena** vuttesu tīsupi mukhesu  
pariggahassa samānataṃ dasseti. Nāmarūpavavattānassa adhippetattā  
niravasesarūpapariggahassa dassanattham **“vatthu nāma kārajakāyo”**ti āha,  
na cakkhādīni chavattāhīti. Karajakāyassa pana vatthubhāvasādhanaṃ  
“idañca pana me viññānaṃ ettha sitaṃ, ettha paṭibaddhaṃ”<sup>1</sup>ti suttam  
ābhatam.

Phassaviññānaṃ pākaṭatā kesañci hotīti yesaṃ na hoti, te sandhāyāha  
**“phassavasena vā hi -pa- na pākaṭam hoti”**ti. Tesam pana aññesañca  
sabbesaṃ veneyyānaṃ vedanā pākaṭāti āha **“vedanāvasena pana pākaṭam  
hoti”**ti. **Satadhotasappi** nāma satavāraṃ vilāpetvā vilāpetvā udake  
pakkhipitvā uddharitvā gahitasappi.

**Vinivattetvāti** catukkhandaṃ samudāyato visuṃ uddharitvā.  
Mahāsatipañṇānasuttādīsu katthaci paṭhamam rūpakammaṭṭhānam vatvā  
pacchā arūpakammaṭṭhānam vedanāvasena vinivattetvā dassitam. Katthaci  
arūpakammaṭṭhānam eva vedanāvasena arūparāsito, nātāpariññāya  
pariññātato vā rūpārūparāsito vā vinivattetvā dassitam. Tatthāpi yesu  
paṭhamam nātāpariññā vuttā, tesu tadantogadham. Yesu na vuttā, tesu ca  
vedanāya ārammaṇamattaṃ saṅkhittam pāli-anāruḥham rūpakammaṭṭhānam  
sandhāya rūpakammaṭṭhānassa paṭhamam kathitā vuttāti veditabbā.

“Manoviññeyyānaṃ dhammānaṃ iṭṭhānaṃ kantānaṃ”<sup>2</sup>ti ādinā<sup>2</sup> nayena  
vuttam chagehassitasomanassaṃ pañcakāmaguṇesu assādānupassino eva  
hotīti āha **“pañcakāmaguṇāmisaniṣṭhā cha gehasitasomanassa vedanā”**ti.

Vedanānupassanāniddesavaṇṇanā niṭṭhitā.

1. Dī 1. 72; Ma 2. 209 piṭṭhesu.

2. Ma 3. 260 piṭṭhe.

### Cittānupassanāniddesavaṇṇanā

365. Kilesasampayuttānaṃ dhammānaṃ kehici kelesehi vippayogepi sati yehi sampayuttā, tehi saṃkilesabhāvena sadisehi saṃkiliṭṭhattā itarehipi na visuddhatā hotīti āha “**na pacchimapadaṃ bhajanti**”ti. **Duvidhanti** visuṃ vacanaṃ sarāgasadosehi visiṭṭhaggahaṇatthaṃ. Avipassanupagattā “**idha okāsova natthī**”ti vuttaṃ.

Cittānupassanāniddesavaṇṇanā niṭṭhitā.

### Dhammānupassanāniddesa

#### Nīvaraṇapabbavaṇṇanā

367. Kaṇhasukkānaṃ yuganaddhatā nitthīti pajānanakāle abhāvā “**abhiṇhasamudācārasenā**”ti āha.

**Subhampīti** kāmaccchantopi. So hi attano gahaṇākārena “subhan”ti vuccati, tenākārena vuccati, tenākārena pavattamānakassa aññassa kāmaccchandassa nimittatā “**nimittan**”ti cāti. Ākaṅkhitassa hitasukhassa anupāyabhūto manasikāro **anupāyamanasikāro**. **Tatthāti** nipphādetabbe ārammaṇabhūte ca duvidhepi subhanimitte.

**Asubhampīti** asubhajjhānampi. Taṃ pana dasasu asubhesu kesādīsu ca pavattaṃ daṭṭhabbaṃ. Kesādīsu hi saññā asubhasaññāti girimānandasutte vuttāti. Ettha catubbidhassapi ayonisomanasikārassa yonisomanasikārassa ca dassanaṃ niravasesadassanatthaṃ katanti veditabbaṃ. Tesu pana asubhe subhanti asubhanti ca manasikāro idhādhippeto, tadanukulattā vā itarepīti.

Bhojane mattañño thinamidhābhivābhāvā otāraṃ alabhamāno kāmarāgo pahīyatīti vadanti. Bhojananissitaṃ pana āhārepaṭikūlasaññaṃ, tabbipariṇāmassa tadādhārassa tassa ca upanissayabhūtaṃ asubhatādidassanaṃ, kāyassa ca āhāraṭṭhitikatādidassanaṃ

so uppādetīti tassa kāmacchando pahiyateva, abhidhammapariyāyena sabbopi lobho kāmacchandaniṅvaraṇanti āha “**arahattamaggenā**”ti.

**Odissakānodissakadisāpharaṇānanti** attagaru-  
atippiyasahāyamajjhattavasena odissakatā, sīmābhede kate anodissakatā, ekadisāpharaṇavasena disāpharaṇatā mettāya uggahaṇe veditabbā. Vihāraracchāgāmādivasena vā odissakadisāpharaṇam, vihārādi-uddesarahitam puratthimādidisāvasena anodissakadisāpharaṇanti evam vā dvidhā uggaham sandhāya “**odissakānodissakadisāpharaṇānan**”ti vuttam. Uggaho ca yāva upacārā daṭṭhabbo, uggahitāya āsevanā **bhāvanā**. Tattha “sabbe sattā paṇā bhūtā puggalā attabhāvapariyāpannā”ti etesaṃ vasena pañcavidhā, ekekasmim “averā hontu abyāpajjā anīghā, sukhī attānam pariharantū”ti catudhā pavattito vīsatividhā vā anodhisoparaṇā mettā, “sabbā itthiyo purisā ariyā anariyā devā manussā vinipātikā”ti sattodhikaraṇavasena pavattā sattavidhā, aṭṭhavīsatividhā vā odhisoparaṇā mettā, dasahi disāhi disodhikaraṇavasena pavattā dasavidhā ca disāpharaṇā mettā, ekekāya vā disāya sattādi-itthi-ādi-averādiyogena asītādhikacatusatappabhedā anodhisoparaṇā veditabbā.

**Kāyavināmanāti** kāyassa vividhena ākārena nāmanā.

**Atibhojane nimittaggāhoti** atibhojane thinamiddhassa nimittaggāho, “ettake bhutte thinamiddhassa kāraṇam hoti, ettake na hoti”ti thinamiddhassa kāraṇākāraṇaggāhoti attho. Dhutaṅgānam vīriyanissitattā āha “**dhutaṅganissitasappāyakathāyapī**”ti.

Kukkuccampi katākatānusocanavasena pavattamānam uddhaccena samānalakkhaṇam avūpasamasabhāvamevāti cetaso avūpasamo “**uddhaccakukkuccamevā**”ti vutto.

Bahussutassa ganthato ca attato ca atthādīni vicinantassa cetaso vikkhepo na hoti yathāvidhipaṭipattiyā yathānurūpapatikārappavattiyā katākatānusocanañcāti “**bāhusaccenapi uddhaccakukkuccam pahiyati**”ti āha. Vuḍḍhasevitā ca vuḍḍhasīlitam āvahaṭīti cetovūpasamakarattā

uddhaccakukkuccappahānakāritā vuttā. Vuḍḍhataṃ pana anapekkhitvā vinayadharā kukkuccavinodakā kalyāṇamittā vuttāti daṭṭhabbā.

Tiṭṭhati etthāti ṭhānīyā, vicikicchāya ṭhānīyā **vicikicchāṭhānīyā**.  
Ṭhātabbāti vā ṭhānīyā, vicikicchā ṭhānīyā etesūti **vicikicchāṭhānīyā**.

Kāmaṃ bahussutatāparipucchakatāhi aṭṭhavatthukāpi vicikicchā pahīyati, tathāpi ratanattayavicikicchāmūlikā sesavicikicchāti katvā āha “**tīṇi ratanāni ārabbhā**”ti. Vinaye pakataññutā “sikkhāya kaṅkhatī”ti<sup>1</sup> vuttāya vicikicchāya pahānaṃ karotīti āha “**vinaye ciṅṇavasībhāvassapī**”ti. **Okappaniyasaddhāsāṅkhāta-adhimokkhabahulassāti** anupavisana saddhāsāṅkhāta-adhimokkhena adhimuccanabahulassa. Adhimuccanañca adhimokkhuppādanamevāti daṭṭhabbaṃ. Saddhāya vā ninnatā **adhimutti**.

Nivaraṇapabbavaṇṇanā niṭṭhitā.

### Bojjhaṅgapabbavaṇṇanā

Khandhādīpāliya attho khandhādīnaṃ atthoti katvā āha “**khandha -pa-vipassanānaṃ atthasannissitaparipucchābahulatā**”ti. Tena pāḷimuttakapucchā na tathā paññāsāmvattanikā, yathā atthapaṭipucchāti dasseti.

Mandattā aggijālādīsu āpodhātu-ādīnaṃ viya vīriyādīnaṃ sakicce asamatthatā vuttā.

**Pattaṃ nīharantova taṃ sutvāti** ettha pañcābhiññāttā dibbasotena assosīti vadanti.

**Pasādasinehābhāvenāti** pasādasāṅkhātassa sinehassa abhāvena.  
**Gadrabhapiṭṭhe** lūkharajo lūkhataro hutvā dissatīti atilūkhatāya taṃsadise.

Sāṃvejanapasādanehi tejanam tosanañca **sampahaṃsanāti**.

Bojjhaṅgapabbavaṇṇanā niṭṭhitā.

1. Abhi 1. 208; Abhi 2. 379 piṭṭhesu.

Samathavipassanāsuddhavipassanāvasena paṭhamassa itaresaṅca kathitattāti attho. **Maggasampayuttā sati kāyānupassanā nāmāti** āgamanavasena vuttaṃ. **Evaṃ tāva desanā puggale tiṭṭhatīti** kāyānupassī-ādināṃ āgamanavasena viresetvā vuttā satipaṭṭhānadesanā puggale tiṭṭhatīti attho. Na hi sakkā ekassa anekasamaṅgitā vatthuṃ ekakkhaṇe anekasatisambhavāvabodhapasaṅgā, puggalaṃ pana āmasitā sakiccaparicchinne dhamme vuccamāne kiccabhedenā ekissāpi satiyā anekānāmatā hotīti dassento “**kāye panā**”ti-ādimāha. Yathā hi puggalakiccaṃ dhammā evāti dhammabhedenā kāyānupassī-ādīpuggalabhedova hoti, na evaṃ dhammassa dhammo kiccanti na dhammabhedenā tassa bhedo, tasmā ekāva sati catuvipallāsappahānabhūtā magge samiddā anattantarena tappahānakiccabhedenā cattāri nāmāni lābhatīti ayamettha adhippāyo.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

374. Abhidhammabhājanīye “kathaṅca bhikkhu keye kāyānupassī viharati? Idha bhikkhu yasmiṃ samaye -pa- dandhābhiññaṃ kāye kāyānupassī, yā tasmiṃ samaye satī”ti-ādinā āgamanavasena viresetvāni satipaṭṭhānāni puggale ṭhapetvā desetvā puna “tatha katamaṃ satipaṭṭhānaṃ? Idha bhikkhu yasmiṃ samaye -pa- dandhābhiññaṃ -pa- yā tasmiṃ samaye satī”ti-ādinā puggalaṃ anāmasitvā āgamavisesanaṅca akatvā catukiccasādhakekasativasena suddhikasatipaṭṭhānanayo vuttoti ayamettha nayadvaye viseso.

Abhidhammabhājanīyavaṇṇanā niṭṭhitā.

Satipaṭṭhānavibhaṅgavaṇṇanā niṭṭhitā.



## 8. Sammappadhānavibhaṅga

### 1. Suttantabhājanīyavaṇṇanā

390. **Kāraṇappadhānāti** “anuppannapāpakānuppādādi-atthā”ti gahitā tatheva te hontīti taṃ atthaṃ sādhetiyevāti etassa atthassa dīpako sammā-saddoti yathādhippetatthassa anuppannapāpakānuppādādino kāraṇabhūtā, padhānakāraṇabhūtāti attho. Sammāsaddassa upāyayoniso-atthadīpakataṃ sandhāya “**upāyappadhānā yonisopadhānā**”ti vuttaṃ. **Paṭipannakoti** bhāvanamanuyutto. Bhusaṃ yogo payogo, payogova parakkamo **payogaparakkamo**. **Etānīti** “vāyamaṭi”ti-ādīni “āsevamaṇo vāyamaṭi”ti-ādīnā yojetabbāni.

**Anuppannāti avattabbataṃ āpannānanti**  
bhūmiladdhārammaṇādhiḡgahitā vikkhambhitāsamugghātītuppannānaṃ.

391. **Dhammacchandoti** taṇhādīṭṭhivīriyachandā viya na añño dhammo atha kho chandaniyasabhāvo evāti dassento āha “**sabhāvacchando**”ti. Tattha “yo kāmesu kāmacchando”ti-ādīsu<sup>1</sup> taṇhā chandoti vuttāti vedītabbo, “sabbeva nu kho mārisa samaṇabrāhmaṇā ekantavādā ekantasīlā ekantachandā ekanta-ajjhosānā”ti<sup>2</sup> ettha dīṭṭhi, pamādaniddese “nikkhittachandatā nikkhittadhuratā”ti viriyanti vaṇṇeti.

394. **Vāyamaṭi vīriyaṃ ārabhatīti** padadvayassapi niddeso vīriyaniddesoyevāti adhippāyenāha “vīriyaniddese”ti.

406. **Sabbapubbabāgeti** sabbamaggānaṃ pubbabhāge. **Purimasminti** “anuppannā me kusalā dhammā anuppajjamānā anattāya saṃvatteyyun”ti etthāpi “**samathavipassanāva gahetabbā**”ti vuttaṃ atṭhakathāyaṃ, taṃ pana maggānuppannatāya bhāvato anuppajjamāne ca tasmim vaṭṭānatthasaṃvattanato na yutthanti paṭikkhipati.

---

1. Abhi 1. 222 piṭṭhe.

2. Dī 2. 225 piṭṭhe.

**Mahantaṃ gāraṃ hoti**, tasmā “saṃghagāraṃ yathāruci vanditūṃ na sakkā”ti saṃghena saha na nikkhami. **Atimandāni notī** nanu atimandānīti attho. Santasamāpattito aññaṃ santhambhanakāraṇaṃ balavaṃ natthīti “**tato pariḥīnā santhambhitūṃ na sakkontī**”ti āha. Na hi mahārajjumhi chinne suddatantū sandhāretūṃ sakkontīti. Samathe vatthūṃ dassetvā tena samānagatikā vipassanā cāti iminā adhippāyenāha “**evaṃ uppannā samathavipassanā -pa- saṃvattantī**”ti.

**Tattha anuppannānanti** ettha tattha duvidhāya sammappadhānakathāya, **tattha** vā pāḷiyaṃ “anuppannānan”ti etassa ayaṃ vinicchayoti adhippāyo. **Eteyevāti** anamatagge saṃsāre uppannāyeva.

**Cuddasa mahāvattāni** khandhake vuttāni āgantuka-āvāsikagamika-anumodana- bhattaggapiṇḍacārika-āraññikasenaśanañāntāgharavaccakuṭi-ācariya-upajjhāyasaddhivihārika-antevāsikavattāni cuddasa. Tato aññāni pana kadāci tajjanīyakammakatādikāle pārivāsikādikāle ca caritabbāni dvāsīti khuddakavattānīti kathitāni daṭṭhabbāni. Na hi tāni sabbāsu avatthāsu caritabbāni, tasmā mahāvatte agaṇitāni. Tattha “pārivāsikānaṃ bhikkhūnaṃ vattaṃ paññāpessāmī”ti ārabhitvā “na upasampādetabbaṃ -pa- na chamāyaṃ caṅkamate caṅkame caṅkamitabbaṃ”ti<sup>1</sup> vuttāni pakatatte caritabbavattāvasenāni chasaṭṭhi, tato paraṃ “na bhikkhave pārivāsikena bhikkhunā pārivāsikavuḍḍhatarena bhikkhunā saddhim, mūlāyapaṭikassanārahena, mānattārahena, mānattacārikena, abbhānārahena bhikkhunā saddhim ekacchane āvāse vatthabbaṃ”ti-ādīni<sup>2</sup> pakatatte caritabbēhi anaññattā visūṃ visūṃ agaṇetvā pārivāsikavuḍḍhatarādīsū puggalantaresu caritabbattā tesāṃ vasena sampiṇḍetvā ekekaṃ katvā gaṇetabbāni pañcāti ekasattati vattāni, ukkhepanīyakammakatavattesu vattapaññāpanavasena vuttaṃ “na pakatattassa bhikkhuno abhivādanaṃ paccuṭṭhānaṃ -pa- nahāne piṭṭhiparikammaṃ sādītābaṃ”ti<sup>3</sup> idaṃ abhivādanādīnaṃ assādiyaṃ ekāṃ, “na pakatatto bhikkhu sīlavipattiyā anuddhamsetabbo”ti-ādīni<sup>4</sup> ca dasāti evaṃ dvāsīti hontī. Etesveva kānici tajjanīyakammakatādivattāni, kānici pārivāsikādivattānīti aggahitaggahaṇena dvāsītivattanti daṭṭhabbaṃ.

1. Vi 4. 83, 86 piṭṭhesu.

3. Vi 4. 82 piṭṭhe.

2. Vi 4. 86 piṭṭhe.

4. Vi 4. 52 piṭṭhe.

Idha vipākānubhavanavasena tadārammaṇaṃ, avipakkavipākassa sabbathā avigatatā bhavitvā vigatamattavasena kammaṅca “**bhutvā vigatuppannaṃ**”ti vuttaṃ, na **aṭṭhasālīniyaṃ**<sup>1</sup> viya rajjanādivasena anubhutvāpagataṃ javanaṃ, uppajjitvā niruddhatāvasena bhūtāpagatasāṅkhātaṃ sesasaṅkhataṅca “bhūtāpagatuppannaṃ”ti, tasmā idha okāsakatuppannaṃ vipākameva vadati, na tattha viya kammampīti. **Anusayitakilesā**ti appahīnā maggena pahātabbā adhippetā. Tenāha “**atītā vā -pa- na vattabbā**”ti. Tesaṅhi ambataruṇopamāya vattamānādītā na vattabbāti.

Āhatakhīrarukkho viya nimittaggāhavasena adhigataṃ ārammaṇaṃ, anāhatakhīrarukkho viya avikkhambhitatāya antogadhakilesaṃ ārammaṇaṃ daṭṭhabbaṃ, nimittaggāhakāvikkhambhitakilesā vā puggalā āhatānāhatakhīrarukkhasadisā. **Purimanayenevāti** avikkhambhituppanne vi “imasmiṃ nāma ṭhāne nuppajjissantīti na vattabbā asamugghāṭitattā”ti yojetvā vitthāretabbaṃ.

**Pāḷiyanti** paṭisambhidāpāḷiyaṃ<sup>2</sup>. Maggena pahīnakilesānameva tidhā navattabbataṃ apākaṭaṃ pākaṭaṃ kātum ajātaphalarukkho ābhato, atītādīnaṃ appahīnatādassanattampi “**jātaphalarukkheṇa dīpetabbaṃ**”ti āha. Tattha yathā acchinne rukkhe nibbattirahāni phalāni chinne anuppajjamānāni na kadāci sasabhāvāni ahesum honti bhavissanti cāti atītādibhāvena na vattabbāni, evaṃ maggena pahīnakilesā ca daṭṭhabbā. Yathā ca chede asati phalāni uppajjissanti, sati ca nuppajjissantīti chedassa sātthakatā, evaṃ maggabhāvanāya ca sātthakatā yojetabbā.

Suttantabhājanīyavaṇṇanā niṭṭhitā.

### 3. Pañhapucchakavaṇṇanā

427. Pañhapucchake yaṃ vuttaṃ “**vīriyajetṭhikāya pana aññassa vīriyassa abhāvā na vattabbāni maggādhipatīnīti vā na maggādhipatīnīti vā**”ti, ettha

1. Abhi-Ṭṭha 1. 109 piṭṭhe.

2. Khu 9. 394 piṭṭhe.

“maggādhipatīnī”ti na vattabbatāya eva aññassa vīriyassa abhāvo kāraṇanti daṭṭhabbam. Chandassa pana cittassa vā namaggabhūtaassa adhipatino tadā abhāvā “na maggādhipatīnī”ti na vattabbānīti vuttam. Chandacittānam viya namaggabhūtaassa aññassa vīriyādhipatino abhāvāti vā adhippāyo. Sammappadhānānam tadā maggasaṅkhāta-adhipatibhāvato vā “na maggādhipatīnī”ti navattabbatā vuttāti veditabbā.

Sammappadhānavibhaṅgavaṇṇanā niṭṭhitā.

## 9. Iddhipādavibhaṅga

### 1. Suttantabhājanīyavaṅṅanā

431. **Iddhi**-saddassa paṭhamo kattu-attho, dutiyo karaṇattho vutto, **pāda**-saddassa eko karaṇamevattho vutto. Pajjitabbāva iddhi vuttā, na ca ijjhantī pajjitabbā ca iddhi pajjanakaraṇena pādena samānādhikaraṇā hotīti “**paṭhamenatthena iddhi eva pādo iddhipādo**”ti na sakkā vattum, tathā iddhikiriyākaraṇena sādhetabbā ca vuddhisāṅkhātā iddhi pajjanakiriyākaraṇena pajjitabbāti dvinnam karaṇānam na asamānādhikaraṇatā sambhavatīti “**dutiyenatthena iddhiyā pādo iddhipādo**”ti ca na sakkā vattum, tasmā paṭhamenatthena iddhiyā pādo iddhipādo, dutiyenatthena iddhi eva pādo iddhipādoti evam yojanā yujjati.

“Chandam ce -pa- ayam vuccati chandasamādhī”ti imāya pāḷiyā chandādhīpati samādhī **chandasamādhī**ti adhipati-saddalopam katvā samāso vuttoti viññāyati, adhipati-saddatthadasanavasena pana “**chandahetuko chandādhiko vā samādhī chandasamādhī**”ti aṭṭhakathāyam vuttanti vedītabbam. **Padhānabhūtā**ti vīriyabhūtāti keci vadanti. Saṅkhatasaṅkhārādinivattanatthañhi padhānaggahaṇanti. Atha vā tam tam viṣeṣam saṅkharotīti **saṅkhāro**, sabbam vīriyam. Tattha catukiccasādhakato aññassa nivattanattham padhānaggahaṇanti **padhānabhūtā** seṭṭhabhūtāti attho. Catubbidhassa pana vīriyassa adhippetatā bahuvacananiddeso kato. **Adhiṭṭhānatthenā**ti duvidhatthāyapi iddhiyā adhiṭṭhānatthena. **Pādabhūtanti** iminā viṣum samāsayojanāvasena pana yo pubbe iddhipādattho pāda-saddassa upāyatthataṃ gahetvā yathāyutto vutto, so vakkhamānānam paṭilābhapubbabhāgānam kattukaraṇiddhibhāvaṃ, uttaracūḷabhājanīye vā vuttehi chandādīhi iddhipādehi sādhetabbāya iddhiyā kattiddhibhāvaṃ, chandādīnaṅca karaṇiddhibhāvaṃ sandhāya vuttoti vedītabbo.

Vīriyiddhipādaniddese “vīriyasamādhīpadhānasaṅkhārasamannāgatan”ti dvikkhattum vīriyam āgataṃ. Tattha purimaṃ samādhivīsesanam “vīriyādhipati samādhī vīriyasamādhī”ti, dutiyam samannāgamaṅgadassanam. Dveyeva hi sabbattha samannāgamaṅgāni samādhī padhānasaṅkhāro ca, chandādayo samādhivīsesanāni,

padhānasaṅkhāro pana padhānavacaneneva visesito, na chandādīhīti na idha viriyādhipatitā padhānasaṅkhārassa vuttā hoti. Vīriyañca samādhiṃ visesetvā ṭhitameva samannāgamaṅgavasena padhānasaṅkhāravacanena vuttanti nāpi dvīhi vīriyehi samannāgamo vutto hotīti. Yasmā pana chandādīhi visiṭṭho samādhi, tathā visiṭṭheneva ca tena sampayutto padhānasaṅkhāro sesadhammā ca, tasmā samādhivisesanānaṃ vasena cattāro iddhipādā vuttā. Visesanabhāvo ca chandhādīnaṃ taṃtaṃnavassayanavasena hotīti “**chandasaṃādhi -pa- iddhipādan**”ti ettha nissayatthepe pāda-sadde upāyatthena chandādīnaṃ iddhipādātā vuttā hoti. Teneva uttaracūḷabhājanīye “cattāro iddhipādā chandiddhipādo”ti-ādinā chandādīnameva iddhipādātā vuttā. Pañhapucchake ca “cattāro iddhipādā idha bhikkhu chandasamādhi”ti-ādināva<sup>1</sup> uddesaṃ katvāpi puna chandādīnaṃyeva kusalādibhāvo vibhattoti. Upāyiddhipādadassanattameva hi nissayiddhipādadassanaṃ kataṃ, aññathā catubbidhatā na hotīti ayamettha pālivasena atthavinicchayo veditabbo.

433. **Rathadhureti** rathassa purato. **Hīnajātiko** caṇḍālo upaṭṭhānādiguṇayogepi senāpatiṭṭhānādīni na labhatīti āha “**jātirī sodhetvā -pa- jātirī avassayati**”ti. **Amantaṇīyoti** hitāhitamantane na araho.

Raṭṭhapālatthero chande sati kathaṃ nānujānissantīti sattapi bhattāni abhuñjitvā mātāpitaro anujānāpetvā pabbajitvā chandameva avassāya lokuttaradhammaṃ nibbattesīti āha “**raṭṭhapālatthero viyā**”ti.

**Mogharājatthero** vīmaṃsaṃ avassayīti tassa bhagavā “suññato lokam avekkhassū”ti<sup>2</sup> suññatākathaṃ kathesi, paññānisitamānaniggahatthañca dvikkhattuṃ pucchito pañhaṃ na kathesi. Tattha punappunaṃ chanduppādanaṃ tosaṃ viya hotīti chandassa upaṭṭhānasadisatā vuttā, thāmabhāvato vīriyassa sūrattasadisatā, “chadvārādhipati rājā”ti<sup>3</sup> vacanato pubbaṅgamattā cittassa visiṭṭhajātisadisattā.

1. Abhi 2. 233 piṭṭhe. 2. Khu 1. 448 piṭṭhe. 3. Dhammapada-Ṭṭha 2. 150 piṭṭhe.

**Abhedatoti** chandādike tayo tayo dhamme sampiṇḍetvā, iddhi-iddhipāde amissetvā vā kathananti attho. Tattha chandavīriyādayo visesena ijjhanti etāyāti iddhīti vuccanti, ijjhatīti iddhīti avisesena samādhīpadhānasāṅkhārāpīti.

Chandiddhipādasamādhīddhipādādayo viṣiṭṭhā, pādo sabbiddhīnam sādharmaṇattā aviṣiṭṭho, tasmā viṣiṭṭhesveva pavesam avatvā aviṣiṭṭhe ca pavesam vatthum yuttanti dassetum sabbattha **“pāde patīṭṭhātipi vatthum vaṭṭati”**ti āha. **Tatthevāti** chandasamādhīpadhānasāṅkhāra-iddhipādesu, catūsu chandādikesvevāti attho. “Chandavato ko samādhi na ijjhissati”ti samādhībhāvanāmukhena bhāvitā samādhībhāvitā.

**Ettha panāti** bhedakathāyaṃ abhedakathanato abhinavaṃ natthīti attho. Ye hi tayo dhammā abhedakathāyaṃ iddhi-iddhipādotveva vuttā, te eva bhedakathāyaṃ iddhīpi honti iddhipādāpi, sesā iddhipādā evāti evaṃ abhinavābhāvaṃ dassento **“chando samādhi”**ti-ādimāha. **Ime hi tayo -pa- na vinā**, tasmā sesā sampayuttakā cattāro khandhā tesam tiṇṇam ijghanena iddhi nāma bhaveyyum, na attano sabhāvenāti te iddhipādā eva honti, na iddhīti evamidam purimassa kāraṇabhāvena vuttanti veditabham. Atha vā tiṇṇam iddhītā iddhipādātā ca vuttā, sesānaṃca iddhipādātāva, tam sabbam sādhetum **“ime hi tayo -pa- na vinā”**ti āha. Tena yasmā ijjhanti, tasmā iddhi. Ijhamānā ca yasmā sampayuttakehi saheva ijjhanti, na vinā, tasmā sampayuttakā iddhipādā, tadantogadhattā pana te tayo dhammā iddhipādāpi hontīti dasseti. Sampayuttakānampi pana khandhānam iddhībhāvaparīyāyo atthīti dassetum **“sampayuttakā panā”**ti-ādimāha. Catūsu khandhesu ekadesassa iddhītā, catunnampi “iddhiyā pādo iddhipādo”ti iminā atthena iddhipādātā, punapi catunnam khandhānam “iddhi eva pādo iddhipādo”ti iminā atthena iddhipādātā ca dassitā, na aññassāti katvā āha **“na aññassa kassaci adhivacanan”**ti. Iminā “iddhi nāma anipphannā”ti idam vadam paṭisedheti.

Paṭilābhappubbabhāgānam paṭilābhasseva ca iddhi-iddhipādātāvacaṇam apubbanti katvā pucchati **“kenatṭhena iddhi, kenatṭhena pādo”**ti. Paṭilābho

pubbabhāgo cāti vacanaseso. Upāyo ca upāyabhāveneva attano phalassa patiṭṭhā hotīti āha “**patiṭṭhānaṭṭheneva pādo**”ti. Chandoyeva -pa- vīmaṃsāva vīmaṃsiddhipādoti kathitaṃ, tasmā cattāro khandhā iddhiyā samānakālikā nānākkhaṇikā vā iddhipādā, jeṭṭhakabhūtā pana chandādayo eva sabbattha iddhipādāti ayameva tesam aṭṭhakathācariyānam adhippāyo. Suttantabhājanīye hi abhidhammabhājanīye ca samādhivisesanavasena dassitānam upāyabhūtānam iddhipādānam pākaṭakaraṇattham uttaracūlabhājanīyam vuttanti. **Kecīti** uttaravihāravāsitherā kira.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

444. Abhidhammabhājanīye “iddhipādoti tathābhūtassa phasso -pa- paggāho avikkhepo”ti<sup>1</sup> iddhi-iddhipādattadassanattham paggāhāvikkhepā vuttā, cittapañña ca saṅkhipitvāti. **Cattāri nayasahassāni vibhattānīti** idam sādhipativārānam paripuṇṇānam abhāvā vicāretabbam. Na hi adhipatīnam adhipatayo vijjanti, ekekasmim pana iddhipādaniddese ekeko adhipativāro labbhatīti soḷasa soḷasa nayasatāni labbhanti.

Abhidhammabhājanīyavaṇṇanā niṭṭhitā.

## 3. Pañhapucchakavaṇṇanā

Nanu ca cattāropi adhipatayo ekakkhaṇe labbhanti, aññaamaññaṃ pana adhipatayo na bhavanti “cattāro iddhipādā na maggādhipatino”ti<sup>2</sup> vuttattā. Rājaputtopamāpi hi etamattham dīpetīti? Na, ekakkhaṇe dutiyassa adhipatino abhāvato eva, “na maggādhipatino”ti vuttattā rājaputtopamā adhipatim na karontīti imamevattham dīpeti, na adhipatīnam sahabhāvaṃ. Tam katham jānitabbanti? Paṭikkhittattā.

1. Abhi 2. 230 piṭṭhe.

2. Abhi-Ṭṭha 3. 360 piṭṭhe.



Adhipatipaccayaniddese hi **aṭṭhakathāyaṃ**<sup>1</sup> vuttā “kasmā pana yathā hetupaccayaniddese ‘hetū hetusampayuttakānan’ti vuttaṃ, evamidha ‘adhipatī adhipatisampayuttakānan’ti avatvā ‘chandādhipati chandasampayuttakānan’ti-ādinā nayena desanā katāti? Ekakkhaṇe abhāvato”ti. Sati ca catunnaṃ adhipatīnaṃ sahabhāve “ariyamaggasamaṅgissa vīmaṃsādhipeteyyaṃ maggaṃ bhāventassā”ti visesanā na kattabbaṃ siyā avīmaṃsādhipatīkassa maggassa abhāvā. Chandādīnaṃ aññamaññādhipatikaraṇabhāve ca “vīmaṃsaṃ ṭhapetvā taṃsampayutto”ti-ādinā chandādīnaṃ vīmaṃsādhipatikattavacanānaṃ na vattabbaṃ siyā. Tathā “cattāro ariyamaggā siyā maggādhipatino, siyā na vattabbā maggādhipatino”ti<sup>2</sup> evamādīhipi adhipatīnaṃ sahabhāvo paṭikkhitto evāti.

Iddhipādavibhaṅgavaṇṇanā niṭṭhitā.

---

1. Abhi-Ṭṭha 3. 360 piṭṭhe.

2. Abhi 1. 272 piṭṭhe.

## 10. Bojjhaṅgavibhaṅga

### 1. Suttantabhājanīya

#### Paṭhamanayavaṇṇanā

466. **Paṭiṭṭhānāyūhanā** oghataraṇasuttavaṇṇanāyam<sup>1</sup>—

“Kilesavasena paṭiṭṭhānaṃ, abhisāṅkhārasena āyūhanā. Tathā taṇhādiṭṭhīhi paṭiṭṭhānaṃ, avasesakilesābhisāṅkhārehi āyūhanā. Taṇhāvasena paṭiṭṭhānaṃ, diṭṭhivasena āyūhanā. Sassatadiṭṭhiyā paṭiṭṭhānaṃ, ucchedadiṭṭhiyā āyūhanā. Līnavasena paṭiṭṭhānaṃ, uddhaccavasena āyūhanā. Kāmasukhānuyogavasena paṭiṭṭhānaṃ, attakilamathānuyogavasena āyūhanā. Sabbākusalābhisāṅkhārasena paṭiṭṭhānaṃ, sabbalokiyakusalābhisāṅkhārasena āyūhanā”ti—

vuttesu pakāresu idha avuttānaṃ vasena veditabbo.

Sammappavatte dhamme paṭisañcikkhati, upapattito ikkhati, tadākāro hutvā pavattatīti **paṭisañkhānalakkhaṇo upekkhāsambojjhaṅgo**. Evañca katvā “paṭisañkhā santiṭṭhanā gahaṇe majjhataṭā”ti upekkhākiccādhimattatāya sañkhārupekkhā vuttā. Anukkamanikkhepe payojanaṃ purimassa purimassa pacchimapacchimakāraṇabhāvo.

467. Balavatī eva sati satisambojjhaṅgoti katvā balavabhāvadīpanatthaṃ paññā gahitā, na yassa kassaci sampadhāraṇasati, kusaluppattikāraṇassa pana saraṇaṃ satīti dassento “**vatthaṃ vā**”ti-ādimāha. **Vattasīse thatvāti** “aho vata me dhammaṃ suṇeyyūṃ, sutvā ca dhammaṃ pasīdeyyūṃ, pasannā ca me pasannākāraṃ kareyyūṃ”ti evaṃcitto ahutvā “svākkhāto bhagavatā dhammo -pa- viññūhi, aho vata me dhammaṃ suṇeyyūṃ, sutvā ca dhammaṃ ājāneyyūṃ, ājānitvā ca pana tathatthāya paṭipajjeyyūṃ”ti dhammasudhammataṃ paṭicca kāruṇṇaṃ anuddayaṃ anukampaṃ upādāya mahākassapattherena viya bhāsitanti attho. **Vimuttāyatanasīseti** “na heva

---

1. Sam-Ṭṭha 1. 18 piṭṭhe.

kho satthā, apica kho yathāsutaṃ yathāpariyattaṃ dhammaṃ vitthārena paresaṃ desessāmi”ti evaṃ vimuttikāraṇapadhānabhāve ṭhatvā. Cirakatavattādivasena taṃsamuṭṭhāpako arūpakoṭṭhāso vutto, bhāvatthattā eva vā katabhāsita-saddā kiriyābhūtassa arūpakoṭṭhāsassa vācakāti katvā āha “kāyaviññattim -pa- koṭṭhāsan”ti.

**Bojjhaṅgasamuṭṭhāpakatā** purimānaṃ channaṃ attano attano anantarikassa, paresaṃ sabbesaṃ vā taṃtampariyāyena samuṭṭhāpanavasena yojetabbo. **Kāmalokavattāmisāti** taṃhā tadārammaṇā khandhāti vadanti, pañcakāmaguṇiko ca rāgo tadārammaṇaṅca **kāmāmisāṃ**, “sassato attā ca loko cā”ti-ādinā lokaggahaṇavasena pavatto sassatucchedasahagato rāgo tadārammaṇaṅca **lokāmisāṃ**, lakadhammā vā, vaṭṭassādavasena uppanno saṃsārajanako rāgo tadārammaṇaṅca **vaṭṭāmisāṃ**. Maggassa pubbabhāgattā **pubbabhāgā**.

Paṭhamanayavaṇṇanā niṭṭhitā.

### Dutyanayavaṇṇanā

468-469. **Abhiññeyyā dhammā** nāma “sabbe sattā āhāraṭṭhitikā, dve dhātuyo, tisso dhātuyo, cattāri ariyasaccāni, pañca vimuttāyatanāni, cha anuttariyāni, satta niddasavatthūni, aṭṭhābhībhāyatanāni, navānupubbavihārā, dasa nijjaravatthūni”ti evambhedā dhammā, “sabbaṃ bhikkhave abhiññeyyan”ti<sup>1</sup> dassitā khandhādayo ca. **Vānanti** vinandhanaṃ bhavādināṃ, gamanaṃ vā piyarūpasātarūpesu.

**Caṅkamaṃ adhiṭṭhahantassa uppannavīriyaṃ** vipassanāsahagatanti veditabbaṃ. **Ettakenāti** “lokiyalokuttaramissakā kathitā”ti ettāvata. **Lokiyanti vadanto na kilamatīti** kāyaviññattisamuṭṭhāpakassa lokiyattā acodaṇīyoti attho. **Alabbha -pa- paṭikkhittāti** rūpāvacare alabbhamānaṃ pītisambojjhaṅgaṃ upādāya labbhamānāpi avitakka-avicārā pīti paṭikkhittā, “pītisambojjhaṅgo”ti na vuttoti attho.

1. Saṃ 2. 258 piṭṭhe.

Kāmāvacare vā alabbhamānakaṃ avitakka-avicāraṃ pītiṃ upādāya labbhamānakāva pītibojjhaṅgabhūtā paṭikkhittā, avitakka-avicāro pītisambojjhaṅgo na vuttoti attho.

**Ajjhattavimokkhanti** ajjhattadhamme abhinivisitvā tato vuṭṭhitamaggo “ajjhattavimokkho”ti idha vuttoti adhippāyo. **Na vāretabboti** vipassanāpādakesu kasiṇādi jhānesu sati-ādīnaṃ nibbedhabhāgiyattā na paṭikkhipitabboti attho. Anuddharantā pana vipassanā viya bodhiyā maggassa āsannakāraṇaṃ jhānaṃ na hoti, na ca tathā ekantikaṃ kāraṇaṃ, na ca vipassanākiccassa viya jhānakiccassa niṭṭhānaṃ maggoti katvā na uddharanti. Tattha kasiṇajjhānaggahaṇena tadāyattāni āruppānīpi gahitānīti daṭṭhabbāni. Asubhajjhānānaṃ avacanaṃ avitakkāvicārassa adhippetattā.

Dutiyanayavaṇṇanā niṭṭhitā.

### Tatiyanayavaṇṇanā

470-471. Tadaṅgasamucchedanissaraṇavivekanissitataṃ vatvā paṭippassaddhivivekanissitattassa avacanaṃ “satisambojjhaṅgaṃ bhāvetī”ti-ādīnā<sup>1</sup> idha bhāvetabbānaṃ bojjhaṅgānaṃ vuttattā. Bhāvitabojjhaṅgassa hi sacchikātabbā phalabojjhaṅgā abhidhamabhājanīye vuttāti. Vossaggasaddo pariccāgattho pakkhandanattho cāti vossaggassa duvidhatā vuttā. **Yathāvuttenāti** tadaṅgasamucchedappakārena tanninnabhāvārammaṇakaraṇappakārena ca. **Pariṇāmentaṃ** vipassanākkhaṇe, **pariṇataṃ** maggakkhaṇe.

Suttantabhājanīyavaṇṇanā niṭṭhitā.

---

1. Saṃ 3. 58; Abhi 2. 238 piṭṭhesu.

## 2. Abhidhammabhājanīyavaṇṇanā

472. **Upekkhanavasenā**ti sabhāvaniddesataṃ dasseti, hāpanavaḍḍhanesu byāpāraṃ akatvā upapattito ikkhanavasenāti attho. **Lokiya-upekkhanāya adhikā upekkhanā ajjupekkhanā**ti ayamattho idha lokuttarā eva adhippetāti yuttoti.

Abhidhammabhājanīyavaṇṇanā niṭṭhitā.

Bojjhaṅgavibhaṅgavaṇṇanā niṭṭhitā.

# 11. Maggaṅgavibhaṅga

## 2. Abhidhammabhājanīyavaṇṇanā

490. Abhidhamme lokuttaracittabhājanīyepi “tasmiṃ kho pana samaye cattāro khandhā honti -pa- aṭṭhaṅgiko maggo hotī”<sup>1</sup>ti vuttattā idhāpi abhidhammabhājanīye abhidhammānurūpaṃ desanaṃ karonto “aṭṭhaṅgiko maggo”ti ariyopapadataṃ na karoti.

493. **Tasmiṃ samayeti** lokiyakālena etesaṃ atirekakiccaṃ dasseti. Virati-uppādanena micchāvācādīni puggalaṃ pajahāpentīti sammādiṭṭhādīni pañca “**kārāpakaṅgānī**”ti vuttāni. Sammāvācādīkiriya hi virati, tañca etāni kārapentīti. **Virativasenāti** viraṃaṅkiriya vasena, na kārapakabhāvena kattubhāvena cāti attho. **Imaṃ -pa- kiccātirekataṃ dassetunti** lokuttarakkhaṇepi imāneva pañca sammāvācādittayassa ekakkhaṇe kārapakānīti dassetunti attho. Micchādiṭṭhādīkā dasa, tappaccayā akusalā ca dasāti vīsati akusalapakkhiyā, sammādiṭṭhādīkā dasa, tappaccayā ca kusalā dasāti vīsati kusalapakkhiyā ca mahācattārīsakassutte<sup>2</sup> vuttāti tassa etaṃ nāmaṃ.

**Puññabhāgiyāti** puññakoṭṭhāse bhavā, puññābhisaṅkhārekadesabhūtāti attho. Khandhopadhiṃ vipaccati, tattha vā vipaccatīti **upadhivepakkā**.

Pañcaṅgikamaggaṃ uddisitvā tattha ekekaṃ pucchitvā tassa tasseva samayavavattānaṃ katvā vissajjanaṃ “**pāṭiyekkaṃ pucchitvā pāṭiyekkaṃ vissajjanaṃ**”ti vuttaṃ. Saha pana pucchitvā pañcannampi samayavavattānaṃ katvā vissajjane “tattha katamā sammādiṭṭhiyā paññā”ti-ādiko paṭiniddeso ekato vissajjanapaṭiniddesattā na pāṭiyekkaṃ pucchāvissajjanaṃ nāma hotīti. Tattha pañcaṅgikavāre eva pāṭiyekkaṃ pucchāvissajjanaṃ sammādiṭṭhādīsu kārapakaṅgesu ekekamukhāya bhāvanāya magguppattim sandhāya katanti veditabbaṃ. Vācādīni hi pubbasuddhiyā sijjhanti, na maggassa upacārenāti.

Abhidhammabhājanīyavaṇṇanā niṭṭhitā.

Maggaṅgavibhaṅgavaṇṇanā niṭṭhitā.

1. Abhi 1. 82 piṭṭhe.

2. Ma 3. 116 piṭṭhe.

## 12. Jhānavibhaṅga

### 1. Suttantabhājanīya

#### Mātikāvaṇṇanā

508. Jhānassa **pubbabhāgakarāṇīyasampadā** pātimokkhasamvarādi. Asubhānussatiyo lokuttarajjhānāni ca ito bahiddhā natthīti **sabbappakāra-**ggahaṇam karoti, **suññā parappavādā samaṇebhīti**<sup>1</sup> vacanena samaṇabhāvakarapubbabhāgakarāṇīyasampadāsampannassapi abhāvaṃ dasseti. Sikkhāpadesu nāmakāyādivasena vuttetu vacanānatikkamavasena sikkhitabbesu, avītikkamanaviraticetanāsankhātesu vā sikkhākoṭṭhāsesu paripūraṇavasena sikkhitabbesu sā sā bhikkhusikkhādikā sikkhāpadekadesabhūtā sikkhitabbāti āha “**sikkhāpadesūti idamassa sikkhitabbadhammaparidīpanan**”ti.

**Santosādi**vasena itarītarasantosaṃ, tassa ca vaṇṇavāditaṃ, aladdhā ca aparitassanaṃ, laddhā ca agadhitaparibhoganti ete guṇe dasseti. Jhānabhāvanāya kārakoti paridīpanaṃ **kārahāvanāparidīpanaṃ**. Araññanti-ādinā senāsanassa pabhedam, **appasaddanti-ādinā** nirādīnavataṃ, **paṭisallānasārūppanti** ānisaṃsaṃ dīpetīti āha “**senāsanappabhede -pa-**paridīpanan”ti.

Mātikāvaṇṇanā niṭṭhitā.

#### Niddesavaṇṇanā

509. Kammatthehi diṭṭhi-saddādīhi sāsanaṃ vuttanti “**diṭṭhattā diṭṭhī**”ti-ādi vuttaṃ. **Sabhāvatṭhenā**ti aviparītaṭṭhena. Sikkhiyamāno kāyādīni vineti, na aññathāti āha “**sikkhitabbatṭhena vinayo**”ti, vinayo vā

---

1. Ma 1. 92; Am 1. 560 piṭṭhesu.

sikkhitabbāni sikkhāpadāni, khandhattayaṃ sikkhitabbhanti vinayo viyāti vinayoti dasseti. Satthu anusāsanadānabhūtaṃ sikkhattayanti āha “**anusīṭṭhidānavasenā**”ti.

**Sammādiṭṭhipaccayāttā**ti sammādiṭṭhiyā paccayattā. Tisso hi sikkhā sikkhantassa sammādiṭṭhi paripūrātīti. “Tasmā tiha tvaṃ bhikkhu ādimeva visodhehi kusalesu dhammesu, ko cādi kusalānaṃ dhammānaṃ? Sīlañca suvisuddhaṃ diṭṭhi ca ujukā”ti vacanato<sup>1</sup> sammādiṭṭhipubbaṅgamaṃ sikkhattayaṃ. Etasmiñca atthadvaye phalakāraṇopacārehi sikkhattayaṃ “diṭṭhi”ti vuttaṃ, kusaladhammehi vā attano ekadesabhūtehīti adhippāyo. Bhagavato vinayanakiriyattā vinayo sikkhattayaṃ, taṃ pana vinayanaṃ dhammeneva avisamasabhāvena, desanādhammena vā pavattaṃ, na daṇḍādināti “**dhammavinayo**”ti vuttaṃ.

**Anavajjadhammatthanti** paramānavajjanibbānattham, akuppacetovimutti-attham vā. Dhammesu abhiññeyyādīsu abhijānanādikāraṇaṃ sikkhattayanti taṃ “**dhammavinayo**”ti vuttaṃ. “Imissā imasmin”ti punappunaṃ vuccamānaṃ niyamakaraṇaṃ hoti, **eva-saddalopo** vā katoti adhippāyenāha “**niyamo kato**”ti.

510. **Bhikkhukoti** anaññatthena **ka-kārena** padaṃ vaḍḍhitanti “**bhikkhanadhammatāyā**”ti atthamāha. **Bhikkhakoti** pana paṭhe bhikkhatīti bhikkhakoti attho. **Jallikaṃ** rajamissaṃ malaṃ, amissaṃ **malameva**. **Bhinnapaṭadharoti** nibbacanaṃ bhinnapaṭadhare bhikkhu-saddassa niruḷhattā vuttaṃ.

Yassa bhāvetabbo pahātabbo ca odhi avasiṭṭho atthi, so odhiso, arahā pana tadabhāvā odhirahitoti “**anodhiso kilesānaṃ pahānā bhikkhū**”ti vutto. Odhi-saddo vā ekadesa niruḷhoti sabbamaggā sabbakilesā ca arahatā bhāvitā pahīnā ca “odhī”ti na vuccanti. **Pahānāti** idañca nibbacanaṃ bhedanapariyāyavasena vuttanti vedītabbaṃ.

---

1. Saṃ 3. 124 piṭṭhe.



**Sekkhoti**-ādinā bhikkhu-saddena vuccamānaṃ atthaṃ guṇavasena dasseti, heṭṭhā pana “samaññāya paṭiññāyā”ti paññāyanavasena, “bhikkhatī”ti-ādinā nibbacanavasena dassito.

**Sekkho bhikkhūti satta sekkhā kathitā, bhinnattā pāpakānaṃ -pa-bhikkhūti khīṇāsavova kathitoti** idaṃ dvayaṃ “sekkhoti puthujjanakalyāṇakena saddhiṃ satta ariyā, bhinnattāti iminā pana cattāro phalattā”ti iminā dvayena na sameti, tadidaṃ nippariyāyadassanaṃ vuttanti vedittabbaṃ. “**Sesatthānesu puthujjanakalyāṇakādayo kathitā**”ti vuttaṃ, nanu paṭiññāya bhikkhusīlopi vuttoti? Vutto, na pana idhādhippeto sabbappakārajjhānanibbattakassa adhippetattā.

Bhagavato vacanaṃ upasampadākammakaraṇassa kāraṇattā ṭhānaṃ, tadanurūpaṃ **ṭhānārahaṃ**, anūnañatti-anussāvanaṃ uppaṭipāṭiyā ca avuttanti attho.

511. **Nippariyāyato sīlaṃ** samādānavirati-avītikkamanaviratibhāvatoti adhippāyo. Anabhijjhādīni sandhāya cetasikasīlassa pariyāyasīlatā vuttā. **Nagaravaḍḍhakī** vatthuvijjācariyoti vadanti. **Catubbidho āhāro** asitādīni, bhakkhitabbabhuñjitabbalesitabbacubitabbāni vā.

**Pātimokkhasaṃvarena upeto** pihitindriyo hoti tiṇṇaṃ sucaritānaṃ indriyasaṃvarāhārattā, pātimokkhasaṃvaro vā indriyasaṃvarassa upanissayo hoti. Iti pātimokkhasaṃvarena pihitindriyo “pātimokkhasaṃvarasaṃvuto”ti vutto. Iminā adhippāyena “saṃvuto”ti etassa pihitindriyoti atthamāha. **Pātimokkhena ca saṃvarena cāti** idaṃ pātimokkhato aññaṃ sīlaṃ kāyika-avītikkamādiggahaṇena gahitanti iminā adhippāyena vuttanti daṭṭhabbaṃ. Dutiyo panattho dvinnampi ekatthataṃ sandhāya vutto.

513. **Sabbampi dussīlyanti** iminā abhijjhādayo ca gahitāti sandhāyāha “**manasāpi ācarati eva, tasmā taṃ dassetun**”ti. **Tatthāti** kāyikavītikkamādivasena vuttetu anācāresu. **Garubhaṇḍavissajjanamāpajjatī** thullaccayaṃ āpajjatī attho.

**Aropimoti** saṅghikabhūmiyaṃ uṭṭhito vutto. **Phātikammanti** garubhaṅḍantarabhūtaṃ kammaṃ. **Daṇḍakammanti** yathāvuttaṃ hatthakammamāha. Sināyanti etenāti **sinānaṃ**, cuṇṇādi.

Saccālikena piyavādī “cāṭū”ti vuccati, cāṭum attānaṃ icchatīti cāṭukāmo, tassa bhāvo **cāṭukamyatā**. **Muggasūpassa appavisanatṭhānaṃ nāma natthi** sabbāhārehi aviruddhattāti adhippāyo. Paribhaṭati dhāreti, poseti vāti **paribhaṭo**, atha vā parivārabhūto bhaṭo sevako **paribhaṭo**.

**Bhaṇḍāgārikakammaṃ** gihīnaṃ kariyamānaṃ vuttaṃ. Piṇḍatthaṃ paṭipiṇḍadānaṃ, piṇḍaṃ datvā paṭipiṇḍaggahaṇaṃ vā **paṇḍapaṭipiṇḍaṃ**. Saṅghabhogacetiyabhogānaṃ ayoniso vicāraṇaṃ **saṅghuppādacetiyuppādapaṭṭhapanam**, attano santake viya paṭipajjananti keci.

514. Gāvo caranti etthāti gocaro, gocaro viyāti **gocaro**, abhiṇhaṃ caritabbaṭṭhānaṃ. Gāvo vā cakkhādīni indriyāni, tehi caritabbaṭṭhānaṃ **gocaro**. Ayutto gocaro **agocaroti** tadañño yutto “gocaro”ti vutto.

Vā-saddo vidhunanatthopi hotīti katvā āha “**viniddhutakibbisāniva**”ti.

515. Avarā pacchimā mattā etesanti **oramattakāni**. **Saṃyamakaraṇīyāni**ti kāyavācāsaṃyamamattena kattabbapaṭikammāni, vikkhipitabbāni vā. “Puna na evaṃ karomī”ti cittaena saṃvaramattena, indriyasamvareneva vā karaṇīyāni **saṃvarakaraṇīyāni**. Divivihārajanapadavāsī **divivihāravāsī**. Manassa adhiṭṭhānameva **adhiṭṭhānāvikkammaṃ**. Desanā idha “**vuṭṭhānāvikkammaṃ**”ti adhippetā. Tattha “cittuppādakaraṇīyāni manasikārapaṭibaddhāni”ti vacanato paṭimokkhasaṃvaravisuddhatthaṃ anatikkamaṇīyāni anāpattigamaṇīyāni vajjāni vuttānīti ācariyassa adhippāyo. **Catubbidhassāti** attānuvādaparānuvādadaṇḍaduggatibhayassa.

516. “Idha bhikkhū”ti bhikkhu eva adhippetoti sandhāya “**sesasikkhā pana atthuddhārasena sikkhā-saddassa atthadassanattaṃ vuttā**”ti āha.

Bhikkhuggahaṇaṃ pana aggaparisāmukhena sabbajjhānanibbattakānaṃ catunnampi parisānaṃ dassanatthaṃ kataṃ. Guṇato vā bhikkhu adhippetoti sabbāpi sikkhā idhādhippetāti daṭṭhabbā. **Sabbena sikkhāsamādānenāti** ettha yena samādānena sabbāpi sikkhā samādinnā honti, taṃ ekampi sabbasamādānakiccarattā sabbasamādānaṃ nāma hoti, anekesu pana vattabbameva natthi. **Sabbena sikkhitabbākārenāti** avītikkamadesanāvuttjhānavattacaraṇādi-ākārena. Vītikkamanavasena sesassapi nissesatākaraṇaṃ sandhāya “**bhinnassapī**”ti-ādimāha.

519. Āvaraṇīyehi cittaparisodhanabhāvanā jāgariyānuyogoti katvā āha “**bhāvanan**”ti. **Suppariggāhakanti** “suppariggāhakaṃ nāma idaṃ ito pubbe ito parañca natthi, ayametassa paccayo”ti-ādinā pariggāhakaṃ.

520-521. **Yuttoti** ārambhamāno. Sātaccam nepakkañca pavattayamāno jāgariyānuyogaṃ anuyutto hotīti sambhandham dasseti.

522. **Lokiyāyapi -pa- āhāti** idaṃ vipassanābhāvanāya satipaṭṭhānādayo ekasmiṃ ārammaṇe saha nappavattanti, pavattamānānīpi indriyabalāni bojjhaṅgesveva antogadhāni honti. Pītisambojjhaṅgaggahaṇena hi tadupanissayabhūtaṃ saddhindriyaṃ, saddhābalañca gahitameva hoti “saddhūpanisaṃ pāmojjan”ti<sup>1</sup> vuttattā. Maggaṅgāni pañceva vipassanākkhaṇe pavattantīti imamatthaṃ sandhāya vuttanti daṭṭhabbāṃ.

523. Samantato, sammā, samaṃ vā sātthakādipajānanam sampajānam tadeva **sampajaññaṃ**. **Tenāti** satisampayuttattā eva uddese avuttāpi sati niddese “sato”ti iminā vuttāti adhippāyo.

Sātthakānaṃ abhikkamādīnaṃ sampajānanam **sātthakasampajaññaṃ**. Evaṃ **sappāyasampajaññaṃ**. Abhikkamādīsu pana bhikkhācāragocare aññatthāpi ca pavatthesu avijahite kammaṭṭhānasaṅkhāte gocare sampajaññaṃ **gocarasampajaññaṃ**. Abhikkamādīsu asammuyhanameva sampajaññaṃ **sammohasampajaññaṃ**.

---

1. Saṃ 1. 269 piṭṭhe.

**Dve kathāti** vacanakaraṇākaraṇakathā na kathitapubbā. Vacanaṃ karomi eva, tasmā subbacattā paṭivacanaṃ demīti attho.

**Kammaṭṭhānasīsenevāti** kammaṭṭhānaggeneva, kammaṭṭhānaṃ padhānaṃ katvā evāti attho. Tena “pattampi acetanaṃ”ti-ādinā vakkhamānaṃ kammaṭṭhānaṃ, yathāparihariyamānaṃ vā avijahitvāti dasseti. “Tasmā”ti etassa “dhammakathā kathetabbāyevāti vadanti”ti etena sambandho. **Bhayeti** paracakkādibhaye.

**Avasesaṭṭhāneti** yāgu-aggahitaṭṭhāne. **Ṭhānacaṅkamaṇamevāti** adhiṭṭhātabbiriyaṭṭhāvasena vuttaṃ, na bhojanādikāle avassaṃ kattabbanisajjāyapi paṭikkhepavasena.

**Thero dārucīriyo—**

“Tasmā tiha te bāhiya evaṃ sikkhitabbaṃ. Diṭṭhe diṭṭhamattaṃ bhavissati, sute mute viññāte. Yato kho te bāhiya diṭṭhe diṭṭhamattaṃ bhavissati, sute mute viññāte viññātamattaṃ bhavissati, tato tvaṃ bāhiya na tena, yato tvaṃ bāhiya na tena. Tato tvaṃ bāhiya na tattha, yato tvaṃ bāhiya na tattha. Tato tvaṃ bāhiya nevidha na hurāṃ na ubhayamantarena. Esevanto dukkhassā”ti<sup>1</sup>—

ettakena arahattaṃ sacchākāsi.

Khāṇu-ādipariharaṇattham, patiṭṭhitapādapariharaṇattham vā passena haraṇam **vītiharaṇanti** vadanti. Yāva patiṭṭhitapādo, tāva āharaṇam **atiharaṇam**, tato param haraṇam **vītiharaṇanti** ayam vā etesaṃ viseso. **Avīcinti** nirantaram.

**Paṭhamajavanepi -pa- na hotīti** idaṃ pañcaviññāṇavīthiyam itthipurisoti rajjanādīnaṃ abhāvaṃ sandhāya vuttaṃ. Tattha hi āvajjanavoṭṭhabbanānaṃ ayoniso āvajjanavoṭṭhabbanavasena iṭṭhe itthirūpādīmhi lobho, aniṭṭhe ca paṭigho uppajjati. Manodvāre pana itthipurisoti rajjanādi hoti,

---

1. Khu 1. 85 piṭṭhe Udāne.

tassa pañcadvāra javanaṃ mūlaṃ, yathāvuttaṃ vā sabbaṃ bhavaṅgādi. Evaṃ manodvāra javanaṃ mūlavasena **mūlapariññā** vuttā. **Āgantukatāvakālikatā** pana pañcadvāra javanaṃseva apubbatittaratāvasena. **Maṇisappo** sihaḷadīpe vijjamaṇā ekā sappajātīti vadanti. **Calananti** kampanaṃ.

**Atiharatīti** yāva mukhā āharati. **Vītiharatīti** tato yāva kucchi, tāva harati, kucchigataṃ vā passato harati. **Allattañca anupāletīti** vāyu-ādīhi ativisosanaṃ yathā na hoti, tathā pāleti. **Ābhujatīti** pariyesanajjhoharaṇajjīṇṇajjīṇṇatādīṃ āvajjeti, vijānātīti attho. Taṃtaṃvijānananipphādakoyeva hi payogo “**sammāpayogo**”ti vuttoti. Atha vā “sammāpaṭipattimāgama abbhantare attā nāma koci bhujanako natthī”ti-ādīnā vijānanaṃ **ābhujanaṃ**.

**Aṭṭhāneti** manussāmanussapariggahite ayutte ṭhāne khettadevāyatanādīke. **Tumbato** veḷunāḷi-ādī-udakabhājanato. **Tanti** chaḍḍitaṃ udakaṃ.

**Gateti gamaneti** pubbe abhikkamaṭṭikkamaggahaṇena gamanepi purato pacchato ca kāyassa atiharaṇaṃ vuttanti idha gamanameva gahitanti veditabbaṃ, vakkhamāno vā etesaṃ viseso.

**Ettakenāti** kammaṭṭhānaṃ avissejjetvā catunnaṃ iriyāpathānaṃ pavattanavacanamaṭṭena gocarasampajaññaṃ na pākaṭaṃ hotīti attho. **Evaṃ pana sutte kammaṭṭhānaṃ avibhūtaṃ hotīti** caṅkamaṇaṭṭhānanisajjāsu eva pavatte pariggaṇhantassa sutte pavattā apākaṭā hotīti attho.

Kāyādikiriyāmayattā āvajjanakiriyāsamuṭṭhitattā ca javanaṃ, sabbampi vā chadvārapavattaṃ **kiriyāmayapavattaṃ** nāma, dutiyajjhānaṃ vacīsāṅkhāravirahā “tuṅhībhāvo”ti vuccati.

526. **Upāsanaṭṭhānanti** issāsānaṃ viya upāsanaṃ sikkhāyogakaraṇassa kammaṭṭhāna-upāsanaṃ ṭhānanti attho. Tameva hi atthaṃ dassetuṃ “**yogapathan**”ti āhāti. **Sīsaṃ dhovatīti** icchādāsabyā bhujissataṃ nāpayati, micchāpaṭipannehi vā pakkhittaṃ ayasaraṇaṃ dhovati.

529. **Vinayapariyāyena** adinnādānapārājike āgataṃ. **Suttantapariyāyena** āraññakasikkhāpade “pañcadhanusatikaṃ pacchiman”ti āgataṃ āraññikaṃ bhikkhuṃ sandhāya. Na hi so vinayapariyāyike araññe vasanato “āraññako pantasenāsano”ti sutte vuttoti.

530. “**Nitumban**”tipi “**nadīkuñjan**”tipi **yam vadanti**, taṃ kandaranti apabbatapadesepi vidugganadīnivattanapadesaṃ **kandaranti** dasseti.

531. **Bhājetvā dassitanti** etena bhājetabbaṃ ante niddesassa kāraṇaṃ dasseti.

533. Rahassa kiriyā rahassaṃ, taṃ arahati tassa yogganti **rāhasseyyakaṃ**. Vicittā hi taddhitāti. Rahasi vā sādhu rahassaṃ, tassa yoggaṃ **rāhasseyyakaṃ**.

536. **Pañhitoti** suṭṭhu ṭhapito.

537. **Pariggahitaniyyānanti** pariggahitaniyyānasabhāvaṃ, kāyādīsu suṭṭhu pavattiyā niyyānasabhāvayuttanti attho. Kāyādipariggahaṇaṃ, ñāṇaṃ vā pariggaho, taṃ sampayuttatāya pariggahitaṃ niyyānabhūtaṃ upaṭṭhānaṃ katvāti attho.

542-543. **Vikārapattiyāti** cittassa vikārapattibhāvenāti attho. **Sabbasaṅgāhikavasenāti** sattaśaṅkhāragatasabbakodhasaṅgāhikavasena. Sabbasaṅgahaṇaṇca samuccheda ppahānassapi adhippetattā katanti veditabbam.

546. **Idaṃ sandhāyāti** “dve dhammā”ti sandhāya. Ekavacanena “thinamiddhan”ti uddisitvāpi niddese “santā”ti **vacanabhedo**, bahuvacanaṃ katanti attho. **Nirodhasantatāyāti** vacanaṃ aṅgasantatāya, sabhāvasantatāya vā santatānivāraṇatthaṃ.

550. Thinamiddhavikāravirahā tappaṭipakkhasaññā **ālokasaññā** nāma hoti. Teneva vuttaṃ “ayaṃ saññā ālokā hoti”ti.

553. “Vantattā muttattā”ti-ādīni, “ālokā hoti”ti-ādīni ca “**cattattāti-ādīni**”ti vuttāni. **Ādi**-saddena vā dvinnampi

niddesapadāni saṅgahetvā tattha yāni yesaṃ vevacanāni, tāneva sandhāya “**aññamaññavevacanāni**”ti vuttanti daṭṭhabbaṃ. **Paṭimuñcatoti** etena sārambhaṃ abhibhavaṃ dasseti. Nirāvaraṇā hutvā ābhujati sampajānātīti **nirāvaraṇābhogā**, taṃsabhāvattā **vivaṭā**.

556. “Vikālo nu kho, na nu kho”ti anicchayatāya katavatthujjhācāramūlako vipphaṭṭisāro **vatthujjhācāro** kāraṇavohārena vuttoti daṭṭhabbo.

562. **Kilissanti**ti kilesenti atthaṃ vadanti, sadarathabhāvena sayameva vā kilissanti. Na hi te uppajjamānā kilesarahitā uppajjanti.

564. **Idheva** ca vibhaṅge “upeto hotī”ti-ādi **tattha tattha vuttameva**.

588. **Niddesavasenāti** “tattha katamā upekkhā? Yā upekkhā”ti-ādiniddesavasena. “Imāya upekkhāya upeto hotī”ti-ādipaṭiniddesavasenāti vadanti. “Tattha katamā -pa- imāya upekkhāya upeto hotī”ti etena puggalo niddiṭṭho hoti, “samupeto”ti-ādinā paṭiniddiṭṭho. Yāva vā “samannāgato”ti padaṃ, tāva niddiṭṭho, “tena vuccati upekkhako”ti iminā paṭiniddiṭṭhoti tesam vasena niddesapaṭiniddesā yojetabbā. **Pakārenāti** upekkhāya “upekkhanā”ti-ādidhammapakārena “upeto samupeto”ti-ādipuggalappakārena ca upekkhaka-saddassa atthaṃ ṭhapento paṭṭhapenti. “Upekkhā”ti etassa atthassa “upekkhanā”ti **kāraṇaṃ**. Upekkhanāvasena hi upekkhāti. Tathā “upeto samupeto”ti etesaṃ “upāgato samupāgato”ti **kāraṇanti** evaṃ dhammapuggalavasena **tassa tassatthassa kāraṇaṃ dassentā vivaranti**, “upekkhako”ti imasseva vā atthassa “imāya upekkhāya upeto hotī”ti-ādinā **kāraṇaṃ dassentā**. Upekkhanā ajjupekkhanā samupeto”ti-ādinā byañjanānaṃ vibhāgamā **dassentā vibhajanti**. Upekkhaka-saddantogadhāya vā upekkhāya tasseva ca upekkhaka-saddassa visum atthavacanāṃ “yā upekkhā upekkhanā”ti-ādinā, “imāya upekkhāya upeto hotī”ti-ādinā

ca **byañjanavibhāgo**. Sabbathā aññātata **nikujjhitabhāvo**, kenaci pakārena viññātepi niravasesaparcchindanābhāvo **gambhīrabhāvo**.

602. **Uparibhūmippattiyāti** idaṃ “rūpasaññānaṃ samatikkamā”ti ettheva yojetabbaṃ. Viññāṇañcāyatanādīnipi vā ākāsañcāyatanādīnaṃ uparibhūmiyoti sabbatthāpi na na yujjati.

610. Viññāṇañcāyatananiddese “anantaṃ viññāṇanti taṃyeva ākāsaṃ viññāṇena phuṭaṃ manasi karoti anantaṃ pharati, tena vuccati anantaṃ viññāṇaṃ”ti ettha **viññāṇenāti** etaṃ upayogathe karaṇavacanaṃ, taṃyeva ākāsaṃ phuṭaṃ viññāṇaṃ manasi karotīti kira aṭṭhakathāyaṃ vuttaṃ. Ayaṃ vā etassa attho—taṃyeva ākāsaṃ phuṭaṃ viññāṇaṃ viññāṇañcāyatanaviññāṇena manasi karotīti. Ayaṃ panattho yutto—taṃyeva ākāsaṃ viññāṇena phuṭaṃ tena ghahitākāraṃ manasi karoti, evaṃ taṃ viññāṇaṃ anantaṃ pharatīti. Yañhi ākāsaṃ paṭhamārūppasamaṅgī viññāṇena anantaṃ pharati, taṃ pharaṇākārasahitameva viññāṇaṃ manasikaronto dutiyārūppasamaṅgī anantaṃ pharatīti vuccatīti.

615. **Taṃyeva viññāṇaṃ abhāvetīti** yaṃ pubbe “anantaṃ viññāṇaṃ”ti manasi kataṃ, taṃyevāti attho. Tasseva hi ārammaṇabhūtaṃ paṭhamena viya rūpanimittaṃ tatiyenārūppena abhāvetīti.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

623. Abhidhammabhājanīye pañcakanayadassane “pañca jhānānī”ti ca, “tattha katamaṃ paṭhamaṃ jhānaṃ”ti ca ādinā uddhaṭaṃ. Uddhaṭānaṃyeva catunnaṃ paṭhamatatiyacatutthapañcamajjhānānaṃ dassanato, dutiyasseva visesadassanato ca.

Abhidhammabhājanīyavaṇṇanā niṭṭhitā.



### 3. Pañhapucchakavaṇṇanā

640. **Lokuttarāpanetthā**ti etesu tīsu jhānesu “lokuttarā siyā appamāṇārammaṇā”ti evaṃ koṭṭhāsikā pana maggakāle, phalakāle vā lokuttarabhūtā evāti adhippāyo.

Paricchinnākāsakaṣiṇālokakaṣiṇānāpānabrahmavihāracatutthāni **sabbatthapādakacattutthe** saṅgahitānīti daṭṭhabbāni.

**Buddhapaccekabuddhakhīṇāsavā maggaṃ bhāvayimṃsu, phalaṃ sacchikarimṃsūti, bhāvevanti sacchikarissantūti** ca heṭṭhimamaggaphalānaṃ vasena vuttanti veditabbaṃ. Kusalato terasasu hi cattutthesu ayaṃ kathā pavattā, na ca kusalacattutthena arahattamaggaphalāni daṭṭhum sakkoti.

“Kiriyaṭo terasannaṃ”ti ettha lokuttaracattutthaṃ kiriyāṃ natthīti “dvādasannaṃ”ti vattabbaṃ, kusalato vā terasasu sekkhaphalacattutthaṃ antogadhaṃ katvā “kiriyaṭo terasannaṃ”ti asekkhacattutthena saha vadatīti veditabbaṃ. Sabbatthapādakañcetta khīṇāsavānaṃ yāni abhiññādīni santi, tesāṃ sabbesaṃ pādakattā **sabbatthapādakanti** daṭṭhabbaṃ. Na hi tesāṃ vaṭṭaṃ atthīti. Paricchannākāsakaṣiṇacattutthādīni viya vā navattabbaṭāya sabbatthapādakadasamānattā **sabbatthapādakata** daṭṭhabbā.

**Manosaṅkhārā** nāma saññāvedanā, cattāropi vā khandhā. **Nimittaṃ ārabbhā**ti ettha “nimittaṃ nibbānañcā”ti vattabbaṃ.

“Ajjhatto dhammo ajjhattassa dhammassa ārammaṇapaccayena paccayo”ti<sup>1</sup> ettha “ajjhattā khandhā iddhividhañāṇassa pubbenivāsānussatiñāṇassa yathākammūpagañāṇassa anāgataṃsañāṇassa āvajjanāya ārammaṇapaccayena paccayo”ti<sup>1</sup> vuttattā na cetopariyañāṇaṃ viya yathākammūpagañāṇaṃ parasantānagatameva jānāti, sasantānagatampi pana apākaṭaṃ rūpaṃ dibbacakkhu viya apākaṭaṃ kammaṃ vibhāveti. Tenāha “**attano kammajānanakāle**”ti.

Jhānavibhaṅgavaṇṇanā niṭṭhitā.

1. Abhi 9. 442 piṭṭhe.

## 13. Appamaññāvibhaṅga

### 1. Suttantabhājanīyavaṇṇanā

642. **Sabbadhīti** disādesodhinā anodhisopparaṇaṃ vuttaṃ, **sabbattatāya sabbāvantaṃti** sattodhinā. Tenāha “**anodhiso dassanatthan**”ti. **Tathā-saddo iti-saddo vā na vuttoti** “mettāsahagatena cetasā”ti etassa anuvattakaṃ taṃ dvayaṃ tassa pharaṇantarā diṭṭhānaṃ aṭṭhānanti katvā na vuttaṃ, puna “mettāsahagatena cetasā”ti vuttanti attho.

643. **Hirottappānupālītā mettā na parihāyati** āsannasapattassa rāgassa sinehassa ca vipattiyā anuppattitoti adhippāyo.

645. **Adhimuñcivāti** suṭṭhu pasāretvāti attho. Taṃ dassento “**adhikabhāvenā**”ti-ādimāha, balavatā vā adhimokkheṇa **adhimuccivā**.

648. **Heṭṭhā vuttoyevāti** “sabbena sabbam sabbathā sabbam”ti etesaṃ “sabbena sikkhāsamādānena sabbam sikkham, sabbena sikkhitabbākārena sabbam sikkhan”ti ca **jhānavibhaṅge**<sup>1</sup> attho vutto. Idha pana sabbena avadhīnā attasamatāya sabbasattayuttatāya ca sabbam lokam, sabbāvadhīdisādīpharaṇākarehi sabbam lokanti ca attho yujjati.

650. **Paccatthikavighātavasenāti** mettādīnaṃ āsannadūrapaccatthikānaṃ rāgabyāpādādīnaṃ vighātavasena. **Yaṃ appamāṇam, so averoti** so averabhāvoti ayam vā tassa atthoti.

653. Nirayādi **gati**, caṇḍālādi **kulam**, annādīnaṃ alābhītā **bhogo**. **Ādi-saddena** dubbaṇṇatādi gahitaṃ.

Suttantabhājanīyavaṇṇanā niṭṭhitā.

### 3. Pañhapucchakavaṇṇanā

699. **Imasmim̐ pana -pa- kathitā**ti iminā imasmim̐ vibhaṅge kathitānaṃ lokiyabhāvameva dassento khandhavibhaṅgādīhi visesetīti na aññattha lokuttarānaṃ appamaññānaṃ kathitatā anuññātā hoti.

Appamaññāvibhaṅgavaṇṇanā niṭṭhitā.

## 14. Sikkhāpadavibhaṅga

### 1. Abhidhammabhājanīyavaṇṇanā

703. **Paṭiṭṭhānaṭṭhenā**ti sampayogavasena upanissayavasena ca okāsabhāvena. Piṭṭhapūva-odanakiṇṇanānāsambhāre pakkhipitvā madditvā katā **surā** nāma. Madhukādipupphapanasādiphala-ucchumuddikādinānāsambhārānaṃ rasā ciraparivāsitā **merayaṃ** nāma, āsavoti attho.

704. **Tāmsampayuttattā**ti viratisampayuttattā, viraticetanāsampayuttattā vā.

**Kamma**pathā evāti asabbasādhāraṇesu jhānādikoṭṭhāsesu kammapathakoṭṭhāsikā evāti attho. Surāpānampi “surāpānaṃ bhikkhave āsevitaṃ -pa- nirayasaṃvattanikaṃ”<sup>1</sup>ti visuṃ kammapathabhāvena āgatanti vadanti. Evaṃ sati ekādasa kammapathā siyumu, tasmāssa yathāvuttessveva kammapathesu upakārakattasabhāgattavasena anupaveso daṭṭhabbo.

**Satta-itthipurisārammaṇatā** tathāgahitasāṅkhārārammaṇatāya daṭṭhabbā. “Pañca sikkhāpadā parittārammaṇā”<sup>2</sup>ti hi vuttaṃ. “Sabbāpi hi etā vītikkamitabbavatthuṃ ārammaṇaṃ katvā veracetanāhi eva viramanti”<sup>3</sup>ti ca vakkhatīti.

**Gorūpasīlako** pakatibhaddo. **Kākaṇika**mattassa atthāyāti-ādi lobhasena musākathane vuttaṃ. Dosavasena musākathane ca niṭṭhappatto saṃghabhedo gahito. Dosavasena parassa byasanatthāya musākathane pana tassa tassa guṇavasena appasāvajjamahāsāvajjatā yojetabbā, mandādhimattabyasanicchāvasena ca. Nissaggiyathāvaravijjāmayiddhimayā sāhatthikaṇattikesveva pavisantīti dve eva gahitā.

**Pañcapi kamma**pathā evāti cetanāsāṅkhātāṃ pariyāyasīlaṃ sandhāya vuttaṃ, viratisīlaṃ pana maggakoṭṭhāsikanti. **Tesaṃ panā**ti sesasīlaṃ.

712. “**Koṭṭhāsabhāvenā**”ti vuttaṃ, “paṭiṭṭhānabhāvenā”ti pana vattabaṃ. Ettha pana sikkhāpadavāre pahīnapañcābhabbaṭṭhānassa arahato

1. Am 3. 78 piṭṭhe.

2. Abhi 2. 315 piṭṭhe.

3. Abhi-Ṭṭha 2. 368 piṭṭhe.

viramitabbaverassa sabbathā abhāvā kiriyesu viratiyo na santīti na uddhaṭā, sekkhānaṃ pana pahīna pañcaverattepi taṃsabhāgatāya verabhūtānaṃ akusalānaṃ veranidānānaṃ lobhādīnaṃca sabbhāvā viratīnaṃ uppatti na na bhavissati. Akusalasamuṭṭhitāni ca kāyakammādīni tesāṃ kāyaduccaritādīni verāneva, tehi ca tesāṃ viratiyo honteva, yato naphalabhūtassapi uparimaggattayassa aṭṭhaṅgikatā hoti. Sikkhāvāre ca abhāvetabbatāya phaladhammāpi na sikkhitabbā, nāpi sikkhitasikkhassa uppajjamānā kiriyadhammāti na keci abyākatā sikkhāti uddhaṭā.

Abhidhammabhājanīyavaṇṇanā niṭṭhitā.

---

## 2. Pañhapucchakavaṇṇanā

714. **Sampattavirativasenāti** sampatte paccuppanne ārammaṇe yathāviramitabbato virativasenāti attho.

Sikkhāpadavibhaṅgavaṇṇanā niṭṭhitā.

## 15. Paṭisambhidāvibhaṅga

### 1. Suttantabhājanīya

#### 1. Saṅgahavāraṇṇanā

718. **Eseva nayoti** saṅkhepena dassetvā tameva nayaṃ vitthārato dassetuṃ “**dhammappabhedassa hī**”ti-ādimāha. Niruttipaṭibhānappabhedā tabbisayānaṃ atthādīnaṃ paccayuppannādibhedehi bhinditvā veditabbā.

“**Yaṃ kiñci paccayasamuppannan**”ti etena saccahetudhammapaccayākāravāresu āgatāni dukkhādīni gahitāni. Saccapaccayākāravāresu nibbānaṃ, pariyattivāre bhāsitattho, abhidhammabhājanīye vipāko kiriyañcāti evaṃ pāḷiyaṃ vuttānameva vasena pañca atthā veditabbā, tathā dhammā ca.

**Vidahatīti** nibbattakahetu-ādīnaṃ sādharmaṇaṃ nibbanaṃ, tadatthaṃ pana vibhāvetumāha “**pavatteti ceva pāpeti cā**”ti. Tesu purimo attho maggavajjesu daṭṭhabbo. Bhāsitampi hi avabodhanavasena atthaṃ pavattetīti. Maggo pana nibbānaṃ pāpetīti tasmim̐ pacchimo.

**Dhammaniruttābhilāpeti** ettha **dhamma**-saddo sabhāvavācakoṭi katvā āha “**yā sabhāvanirutti**”ti, aviparītaniruttīti attho. **Tassā abhilāpeti** tassā niruttiyā avacanabhūtāya paññattiyā abhilāpeti keci vaṇṇayanti. Evaṃ sati paññatti abhilapitabbā, na vacananti āpajjati, na ca vacanato aññaṃ abhilapitabbam̐ uccāretabbam̐ atthi, athāpi phassādivacanehi bodhetabbam̐ abhilapitabbam̐ siyā, evaṃ sati atthadhammavajjaṃ tehi bhodhetabbam̐ na vijjatīti tesam̐ niruttibhāvo āpajjati. “Phassoti ca sabbhāvanirutti, phassam̐ phassāti na sabhāvanirutti”ti dassitovāyamattho, na ca avacanam̐ evaṃpakāraṃ atthi, tasmā vacanabhūtāya eva tassā sabhāvaniruttiyā abhilāpe uccāraṇeti attho daṭṭhabbo.

**Tam̐ sabhāvaniruttim̐ saddam̐ ārammaṇam̐ katvā paccavekkhantassa tasmim̐ sabhāvaniruttābhilāpe pabhedagataṃ nāṇam̐ niruttipaṭisambhidāti vuttattā niruttisaddārammaṇāya sotaviññānavīthiyā parato manodvāre**

niruttipaṭisambhidā pavattatīti vadanti. “Niruttipaṭisambhidā paccuppannārammaṇā”ti ca vacanaṃ saddaṃ gahetvā pacchā jānanaṃ sandhāya vuttanti. Evaṃ pana aññasmiṃ paccuppannārammaṇe aññaṃ paccuppannārammaṇanti vuttanti āpajjati. Yathā pana dibbasotaññaṃ manussāmanussādisaddappabhedanicchayassa paccayabhūtaṃ taṃ taṃ saddavibhāvakaṃ, evaṃ sabhāvāsabhāvaniruttinicchayassa paccayabhūtaṃ paccuppannasabhāvaniruttisaddārammaṇaṃ taṃvibhāvakaññaṃ niruttipaṭisambhidāti vuccamāne na pāḷivirodho hoti. **Taṃ sabhāvaniruttim saddaṃ ārammaṇaṃ katvā paccavekkhantassāti** ca paccuppannasaddārammaṇaṃ paccavekkhaṇaṃ pavattayantassāti na na sakkā vuttum. Tampi hi ñāṇaṃ sabhāvaniruttim vibhāventamyeva taṃtaṃsaddapaccavekkhaṇānantaraṃ taṃtaṃpabhedanicchayahetuttā niruttim bhindantaṃ paṭivijjhantameva uppajjati ca pabhedagatampi hotīti. **Sabhāvaniruttīti** māgadhabhāsā adhippetāti tato aññaṃ sakkaṭānāmādisaddaṃ sandhāya “**aññaṃ panā**”ti āha. **Byañjananti** nipātapadamāha.

**Kathitaṃ** aṭṭhakathāyaṃ. **Bodhimaṇḍa**-saddo paṭhamābhisambuddhaṭṭhāne eva daṭṭhabbo, na yattha katthaci bodhirukkhasa patiṭṭhitaṭṭhāne. **Suvaṇṇasalākanti** seṭṭhasalākāṃ, dhammadesanattamaṃ salākāṃ gahetvāti attho, **na paṭisambhidāyaṃ ṭhitena** pavāritaṃ, tasmā paṭisambhidāto aññeneva pakārena jānitabbato na sakkaṭabhāsājānanaṃ paṭisambhidākiccanti adhippāyo.

**Idaṃ kathitanti** māgadhabhāsāya sabhāvaniruttitāñāpanattamaṃ idaṃ idāni vattabbaṃ kathitanti attho. **Chaddantavāraṇa**<sup>1</sup>**tittirajātakādīsu**<sup>2</sup> tiracchānesu ca māgadhabhāsā ussannā, na oṭṭakādibhāsā sakkaṭaṃ vā.

**Tatthāti** māgadhasesabhāsāsu. **Sesā parivattanti** ekantena kālantare aññathā honti vinassanti ca. Māgadhā pana katthaci kadāci parivattantīpi na sabbattha sabbadā sabbathā ca parivattati, kappavināsepi tiṭṭhatiyevāti “**ayamevekā na parivattatī**”ti āha. **Papañcoti** cirāyananti attho. Buddhavacanameva cetassa visayo, teneva “nelaṅgo setapacchādo”ti gātham pucchito citto gahapati “kiṃ nu kho etaṃ bhante bhagavatā bhāsitanti. Evaṃ gahapatīti<sup>3</sup>. Tena hi bhante muhuttaṃ āgametha, yāvassa attham pekkhāmī”ti āhāti vadanti.

1. Khu 5. 371 piṭṭhe.

2. Khu 5. 102 piṭṭhe.

3. Saṃ 2. 482 piṭṭhe.

**Sabbatthakañāṇanti** atthādīsu ñāṇaṃ. Tañhi sabbesu tesu tīsu, catūsopi vā pavattattā, kusalakiriyabhūtāya paṭibhānapaṭisambhidāya dhammatthabhāvato tīsu eva vā pavattattā “**sabbatthakañāṇanti**”ti vuttam. Imāni ñāṇāni idamatthajotakānīti sātthakānaṃ paccavekkhitabbāntā sabbo attho etassātipi sabbatthakaṃ, sabbasmiṃ khittanti vā. Sekkhe pavattā arahattappattiyā visadā hontīti vadanti. Pabbayogo viya pana arahattappatti arahatopi paṭisambhidāvisadatāya paccayo na na hotīti pañcannampi yathāyogaṃ sekkhāsekkhapaṭisambhidāvisadattakāraṇatā yojetabbā.

Pucchāya parato pavattā kathāti katvā aṭṭhakathā “**paripucchā**”ti vuttā. **Paṭipattim pūretabbaṃ maññissantīti** paṭipattigarutāya lābhaṃ hīḷentena satahassagghanakampi kambalaṃ vāsiyā koṭṭetvā paribhaṇḍakaraṇaṃ mayā kataṃ āvajjitvā lābhagaruno pariyattidharā dhammakathikāva bhavitum na maññissantīti vuttam hoti. Ettha ca therassa kaṅkhuppattiyā pubbe avisadataṃ dassetvā arahattappattassa pañhaviṣṣajanena arahattappattiyā visadatā dassitā. **Tissatthero** anantaraṃ vutto tissatthero evāti vadanti.

**Pabhedo** nāma maggehi adhigatānaṃ paṭisambhidānaṃ pabhedagamanam. **Adhigamo** tehi paṭilābho, tasmā so lokuttaro, pabhedo kāmāvacaro daṭṭhabbo. **Na pana tathāti** yathā adhigamassa balavapaccayo hoti, na tathā pabhedassāti attho. Idāni pariyattiyādīnaṃ adhigamassa balavapaccayattābhāvaṃ, pabbayogassa ca balavapaccayattam dassento “**pariyattisavanaparipucchā hī**”ti-ādimāha. Tattha **paṭisambhidā nāma natthīti** paṭisambhidādhigamo natthīti adhippāyo. Idāni yaṃ vuttam hoti, tam dassento “**ime panā**”ti-ādimāha. Pabbayogādhigamā hi dvepi visadakāraṇāti “pabbayogo pabhedassa balavapaccayo hoti”ti vuttanti.

Saṅgahavāraṇṇanā niṭṭhitā.



## 2. Saccavārādivaṇṇanā

719. Hetuvāre kālattayepi hetuphaladhammā “atthā”ti vuttā, tesañca hetudhammā “dhammā”ti, dhammavāre veneyyavasena atītānañca saṅgahitattā “uppannā samuppannā”ti-ādi na vuttanti atītapaccuppannā “atthā”ti vuttā, taṃnibbattakā ca “dhammā”ti idametesam dvinnampi vārānaṃ nānattaṃ.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

725. **Avuttattāti** “tesaṃ vipāke ñāṇaṃ”ti sāmāññena vatvā visesena avuttattāti adhippāyo. Ettha ca kiriyānaṃ avipākattā dhammabhāvo na vuttoti. Yadi evaṃ vipākā na hontīti atthabhāvo ca na vattabboti? Na, paccayuppannattā. Evañce kusalākusalānampi atthabhāvo āpajjatīti. Nappaṭisiddho, vipākassa pana padhānahetutāya pākaṭattā dhammabhāvova tesaṃ vutto. Kiriyānaṃ paccayattā dhammabhāvo āpajjatīti ce? Nāyaṃ doso appaṭisiddhattā, kammaphalasambandhassa pana ahetuttā dhammabhāvo na vutto. Apica “ayaṃ imassa paccayo, idaṃ paccayuppannaṃ”ti evaṃ bhedaṃ akatvā kevalaṃ kusalākusale vipākakiriyadhamme ca sabhāvato paccavekkhantassa dhammapaṭisambhidā atthapaṭisambhidā ca hotītipi tesaṃ atthadhammatā na vuttāti veditabbā. Kusalākusalavāresu ca dhammapaṭisambhidā kusalākusalānaṃ paccayabhāvaṃ sattavisesaṃ sanipphādetabbataṃ passantī nipphādetabbāpekkhā hotīti taṃsambandheneva “tesaṃ vipāke ñāṇaṃ atthapaṭisambhidā”ti vuttaṃ. Sabhāvadassanamattameva pana atthapaṭisambhidāya kiccaṃ nipphannaphalamattadassanatoti tassā nipphādakānapekkhattā vipākavāre “tesaṃ vipaccanake ñāṇaṃ dhammapaṭisambhidā”ti na vuttanti veditabbaṃ.

**Sabhāvapaññattiyāti** na sattādipaññattiyā, aviparītapaññattiyā vā.  
**Khobhetvāti** lomahaṃsajananasādhuḥkārādānādīhi khobhetvā. **Puna**

**dhammassavane jānissathāti** appassutattā dutiyavāraṃ kathento tadeva kathessatīti adhippāyo.

746. **Bhūmidassanattanti** ettha kāmāvacarā lokuttarā ca bhūmi “bhūmi”ti veditabbā, cittuppādā vāti.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

747. **Paccayasamuppannañca atthaṃ paccayadhammañcāti** vacanehi hetā dipaccayasamuppannānaṃ kusalākusalarūpānampi atthapariyāyaṃ, hetā dipaccayabhūtānaṃ vipākakiriyarūpānampi dhammapariyāyañca dasseti. Paṭibhānapaṭisambhidāya kāmāvacaravipākārammaṇatā mahaggaṭārammaṇatā ca paṭisambhidāññārammaṇatte na yujjati paṭisambhidāññānaṃ kāmāvacaralokuttarakusalesu kāmāvacarakiriyālokuttaravipākesu ca uppattito. Sabbaññārammaṇatāya sati yujjeyya, “yena ñāṇena tāni ñāṇāni jānāti”ti<sup>1</sup> vacanato pana na sabbaññārammaṇatāti kathayanti. Suttantabhājanīye pana “ñāṇesu ñānaṃ paṭibhānapaṭisambhidā”ti avisesena vuttattā sabbaññārammaṇatā siyā. Abhidhammabhājanīyepi cittuppādavasena kathanāṃ niravasesakathananti yathā dasseti avisaṃvāsanāya “yena ñāṇena tāni ñāṇāni jānāti”ti yaṃ vuttaṃ, taṃ aññārammaṇatā na paṭisedhetīti. Yathā ca atthapaṭisambhidāvisayānaṃ na niravasesena kathanāṃ abhidhammabhājanīye, evaṃ paṭibhānapaṭisambhidāvisayassapīti. Evaṃ paṭibhānapaṭisambhidāya sabbaññāvisayattā “tisso paṭisambhidā siyā parittārammaṇā siyā mahaggaṭārammaṇā siyā appamāñārammaṇā”ti<sup>2</sup> vuttā.

Yadipi “siyā atthapaṭisambhidā na maggārammaṇā”ti<sup>2</sup> vacanato abhidhammabhājanīye vuttapaṭisambhidāsveva pañhapucchakanayo pavatto. Na hi maggo paccayuppanno na hoti, abhidhammabhājanīye ca paṭisambhidāññāvisayā eva paṭibhānapaṭisambhidā vuttāti na tassā mahaggaṭārammaṇatāti. Evamapi dvepi etā pāḷiyo virujjhanti, tāsū balavatarāya

1. Abhi 2. 3089 piṭṭhe.

2. Abhi 2. 320 piṭṭhe.

ṭhatvā itarāya adhippāyo maggitabbo. Kusalākusalānaṃ pana paccayuppannattaṭṭavedhopi kusalākusalabhāvapaṭivedhavinimutto natthīti nippariyāyā tattha dhammapaṭisambhidā ekantadhammavisayattā, tathā vipākakiriyānaṃ paccayabhāvapaṭivedhopi vipākakiriyabhāvapaṭivedhavinimutto natthīti nippariyāyā tattha atthapaṭisambhidā ekantika-atthavisayattā. Kiñci pana ñāṇaṃ appaṭibhānabhūtaṃ natthi ñeyyappakāsanatoti sabbasmimpi ñāṇe nippariyāyā paṭibhānapaṭisambhidā bhavituṃ arahati. Nippariyāyapaṭisambhidāsu pañhapucchakassa pavattiyānaṃ dvepi pāliyo na virujjhanti.

**Saddārammaṇattā bahiddhārammaṇāti** ettha parassa abhilāpasaddārammaṇattāti bhavitabbaṃ. Na hi saddārammaṇattā bahiddhārammaṇattāya kāraṇaṃ saddassa ajjhattassa ca sabbhāvāti. Anuvattamāno ca so eva saddoti visesaṇaṃ na katanti daṭṭhabbaṃ.

Paṭisambhidāvibhaṅgavaṇṇanā niṭṭhitā.

## 16. Nāṇavibhaṅga

### 1. Ekakamātikādivaṅṅanā

751. **Okāsaṭṭhena** sampayuttā dhammā ārammaṇaṅcāpi **ñāṇassa vatthu**. **Yāthāvaka**vatthuvibhāvanāti nahetādi-avitathekappakāravatthuvibhāvanā. Yathā ekaṃ nahetu, tathā ekaṃ aññampīti hi gahetabbaṃ avitathasāmaññayuttaṃ ñāṇārammaṇaṃ yāthāvakavatthu. Yāthāvakena vā avitathasāmaññena vatthuvibhāvanā **yāthāvaka**vatthuvibhāvanā.

**Dukānurūpehī**ti dukamātikānurūpehīti vadanti. Osānadukassa pana dukamātikaṃ anissāya vuttattā dukabhāvānurūpehīti vattabbaṃ. Evaṃ **tikānurūpehī**ti etthāpi daṭṭhabbaṃ. Osānaduke pana **atthoti** phalaṃ, anekatthattā dhātusaddānaṃ taṃ janetīti **atthajāpikā**, kāraṇagatā paññā. Jāpito janito attho etissāti **jāpitatthā**, kāraṇapaññāsadisī phalappakāsanabhūtā phalasampayuttā paññā.

### 10. Dasakamātikāvaṅṅanā

760. “Catasso kho imā sārīputta yoniyo. Katamā -pa-. Yo kho maṃ sārīputta evaṃ jānaṃ”<sup>1</sup>ti vacanena **catuyoniparicchedakañāṇaṃ** vuttaṃ, “nirayaṅcāhaṃ sārīputta pajānāmi”<sup>2</sup>ti-ādinā **pañcagatiparicchedakaṃ**. “**Samyuttake āgatāni tesattati ñāṇāni, sattasattati ñāṇāni**”<sup>3</sup>ti vuttaṃ, tattha pana nidānavagge **sattasattati āgatāni** catucattārīsaṅca, **tesattati** pana paṭisambhidāmagge sutamayādīni āgatāni dissanti, na samyuttaketi. **Aññānipī**ti etena idha ekakādivasena vuttaṃ, aññattha ca “pubbante ñāṇaṃ”<sup>4</sup>ti-ādinā, brahmajālādīsu ca “tayidaṃ tathāgato pajānāti ‘imāni ditṭhiṭṭhānāni evaṃ gahitāni’<sup>5</sup>ti”<sup>6</sup>ti-ādinā vuttaṃ anekañāṇappabhedāṃ saṅgaṇhāti. Yathāvapaṭivedhato sayaṅca akampiyaṃ puggalaṅca taṃsamaṅgiṃ ñeyyesu adhibalaṃ karotīti āha “**akampiyaṭṭhena upatthambhakaṭṭhena cā**”<sup>7</sup>ti.

1. Ma 1. 105 piṭṭhe.

2. Ma 1. 106 piṭṭhe.

**Setṭhaṭṭhānaṃ** sabbaññutaṃ. Paṭijānavasena sabbaññutaṃ abhimukhaṃ gacchanti, aṭṭha vā parisā upasaṅkamaṇṭīti **āsabhā**, buddhā. **Idaṃ panāti** buddhānaṃ ṭhānaṃ sabbaññutameva vadati. **Tiṭṭhamānovāti** avadantopi tiṭṭhamānova paṭijānāti nāmāti attho. **Aṭṭhasu parisāsu** “abhijānāmahaṃ sārīputta anekasataṃ khattiyaparisaṃ -pa-. Tatra vata maṃ bhayaṃ vā sārājjaṃ vā okkamissatīti nimittametaṃ sārīputta na samanupassāmī”<sup>1</sup> vacanena dassita-akampiyañāyutto dasabalohanti **abhītanādaṃ nadati**. **Sīhanādasuttēna** khandhakavagge āgatenā.

“Devamanussānaṃ catucakkaṃ vattatī”<sup>2</sup> ti<sup>2</sup> suttasesena sappurisūpassayādīnaṃ phalasampatti pavatti, purimasappurisūpassayādīnaṃ upanissāya pacchimasappurisūpassayādīnaṃ sampatti pavatti vā vuttatī **ādi-**saddena tattha ca cakka-saddassa gahaṇaṃ veditabbaṃ. Paṭivedhaniṭṭhattā arahattamaggañāṇaṃ paṭivedhoti **“phalakkhaṇe uppannaṃ nāmā”**ti vuttaṃ. Tena paṭiladdhassapi desanāñāṇassa kiccanipphattiparassa bujjanamattena hotīti **“aññāsikoṇḍaññaṃ sotāpattiphalakkhaṇe pavattaṃ nāmā”**ti vuttaṃ. Tato paraṃ pana yāva parinibbānā desanāñāṇappavatti tasseva pavattitassa dhammacakkassa ṭhānanti veditabbaṃ pavattitacakkassa cakkavattino cakkaratanaṭṭhānaṃ viya.

Samādiyantīti **samādānāni**, tāni pana samādiyitvā katāni hontīti āha **“samādiyitvā katānaṃ”**ti. **Kammameva vā kammāsamādānanti** etena samādāna-saddassa apubbathābhāvaṃ dasseti muttagata-sadde gata-saddassa viya.

**Agatigāmininti** nibbānagāminim. Vuttañhi “nibbānañcāhaṃ sārīputta pajānāmi nibbānagāminiñca paṭipadan”<sup>3</sup>ti<sup>3</sup>.

**Hānabhāgiyadhammanti** hānabhāgiyasabhāvaṃ, kāmasahagatasaññādidhammaṃ vā. **Tam kārāṇanti** pubbeva katābhisaṅkhārādīnaṃ.

**“Idāni”**ti etassa “iminā anukkamena vuttānīti veditabbāni”<sup>3</sup>ti iminā saha yojanā kātabbā. Kilesāvaraṇaṃ tadabhāvañcāti **kilesāvaraṇābhāvaṃ**. Kilesakkhayādhigamassa hi kilesāvaraṇaṃ **aṭṭhānaṃ**, tadabhāvo **ṭhānaṃ**. Anadhigamassa kilesāvaraṇaṃ **ṭhānaṃ**,

1. Ma 1. 104 piṭṭhe.

2. Am 1. 341 piṭṭhe.

3. Ma 1. 106 piṭṭhe.

tadabhāvo **aṭṭhānanti**. Tattha tadabhāvaggahaṇena gahitaṃ “atthi dinnan”ti-  
 ādikāya sammādiṭṭhiyā ṭhitim tabbiparītāya ṭhānābhāvañca adhigamassa  
 ṭhānaṃ passantena iminā ñāṇena adhigamānadhigamānaṃ ṭhānāṭṭhānabhūte  
 kilesāvaraṇatadabhāve passati bhagavāti imamatthaṃ sadhento āha  
**“lokiyasammādiṭṭhiṭṭhidassanato niyatamicchādiṭṭhiṭṭhānābhāvadassanato  
 cā”**ti. Ettha ca adhigamaṭṭhānadassanameva adhippetam upari  
 bhabbapuggalavaseneva vipākāvaraṇābhāvadassanādikassa vakkhamānattā.  
 Iminā pana ñāṇena sijjhanato pasaṅgena itarampi vuttanti veditabbaṃ.  
**Dhātuvemattadassanatoti** rāgādīnaṃ adhimattatādivasena taṃsahitānaṃ  
 dhātūnaṃ vemattatādivasana, “ayaṃ imissā dhātuyā adhimattattā  
 rāgacarito”ti-ādīnaṃ cariyāhetūnaṃ vā, rāgādayo eva vā pakatibhāvato  
 dhātūti rāgādivemattadassanatoti attho. **Payogaṃ anādiyitvāti**  
 santatimahāmattha-aṅgulimālādīnaṃ viya kāmāragabyāpādādivasena  
 payogaṃ anādiyitvā.

### 1. Ekakaniddesavaṇṇanā

761. **Na hetumevāti** ettha ca na hetū evāti attho,  
 byañjanasiliṭṭhatāvasena pana rassattaṃ **ma-kāro** ca kato  
 “adukkhamasukhā”ti ettha viya. **Imināpi nāyēnāti** ettha purimanayena  
 hetubhāvādipaṭikkhepo, pacchimanayena nahetudhammādikotṭhāsasaṅgahoti  
 ayaṃ viseso veditabbo. **Cuti**ggahaṇena cutiparicchinnāya ekāya jātiyā  
 gahaṇaṃ daṭṭhabbaṃ, **bhava**ggahaṇena navadhā vuttabhavassa.  
 Tadantogadhatāya tattha tattha **pariyāpannatā** vuttā. **Uppannaṃ  
 manoviññāṇaviññeyyamevāti** “na rūpaṃ viya uppannā  
 chaviññāṇaviññeyyā”ti rūpato etesaṃ visesaṃ karoti.

762. **Kappato kappam gantvāpi na uppajjati** ti na kadāci tathā uppajjati.  
 Na hi khīrādīnaṃ viya etesaṃ yathāvuttalakkaṇavilakkhaṇatā atthīti  
 dasseti.

763. **Samodhānetvāti** loke vijjamaṇaṃ sabbaṃ rūpaṃ samodhānetvā.  
 Etena mahattepi avibhāvakattaṃ dassento sukhumattā na

vibhāveṣṣatīti vādapatham chindati. **Cakkhupasāde** mama vatthumhīti attho. **Visayoti** issariyaṭṭhānanti adhippāyo.

764. **Abbokinṇāti** abyavahitā, anantaritāti attho. Vavatthitānampi paṭipāṭiniyamo tena paṭikkhittoti attho. **Anantaratāti** anantarapaccayatā etena paṭikkhittāti attho.

765. **Samanantaratāti** ca samanantarapaccayatā.

766. **Ābhujanatoti** ābhuggakaraṇato, nivattanato icceva attho. Ettha ca “pañca viññāṇā anābhogā”ti ābhogasabhāvā na hontīti attho, “pañcannaṃ viññāṇānaṃ natthi āvaṭṭanā vā”ti-ādīsupi āvaṭṭanabhāvo vāti-ādīnā attho daṭṭhabbo.

**Na kañci dhammaṃ paṭivijānātīti** ettha na sabbe rūpādīdhammā dhamma-ggahaṇena gahitāti yathādhippetadhammadassanattam **“manopubbaṅgamā dhammāti evaṃ vuttan”**ti āha.

Rūpādīsu abhinipatanam tehi samāgamo tesantipi vattum yujjātīti āha **“rūpādīnaṃ abhinipātamattan”**ti. Kammatthe vā sāmivacanaṃ. Viññāṇehi abhinipatitabbāni hi rūpādīnīti. **Idam vuttam hotīti**-ādīsu hi ayaṃ adhippāyo—ārammaṇakaraṇena paṭivijānitabbāni rūpādīni ṭhapetvā kusalākusalacetanāya taṃsampayuttānaṃca yathāvuttānaṃ sahajapubbaṅgamadhammena paṭivijānitabbānaṃ paṭivijānanaṃ etesaṃ natthīti. Evaṃca katvā **“dassanādīmattato pana muttā aññā etesaṃ kusalādīpaṭivīññatti nāma natthī”**ti kiccantaram paṭisedhenti.

Avipākabhāvena aññaṃ abyākatasāmaññaṃ anivārento kusalākusalaggahaṇaṇca karotīti cavanapariyosānaṃca **kiccaṃ. Pi**-saddena sahajavanakāni vīthicittāni sampiṇḍetvā pañcadvāre paṭisedhane ayaṃ adhippāyo siyā—“manasā ce paduṭṭhena -pa- pasannena bhāsati vā karoti vā”ti<sup>1</sup> evaṃ vuttā bhāsanakaraṇakarā, taṃsadisā ca sukhadukkhuppādakā balavanto chaṭṭhadvārikā eva dhammaggahaṇena gahitāti na tesam pañcadvārikajavanena paṭivijānanaṃ atthi, dubbalānaṃ pana pubbaṅgamaṃ paṭivijānanaṃ tattha na paṭisaddham

1. Khu 1. 13 piṭṭhe.

“na kāyakammaṃ na vacīkammaṃ paṭṭhapeti”ti viññattidvayaajanakasseva paṭṭhapanapaṭikkhepena dubbalassa manokammasa anuññātattā. Tathā kāyasucaritādikusalākammaṃ karomīti, tabbiparītaṃ akusalaṃ kammaṃ karomīti ca kusalākusalasamādānaṃ pañcadvārikajavanena na hoti. Tathā paṭiccasamuppādavaṇṇanāyaṃ vuttā “pañcadvārikacuti ca na pañcadvārikacittehi hoti cuticittassa atamdvārikattā”ti, yā panāyaṃ pāli “pañcahi viññāṇehi na kañci dhammaṃ paṭivijānāti aññatra abhinipātamattā”ti, tassā rūpādīnaṃ āpāthamattaṃ muñcitvā aññaṃ kañci dhammasabhāvaṃ na paṭivijānātīti ayamatto dissati. Na hi rūpaṃ paṭiggaṇhantampi cakkhuvīññāṇaṃ rūpanti ca gaṇhātīti. Sampatiṅghanassapi rūpanīlādi-ākārapaṭivijānanam natthīti kiñci dhammasa paṭivijānanam paṭikkhittaṃ, pañcahi pana viññāṇehi sātisaṃ tassa vijānananti “aññatra abhinipātamattā”ti na vuttaṃ. Yassa pāliyaṃ bahiddhāpaccuppannārammaṇatā vuttā, tato aññaṃ niruttiṭṭhisambhidamicchantehi pañcadvārajavanena paṭisambhidāññāssa saḥuppatti paṭisiddhā. **Rūpārūpadhammeti** rūpārūpāvacaradhammeti attho.

**Pañcadvārikacittena na paṭibujjhatīti** kasmā vuttaṃ, nanu rūpādīnaṃ āpāthagamane niddāpaṭibodho hotīti? Na, paṭhamam manodvārikajavanassa uppattitoti dassento āha “**niddāyantassa hī**”ti-ādi. **Palobhetvā** saccasupinena.

**Abyākatoyeva** āvajjanamattasseva uppajjanatoti vadanti. Evaṃ vadantehi manodvārepi āvajjanam dvattikkhattum uppajjitvā javanaṭṭhāne ṭhatvā bhavaṅgam otaratīti adhippetanti daṭṭhabbam.

**Tassā eva vasenāti** tassā vasena ekavidhena ñāṇavatthu hotīti ca, veditabbanti ca yojanā kātabbā.

Ekakaniddesavaṇṇanā niṭṭhitā.

## 2. Dukaniddesavaṇṇanā

767. Tattha-saddo aññatra sabhāvaṃ gahetvā adhikaraṇesu pavattamāno adhikaraṇavasena liṅgaparivattim gacchatīti adhippāyena



jāpitā ca sā atthā cāti **jāpitatthā**ti ayamattho vibhāvitoti daṭṭhabbo.

Dukaniddesavaṇṇanā niṭṭhitā.

### 3. Tikaniddesavaṇṇanā

768. **Paññāpariṇāmitesūti** paññāya paripācitesu. “Yogavihitesūti idañca visayavisesanamattameva, tasmā yāni paññāya vihitāni ahesuṃ honti bhavissanti ca, sabbāni tāni yogavihitānīti daṭṭhabbāni. Sikkhitvā kātabbam **sippam**, itaram **kammam**. Ayametesam viseso **vaḍḍhakikammanti** ca asikkhitvāpi kātabbam thūlakammam **“kamman”**ti daṭṭhabbam, paññā eva vā tattha tattha **“kammam sippam”**ti ca veditabbā. **Nāgamaṇḍalam** nāma maṇḍalam katvā sappe vijjāya pakkosivā balim datvā visāpanayanam. **Parittam** rakkhā, yena “phū”ti mukhavātam datvā visam apanayanti, so uṇṇanābhi-ādīmanto **phudhamanakamanto**. “A ā”ti-ādīkā mātīkā “ka kā”ti-ādīko tappabhedo ca **lekhā**.

Kusalam dhammam **sakam**, itaram **nosakam**. Catunnam saccānam paṭivijjhitaḍḍhanam tappaṭivedhapaccayabhāvena **anulomanam** daṭṭhabbam. Pubbe “yogavihitesu vā kammāyatanesū”ti-ādīnā paññā vuttā, puna tassā vevacanavasena “anulomikam khanti”ti-ādī vuttanti adhippāyena **“anu -pa-paññāvevacanāni”**ti āha. Ettha ca **evarūpinti** yathāvuttakammāyatanādivisayam kammassakatasaccānulomikasabhāvam aniccādivapatti-ākārañcāti attho. Yathāvuttā ca bhūmisabhāvavapatti-ākāraniddesā khanti-ādīhi yojetabbā. Yassā paññāya dhammā nijjhānapajānanakiccasañkhātam olokam khamanti aviparītasabhāvattā, sā paññā dhammānam nijjhānakkhamanam etissā atthīti **dhammanijjhānakkhantī**ti attho.

769. Asamvaram muñcatīti samādānasampattaviratisampayuttacetanā **“sīlam pūrentassa muñcacetanā”**ti vuttā. Pubbāparapaññāya ca dānasīlamayatāvacanato muñca-aparacetanāvasena **“ārabbhā”**ti, pubbacetanāvasena **“adhikicā”**ti ca vatthum yuttanti **“adhikicā”**tipi pāṭho yujjati.

770. Pañcasīladasasīlāni viññāṇassa jātiyā ca paccayabhūtesu saṅkhārabhavesu antogadhānīti “**uppādā vā**”ti-ādikāya dhammaṭṭhitipāliyā saṅgahitāni. Bhavanibbattakasīlassa paññāpanaṃ satipi savane na tathāgatadesanāyattanti bhikkhu-ādīnampi taṃ vuttaṃ.

**Adhipaññāya paññā**<sup>1</sup>ti adhipaññāya antogadhā paññā. Atha vā adhipaññānibbattesu, tadadhiṭṭhānesu vā dhammesu adhipaññā-saddo daṭṭhabbo, tattha paññā **adhipaññāya paññā**.

771. Apāyuppādanakusalatā apāyakosallaṃ siyāti maññamāno pucchati “**apāyakosallaṃ kathaṃ paññā nāma jātā**”ti. Taṃ pana parassa adhippāyaṃ nivattento “**paññāvāyeva hī**”ti-ādīmāha. **Tatrupāyāti** tatra tatra upāyabhūtā. Ṭhāne uppatti etassāti **ṭhānuppattiyāṃ**. Kim taṃ? Kāraṇajānanaṃ, bhayādīnaṃ uppattikkhaṇe tasmim̐ yeva ṭhāne lahu-uppajjanakanti vuttaṃ hoti.

Tikaniddesavaṇṇanā niṭṭhitā.

#### 4. Catukkaniddesavaṇṇanā

793. **Na paritassatīti** “api nāma me taṇḍulādīni siyun”ti na pattheti, tadabhāvena vā na uttasati.

796. **Aparappaccayeti** parena napattiyāyitabbe. **Dhamme ñāṇanti** saccavisayaṃ ñāṇaṃ. Ariyasaccesu hi **dhamma**-saddo tesam̐ aviparītasabhāvattāti. Saṅkhatapavaro vā ariyamaggo tassa ca phalaṃ **dhammo**, tattha paññā taṃsahagatā **dhamme ñāṇaṃ**. Na aññāñāṇuppādanam̐ **nayanayaṃ**, ñāṇasseva pana pavattivisesoti adhippāyenāha “**paccavekkhaṇāñāṇassa kiccaṃ**”ti. Ettha ca **iminā dhammenāti** maggañāṇenāti vuttaṃ, duvidhampi pana maggaphalañāṇam̐ paccavekkhaṇāya ca mūlaṃ, kāraṇāṇca nayanayanassāti duvidhenapi tena dhammenāti na na yujjati, tathā catusaccadhammassa ñātattā, maggaphalasaṅkhātassa ca dhammassa saccapaṭivedhasampayogaṃ gatattā nayaṃ hotīti tena iminā

1. Atirekapaññāya paññam̐ (Aṭṭhakathāyaṃ)

dhammena ñāṇavisayabhāvena, ñāṇasampayogena vā ñātenāti ca attho na na yujjati.

Yadipi sabbena sabbaṃ atītānāgatapaccuppannaṃ dukkhaṃ abhijānanti, tathāpi paccuppanne sasantatipariyāpanne savisesse abhiniveso hotīti āha “**na taññeva iman**”ti. Diṭṭhena adiṭṭhena nayato **nayanaññāṇaṃ**, adiṭṭhassa diṭṭhatāya kāraṇabhūtattā **kāraṇaññāṇaṃ**, anurūpatthavācako vā kāraṇa-saddoti dhamme ñāṇassa anurūpaññānti attho.

**Sammutimhi ñāṇanti** dhamme ñāṇādīnaṃ viya sātisayassa paṭivedhakiccassa abhāvā visayobhāsanamattajānanasāmaññena ñāṇanti sammatesu antogadhanti attho. Sammutivasena vā pavattaṃ **sammutimhiññāṇaṃ**, avasesaṃ pana itaraññāṇattayavisabhāgaṃ ñāṇaṃ tabbisabhāgasāmaññena sammutiññāṇaṃhi paviṭṭhattā **sammutiññāṇaṃ** nāma hotīti.

797. **Kilesamūlake cāti** nīvaraṇamūlake ca kāmabhavadhamme.

798. **Sā hissāti** ettha **assāti** yo “kāmesu vītarāgo hotī”ti evaṃ vutto, assa paṭhamajjhānasamaṅgissāti attho. **Svevāti** etena kāmesu vītarāgabhāvanāvathasseva paṭhamajjhānasamaṅgissa gahaṇe pavatte tassa tato paraṃ avatthaṃ dassetuṃ “**kāmesu vītarāgo samāno**”ti vuttaṃ. Catutthamaggapaññā chaṭṭhābhiññābhāvappattiyā taṃ **paṭivijjhati** nāma, itarā tadupanissayattā. Yathānurūpaṃ vā āsavakkhayabhāvato, phale vā āsavakkhaye sati yathānurūpaṃ taṃnibbattanato catūsupi maggesu paññā **chaṭṭhaṃ abhiññāṃ paṭivijjhatī**ti daṭṭhabbā.

799. **Kāmasahagatāti** vatthukāmārammaṇā. **Codentīti** kāmābhimukhaṃ tanninnaṃ karontīti attho. **Tadanudhammatāti** tadanudhammā icceva vuttaṃ hoti. **Tā-saddassa** apubbatthābhāvatoṭi adhippāyenāha “**tadanurūpasabhāvā**”ti. Nikantiṃ, nikantisahagatacittuppādaṃ vā “**micchāsati**”ti vadati. “Aho vata me avitakkaṃ uppajjeyyā”ti avitakkārammaṇā **avitakkasahagatā**.

801. Adhigamabhāvena abhimukhaṃ jānantassa **abhijānantassa**, abhivisiṭṭhena vā ñāṇena jānantassa, anārammaṇabhūtaṅca taṃ ṭhānaṃ pākaṭaṃ karontassāti attho.

802. Vasitāpañcakarahitaṃ jhānaṃ **appaguṇaṃ**. Ettha catasso paṭipadā cattāri ārammaṇānīti paññāya paṭipadārammaṇuddesena paññā eva uddiṭṭhāti sā eva vibhattāti.

Catukkaniddesavaṇṇanā niṭṭhitā.

### 5. Pañcakaniddesavaṇṇanā

804. **Pañcaṅgiko sammāsamādhī**ti samādhi-aṅgabhāvena paññā uddiṭṭhāti. Pītipharaṇatādivacanena hi tameva vibhajati, “so imameva kāyaṃ vivekajena pītisukhena abhisandeti”ti-ādinā<sup>1</sup> nayena pītiyā sukhasa ca pharaṇaṃ veditabbaṃ. Pītipharaṇatāsukhapharaṇatāhi ārammaṇe ṭhatvā catutthajjhānassa uppādanato “**pādā viyā**”ti tā vuttā.

Dutiypañcake ca “**pañcañāṇiko**”ti samādhimukhena pañcañāṇāneva uddiṭṭhāni niddiṭṭhāni cāti daṭṭhabbāni. Lokiyasamādhissa paccanīkāni nīvaraṇapaṭhamajjhānanikanti-ādīni niggahetabbāni. Aññe kilesā vāretabbā, imassa pana arahattasamādhissa paṭippassaddhasabbakilesattā na niggahetabbaṃ vāretabbaṅca atthīti maggānantaraṃ samāpattikkhaṇe ca appayogeneva adhigatattā ca ṭhapitattā ca, aparihānivasena ṭhapitattā vā **na sasaṅkhāraniggayhavāritagato**<sup>2</sup>. **Sativepullappattattāti** etena appavattamānāyapi satiyā satibahulatāya sato eva nāmāti dasseti. **Yathāparicchinnakālavasenāti** etena paricchindanasatiyā satoti.

Pañcakaniddesavaṇṇanā niṭṭhitā.

1. Dī 1. 70; Ma 1. 344 piṭṭhe.

2. Na sasaṅkhāraniggayhavārivāvato (Ka)

### 6. Chakkaniddesavaṇṇanā

805. Visuddhibhāvaṃ dassento “**dūra -pa- rammaṇāyā**”ti āha. Sotadhātuvisuddhīti ca cittacetāsikā dhammā vuttāti tатtha ñāṇaṃ **sotadhātuvisuddhiyā ñāṇaṃ**. “Cetopariyañāṇaṃ”ti idameva atthavasena “**paracitte ñāṇaṃ**”ti uddhaṇanti daṭṭhabbaṃ. Cutūpapātañāṇassa dibbacakkhuñāṇekadesattā “**vaṇṇadhātu-ārammaṇā**”ti vuttaṃ. Muddhappattena cutūpapātañāṇasaṅkhātena dibbacakkhuñāṇena sabbaṃ dibbacakkhuñāṇanti vuttanti daṭṭhabbaṃ.

Chakkaniddesavaṇṇanā niṭṭhitā.

---

### 7. Sattakaniddesavaṇṇanā

806. **Tadeva ñāṇanti** chabbidhampi paccavekkhaṇañāṇaṃ vipassanārammaṇabhāvena saha gahetvā vuttanti adhippāyo. **Dhammaṭṭhitiñāṇenāti** chapi ñāṇāni saṅkhipitvā vuttana ñāṇena. **Khayadhammanti**-ādīnā hi pakārena pavattañāṇassa dassanaṃ, ñāṇavipassanādassanato vipassanāpaṭivipassanādassanamattamevāti na taṃ aṅganti adhippāyo. Pāḷiyaṃ pana sabbattha ñāṇavacanena aṅgānaṃ vuttattā **nirodhadhammanti ñāṇanti iti**-saddena pakāsetvā vuttaṃ vipassanāñāṇaṃ sattamaṃ ñāṇanti ayamatto dissati. Na hi yampi taṃ dhammaṭṭhitiñāṇaṃ, tampi ñāṇanti sambandho hoti taṃñāṇaggahaṇe etasmim ñāṇabhāvadassanassa anadhippetattā, “khayadhammaṃ -pa-nirodhadhammaṃ”ti etesaṃ sambandhābhāvappasaṅgato cāti.

Sattakaniddesavaṇṇanā niṭṭhitā.

---

### 8. Aṭṭhakaniddesavaṇṇanā

808. **Vihāritabbaṭṭhenāti** paccanīkadhamme, dukkhaṃ vā vicchinditvā pavattetabbaṭṭhena.

Aṭṭhakaniddesavaṇṇanā niṭṭhitā.

## 10. Dasakaniddesa

### Paṭhamabalaniddesavaṇṇanā

809. Avijjamānaṃ ṭhānaṃ **aṭṭhānaṃ**, natthi ṭhānanti vā **aṭṭhānaṃ**. Esa “**anavakāso**”ti etthāpi nayo. Tadatthanigamanamattameva hi “netam ṭhānaṃ vijjati”ti vacananti. Asukhe sukhanti diṭṭhivipallāsova idha sukhato upagamanassa ṭhānanti adhippetanti dassento “**ekanta -pa-attadiṭṭhivasenā**”ti padhānadiṭṭhimāha. Bhedānurūpassa sāvanaṃ **anussāvanaṃ**, bhedānurūpena vā vacanena viññāpanaṃ.

Liṅge parivatte ca so eva ekakammanibbattito bhavaṅgappabandho jīvitindriyappabandho ca, nāññoti āha “**api parivattaliṅgan**”ti. **Ayam pañhoti** ñāpanicchānibbattā kathā.

**Saṅgāmacatukkaṃ** sapattavasena yojetabbaṃ. Sabbattha ca purimaṃ abhisandhicittaṃ appamāṇaṃ, vadhakacittaṃ pana tadārammaṇaṅca jīvitindriyaṃ ānantariyānānantariyabhāve pamāṇanti daṭṭhabbaṃ. **Puthujjanasseva taṃ dinnam hoti**. Kasmā? Yathā vadhakacittaṃ paccuppannārammaṇampi jīvitindriyappabandhavicchedanavasena ārammaṇaṃ katvā pavattati, na evaṃ cāgacetaṇā. Sā hi cajitabbaṃ ārammaṇaṃ katvā cajanamattameva hoti, aññasakakaraṇaṅca tassa cajanam, tasmā yassa taṃ sakaṃ kataṃ, tasseva dinnam hotīti.

**Sanṭha -pa- kappavināseyeva mucatīti** idaṃ kappatṭhakathāya na sameti. Tattha hi **aṭṭhakathāyaṃ**<sup>1</sup> vuttaṃ “āpāyikoti idaṃ suttaṃ yaṃ so ekaṃ kappam asītibhāge katvā tato ekabhāgamattaṃ kālaṃ tiṭṭheyya, taṃ āyukappaṃ sandhāya vuttan”ti. **Kappavināseyevāti** pana āyukappavināseyevāti atthe sati natthi virodho. Ettha ca **sanṭhahanteti** idaṃ sve vinassisatīti viya abhūtaparikappavasena vuttaṃ. **Ekadivasameva paccati** tato paraṃ kappābhāvena āyukappassapi abhāvatoti avirodhato atthayojanā daṭṭhabbā.

**Pakatattoti** anukkhitto. **Samānasamvāsakoti** apārājiko.

---

1. Abhi-Ṭṭha 3. 234 piṭṭhe.

**Kim pana tanti** yo so “niyato”ti vutto, taṃ kimniyametīti attho. Tasseva pana yathāpucchitassa niyatassa micchattasammattaniyatadhammānaṃ viya sabhāvato vijjānānaṃ yathāpucchitaṅca niyāmakahetuṃ paṭisedhetvā yena “niyato”ti “sattakkhattuparamādiko”ti ca vuccati, taṃ yathāhippetakāraṇaṃ dassetuṃ “**sammāsambuddhena hī**”ti-ādimāha. Jātassa kumārassa viya ariyāya jātiyā jātassa **nāmamattametaṃ** niyatasattakkhattuparamādikaṃ, niyatāniyatachedaṃ nāmanti attho. Yadi pubbaheṭu niyāmakko, sotāpanno ca niyatoti sotāpattimaggaṃ uddham tiṇṇaṃ maggānaṃ upanissayabhāvato pubbaheṭukiccaṃ, tato pubbe pana pubbaheṭukiccaṃ natthīti sotāpattimaggaṃ **upanissayābhāvo āpajjati**. Yadi hi tassapi pubbaheṭu upanissayo siyā, so ca niyāmakoti sotāpattimaggupattito pubbe eva niyato siyā, taṅca aññānaṃ, tasmāssa pubbaheṭunā ahetukatā āpannāti imamatthaṃ sandhāyāha “**iccassa ahetu appaccayā nibbattiṃ pāpuṇāti**”ti.

**Paṭiladdhamaggo** sotāpattimaggaṃ, teneva sattakkhattuparamādiniyame sati sattaṃbhavādito uddham pavattanakassa dukkhassa mūlabhūtā kilesā teneva khīṇāti upari tayo maggā akiccaṃ hontīti attho. Yadi upari tayo maggā sattakkhattuparamādikaṃ niyamenti, tato ca aññānaṃ sotāpanno natthīti sotāpattimaggaṃ akiccaṃ nippayojanātaṃ āpajjati attho. Atha sakkāyadīṭṭhādippahānaṃ dassanakiccaṃ, tesaṃ pahānaṃ sattaṃbhavādītāya bhavitabbaṃ. Sā cuparimaggehi eva hotīti sattaṃbhavādito uddham pavattito tena vinā vuṭṭhāne sakkāyadīṭṭhādippahānaṃ ca tena vinā bhavitabbanti āha “**paṭhamamaggena ca anuppajjitvāya kilesā khepetabbā hontī**”ti. **Na aññānaṃ koci niyametīti** nāmakaraṇanimittato vipassanāto aññānaṃ koci niyāmakko nāma natthīti attho. Vipassanāya niyametīti ca nāmakaraṇanimittatāmyeva sandhāya vuttaṃ. Tenevāha “**iti sammāsambuddhena gahitaṃ nāmamattameva tan**”ti.

**Na uppajjantīti pana atthīti** “na me ācariyo atthi, sadiso me na vijjati”ti-ādim<sup>1</sup> imissā lokadhātuyā ṭhatvā vadantena bhagavatā “kim

---

1. Ma 1. 227; Ma 2. 295; Vi 3. 12; Abhi 4. 218 piṭṭhesu.

panāvuso sārīputta atthetarahi aññe samaṇā vā brāhmaṇā vā bhagavatā samasamā sambodhiyanti evaṃ puṭṭhāhaṃ bhante noti vadeyyan”<sup>1</sup>ti<sup>1</sup> vatvā tassa kāraṇaṃ dassetuṃ “aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā”<sup>2</sup>ti<sup>2</sup> imaṃ suttaṃ dassentena dhammasenāpatinā ca buddhakkhettabhūtaṃ imaṃ lokadhātum ṭhapetvā aññattha anuppatti vuttā hotīti adhippāyo.

“Yo pana bhikkhū”ti-ādinā vuttāni sikkhāpadāni **mātikā**, tāya antarahitāya nidānuddesasaṅkhāte pātimokkhe pabbajjūpasampadākammesu ca **sāsanam tiṭṭhatī**ti attho. Pātimokkhe vā antogadhā pabbajjā upasampadā ca tadubhayābhāve pātimokkhābhāvato, tasmā pātimokkhe, tāsu ca **sāsanam tiṭṭhatī**ti vuttaṃ. **Osakkitaṃ nāmā**ti pacchimapaṭivedhasīlabhedadvayaṃ ekato katvā tato paraṃ vinaṭṭhaṃ nāma hotīti attho.

**Tā**ti rasmiyo. **Kāruṇṇanti** paridevanakāruṇṇaṃ.

**Anacchariyattā**ti dvīsu uppajjamānesu acchariyattābhāvadosatoti attho. **Vivādabhāvatoti** vivādābhāvattamaṃ dve na uppajjantīti attho.

Ekam buddhaṃ dhāretīti **ekabuddhadhāraṇī**. Etena evaṃsabhāvā ete buddhaguṇā, yena dutiyabuddhaguṇe dhāretuṃ asamatthā ayaṃ lokadhātūti dasseti. Paccayavisesanipphannaṇāhi dhammānaṃ sabhāvaviseso na sakkā dhāretunti. Samaṃ uddhaṃ pajjatīti **samupādikā**, udakassopari samaṃ gāminīti attho. **Dvinnampī**ti dvepi, dvinnampi vā sarīrabhāraṃ. **Chādentanti** rocayamānaṃ. **Sakim bhuttovā**ti ekampi ālopaṃ ajjhoharivāva mareyyāti attho.

**Atidhamabhārenā**ti dhammena nāma pathavī tiṭṭheyya, sā kim teneva calatīti adhippāyo. Puna thero ratanaṃ nāma loke kuṭumbaṃ sandhārentaṃ abhimatañca lokena attano garusabhāvātāya sakāṭabhaṅgassa kāraṇaṃ atibhārabhūtaṃ diṭṭhaṃ. Evaṃ dhammo ca hitasukhavisesehi taṃsamaṅginaṃ dhārento abhimato ca viññūhi gambhīrāppameyyabhāvena garusabhāvattā atibhārabhūto pathavīcalanassa kāraṇaṃ hotīti

1. Dī 3. 94 piṭṭhe.

2. Ma 3. 110 piṭṭhe.



dassento “**idha mahārāja dve sakaṭā**”ti-ādimāha. **Ekassā**ti ekasmā, ekassa vā sakaṭassa ratanaṃ, tasmā sakaṭato gahetvāti attho. **Osāritanti** pavesitaṃ āhaṭaṃ vuttanti attho.

**Sabhāvapakatikā**ti akittimapakatikāti attho. **Kāraṇamahantattā**ti mahantehi pāramitākāraṇehi buddhaguṇānaṃ nibbattitoti vuttaṃ hoti. Pathavī-ādayo mahantā attano attano visaye ekekāva, evaṃ sammāsambuddhopi mahanto attano visaye eko eva. Ko ca tassa visayo? Yāvatakaṃ ñeyyaṃ, evaṃ ākāso viya anantavisayo bhagavā eko eva hotīti vadanto lokadhātvantaresupi dutiyassa abhāvaṃ dasseti.

Pubbabhāge āyūhanavasena **āyūhanasamaṅgitā** sanniṭṭhānacetanāvasena **cetanāsamaṅgitā** ca veditabbā, santatikhaṇavasena vā. **Vipākārahanti** dutiyabhavādīsu vipaccanapakatitaṃ sandhāya vadati. **Calatī**ti parivattati. Sunakhehi vajanasīlo **sunakhavājiko**.

Paṭhamabalaniddesavaṇṇanā niṭṭhitā.

### Dutiyabalaniddesavaṇṇanā

810. Gatito aññā gatisampatti nāma natthīti dassento “**sampannā gatī**”ti āha. Mahāsudassanādisurājakālo paṭhamakappikādisumanussakālo ca **kālasampatti**.

**Ekantaṃ kusalasseva okāsoti** idaṃ yadipi koci kāyasucaritādipayogasampattiyāṃ ṭhitaṃ bādheyya, taṃ pana bādhanāṃ bādhakasseva issādinimittena viparītaggāhena jātaṃ. Sā payogasampatti sabhāvato sukhavipākasseva paccayo, na dukkhavipākassāti imamatthaṃ sandhāya vuttaṃ. Makkaṭo bhattapuṭaṃ bandhaṭṭhāne muñcitvā bhuñjituṃ na jānāti, yattha vā tattha vā bhinditvā vināseti, evaṃ anupāyaññūpi bhoge. **Susāne chaḍḍetvāti**-ādinā ghātetvā chaḍḍitassa vuṭṭhānābhāvo viya apāyato vuṭṭhānābhāvoti dasseti.

“Paccarī”tipi **uḷumpassa** nāmaṃ, tena ettha katā “mahāpaccarī”ti vuccati. **Udake maraṇaṃ thale maraṇaṅca ekamevā**ti kasmā vuttaṃ, nanu sakkena “samuddārakkhaṃ karissāmi”ti vuttanti? Saccam vuttaṃ, jīvitassa lahu-parivattitaṃ pakāsentehi therehi evaṃ vuttaṃ, lahu-parivattitāya jīvitahetu na gamissāmāti adhippāyo. Atha vā **udaketi** nāgadīpaṃ sandhāya vuttaṃ, **thaleti** jambudīpaṃ.

**Thero na detī**ti kathamaḥam etena ñāto, kenaci kiñci ācikkhitaṃ siyāti saññāya na adāsi. Teneva “mayampi na jānāmā”ti vuttaṃ. **Aparassāti**<sup>1</sup> aparassa bhikkhuno pattaṃ ādāya -pa- therassa hatthe ṭhapesīti yojanā. **Anāyataneti** nikkāraṇe, ayutte vā nassanaṭṭhāne. **Tuvaṃ attānaṃ rakkheyyāsi**, mayaṃ pana mahallakattā kiṃ rakkhitvā karissāma, mahallakattā eva ca rakkhitaṃ na sakkhissāmāti adhippāyo. Anāgāmittā vā therō attanā vattabbaṃ jānitvā ovadati.

**Sammāpayogassa gatamaggoti** sammāpayogena nipphāditattā tassa sañjānanakāraṇanti attho.

Bhūtamattaṃ katvā abhūtopamaṃ kathayissatīti adhippāyo. **Manussāti** bhaṇḍāgārikādiniyuttā manussā mahantattā **sampaṭicchitum nāsakkhimsu**.

Dutiyabalaniddesavaṇṇanā niṭṭhitā.

### Tatīyabalaniddesavaṇṇanā

811. **Añcitāti** gatā. **Peccāti** puna, maritvāti vā attho. **Ussannattāti** vitakkabahulatāya ussannattāti vadanti, sūratādīhi vā **ussannattā**. **Dibbantīti** kīḷanti.

Sañjīvakāḷasuttasaṅghātaroruva mahāroruva tāpanamahātāpana avīciyo **aṭṭha mahānirayā**. Ekekassa cattāri dvārāni, ekekasmim dvāre cattāro cattāro gūthanirayādayoti evaṃ **soḷasa ussadaniraye** vaṇṇayanti.

1. Aparopi therassa (Aṭṭhakathāyam)

Sakkasuyāmādayo viya **jeṭṭhakadevarājā**. Pajāpativaruṇa-īśānādayo viya dutiyādiṭṭhānantarakārako **paricārako hutvā**.

Tatīyabalaniddesavaṇṇanā niṭṭhitā.

### Catutthabalaniddesavaṇṇanā

812. **Kappo**<sup>1</sup>ti dvedhābhūtaggo. Ettha ca bījādihātunānattavasena khandhādihātunānattam veditabban.

Catutthabalaniddesavaṇṇanā niṭṭhitā.

### Pañcamabalaniddesavaṇṇanā

813. **Ajjhāsayadhātū**ti ajjhāsayasabhāvo. Yathā gūthādīnam dhātusabhāvo eso, yaṃ gūthādīheva saṃsandati, evaṃ puggalānam ajjhāsayasassevesa sabbhāvo, yaṃ dussīlādayo dussīlādikeheva saṃsandantīti vuttam hoti. **Bhikkhūpi āhamsū**ti aññamaññam āhamsu. Āvuso ime manussā “yathāsabhāgena paribhuñjathā”ti vadantā amhe sabbhāgāsabhāge viditvā hīnajjhāsayapaṇītajjhāsayatam paricchinditvā dhātusaṃyuttakamme upanenti tassa payogaṃ daṭṭhukāmāti attho, evaṃ sabbhāgavaseneva ajjhāsayadhātuparicchindanato ajjhāsayadhātusabbhāgavasena niyametīti adhippāyo.

Pañcamabalaniddesavaṇṇanā niṭṭhitā.

### Chaṭṭhabalaniddesavaṇṇanā

**Caritanti** idha duccaritam sucaritanti vuttam. Apparajam akkham etesanti **apparajakkhā**ti attho vibhāvito, apparajam akkhamhi etesanti **apparajakkhā**tipi saddattho sambhavati. Ettha ca āsayajānanādīnā

---

1. Tambo (Aṭṭhakathāyam)

yehi indriyehi paroparehi sattā kalyāṇapāpāsayaḍḍikā honti, tesam jānaṇam vibhāvetīti veditabbaṃ. Evañca katvā indriyaparopariyatta-  
āsayānusayañāṇāṇam visum asādhāraṇatā,  
indriyaparopariyattanānādhimuttikatāñāṇāṇam visum balatā ca siddhā hoti.

815. **Yadariyā**ti ye ariyā. **Āvasimsū**ti nissāya vasimsu. Ke pana te?  
“Idha bhikkhave bhikkhu pañcaṅgavippahīno hoti chaḷaṅgasamannāgato  
ekārakkho caturāpasseno panuṇṇapaccekasacco samavayasatṭhesano  
anāvilaṇṇakappo passaddhakāyasaṅkhāro suvimuttacitto suvimuttapañño”<sup>1</sup>  
evaṃ vuttā. Etesu pañcaṅgavippahīnapaccekasaccapanodana-  
esaṇāsamavayasajjanāni “saṅkhāyekaṃ paṭisevati adhivāseti parivajjeti  
vinodeṭī”<sup>2</sup> vuttesu apassenesu vinodanañca maggakiccāneva, itare ca  
maggeneva samijjhanti. Tenāha “**etañhi suttam -pa- dīpetī**”ti.

816. Ārammaṇasantānānusayanesu iṭṭhārammaṇe ārammaṇānusayanena  
**anuseti. Āciṇṇasamāciṇṇā**ti etena samantato veṭhetvā viya ṭhitabhāvena  
anusayitattaṃ dasseti. Bhavassapi vatthukāmatā, rāgavasena vā samānattā  
“**bhavarāgānusayo -pa- saṅgahito**”ti āha.

818. “Paṇītādhimuttikā tikkhindriyā, itare mudindriyā”ti evaṃ  
indriyavisesadassanattameva adhimuttiggahaṇanti āha  
“**tikkhindriyamudindriyabhāvadassanattā**”ti.

819. **Pahānakkamavasena**ti ettha pahātabbapajahanakkamo  
pahānakkamoti daṭṭhabbo, yassa pahānena bhavitabbaṃ, taṃ teneva  
pahānena paṭhamam vuccati, tato appahātabbanti ayaṃ vā pahānakkamo.

820. Maggassa upanissayabhūtāni indriyāni **upanissaya-indriyāni**.

826. Nibbutichandarahitattā **acchandikatṭhānam pavitṭhā**. Yasmiṃ  
bhavaṅge pavattamāne taṃsantatiyaṃ lokuttaram nibbattati, taṃ tassa  
**pāḍakam**.

Chaṭṭhabalaniddesavaṇṇanā niṭṭhitā.

1. Dī 3. 224; Am 3. 279 piṭṭhesu.

2. Ma 2. 127 piṭṭhe.

### Sattamabalaniddesavaṇṇanā

828. **Niddāyitvā**ti kammaṭṭhānaṃ manasi karonto niddaṃ okkamitvā paṭibuddho samāpattiṃ samāpannomhīti attho. Nīvaraṇādīhi visuddhacittasantati eva **cittamañjūsā**, samādhi vā, kammaṭṭhānaṃ vā. **Cittaṃ ṭhapetunti** samāpatticittaṃ ṭhapetuṃ. Saññāvedayitānaṃ apagamo eva **apagamavimokkho**.

Saññāmanasikāraṇaṃ kāmādidutiyaḥhānādīpakhandanāni “**hānabhāgiyavisesabhāgiyadhammā**”ti dassitāni, tehi pana ḥhānānaṃ taṃsabhāvātā dhamma-saddena vuttā. Paṇḍabhāvavodānaṃ **paṇḍavodānaṃ**. Tadeva paṭhamajjhānādīhi vuṭṭhahitvā dutiyaḥhānādī-adhigamassa paccayattā **vuṭṭhānaṃ nāmā**”ti vuttaṃ. “Vodānampi vuṭṭhānaṃ, tamhā tamhā samādhimhā vuṭṭhānampi vuṭṭhānaṃ”ti imāya vuṭṭhānapāliya asaṅgahitattā nirodhasamāpattiyā vuṭṭhānaṃ “**pālimuttakavuṭṭhānaṃ nāmā**”ti vuttaṃ. Ye pana “nirodhato phalasaṃpattiyā vuṭṭhānaṃ”ti pāli natthīti vadeyyuṃ, te “nirodhā vuṭṭhahantassa nevasaññānāsaññāyātanaṃ phalasaṃpattiyā anantarapaccayena paccayo”ti<sup>1</sup> imāya pāliya paṭisedhetabbā.

Sattamabalaniddesavaṇṇanā niṭṭhitā.

### Dasamabalaniddesavaṇṇanā

831. Rāgādīhi cetaso vimuttibhūto samādhi **cetovimutti**. Paññāva vimutti **paññāvimutti**. **Kammantaravipākantamevā**ti kammantarassa vipākantamevāti attho. Cetanācetanāsaṃpayuttakadhamme nirayādinibbānagāminipaṭipadābhūte kammanti gahetvā āha “**kammaṃparicchedamevā**”ti. **Appetuṃ na sakkoti** aṭṭhamanavaṃsabalāni viya, taṃsadisāṃ iddhividhaññaṃ viya vīkubbituṃ. Etena dasabalasadisatañca vāreti, ḥhānādīññaṃ viya vā appetuṃ vīkubbituñca. Yadi pi hi ḥhānādīpaccavekkhaṇaṇñaṃ sattamabalanti tassa savitakkasavicāratā vuttā, tathāpi

1. Abhi 8. 138 piṭṭhe.

jhānādīhi vinā paccavekkhaṇā natthīti jhānādisahagataṃ ñāṇaṃ  
 tadantogadhaṃ katvā evaṃ vuttanti veditabbaṃ. Atha vā sabbaññutaññāṇaṃ  
 jhānādīkiccaṃ viya na sabbaṃ balakiccaṃ kātuṃ sakkotīti dassetuṃ **“tañhi  
 jhānaṃ hutvā appetuṃ iddhi hutvā vikubbituṅca na sakkotī”**ti vuttaṃ, na  
 pana kassaci balassa jhāna-iddhibhāvatoti daṭṭhabbaṃ.

Ñāṇavibhaṅgavaṇṇanā niṭṭhitā.

## 17. Khuddakavatthuvibhaṅga

### 1. Ekakamātikādivaṇṇanā

832. “Tettiṃsati tikā”ti vuttaṃ, te pana **pañcatimsa**. Tathā “purisamalādayo aṭṭha navakā”ti vuttaṃ, te pana **āghātavatthu-ādayo nava**. Ye “dve aṭṭhārasakā”ti-ādimhi vuttā, te eva “iti atītāni chattimsā”ti-ādinā tayō chattimsakā katāti āha “**cha aṭṭhārasakā**”ti, dvāsaṭṭhi pana diṭṭhigatāni aññattha vuttabhāveneva idha nikkhittānīti na gahitānīti daṭṭhabbāni.

Ekakamātikādivaṇṇanā niṭṭhitā.

### 1. Ekakaniddesavaṇṇanā

843-844. **Atthipaṭiccaṃ nāmāti** yathā “cakkhuñca paṭicca”ti-ādīsu nissayādiṭṭhābhāvena paṭiccaṃti vuttaṃ, na tathā idha khattiyādiṭṭhābhāvena paramatthato avijjamānānaṃ nissayādiṭṭhābhāvenā bhāvaṃ. Yesu pana khandhesu santesu khattiyādisammuti hoti, tesāṃ abhocchinnatāva khattiyādiṭṭhābhāvaṃ atthitā, sā idha paṭicca-saddena vibhāvitāti attho. **Ekissā seṇiyāti** asambhinnāyāti attho.

Pañhavissajjanādikiriyaṃ purato karaṇaṃ **purekkhāro**. **Nikkheparāsīti** nidhānarāsī. **Patthaṭākittinoti** vitthiṇṇākittino. **Rattaññumadoti** purāṇaññutāmadoti vadanti. Cirarattijātena, cirarattipabbajitena vā jānitabbassa, rattīnameva vā jānanamado. **Upaṭṭhāpakamānoti** āṇākaraṇamāno. **Āṇākaraṇaṃhi** vicāraṇaṃ idha “**yaso**”ti vuttanti. Parimaṇḍalattabhāvanissito māno **pariṇāhamado**. Sarīrasampattipāripūriyā mado **pāripūrimado**.

845. Vatthunā vināpi vattabbatāya **avatthukam**, na vatthuno bhāvaṃ.

846. **Cittassa vossajjananti** cittassa satito mucchanā, kāyaduccaritādīsu pakkhandanaṃ vā **vossaggo**. **Patitṭhābhāvoti** kusalakarāṇe aṭṭhānaṃ,

anuṭṭhānanti attho. Pamādasāṅkhātassa **atthassa** kāyaduccarite cittassa vossaggo pāṇātipāte micchādīṭṭhiyaṃ kodhe upanāheti evamādiko pariyaṃyo apariyanto, tadatthappariyaṃyappakāsako vossagganissaggādiko byañjanapariyaṃyo cāti sabbaṃ taṃ saṅkhipitvā evarūpoti idaṃ ākāranidassanaṃ sabbapariyaṃyassa vattum asakkuṇeyyattā katanti dassento āha “**pariyantābhāvato**”ti. **Vissatṭhākāro**ti satiyā paccanīkabhūte cattāro khandhe dasseti.

847. **Cittassa thaddhatā** tathāpavattacittamevāti vadanti, mānaviseso vā daṭṭhabbo. Upasaṅkamane vanditabbaṃ hotīti **pariyanteneva carati**.

848. “Āpattim āpannosī”ti vutte “āvuso tvaṃ āpannosī”ti-ādinā tena vuttaṃ tasseva upari khipanavasena “**paṭippharivā**”ti vadanti. “Tasmim nāma dalidde, akusale vā idaṃ karonte ahaṃ kasmā na karomī”ti evaṃ idha paṭippharaṇaṃ yuttaṃ. Karaṇassa uttarakiriya **karaṇuttariyaṃ**. **Akusalapakkho esāti** sārambhoti adhippāyo.

849. Aticca icchatīti aticciccho, tassa bhāvo aticcicchatāti vattabbe cci-kāralopaṃ katvā “**aticchatā**”ti vuttaṃ. **Atricchatāti** ca sā eva vuccatīti. Tetrāpi neruttikavidhānena padasiddhi veditabbā. Yathāladdhaṃ vā atikkamitvā atra atra icchanāṃ **atricchatā**, sā eva ra-kārassa ta-kāraṃ katvā “**aticchatā**”ti vuttā.

**Atricchanti** aticchaṃ, atra vā icchanto. Kena? **Atilobhena** atilobhamicchāsāṅkhātena **atilobhamadena** ca. Attano hitaṃ **attāti**<sup>1</sup> vuttaṃ. **Hāyati** jīrati, ādiṇṇo vā **attā**, patto vā **attā**, naṃ jīrati candakinnarim patthayitvā asitābhūdeviyā vihīno viya.

**Ichāsatasāti** icchāya upaddutassa, mudditassa vā.

**Atihīlayānoti** avamaññamāno. **Malaka**<sup>2</sup>nti evaṃnāmakaṃ janapadaṃ, abbhokāsaṃ vā. **Kodaṇḍakenāti** kudaṇḍakena rassadaṇḍakena. Gaddulenāti ca vadanti. **Ruhiramakkhitaṅgoti** ruhirasinnagatto.

1. Atthamhāti (Aṭṭhakathāyaṃ)

2. Mallagāmaṃ (Aṭṭhakathāyaṃ)



850. Jānantasseva bhiiyo bhiiyo codento viya **sambhāvetukāmo hoti**. **Paccayeti upādānādipaccaye**.

851. Ye patirūpena vañcenti, te **gaṇṭhikā**, durācārena vā gaṇṭhibhūtā. **Gaṇṭhikaputtā nāma gaṇṭhikā eva honti, tena** saddhivihārikā gaṇṭhikabhāvena “**thero -pa- dīghacaṅkame viharatī**”ti vadanti.

**Vaṭṭati bhanteti** ayampi eko pakāro, lābhina eva pana sakkā nātunti attano samāpattilābhitam sūcetīti attho. **Pañcattayam** nāma uparipaṇṇāsake dutiyasuttam<sup>1</sup>. Tassa gambhīrattā vadati “**pañcattayam olokontassā**”ti.

852. **Singanti** singāram. Tañhi kusalassa vijjhanato samāsevitatāya sīse parikkhataṃ sunikkhataṃ visāṇam viya, thirattā ca singam viyāti singam, tam panatthato rāgo.

853. Temanakaraṇatthe **tintiṇa**-saddo daṭṭhabbo. **Khīyananti** ca yena lobhena param mamanti vadantaṃ khīyati, so vutto. **Khīyanam** bhaṇḍananti ca vadanti. **Tintiṇanti** vā loluppamicceva vuttaṃ hoti. Saññā-saddo hi eso loluppavācakoti.

854. **Ūruppamāṇāpīti** etena mahantaghanabhāvena apūtitaṃ dasseti. **Atha vāti-ādinā** cīvaramaṇḍanādīnam visesanāni “imassa vā pūtikāyassa bāhirānam vā parikkhārānam maṇḍanā”ti-ādīnīti dasseti. Cīvarena hi maṇḍanā **cīvaramaṇḍanā**, cīvarassa vā maṇḍanā **cīvaramaṇḍanā**, evam **pattamaṇḍanā senāsanamaṇḍanā** cāti adhippāyo. Ūnaṭṭhānapūraṇam chavirāgasusaṅghānādikaraṇaṅca cīvarādīsu kāye ca yathāyogam yojetabbam. **Tadahujātadārako viya hotīti** dārakacāpalyam na muñcatīti attho.

855. Sadiśā anurūpā bhatti sabhāgo, na sabhāgo asabhāgo, mānathaddhatā, virodho vā. Tenassa mātādīsu vattanam **asabhāgavuttitā**. Evamvidhānam mānādhikānam akusalānamidaṃ nāmam.

---

1. Ma 3. 18 piṭṭhe.

856. **Paritassitā**ti saṅkampanā, ukkaṅṭhitassa vā tassa tassa taṇhāyanā.

857. Kusalakarāṇe kāyassa avipphārikatā līnatā **jāti-ālasyaṃ**, na roga-  
utubhojanādīhi kāyagelaññaṃ **tandī** nāma, atha kho pakati-ālasanti attho.  
**Kāyālasiyanti** nāmakāyassa ālasiyaṃ, tadeva rūpakāyassāpīti daṭṭhabbaṃ.

858. Accasanādīhi uppanadhātukkabhānimittāṃ ālasiyaṃ **viambhitā**.

859. Bhattanimittena uppannaṃ ālasyaṃ **bhattasammado**.

860. **Imehi panā**ti cittassa akalyatādīhi. Sabbattha **kilesavasenā**ti  
thinamiddhakāraṇānaṃ rāgādīnaṃ vasenāti daṭṭhabbaṃ.

861. Sammā-ājīvato apeto katoti **apakato**. So ājīvupaddavena upaddutoti  
katvā āha “**upaddutassāti attho**”ti.

**Tividhampi taṃ** tattha āgataṃ tassa nissayabhūtāya imāya pāḷiyā  
**dassetunti** evamattho daṭṭhabbo.

**Pāpaṅkānī**ti āpaṇato chaḍḍitāni. **Nantakānī**ti antarahitāni, cīrāni vā.  
Gilānassa paccayabhūtā bhesajjasāṅkhātā jīvitaparikkhārā  
**gilānapaccayabhesajjaparikkhārā**. **Pūtimuttanti** purāṇassa apurāṇassa ca  
sabbassa gomuttassetāṃ nāmaṃ. Pūtibhāvena chaḍḍitosadhantipi keci.

Agabbhikā ekadvārā dīghasālā kira **uddaṇḍo**. Kucchitarajabhūtāya  
pāpicchatāya niratthakakāyavacīvipphandaniggahaṇaṃ korajaṃ, taṃ etassa  
atthīti korajiko, ativiya korajiko **korajikakorajiko**. Atiparisāṅkitoti keci.  
**Mukhasambhāvitoti** korajikakorajikādibhāvena pavattavacanehi attano  
mukhamattena aññehi sambhāvito. So evarūpo evarūpatāya eva attānaṃ  
paraṃ viya katvā “**ayaṃ samaṇo**”ti-ādīṃ katheti.

**Paṇidhāyā**ti “arahāti maṃ jānantū”ti cittaṃ ṭhapetvā, patthetvā vā.  
**Āpāthakajjhāyī**ti manussānaṃ āpāthaṭṭhāne samādhīṃ samāpanno viya  
nisīdanto āpāthake janassa pākāṭaṭṭhāne jhāyī.

Aññaṃ viya katvā attano samīpe bhaṇanaṃ **sāmantajappitaṃ**. Ākāraṣṣa rassattaṃ katvā “**aṭhapanā**”ti vuttaṃ. Kuhanaṃ kuho, tassa ayanā pavatti **kuhāyanā**, kuhassa vā puggalassa ayanā gatikiriyā **kuhāyanā**.

862. **Putṭhassāti** “ko tisso, ko rājapūjito”ti putṭhassa. **Nahanāti** bandhanā pariveṭhanā.

863. Nimittena caranto jīvanto nimittakārako nemittiko, tassa bhāvo **nemittikatā**. Attano icchāya pakāsaṇaṃ **obhāso**. Ko pana soti? “Ajjā bhikkhūnaṃ paccayā dullabhā jātā”ti-ādikā **paccayapaṭisaṃyuttakathā**. Icchitavatthussa samīpe kathaṇaṃ **sāmantajappā**.

864. Bahi chaḍḍanaṃ **upekkhanā**. Parapiṭṭhimaṃsakhādanasīlo parapiṭṭhimaṃsiko, tassa bhāvo **parapiṭṭhimaṃsikatā**.

865. Nikattum appena lābhena bahukaṃ vañcetvā gahetum icchanaṃ nijigīsaṇaṃ, tassa bhāvo **nijigīsanatā**. Tasseva icchanassa pavatti-ākāro, taṃsahajātaṃ vā gavesanakammaṃ.

866. Vaṇṇasampannaṃ pokkharāṃ vaṇṇapokkharanti uttarapadalopo pubbapadassa daṭṭhabbo, vaṇṇapāripūrī vā **vaṇṇapokkharatā**. “Atthajāpikā”ti ettha viya japa-saddo uppattivācakoti āha “**pavatteti**”ti.

867. Seyyasadisamānā unnativasena pavattāti ubhayatthāpi “**mānaṃ jappeti**”ti vuttaṃ.

868. Hīnamāno pana onativasena pavattito kevalena mānasaddena niddesaṃ nārahatīti taṃniddese “**omānaṃ jappeti**”ti<sup>1</sup> vuttaṃ.

872. Rājabhogena raṭṭhabhuñjanako rājanissito **raṭṭhiyo**.

879. **Puggalaṃ anāmasitvāti** yathā seyyassa seyyamānādiniddesesu “parehi seyyaṃ attānaṃ dahatī”ti seyyādipuggalo

---

1. Abhi 2. 368 piṭṭhe.

mānuppādako āmaṭṭho, evametassa seyyamānabhāvepi  
mānuppādakapuggalavisesaṃ anāmasitvā “pare atimaññati”cceva vuttanti  
attho. Pare atikkamitvā maññanañhi yassa kassaci atimānoti.

880. Purimamānassa uparimāno **mānātimāno**, **ati**-saddo upari-saddassa  
attham vadatīti daṭṭhabbo. Purimamānaṃ vā atikkanto māno **mānātimāno**.

881. Pakkhijātīsu vāyaso anto lāmakoti katvā “**kākajāti viyā**”ti vuttam.

882. Thero kira dosacarito ahosi, tasmā āditova “tumhe akhīṇāsavā”ti  
avatvā upāyena kathesīti vadanti, dosacaritattā vā khippaṃ tatiyapadavāre  
virāgaṃ uppādesīti adhippāyo.

883. **Mānaṃ anugatacchando**ti mānasampayuttachando, mānasabhāvaṃ  
anugato mānacchando vā.

884. “Vilambanan”ti ca  
itthipurisasammānanādikiriyādivilambanapaṭisaṃyuttaṃ kattabbaṃ  
daṭṭhabbaṃ. Tattha yuttamuttasiliṭṭhaṃ paṭibhānaṃ **vilambanapaṭibhānaṃ**.

887. Amaravādapāṭisaṃyutto vitakko attano amaraṇatthāya,  
devabhāvattthāya vā vitakko **amaravitakko**.

888. Paresu anuddayā rāgavasena anuddayakaraṇaṃ etassāti  
parānuddayo, tassa bhāvo **parānuddayatā**, paresu vā anuddayasseva  
sahananditādikassa bhāvo **parānuddayatā**, tādiso rāgo. **Tatthāti**  
parānuddayatāya saṃsaṭṭhavihārena dassitāyāti attho yujjati.

890. Anavaññattim patthento anavaññattatthameva kāmaguṇe ca  
patthetīti āha “**pañcakāma -pa-** nissito hutvā”ti.

Ekakaniddesavaṇṇanā niṭṭhitā.

## 2. Dukaniddesavaṇṇanā

891. **Upanayhatī**ti bandhati. A-kāro anantaratthavācako, mariyādavācakassa vā ākārassa rassattaṃ katvā “aṭṭhapanā”ti vuttanti “**anantaratṭhapanā**”ti-ādimāha. Tattha paṭhamuppannassa pavattākāro mariyādā, taṃ anaticcāmitvā tasseva daḥhikaraṇavasena ṭhapanā **mariyādatṭhapanā**. **Pakatiṭṭhapanā**mattameva, visesanarहितīti attho.

892. Niṭṭhuriyaṃ khelaṭpātanāṃ, niṭṭhuriyaṃ viya **niṭṭhuriyaṃ**. **Dassetvā**ti dantehi chinditvā. Tena pana dassanaṃ **paḷāsoti** dasseti. **Paḷāsassa āyanā**ti yugaggāhappavatti. Samabhāvadahanāṃ **jayo**, tassa āharaṇato **āhāro**. **Dhuraṃ na detī**ti pāmokkhaṃ na deti.

894. Kāyena cetiyaṅgaṇādivattaṃ karoti “evaṃ vattasampanno saddho kathaṃ kāyaduccaritādāni karissatī”ti paresaṃ nāpanatthaṃ. **Aticcā**ti accayaṃ katvā. **Āsarantī**ti āgacchanti, puna paṭicchādane pavattantīti attho. Konāmevaṃ karotīti vocchindanacchādanā vā **vocchādanā**.

**Na sammā bhāsītā**ti yo na sammā bhāsati, so **saṭhoti** dasseti. **Kucchi vā piṭṭhi vā jānituṃ na sakkā**ti asantaḡuṇasambhāvaneneva cittaṇurūpakiriyāviraḡato “evaṃcitto evaṃkiriyo”ti jānituṃ na sakkāti attho.

Ajo eva **ajāmigo**. **Nelakoti** taruṇavaccho. Yathā so yakkho tādisaṃ rūpaṃ dassetvā “ajā”ti saññāya āgatāgate khādati, evamayampi taṃtaṃsadisaḡuṇasambhāvanena te te vañceti. Tenetaṃ sāṭheyyaṃ māyāto balavataṛā vañcanāti daṭṭhabbaṃ. Teneva “**parikkhattatā**”ti vuttaṃ.

908. Sakkāyadiṭṭhādānaṃ abhāvepi yaṃ saṃyojanaṃ hoti, taṃ bahiddhā saṃyojanato bahiddhāsaṃyojanassa puggalassa visesanabhūtaṃ **bahiddhāsaṃyojanaṃ nāma**.

Dukaniddesavaṇṇanā niṭṭhitā.

### 3. Tikaniddesavaṇṇanā

909. Akusalamūlāneva vaṭṭamūlānīti tehi kathitehi vaṭṭamūlasamudācāro kathito hotīti āha “**tīhi -pa- kathito**”ti.

919. **Sassato lokoti**-ādidassanameva brahmacariyaṃ mokkhasampāpakaṃ uttamacariyanti diṭṭhigatikehi sammatanti āha “**diṭṭhigatikasammatassā**”ti. Rūpārūpāvacaravipākesu sātisayo bhavarāgoti adhippāyena vuttaṃ “**mahābrahmānan**”ti.

920. **Kathamvidhanti** kenākārena saṅghitanti atthoti katvā āha “**ākārasaṅghānan**”ti. **Mānaṭhapanā**ti seyyādivasena mānena ṭhapanā, mānasaṅkhātā vā ṭhapanā.

921. **Cetaso utrāso** domanassaṃ, doso vā, taṃsampayuttā vā cetaṇādayo.

922. **Desanāsukhatāyāti** tiṇṇaṃ addhānaṃ vasena vicikicchāya desanā sukhā “kaṅkhati vicikicchati”ti, na pana tathā mohenāti adhippāyo. **Vaṇṇādibhedan** sutvāti keci kira vadanti “khattiyajīvo paṇḍuvaṇṇo. Kasmā? So hi pubbaṅhe ramati, pubbaṅhe ca chāyā paṇḍuvaṇṇā. Brāhmaṇavessasuddajīvā odātapītakāḷavaṇṇā. Te hi majjhanhasāyanharattīsu odātapītakāḷachāyā kālātamakālesu ramantī”ti tesāṃ vaṇṇabhedaṃ, “byāpī parimaṇḍalo”ti-ādinā kathentānaṃ saṅghānabhedaṅca sutvā.

923. **Purisapuggaloti** padadvayaṃ ekapadaṃ katvā jānantānaṃ vassenāyaṃ sammutikathā pavattā, padantameva vā idaṃ puggalavācakanti dassento “**ayam panā**”ti-ādimāha. Atha vā purisoti vutto ca puggalo eva, na purisindriyayuttovāti dassanatthampi “**purisapuggalo**”ti vuttanti veditabbaṃ. **Aṭṭhasu ābādhesūti** pittasemhavātasamuṭṭhāna utuvipariṇāmaja opakkamikavisamaparihāraja sannipātaja kammaṃsamuṭṭhānesu. **Pubbe katanti** purāṇatarakammaṃ icchantīti upapajjavedanīyaṅca kira paṭikkhipanti. **Āṇattimūlakena vāti** yopi āṇāpetvā vadhabandhādidukkaṃ uppādeti, tampi taṃmūlakaṃ na hoti, issaranimmānamūlamevāti adhippāyo.

924. **Mohassa anudahanam** dāhakāraṇatāya vuttam, sabhāvatopi pana asampaṭivedho sampāṭivedhasukhassa paccanīkabhūto dukkho evāti anudahanatā veditabbā. Evañca katvā “upekkhā vedanā nāṇasukhā aññāṇadukkhā”ti<sup>1</sup> vuttā.

926. **Puthunimittārammaṇesūti** subhanimittādivasena puthunimittasabhāvesu ārammaṇesu, puthusabhāvesu vā subhanimittādi-ārammaṇesu. Kosajjapamādaniddesānam samānattepi avipphārikatāsaṅkhātā līnavuttitā **kosajjam**, sativossaggasaṅkhātam pamajjanam **pamādoti** ayam visesoti.

931. **Sagaruvāsanti** sa-ottappavāsamāha, **sajettṭhakavāsanti** sahirivāsam. Anādiyanā **anaddā** ovāda-aggahaṇam, acittikāroti attho. Sukkhakaṭṭhassa viya anallatā, amudutā vā **anaddā**. **Asīlyanti** asukhasīlatā amudutā eva.

934. **Upārambho** dosasampayuttacittuppādo siyā.

936. “Idha pāsānam karoti”ti-ādinā ṭhapanatthepi karotisaddo yujjātī āha “**karotīti ṭhabetī**”ti. Ettha cāyam āvajjanā akusalānam āsannakāraṇattā khuddakavatthūsu vuttāti veditabbā, tadanukūlakiccattā vā.

Tikaniddesavaṇṇanā niṭṭhitā.

#### 4. Catukkaniddesavaṇṇanā

939. **Itīti nidassane nipātoti** evam-saddena samānatthoti dasseti. **Bhavābhavahetūtipīti** ettha bhavanti jāyanti etenāti **bhavo**, sappi-ādibhesajjam. Bhavo eva paṇītatāro abhivuddho **abhavo**. Bhāvanārāmatā-ariyavaṃsappaheyyattā vā purimataṇhāttayavajjā sabbā taṇhā “bhavābhavahetu uppajjati”ti vuttāti veditabbā.

---

1. Ma 1. 377 piṭṭhe.

**Etāyāti** chandādi-agatiyā. **Na gacchantīti** na pavattanti, taṃ taṃ kiriyaṃ na karontīti attho. **Imināti** chandādinā agatigamanena. Chandādīsu yena ninno, tena gamaṇaṃ **yathāninnagamaṇaṃ**.

“Rājā”ti-ādinā rājādinimitto viya ūmi-ādinimitto cittutrāso **ūmi-ādibhayaṃ**, “ūmibhayanti kho bhikkhave kodhupāyāsassetāṃ adhivacanaṃ”ti-ādivacana<sup>1</sup> kodhupāyāsa-odarikattapañcakāmaguṇamātugāmā vā. Tattha pañcakāmaguṇamātugāmaggaṇaṇa tannissitachandarāgaggahaṇaṃ veditabbaṃ, odarikattañca lobhova. Ukkhepanīyādikammaṃ **vinayaḍaṇḍaṃ**.

“Atha kho timbaruko paribbājako yena bhagavā -pa- etadavoca ‘kiṃ nu kho bho gotama sayāmkataṃ sukhadukkhaṃ’ti. Mā hevaṃ timbarukāti bhagavā avocā”ti-ādinā nidānavagge<sup>2</sup> āgatattā **“timbarukadiṭṭhī”**ti vuttā.

Catukkaniddesavaṇṇanā niṭṭhitā.

### 5. Pañcakaniddesavaṇṇanā

940. **Āganturaṃ pana na dentīti** āgamanassa paccayā na hontīti attho ḍaṭṭhabbo.

941. **Avadehanatoti** pūraṇena maṃsūpacayahetutāya ca upacayanato. Gimhakāle bhuñjitvā sayantassa sukhaṃ hotīti taṃ utusukhaṃ **“seyyasukhaṃ”**ti vuttaṃ, sayaniriyāpathasukhanti attho. **Vatanti** dhutaṅgāni. **Tapoti** khandhakavattāni, vīriyaṃ vā. Silaggahaṇaṇa khandhakavattamethunaviratīnaṃ gahitattā tapabrahmacariyaggahaṇaṃ na kattabbanti ce? Na, aññasīlato visesetvā tapabrahmacariyānaṃ devattakāraṇattaggahaṇassa dassanato, bāhirānañcassa vinibandhassa pavattidassanato vā. Tesañhi avihimsādigovatādidukkarakārikāmethunaviratiyo yathākkamaṃ silādīni, tāni ca te devanikāyaṃ pañidhāya carantīti. **Aññathā ca** saddhārucci-ādīhi “yato kho bho ayaṃ attā rūpī cātumahābhūṭiko mātāpettikasambhavo kāyassa bheda ucchijjati”ti-ādinā<sup>3</sup> vikappetvā.

1. Ma 2. 123; Am 1. 439; Khu 1. 271 piṭṭhesu.

2. Sam 1. 261 piṭṭhe.

3. Dī 1. 31 piṭṭhe.



942. Byasanesu ñātibhogarogabyasanaggahaṇena taṃnimittā sokādayo gahitāti daṭṭhabbā. Dassanasavanesu paṭikūlatā **dassanasavanapaṭikūlatā**. Ettha ca ādinavehi pañcahi tesam kāraṇabhūtā akkhantiyeva bhinditvā kathitāti veditabbā, akkhantimūlakā vā appiyatādihetubhūtā dukkaṭadubbhāsitatādidosā.

Micchājīvanimittam maraṇakāle uppannabhayaṃ “**ājīvakabhayan**”ti vuttam. “Ājīvikābhayan”ti pana pāṭhe paccayānuppattim passato ājīvikanimitto cittutrāsoti attho daṭṭhabbo. Kittisaddo silokanti tappaṭipakkhā asilokam akitti. Tenāha “**garahabhayan**”ti.

943. **Uppilāvīṭanti** udaggaṭāsankhāto avūpasamabhāvo, avūpasamahetubhūto vā pītiyā ākāro.

Pañcakaniddesavaṇṇanā niṭṭhitā.

## 6. Chakkaniddesavaṇṇanā

944. “Kodhano hoti upanāhī”ti-ādinā kodhādihetukā upanāhādayo kodhādīnam saḥāyakāraṇabhāvena suttante vuttāti kodhādayo eva **vivādamūlāni**, tenettha te eva vuttā. **Sandiṭṭhiparāmasitā** attano diṭṭhiyam abhiniviṭṭhatā.

945. **Appatissayoti** patissayabhūtehi garūhi virahito. **Appamādalakkhaṇanti** sati-avippavāsam kusalanuyogasātaccam vā.

**Yuttapayuttatāti** tanninnatāvasena suṭṭhu yuttatā. **Gaṇasaṅgaṇikā** kilesavasena pavattā saṅgaṇikā. Itthipaṭisaṃyuttakathāsavane itthisaddasavane ca assādo **savanasaṃsaggo**. Itthiyā kassaci dānaggahaṇassādo **paribhogasaṃsaggo**.

946. **Somanassena saddhirūpavicārānti** somanassupavicārānti akusalasomanassasahagatā rūpavicārādayo idhādhippetāti veditabbā, tathā **upekkhupavicārā** ca. **Taṃsampayutto vāti** etena vicāraggahaṇena

vītakopi gahitoti vītakappavattanena “upavītakketī”ti idampi vuttaṃ hotīti dasseti.

947. **Aññāṇasampayuttā**ti vicikicchuddhaccasahagatacittesu upekkhā mohoti vadanti, lobhasampayuttupekkhāpi pana gehassitā na na hoti.

948. **Adhiccāsammuppanniko** “adhicca sammuppanno attā uppanno bhavissatī”ti gaṇhanto sassatadiṭṭhiko hotīti evarūpassa diṭṭhi viyāti dassento “**adhiccāsammuppannikassevā**”ti āha. **Na so jātoti** ettha “jātū”ti ayaṃ nipāto u-kārassa o-kāraṃ katvā jātoti vutto, tena vā samānattaṃ nipātantaṃ etaṃ daṭṭhabbaṃ. **Sabbāsavadiṭṭhīti sabbāsavapariyāyena** āgatā diṭṭhi.

Chakkaniddesavaṇṇanā niṭṭhitā.

### 7. Sattakaniddesavaṇṇanā

951. Dvāsaṭṭhiyā diṭṭhīsu satta-kassa aññassa abhāvā satta ucchedavādā eva idha tathā avatvā “satta diṭṭhī”ti vuttā.

Sattakaniddesavaṇṇanā niṭṭhitā.

### 8. Atṭhakaniddesavaṇṇanā

952. “Kammaṃ kho me kattabbaṃ bhavissatī”ti-ādinā osīdanākārena pavattacittuppādā **kosajjakāraṇāni**, kosajjameva vā kosajjantarakāraṇatāya **kosajjakāraṇānī**ti daṭṭhabbāni. **Māsācitarā maññeti** ettha ācita-saddo tinta-saddassa, maññe-saddo ca viya-saddassa atthaṃ vadatīti adhippāyena “tintamāso viyā”ti ayamatto vibhāvito, māsacayo viyāti vā attho.

957. **Pharatīti** phusati, ghaṭṭetīti attho. **Aññena kāraṇenā**ti “ajja tayā vikāle bhuttaṃ, tena tvaṃ āpattim āpannosī”ti vutto

“hiyyo mayā kāle bhuttaṃ, tenāhaṃ anāpanno”ti-ādinā aññena ayuttena kāraṇena aññaṃ yuttaṃ kāraṇaṃ paṭicchādetīti attho. Pucchitatthato bahiddhā yathā taṃ na allīyati, tathā kathāya apanayanam vikkhipanam **bahiddhā apanāmanā**.

958. **Asaññīvādā**ti puggalehi diṭṭhiyo dasseti. Yehi vā abhinivesehi asaññī attānaṃ vadanti, te **asaññīvādā**. **Arūpasamāpattinimittanti** ākāśādīṃ.

Aṭṭhakaniddesavaṇṇanā niṭṭhitā.

### 9. Navakaniddesavaṇṇanā

960. Dasamassa avuttattā “**sattesu uppattivaseveva kathitānī**”ti vuttaṃ.

963. **Sukhavinicchayanti** sevitaḥḥāsevitaḥḥasukhasanniṭṭhānanti attho. **Ajjhattaṃ sukhanti** sevitaḥḥaṃ nekkhammasukhaṃ. **Vinicchayāti dve vinicchayāti** idaṃ—

“Sātaṃ asātanti yamāhu loke,  
Tamūpanissāya pahoti chando.  
Rūpesu disvā vibhavaṃ bhavañca,  
Vinicchayaṃ kubbatī jantu loke”ti<sup>1</sup>—

etassa niddese vuttaṃ.

**Idha vinicchayoti vuttoti** imissā vibhaṅgapāḷiyā yo chandarāgassa paccayasabhāvena vinicchaya-saddena vutto, **sakkapañhepi**<sup>2</sup> chandassa nidānabhāvena vitakka-saddena so eva āgatoti evaṃ vitakkassa vinicchayaḥḥavaṃ tasseva idha gahitatañca dasseti. **Balavasanniṭṭhānanti** balavatiyā taṇhāya ārammaṇassa niṭṭhapetvā gahaṇaṃ.

964. Satipi aññesañca saṅkhataḥḥāve ahanti asmīti ca sātisayā mānassa saṅkhataḥḥāti katvā “**saṅkhatan**”ti māno vutto.

1. Khu 1. 413; Khu 7. 204, 206 piṭṭhesu.

2. Dī 2. 221 piṭṭhe.

seyyādivasena “ahamasmī”ti attano saṅkharāṇaṃ vā **saṅkhatāṃ**. Ettha “bhavissanti”ti-ādikā pavatti taṇhādiṭṭhīnaṃ viśesavatīti tāsampi iñjitādibhāvo vutto.

Navakaniddesavaṇṇanā niṭṭhitā.

### 10. Dasakaniddesavaṇṇanā

970. Jālakkipasaṃvidhānādikusalatā saṅkappanaṃ **upāyacintā**, tassā micchābhāvapaṭicchādānabhāvena pavatto tadākāro **moho upāyacintāvasena uppannoti** daṭṭhabbo. Yathākate pana pāpe anādīnavadassanavasena pavattā saññā, saṅkappo vā **paccavekkhaṇā**, tassāpi micchābhāvapaṭicchādakaṃ tadākāraṃ, anādīnavadassanaṃ vā **paccavekkhaṇākārena uppanno mohoti**. **Vimuttasaññitā**ti adhimānasampayuttaṃ, tiṭṭhiyānaṃ vā attano diṭṭhiyā vimuttatāsañjānaṃ. “Vimuttomhī”ti evaṃ pavatto akusalacittuppādo **micchāvimuttī**ti keci vadanti. Phalaṃ viya vimuttanti gahite pana diṭṭhisampayuttacitte diṭṭhi **micchāñāṇaṃ**, samādhī ca **micchāvimuttī**ti yuttaṃ siyā.

Dasakaniddesavaṇṇanā niṭṭhitā.

### Taṇhāvicaritaniddesavaṇṇanā

973. **Samūhagāhatoti** taṇhāmānadiṭṭhīnaṃ sādharāṇaggahaṇatoti vadanti. “Itthaṃ evaṃ aññathā”ti pana viśesaṃ akatvā gahaṇaṃ **samūhavāhoti** daṭṭhabbo. **Aññaṃ ākāraṃ**ti parasantānagataṃ ākāraṃ. **Atthī**ti sadā saṃvijjati attho. **Sīdatī**ti vinassati. **Saṃsayaparivittakkavasenā**ti “kim nu kho ahaṃ siyaṃ, na siyaṃ”ti evaṃ parivittakkavasena. **Patthanākappanavasenā**ti “api nāma sādhu panāhaṃ siyaṃ”ti evaṃ patthanāya kappanavasena.

**Suddhasīsā**ti taṇhāmānadiṭṭhīnaṃ sādharāṇasīsā viśesassa anissitattā “suddhasīsā”ti vuttā. Tattha diṭṭhisīsēhi diṭṭhiyā taṇhā dassitā,

sīsasīsamūlakehi mānadiṭṭhihi sayameva cāti āha “**evamete -pa- taṇhā vicaritadhammā veditabbā**”ti. Diṭṭhimānesupi “**taṇhāvicaritānī**”ti vacanañca aññamaññaṃ vippayogīnaṃ diṭṭhimānānaṃ taṇhāya avippayogīnaṃ taṇmūlakattāva tappadhānatāya katanti veditabbaṃ.

974. **Avakkārīti** nipāto nānābhāve vattatīti anānākaraṇaṃ anavakkari, taṃ katvā, avakkari vā akatvā anavakkari katvāti evaṃ dassento āha “**avinibbhogaṃ katvā**”ti. “Anavakāriṃ karitvā”ti vā pāṭho, tattha avakiraṇaṃ vikkhepanaṃ samūhassa ekadesānaṃ vinibbhujjanaṃ avakāri, taṃ avakāriṃ vinibbhogaṃ akatvā, pañcapi khandhe samūhato ekatteneva gahetvā attato avinibbhujjitvā asmīti chandamānadiṭṭhiyo paṭilabhatīti attho. **Asitabyābhaṅgitāyāti** dāttena kājena cāti etena parikkhārena, asitabyābhaṅgīti lavanaavanakiriyā vā “**asitabyābhaṅgī**”ti vuttā.

976. **Avakāriṃ karitvāti** rūpādīni attato vinibbhujjitvā iminā rūpena -pa- iminā viññāṇena asmīti chandaṃ paṭilabhatīti evaṃ sabbattha imināti etassa attato avinibbhuttana rūpādīnāti attho daṭṭhabbo. Attato hi avinibbhuttāni abahikatāni ahamicceva gahitāni rūpādīni upādāya upagantvā pavattā taṇhā “**ajjhattikassa upādāyā**”ti vuttā, attato ca vinibbhuttāni bahikatāni upagantvā pavattā “**bāhirassa upādāyā**”ti.

**Khaggena vā chattena vā ahaṃ niccoti** abhimaṅgalasammattena khaggādīnā mama vināso natthīti maññatīti attho. **Ekekassāti** idaṃ anādimhi anante ca saṃsāre ekekassa atītānāgatesu chattimsāyapi sambhavadassanattamaṃ vuttamaṃ, **ekekassa vā puggalassa yathālābhavasena**ti idampi anissitataṇhāmānadiṭṭhiṃ katvā puthujjanaassa addhāpaccuppanne kassaci sambhavadassanattamaṃ.

Taṇhāvicaritaniddesavaṇṇanā niṭṭhitā.

Khuddakavatthuvibhaṅgavaṇṇanā niṭṭhitā.

## 18. Dhammahadayavibhaṅga

### 1. Sabbasaṅgāhikavāraṇṇanā

978. “Pañcakkhandhā”ti-ādinā **khandhādīnam** dhātusambhavapariyāpannapātubhāvabhūmantaratīsudhātūsu-uppādakadānādikusalakammatabbipāka-abhiññeyyādi-ārammaṇadukadvaya-diṭṭhādikusalattikādītipakaṇṇakārūpalokiyadukadvayabhedabhinnānam niravasesato saṅgahitattā dutiyavārādīnañca ettha anuppavesato sabbasāmaññena vutto paṭhamo **sabbasaṅgāhikavāro** nāma, dutiyo **uppattānuppattidassanavāro nāmāti** vuttaṃ. Tattha pana “kāmadhātuyā kati khandhā kati āyatanāni”ti-ādinā<sup>1</sup> tesam atthitā eva vuttā, kiriyāvisesassa appayogo “atthi bhavati samvijjati”ti sāmāññakiriyāya viññeyyabhāvato, tenāyaṃ “sambhavāsambhavadassanavāro”ti vuttuṃ yutto, catuttho ca upapattikkhaṇe uppattānuppattidassanavāroti tattha pātubhāvāpātubhāvavacanato.

979. **Yathāpucchanti** pucchānurūpaṃ avitathabyākaraṇaṃ parehi katampi sabbaññuvacanaṃ viññāya katattā **sabbaññubyākaraṇameva** nāma hoti, ko pana vādo sabbaññunā eva kateti adhippāyo.

### 2. Uppattānuppattivāraṇṇanā

991. **Kāmadhātusambhūtānañcāti** iddhiyā rūpadhātugatānaṃ kāmāvaccarasattānañcāti attho. **Ghāṇāyatanādīnaṃ abhāvenāti** ettha yadi tadabhāvena gandhāyatanādīni āyatanādīkiccaṃ na karonti, asaññasattesu cakkhāyatanassa abhāvena rūpāyatanam āyatanādīkiccaṃ na kareyya. Tato “asaññasattānaṃ devānaṃ upapattikkhaṇe dvāyatanāni pātubhavanti”ti-ādivacanaṃ na vattabbaṃ siyā. Kāmāvaccarādi-okāsā tattha uppajjamānasattānaṃ, tattha pariyaṇṇadhammānaṃ vā adhiṭṭhānabhāvena “dhātū”ti vuccanti, tathā yesu kāmāvaccarādisattanikāyesu kāmāvaccarādisattā uppajjanti, tesam sattānaṃ uppatti etthāti sattuppattīti vuccamānā

---

1. Abhi 2. 417 piṭṭhe.

te sattanikāyā ca, na panettha apariyāpannokāso apariyāpannasattanikāyo ca atthi, yo “dhātū”ti vucceyyāti imamattham dassento “**okāsavasena vā**

**sattuppattivasena vā apariyāpannadhātu nāma natthī**”ti āha.

**Sattuppattivasenāti** iminā vā okāsasattalokadvayaṃ saha gahetvā tādisāya apariyāpannadhātuyā abhāvaṃ dasseti, sattabhāvena vā uppatti sattuppatti, sattāvāsavasena taṃtaṃbhavavasena uppajjamānā upādinnakakkhandhā taṃtaṃpariyāpannānaṃ sadisādhiṭṭhānabhāvena dhātūti vuccantīti evaṃ apariyāpannadhātu natthīti attho.

### 3. Pariyāpannāpariyāpannavāraṇṇanā

999. **Bhavavasena okāsavasena ca paricchinnāti** tattha aññattha ca uppajjamānā upādinnakakkhandhā taṃtaṃpariyāpannā sabbe daṭṭhabbā.

## 6. Uppādakakamma-āyuppamāṇavāra

### 1. Uppādakakammavaṇṇanā

1021. Khandhādīnaṃ dhātusambhavādivasena pabhedam vatvā ye sattā dhātuppabhedavanto, yañca tesam uppādakakammaṃ, yo ca tassa vipāko, tesam vasena pabhedam dassetuṃ “**tayo devā**”ti-ādiko chaṭṭhavāro āradhho. Khandhādayo eva hi dhātuttayabhūtadevavasena dānādikammavasena taṃtaṃāyuppamāṇaparicchinna-upādinnakakkhandhavasena ca bhinnāti. Catudoṇaṃ **ambānaṃ**, chadoṇanti eke.

Uppādakakammavaṇṇanā niṭṭhitā.

### 2. Āyuppamāṇavaṇṇanā

1024. **Tayopi janāti** tayo janasaṃmūhāti adhippāyo.

1025. **Ābhāti** sobhanā pabhā.

1026. Kañcanapiṇḍo viya sassirikā **kañcanapiṇḍasassirikā**. Tattha pana sobhanapabhāya kiṇṇā subhākiṇṇāti vattabbe ā-kārassa

rassattaṃ antima ṇa-kārassa ha-kāraṇca katvā “**subhakiṇṇā**”ti vuttā, atha pana subhena kiṇṇā subhakiṇṇā. Purimapadesupi parittaṃ subhaṃ etesanti **parittasubhā**, appamāṇaṃ subhaṃ etesanti **appamāṇasubhāti** subha-saddena samāso yojetabbo hoti.

1027. **Ārammaṇamanasikārā pubbhāgena kathitāti** jhānakkhaṇe tato pacchā vā parittādikasiṇārammaṇabhāvanāya āvajjanena ca jhānassa ārammaṇamanasikāranānattatā na hoti, pubbhāgabhāvanāya pana pubbhāgāvajjanena ca hotīti attho. Pubbhāgabhāvanāya vasena hi jhānaṃ parittapathavīkasiṇādīsu taṃtadārammaṇaṃ hoti, pubbhāgena taṃtaṃkasiṇāvajjanena taṃtaṃmanasikāranti. Chandādayo pana appanākkhaṇepi vijjanti. Tattha **paṇidhīti** na taṇhāpatthanā, atha kho chandapatthanāva daṭṭhabbā. **Adhimokkho** nicchayo. **Abhinīhāro** cittappavattiyeva. Yadi pana bhavachandabhavapatthanādayo taṃtaṃbhavavisesaniyāmakā adhippetā. “**Appanāyapi vaṭṭantī**”ti etassa appanāya pavattāya tato pacchāpi vaṭṭantīti attho daṭṭhabbo. Saññāvirāgādīhi pana visesiyamānaṃ ārammaṇaṃ tathā tathā tattha pavatto manasikāro ca bhavavisesaniyāmakō pubbhāgo va vaṭṭatīti “**ārammaṇamanasikārā pubbhāgena kathitā**”ti vuttaṃ.

**Vipulā phalāti** vipulasantasukhāyuvanṇādiphala. **Suṭṭhu passanti** paññācakkhunā maṃsadibbacakkhūhi ca.

1028. “Yāva na taṃ pāpakammaṃ byantī hotī”ti<sup>1</sup> vacanato “**kammameva pamāṇaṃ**”ti āha, abbudādi-āyuppaṃāparicchedo pana kammavaseneva katoti adhippāyo.

**Nīliyanokāsassa abhāvāti** samānajātikena accharāgaṇena sabbadā parivāriyamānassa kāmaguṇākiṇṇassa tabbiraḥitaṭṭhānassa abhāvāti attho.

**Kim niyametīti** kim jhānaṃ upapattiṃ niyametīti attho. **Nava brahmaloketi** brahmapārisajjādayo navapi sodhetvā. **Matthaketi**

---

1. Ma 3. 205 piṭṭhe.



vehampalesūti attho. **Setṭhabhavā nāmā**ti tato paraṃ agamanato uttamabhavāti adhippāyo. Teneva **bhavasīsānī**ti gahitā. **Imesu tīsu ṭhānesūti** vehapphalādiṭṭhānāni eva sandhāya vuttaṃ. Vehapphalato pana purimesu navasu nibbatta-anāgāmī arūpadhātuṃ upapajjatīti katvā “rūpadhātuyā cutassa arūpadhātuṃ upapajjantassa kassaci satta anusayā anusenti, kassaci pañca, kassaci tayo anusenti”<sup>1</sup>ti idam vuttaṃ, na vehapphalādīsu upapannaṃ sandhāyāti ayamettha adhippāyo siyā. Yaṃ pana vuttaṃ “**navasu brahmalokesu nibbatta-ariyasāvakaṇaṃ tatrūpapattiyeva hoti, na heṭṭhūpapattī**”ti, etena heṭṭhūpapatti eva nivāritā, na tesveva uparūpari vehapphale ca upapatti arūpadhātūpapatti ca. “**Paṭhamajjhānabhūmiyaṃ nibbatta anāgāmī nava brahmaloke sodhetvā matthake ṭhito parinibbātī**”ti idampi anupubbena ārohantaṃ sandhāya vuttanti na tena tassa matthakaṃ appattassa arūpadhātuṃ upapatti nivāritāti daṭṭhabbā.

Yo vā aññattha tattha vā maggaṃ bhāvetvā cavitvā tattha upapanno avikkhambhitarūparāgo ariyasāvako, taṃ sandhāya ayam atṭhakathā vuttā. Teneva “**navasu brahmalokesu nibbatta-ariyasāvakaṇaṃ**”ti, “**paṭhamajjhānabhūmiyaṃ nibbatta anāgāmī**”ti, “**imesu tīsu ṭhānesu nibbatta-anāgāmīno**”ti ca sabbattha nibbattaggahaṇaṃ kataṃ. Tassa pana yena tattha upapanno, tasmim rūparāge vikkhambhite puna bhavābhilāso na bhavissatīti arūparāgupacchedo ca bhavissatiyeva. Yo pana puthujjano tattha nibbatta ariyamaggaṃ bhāvetvā arūpehi vikkhambhitarūparāgo uppanne magge nibbattabhavādīnavadassanavasena anivattitabhavābhilāso, tassa vasena yamakapālī pavattāti vā ayamattho adhippāto siyā.

Āyuppamāṇavaṇṇanā niṭṭhitā.

---

1. Abhi 6. 281 piṭṭhe.

### 7. Abhiññeyyādivāraṇṇanā

1030. “Ruppanalakkhaṇaṃ rūpaṃ, phusanalakkhaṇo phasso”ti-ādinā sāmāññavisesalakkhaṇapariggāhikā **salakkhaṇapariggāhikā** dīṭṭhikāṅkhāvitarāṇavisuddhiyo **ñātapariññā**, tato paraṃ yāva anulomā **tīraṇapariññā**, udayabbayānupassanato paṭṭhāya yāva maggā **pahānapariññā**.

**Tattha tatthāti** khandhādīnaṃ tāva khandhavibhaṅgādīsu pañhapucchakavāre vattabbaṃ vuttaṃ, hetu-ādīnañca khandhādīsu antogadhattā tattha tattha pañhapucchakavāre vattabbaṃ vuttamevāti daṭṭhabbaṃ.

Abhiññeyyādivāraṇṇanā niṭṭhitā.

Dhammahadayavibhaṅgavaṇṇanā niṭṭhitā.

Iti sammohavinodaniyā līnatthapadavaṇṇanā

**Vibhaṅgamūlaṭīkā samattā.**



## Vibhaṅgamūlaṭṭikāya

### Saṁvaṇṇitapadānaṁ anukkamaṇikā

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Akāmakāriyaṁ	38	Adhikato	3
Akiriyaḍiṭṭhi	55	Adhicittam	151
Akovidō	13	Adhipateyyaṭṭho	51
Agocaro	179	Adhimuñcitvā	187
Aṅgapaccaṅgasandhi- bandhanāni	110	Adhimutti	160
Accantakhārena	5	Adhimokkho	233
Accutirasam	52	Adhuvaṁ	128
Ajaññā	153	Anacchariyattā	209
Ajjhattaṁ	42	Anaññathatā	53
Ajjhāsayaḍhātu	212	Anaññathā	50
Ajjhāsayasampanno	32	Anatthaṁ	66
Ajjhosāya	85	Anatthakāmā	67
Añcitā	211	Anatthabhāvo	67
Aññadhammānupassī	148	Anaddā	224
Aṭṭhāne	182	Anayabyasanāpādanam	64
Aṭṭhim katvā	84	Anavajjadhammatthaṁ	177
Aṭṭhīni	153	Anāyatane	211
Aticca	222	Anāyūhanam	70
Atiharaṇam	181	Anāyūhantena	83
Atiharati	182	Aniñjanaṁ	94
Atihīlayāno	217	Animittapaccupaṭṭhānam	52
Atītaṁsena	6	Anugatacchando	221
Attā	217	Anupacchedakaraṇam	52
Atthatthaṁ	93	Anupāyamanasikāro	158
Atricchaṁ	217	Anuppādanirodho	51
Atricchatā	217	Anubodho	55

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Anubhoti	151	Abhāvaṭṭhena	37
Anuyuttana	151	Abhāvo	51
Anurūpāya	103	Abhiññāñāṇaṃ	103
Anulomantena	83	Abhiññāsacchikaraṇīyassa	152
Anuvidhānaṃ	80	Abhiññeyyāni	59
Anuseti	213	Abhiṇhasampañjānato	37
Anusocanaṃ	64	Abhinibbatti	61
Anūhate	70	Abhinīhāro	233
Anekasandhiyamito	154	Abhisāññūhitvā	6
Anohāya	20	Abhisamayaṭṭho	51
Antogadhā	124	Abhītanādaṃ	198
Antonijjhānaṃ	64	Abhedo	109
Antosaṅkhepo	148	Amantaṇīyo	167
Apakato	219	Amaratapo	98
Apagamavimokkho	214	Amaravitakko	221
Apaññatti	70	Amā	67
Apariṇāyako	101	Ambaṇaṃ	232
Appaṭibāhantena	83	Ariyāñāṇassa	53
Appaṭisaṅkhānupekkhā	2	Ariyasaccāni	52
Appatissayo	226	Ariyasīlaṃ	61
Appamāṇasubhā	233	Ariyāni	52
Appamādalakkhaṇaṃ	226	Ariyo	71
Apparajakkhā	212	Aropimo	179
Appahutatāya	19	Allīyati	70
Appitā	156	Avakkari	230
Appiyanti	66	Avatthukaṃ	216
Appiyasampayogo	67	Avalekhanasatthakaṃ	153
Aphuṭaṃ	2	Avasavattanakaṭṭho	37
Abyāvaṭaṃmano	2	Avijjā	89
Abhavo	224	Avijjāsamudayā	100

Padānukkamo	Piṭṭhaṅko	Padānukkamo	Piṭṭhaṅko
[ A ]		[ Ā ]	
Avijjāsammūḥhattā	99	Ākaḍḍhanaṃ	62
Avitathatā	53	Ākāra	126
Avitathā	50	Āgantvā	104
Aviditaṃ	89	Ātāpanaṃ	62
Avinibbhogaṃ	230	Ādānaṃ	94
Avipākaṃ	116	Ādimattakathanaṃ	125
Avisayatāya	19	Ādevo	65
Avisesena	103	Ādhipaccaṃ	79
Avihimsā	46	Āpāthakajjhāyī	219
Avīciṃ	181	Āpo	43
Avokkamantena	83	Ābādhesu	223
Avhāyati	34	Ābhā	232
Asaññivādā	228	Ābhujati	182
Asaddhammasavanaṃ	123	Ābhujanaṃ	182
Asabhāgavuttitā	218	Āyatanalakkhaṇaṃ	91
Asamapekkhanā	32	Āyatanāni	88
Asamavāyā	58	Āyanā	222
Asammissato	147	Āyāso	90
Asammissassa	90	Āyūhanaṃ	50, 90
Asamphuṭṭhadhātu	42	Āyūhanarasā	90
Asammohasampajaññaṃ	180	Ālayarāmā	122
Asātaṭṭhena	12	Ālimpeti	151
Asādhāraṇattā	100	Āvaṭṭanti	66
Asīlyaṃ	224	Āvasimsu	213
Assakhaḷuṅko	48	Āsayo	152
Assādayamānaṃ	111	Āsaranti	222
Assādānupassino	100	Āsādukkhaṃ	47
Assādeti	34	Āsiñcamānaṃ	13
Ahitaṃ	66	Āsevanā	156
		Āhāro	222

Padānukkamo	Piṭṭhaṅko	Padānukkamo	Piṭṭhaṅko
[ I - Ī ]		[ U - Ū ]	
Icchāhatassa	217	Ummujjanapaccupaṭṭhānā	61
Icchitālābham	68	Ullīgenti	79
Iñjati	93	Ussukkāpetvā	73
Indaliṅgaṭṭho	78	Ussannattā	211
Indasiṭṭham	79	Ūruppamaṇāpi	218
Īhā	36	[ E ]	
[ U ]		Ekakāraṇavādo	99
Ukkaṃsāvakaṃso	118	Ekattanimittēyeva	13
Ukkhepanā	220	Ekattasamosaraṇaṃ	146, 147
Uggahakosallatṭham	150	Ekabuddhadhāraṇī	209
Uggahasandhi	154	Evamaṇvaṇṇappaṭibhāgaṃ	17
Ucchedadiṭṭhi	55	[ O ]	
Uṭṭhānakadāyaṃ	154	Okkamanavissajjanaṃ	151
Udakajallakaṃ	27	Odhunanaṃ	62
Udake	211	Obhāso	220
Uddaṇḍo	219	Omato	108
Uddhāro	155	Omānaṃ	220
Upaṭṭhāti	154	Osāritaṃ	210
Upadhivepakkā	69	Oḷārikā	13
Upanayhati	222	Oḷārikārammaṇe	145
Upanissayakoṭiyā	124	[ Ka ]	
Upanissaya-indriyāni	213	Kaṇṇanapaṇḍasassirikā	232
Upāyacintāvasena	229	Kaṭiṭṭhino	152
Upāsanaṭṭhānaṃ	182	Kammaṭṭhānaṃ	156
Upekkhanavasena	174	Kammaṭṭhā	189
Upekkhāsambojjhaṅgo	171	Kammasaṅkhepo	128
Uppajjati	69	Kākajāti	221
Uppattideso	35	Kātabbaṃ	151
Uppilāvitā	226	Kāmapaṭisaṃyuttā	44

Padānukkamo	Piṭṭhaṅko	Padānukkamo	Piṭṭhaṅko
[ Ka ]		[ Ga ]	
Kāmayānassa	125	Gaṇasaṅgaṇikā	226
Kāmāmisarṇ	172	Gaṇṭhikā	218
Kāyavināmanā	159	Gatamaggo	211
Kāyālasiyarṇ	219	Gati	187
Kāyo	34	Gatibhedo	36
Kāraṇarṇ	184	Gatiyo	72
Kāraṇappadhānā	162	Gamako	57
Kāruṇṇarṇ	209	Gambhīrabhāvo	185
Kālasampatti	210	Gambhīrā	59
Kālassa	63	Gahaṇarṇ	94
Kiccarṇ	7	Guṇadosakittanaraso	65
Kiccato	55	Gocarabhāvo	53
Kittimaloharṇ	43	Gocaravisayo	36
Kilissanti	184	Gocarasampajaṇṇarṇ	180
Kīlāgoḷakāni	152	Gocaro	179
Kuppati	5	Gopakasīvali	104
Kulam	187	Gorūpasīlako	189
Kuhāyanā	220	[ Gha ]	
Koṭisatasahassasaṅkhyā	26	Ghaṭṭiyati	5
Kodaṇḍakena	217	Ghanapuṇjabhāvo	24
Korajikakorajiko	219	[ Ca ]	
Kosajjarṇ	224	Cajiyati	70
Kosajjakāraṇāni	227	Catutthatā	54
[ Kha ]		Catubhedasaṅgharṇ	126
Khandhaṭṭho	4	Catusaccadaso	1
Khārāpaṭicchakarṇ	62	Calati	210
Khipanti	111	Calanarṇ	182
Khīyanarṇ	218	Cāṭukamyatā	179



Padānukkamo	Piṭṭhaṅko	Padānukkamo	Piṭṭhaṅko
[ Ca ]		[ Jha ]	
Cittasamuṭṭhānasseva	116	Jhāmaṃ	64
Cintenti	66	[ Ña ]	
Cīvamaṇḍanā	218	Ñāṇaṇeyyāvayavā	45
Cuṇṇikaraṇaṃ	40	Ñātapariññā	235
Cutilakkhaṇaṃ	63	Ñātikkhayo	64
Cetovimutti	214	Ñāyappaṭivedhāya	85
Copanaṃ	94	[ Tha ]	
[ Cha ]		Ṭhānaviruddho	100
Chadhāturo	46	Ṭhānārahaṃ	178
Chandasamādhi	166	[ Ta ]	
Chādanapaccupaṭṭhānā	90	Tacaparicchinnam	150
Chādayamaṇaṃ	13	Tacchaniyyānabhāvattā	53
Chādentam	209	Tacchāviparītabhūtabhāvo	53
Chijjivā	5	Tacchāvipallāsā	53
Chinnapapātaṃ	66	Taṇhāparikkhāre	98
Chinnabhinnagaṇena	68	Tatīyatā	54
[ Ja ]		Tathatā	53
Jaṅghaṭṭhikassa	152	Tathatthena	57
Janā	232	Tadatthaniyyātane	113
Jayo	222	Tandī	219
Jallikaṃ	177	Tapo	225
Jāti	92	Tālaguḷapaṭalaṃ	152
Jāti-ālasyaṃ	219	Tāvato	35
Jāti-uṇṇā	17	Tiṇajāti	61
Jāti-uṇṇāya	109	Tintiṇaṃ	218
Jāyanaṭṭhena	61	Tīraṇapariññā	235
Jīraṇatā	63	Tuṅgaṇāsikā	69
Juṭṭham	79		
Jeṭṭhakadevarāḷā	212		



Padānukkamo	Piṭṭhaṅko	Padānukkamo	Piṭṭhaṅko
[ Na ]		[ Pa ]	
Nivisati	69	Paṇidhāya	219
Nissaraṇaṃ	50	Paṇidhi	233
Nemittikatā	220	Paṇihito	183
Neyyaṃ	118	Paṇitā	13, 46
Nelako	222	Pathavīkāyaṃ	148
No	163	Pathavīdhātudvayaṃ	42
Nhāpanaṃ	62	Padaghāto	73
[ Pa ]		Pade padaṃ	20
Pakatibhāvavijānaṃ	38	Padhānabhūtā	166
Pakaraṇanayo	146	Papañco	192
Pakāseti	34	Papatanti	66
Pagaṇavodānaṃ	214	Pabhaṅgu	151
Paccattaṃ	42	Pabhavo	52
Paccayakiccaṃ	7	Pamoho	93
Paccayabhedo	36	Payogaparakkamo	162
Paccayo	7	Payogo	73
Paccavekkhaṇā	93	Parapiṭṭhimaṃsikatā	220
Paccuppannaṃ	7	Paramatthasaccaṃ	54
Pajānāti	93	Parānuddayaṭā	221
Pañcaṅgasamannāgate	154	Parāmaṭṭhassa	32
Pañcavokārabhave	115	Parikaḍḍhanaṃ	62
Paññāvimutti	214	Pariggahitaniyyānaṃ	183
Paṭinissajjīyati	70	Pariggahe	32
Paṭipīlanaṃ	37	Pariṇataṃ	173
Paṭipīlanaṭṭhena	37	Pariṇāmentaṃ	173
Paṭivattaṃ	32	Pariṇāhamado	216
Paṭisaṅkhānalakkhaṇo	171	Paritassati	90
Paṭisandhipaccupaṭṭhānaṃ	90	Paritassitā	219
Paṭhamatā	54	Paritāpanaṃ	62
		Parittasubhā	233

Padānukkamo	Piṭṭhaṅko	Padānukkamo	Piṭṭhaṅko
[ Pa ]		[ Pa ]	
Paridāho	44	Puggalabhedo	36
Parinijjhāyanam	64	Puññabhāgiyā	175
Parinipphanho	24	Puñño	93
Paribhaṭo	179	Puthuttārammaṇe	151
Paribhogasaṁsaggo	226	Punāti	93
Pariyuṭṭhānaṭṭhāyī	125	Punobbhavo	69
Pariyesatu	8	Pubbaṅgamarasaṁ	90
Parivaṭṭo	33	Pubbantāharaṇato	126
Parivattanti	192	Pubbabhāgakarāṇīyasampadā	176
Palāpo	65	Pubbāpariyāṁ	84
Palibodho	52	Purekkhāro	216
Pavattito	113	Pūtimuttāṁ	219
Pavattipaccupaṭṭhānaṁ	52	Pecca	211
Pavattiyāṁ	115		
Paveṇī	18	[ Pha ]	
Pasādasinehābhāvena	160	Pharati	227
Pahānapariññā	235	Phalatisammuti	113
Pākaṭattā	100	Phalāpadesato	59
Pākatiko	44	Phaluppattiyā	126
Pāṭiyekko	42	Phātikammaṁ	179
Pādabhūtaṁ	166		
Pāpakammādinimittāṁ	64	[ Ba ]	
Pāpaṇikāni	219	Bahulīkammaṁ	156
Pāmaṅgasuttāṁ	69	Bādhakatā	53
Pāripūrimado	216	Bādhakattaniyāmena	53
Piṇḍaṭṭho	4	Bādhanalakkhaṇaṁ	52
Piṇḍapaṭipīṇḍaṁ	179	Bādhayamānā	68
Pīlanaṁ	50	Bālo	125
Pīlanaṭṭho	50	Bālyāṁ	93
Pīlīyati	5	Byāsatti	66



Padānukkamo	Piṭṭhaṅko	Padānukkamo	Piṭṭhaṅko
[ La ]		[ Va ]	
Lokāmisam	172	Vipassanāpaṭipāṭiyā	32
Loko	121	Vipassanāyānaṃ	74
[ Va ]		Vippavāsapaccupaṭṭhānaṃ	63
Vakkabhāgena	153	Vippasannapañcapasādaṃ	69
Vakkahadayayakanapapphāsāni	43	Vibhaṅgapakaraṇaṃ	3
Vacīsankhāro	90	Vibhajjavādimañḍalaṃ	83
Vaṭṭanāvali	153	Vibhattaṃ	10
Vaṭṭāmisam	172	Vibhāveti	34
Vaṇṇapokkharatā	220	Vimuttasaññitā	229
Vattaṃ	32	Viyogarasam	63
Vattappaṭivattaṃ	32	Virajjati	70
Vatthupariññāya	156	Virativasena	175
Vānaṃ	172	Viratisacce	54
Vāyanavasena	44	Vilambanapaṭibhānaṃ	221
Vāyamanti	35	Vivaṭṭanti	66
Vāyāmo	58	Vivādabhāvato	209
Vikārapattiyā	183	Vivādamūlāni	226
Vikiraṇarasam	90	Visamvādikā	53
Vigatantā	156	Visamsaṭṭho	14
Vighātamayaṃ	68	Visabhāgaṃ	36
Vicikicchāṭhānīyā	160	Visabhāgaṭṭho	14
Vijambhitā	219	Visabhāgāhāro	153
Vitthārenti	35	Visamacchinnakalāpo	153
Vidahati	45	Visayo	122
Vināsītā	156	Visādo	66
Vinivattetvā	157	Visīdanaṃ	66
Vipariṇāmo	37	Vihimsanti	44
Viparītātā	53	Vihimsādhātu	46
Vipassanā	58	Vītihaṇaṃ	181
		Vītiharati	182
		Vuṭṭhānapaccupaṭṭhānaṃ	52

Padānukkamo	Piṭṭhaṅko	Padānukkamo	Piṭṭhaṅko
[ Va ]		[ Sa ]	
Vusīmato	121	Santāpaṭṭho	50
Vusīmā	121	Santāpanaṃ	52
Vekantakaṃ	43	Santāpo	43, 50
Vegāyitattaṃ	2	Santi	52
Vedanāvavatthānato	99	Santo	147
Vedeyyo	125	Sandhibandhanacchedanaṃ	64
Vocchādanā	222	Sappaccayā	154
Vossajjanaṃ	216	Sappati	34
[ Sa ]		Sappadesattā	58
Saṃyogapalibodhaṭṭhā	50	Sappimaṇḍabindu	17
Saṃvarakaraṇīyāni	179	Sabbatthikā	148
Saṃsīdanaṃ	66	Sabbasaṅgāhikakathā	45
Sa-iñjanaṃ	94	Sabhāgaṃ	36
Sakiccakkhāṇe	7	Sabhāgaparicchedo	151
Sakkāyadiṭṭhi	55	Sabhāvacchando	162
Sakkharasudhāvaṇṇaṃ	153	Sabhāvaṭṭhena	176
Sakkhibhabbatā	152	Sabhāvaniruttim	192
Sakkhibhabbo	152	Sabhāvapakatikā	210
Sagaruvāsaṃ	224	Samatho	58
Saṅkhataṃ	229	Samanvesitvā	72
Saṅkhāro	166	Samasīsī	156
Saccāni	52	Samādhinimittam	151
Sajātiko	58	Samitam	125
Sañjāti	61	Samuggamo	17
Satadhotasappi	44, 157	Samucchedamaṇaṃ	63
Sati	58	Samudāgato	88
Satipaṭṭhānaṃ	145	Samupādikā	209
Sadarathā	12	Sampajaññaṃ	180
Santatisīsāni	17, 114	Sampajānavediyaṇaṃ	156
Santā	13	Sampattiyam	69

Padānukkamo	Piṭṭhaṅko	Padānukkamo	Piṭṭhaṅko
[ Sa ]		[ Sa ]	
Sampattivirahato	8	Sīdati	229
Sampayogarasam	90	Sīsabhāvo	87
Sampahaṁseti	152	Sukham	64
Sambhamapaccupaṭṭhāno	65	Sukhapaṭikkhepato	37
Sambhavabhedo	109	Sukhavinicchayaṁ	228
Sambhāro	128	Sukhumā	13
Sammaddaso	149	Suññatādhammassa	149
Sammasanacāro	45	Suddhacittena	155
Sammutimanāpaṁ	10	Suddhasīsā	229
Sammutimaraṇaṁ	63	Suddhāya	107
Ammohanarasā	90	Sunakhavājiko	210
Sammoho	93	Subhampi	158
Saraṇavasena	146, 147	Surā	189
Sarantā	5	Sūcayati	34
Savanasamsaggo	226	Seṭṭhabhavā	234
Sassatadiṭṭhi	55	Seyyasukham	225
Sahajātasāṅkhārā	111	[ Ha ]	
Sahassuddhāraṁ	155	Hatthasaṅkhalikā	151
Sātthakasampajaññaṁ	180	Hāyati	217
Sāmantajappā	220	Hitam	64
Sāmantajappitaṁ	220	Hīnapaṇitā	124
Sāmuddikamuttā	43	Hīnā	46
Sāsaṇaṁ	84	Hetu	7
Sāsanakkamo	50	Hetu-apadesato	59
Siṅgaṁ	218	Hetusambhārā	128
Sinānaṁ	179	Hetvaṭṭho	51
Sītibhāvaṁ	152		





# Abhidhammapiṭaka

## Vibhaṅga-anuṭṭikā

Namo tassa Bhagavato Arahato Sammāsambuddhassa.

### 1. Khandhavibhaṅga

#### 1. Suttantabhājanīyavaṇṇanā

Catusaccantogadhattā catunnaṃ ariyasaccānaṃ gāthāyaṃ  
“catusaccadaso”ti nippadesato saccāni gahitānīti nippadesato eva tadattham  
vibhāvento “**cattāri saccāni**”ti-ādimāha. Tattha **samāhaṭṭāni**ti samānītāni,  
cittena ekato gahitānīti adhippāyo. “**Samāhaṭṭāni**”ti ca etena samāhāre ayaṃ  
samāsoti dasseti. Tenevassa katekattassa catusaccanti napuṃsakaniddeso  
“tivaṭṭan”ti-ādīsu viya. Pattādiṭṭhāpakkhepena hissa na itthiliṅgatā yathā  
pañcapattāṃ, catuyugaṃ, tibhuvananti, taṃ catusaccaṃ passi adakkhi,  
pariññāpahānasacchikiriyābhāvanābhissamayavasena paṭivijjhīti attho.  
Kasmā panettha anantāparimāṇesu anaññasādhāraṇesu  
mahākaruṇāsabbaññūtaññāṇādisu buddhaguṇesu saṃvijjamānesu sāvakehi,  
paccekabuddhehi ca sādhāraṇena catusaccadassanena bhagavantaṃ thometīti  
codanaṃ manasi katvā āha “**satipi sāvakanāna**”ti-ādi. Tattha  
“**anaññāpubbakattā**”ti iminā sāvakehi, “**tattha cā**”ti-ādinā paccekabuddhehi  
ca bhagavato catusaccadassanassa asādhāraṇataṃ, niratisayataṃca dasseti.  
**Parasantānesu pasāritabhāvena supākaṭṭatī**ti desanānubhāvena  
veneyyasantānesu catusaccadassanassa vitthāritabhāvena yāva  
devamanussesu suppakāsītattā. Nāthasaddaṃ

loke yācanupatāpissariyāsīsāsu paṭhantīti tamattham̐ dassetuṃ **“nāthatīti nātho”**ti-ādi vuttaṃ. Tattha yasmā bhagavā catusaccadassanabhāveneva attano hitasukhāsīsāya kilesabyasanupatāpanassa, hitapaṭipattiyācanassa ca matthakam̐ patto, tasmā taṃ teneva pakāsītanti atthuddhāram̐ anāmasitvā paduddhāravasena nāthasaddassa attham̐ dassento **“veneyyānam̐ hitasukham̐ āsīsati”**ti-ādimāha. “Catusaccadaso”ti vā iminā anaññasādhāraṇo bhagavato ñāṇānubhāvo pakāsītoti “nātho”ti iminā anaññasādhāraṇam̐ karuṇānubhāvam̐ vibhāvetuṃ **“veneyyānan”**ti-ādi vuttaṃ. Paramena cittissariyena samannāgato bhagavā nāthoti vuccatīti yojanā. Tathā paramena cittissariyena samannāgato sabbasatte guṇehi īsatīti yojetabbam̐. **Cittissariyenā**ti ariyiddhi-ādinā citte vasībhāvena. **Guṇehi īsatīti** paramukkaṃsagatehi attano silādiguṇehi dhammena issariyam̐ vattetīti attho. Evaṃbhūto yasmā sabbābhībhū nāma hoti, tena vuttaṃ **“abhibhavati”**ti. Tathā cāha “sadevake bhikkhave loke -pa- abhibhū anabhibhūto, tasmā ‘tathāgato’ti vuccati”ti<sup>1</sup>. Duvidhenāpi issariyattham̐ nāthasaddam̐ dasseti.

Aṭṭhārasappabhedāya desanāya thomanamevāti yojanā.

**Samānagaṇanagaṇehi**ti samānagaṇanehi guṇehi karaṇabhūtehi.

**Yathāvuttena niratisayena catusaccadassanenā**ti sabbaññutaññāṇassa,

dasabalesu vasībhāvassa ca padaṭṭhānabhūtena. Saccābhisambodhena hi abhinīhārānurūpaṃ rūpārūpadhammesu

chattīmsakoṭisatasahassamukhappavattena sātisayam̐

santatisamūhakiccārammaṇaghanappabhedena mahāvajirañāṇasaṅkhātena

buddhāveṇikena sammasanena sambhūtena bhagavā sammāsambodhiyam̐

patiṭṭhitova kusalādibhedena, phassādibhedena ca dhamme vibhajanto

cittuppādakaṇḍādivasena dhammasaṅgaham̐ catudhā desetum̐ samattho

ahosi. Tathā atītam̐se appaṭihatañāṇatādibuddhadhammasamannāgato

bhagavā atītādibhedato khandhādike vibhajitvā desetum̐ samattho ahosi.

Tena vuttaṃ **“yathāvuttena -pa- vibhaṅgan”**ti. **“Sabbaññubhāsītattā”**ti vatvā puna **“asabbaññunā desetum̐ asakkuṇeyyatam̐ dassento”**ti etena

1. Aṃ 1. 332; Dī 3. 111 piṭṭhesu.

dhammasaṅgaṇīvibhaṅgānaṃ anvayato, byatirekato ca sammāsambuddhappaveditaññeva vibhāveti. **Sammāsambuddhatādiguṇeti** buddharatanassa sammāsambuddhatā, dhammasaṅgharatanānaṃ svākkhātā, suppaṭipannatāti evamādiguṇe pakāseti.

Nanu ca “catusaccadaso”ti-ādinā bhagavato va guṇā vibhāvitāti? Saccam teneva dhammasaṅghānampi guṇā vibhāvitā honti tappabhavassa anaññathābhāvato, tadapadesena vā dhammo, tadādhāro ca saṅgho vuttova hotīti vuttam “**buddhādīnaṃ -pa- vibhāvetī**”ti.

**Atītaṃseti** atītaakoṭṭhāse, pubbanteti attho. **Appaṭihatanti** nappaṭihatam, ñāṇassa paṭighāto nāma aññāṇam, sabbampi vā kilesajātam. Tam yasmā bhagavato saha vāsanāya pahīnaṃ, tasmāssa atītaṃse sabbatthakameva ñeyyāvaraṇappahānena ñāṇam appaṭihatanti vuccati. Esa nayo sesesupi. Kim panetāni pāṭiyekkam visum ñāṇāni, udāhu atītādīsu pavattanakaññāni eva? Tīsu kālesu appaṭihataññāni nāma pāṭiyekkam bhagavato tīni ñāṇānevāti vadanti. Ekaṃyeva hutvā tīsu kālesu appaṭihataññānaṃ nāma sabbaññutaññānameva. **Sabbaṃ kāyakammanti** yaṃ kiñci bhagavatā kattabbaṃ kāyakammaṃ. **Ñāṇapubbaṅgamanti** ñāṇapurecārikam. **Ñāṇanuparivattanti** ñāṇassa anuparivattanakaṃ, sabbaṃ kāyapayogaṃ pavattento bhagavā ñāṇena paricchinditvā ñāṇasahitameva pavattetīti attho. Sesapadadvayepi eseva nayo. **Chandassāti** kattukamyatāya, mahākaruṇāsamāyogato sattānaṃ ekantahitesitāya hitakiriyaṅchandassāti attho. **Dhammadesanāyāti** dhammakathāya. Aparikkhayāparimeyyapaṭibhānatāya, hi bhagavato karaṇasampattiyā ca dhammadesanā nirantaram pavattiyamānāpi na kadācīpi parikkhayaṃ gacchati, aññadatthu uparūpari vaḍḍhateva. **Vīriyassāti** parahitapaṭipattiyam ussāhassa. **Vimuttiyāti** phalavimuttiyā. Ettha ca samādhi-ādīnaṃ ahāni taṃtaṃpaṭipakkhassa savāsanapahīnattā<sup>1</sup> anaññasādhāraṇatāya veditabbā. Chandādīnaṃ pana mahākaruṇāsamāyogatopi. Sesam suviññeyyameva.

---

1. Savāsanam pahīnattā (Ka)

1. **Te eva dhammeti** te eva kusalādike tikadukehi saṅgahite dhamme. Suttante khandhādivasena vutte khandhādivasena vibhajitunti yojanā. Nanu suttante paṭisambhidāvasena te na vuttāti? Yadi pi sarūpato na vuttā, “jarāmaṇe ñāṇaṃ, jarāmaṇasamudaye ñāṇaṃ”ti-ādinā<sup>1</sup> pana hetuhetuphalādīsu ñāṇavibhāgassa vuttattā atthato vuttā eva honti, paṭisambhidāmagge<sup>2</sup> vā paṭisambhidānaṃ āgatattā suttante paṭisambhidāvasenapi te dhammā vuttā eva. **Tatthāti** tasmim suttante. **Saṅkhepenāti** samāseṇa. Uddesaniddesamatteneva hi suttante khandhādayo desitā, na paṭiniddesādināti saṅkhepena te tattha vuttāti vuttā. **Tatthāti** vā dhammasaṅgahe. Tatthāpi hi “tasmim kho pana samaye cattāro khandhā honti”ti-ādinā<sup>3</sup> khandhādayo saṅkhepena vuttāti. Vibhajiyanti ettha, etena vā khandhādayoti vibhaṅgo, te eva pakiriyanti paṭṭhapīyanti ettha, etena vāti pakaraṇaṃ, vibhaṅgo ca so pakaraṇaṅcāti **vibhaṅgappakaraṇaṃ**. **Ādisaddatthajotakenāti** “iti vā, iti evarūpā naccagītavāditavisūkadassanā paṭivirato”ti-ādīsu<sup>4</sup> viya ādisaddassa atthadīpakena. **Pakāratthajotakenāti** “iti kho bhikkhave sappatibhayo bālo, appatibhayo paṇḍito”ti-ādīsu<sup>5</sup> viya pakāratthavibhāvakena. **“Ekadesena samudāyaṃ nidasseti”**ti etena “rūpakkhandho -pa- viññāṅakkhandho”ti ettha itisaddassa nidassanatthataṃ dasseti. Nidassanatthopi hi itisaddo diṭṭho yathā “atthīti kho kaccāna ayameko anto”ti-ādīsu<sup>6</sup>. Parisamāpanattho vā “tasmātiha me bhikkhave dhammadāyādā bhavatha, no āmisadāyādā. Atthi me tumhesu anukampā ‘kinti me sāvakā dhammadāyādā bhaveyyum, no āmisadāyādā’”<sup>7</sup> evamādīsu viya. Parisamāpanaṃ hetam suttantabhājanīyassa ekadesadassanena yadidaṃ “pañcakkhandhā rūpakkhandho -pa- viññāṅakkhandho”ti tāva tadatthassa saṅgahitattā. **Tatthāti** vibhaṅgappakaraṇe. **“Nibbānavajjānaṃ”**ti ettha yadi nibbānavajjānaṃ -pa- appakatarapadattā khandhānaṃ khandhavibhaṅgo ādimhi vutto, nanu saha nibbānena sabbadhammasaṅgāhakattā, sabbadhammasaṅgāhakehi ca āyatanādīhi khandhehi ca appakatarapadattā saccavibhaṅgo ādimhi

---

1. Saṃ 1. 288 piṭṭhe.

3. Abhi 1. 26 piṭṭhe.

5. Am 1. 100 piṭṭhe.

7. Ma 1. 15 piṭṭhe.

2. Khu 9. 333 piṭṭhe.

4. Dī 1. 6 piṭṭhe.

6. Saṃ 1. 258; Saṃ 2. 110 piṭṭhe.

vattabboti? Na, tatthāpi dukkhasaccavibhaṅge ekadesena khandhānaṃ eva vibhajitabbato. Yathāha “tattha katamaṃ dukkhaṃ ariyasaccaṃ? Jātipi dukkhā -pa- saṃkhittena pañcupādānakkhandhā dukkhā”ti<sup>1</sup>. Idha pana anavasesatova<sup>2</sup> khandhā vibhajiyantīti nibbānavajjānaṃ -pa- appakatarapadattā khandhānaṃ khandhavibhaṅgo ādimhi vutto.

Apica rūpasammūḷhā arūpasammūḷhā ubhayasammūḷhāti tividdhā bodhaneyyapuggalā, tathā saṃkhittarucino vitthārarucino nātisaṅkhepavittthārarucino, tikkhindriyā mudindriyā majjhimindriyāti ca. Tesu arūpasammūḷhānaṃ upakārāya khandhadesanā, rūpasammūḷhānaṃ āyatanadesanā, ubhayasammūḷhānaṃ dhātudesanā. Tathā saṃkhittarucīnaṃ khandhadesanā, nātisaṅkhepavittthārarucīnaṃ āyatanadesanā, vitthārarucīnaṃ dhātudesanā. Tikkhindriyānaṃ khandhadesanā, majjhimindriyānaṃ āyatanadesanā, mudindriyānaṃ dhātudesanāti iminā payojanena, anukkamena ca khandhāyatanadhātuvibhaṅgānaṃ desanākkamova veditabbo. Taṃ panetaṃ khandhādittayaṃ pavattinivattitadubhayahetumukheneva ñāyamānaṃ yathābhūtāvabodhāya hoti, nāññathāti dassanatthaṃ saccavibhaṅgadesanā pavattā. So ca yathābhūtāvabodho visesato indriyasannissayenāti indriyavibhaṅgadesanā. Indriyānañca indaṭṭho taṃtaṃpaccayadhammabhūtānaṃ yathāsakaṃ paccayuppannesu paccayabhāvavisesenevāti paccayapaccayuppannavibhāgasandassanī paccayākāravibhaṅgadesanā. Paccayākārassa, khandhādīnañca aviparītasabhāvāvabodho satipaṭṭhānādīsu sammāmanasikārenāti satipaṭṭhānasammappadhāna-iddhipādabojjhaṅgamaggaṅgavibhaṅgadesanā. Svāyaṃ satipaṭṭhānādīsu sammāmanasikāro imāya paṭipattiyā hotīti jhāna-appamaññāvibhaṅgadesanā, sā sammāpaṭipatti ettake sīle patiṭṭhitassa sambhavatīti sikkhāpadavibhaṅgadesanā, yathāvuttāya ca sammāpaṭipattiyā ime ānisaṃsāti paṭisambhidāññāvibhaṅgadesanā, te cime ñāṇavisesā imesu kilesesu pahīyantesu ca sambhavanti, nāññathāti kilesavibhaṅgadesanā,

1. Abhi 2. 104; Dī 2. 243; Ma 1. 82; Ma 3. 292 piṭṭhesu.

2. Anavasesato (Ka)

evam vitthārato desite khandhādike saṅkhepatopi jānantassa atthasiddhi hoti evāti dassanattham pariyoṣāne dhammahadayavibhaṅgedesaṇā pavattāti evametesam aṭṭhārasannam mahāvibhaṅgānam desanākkamakāraṇam veditabbanam.

**Rūpādīnanti** rūpavedanāsaññāsāṅkhāraviññāṇānam.

**Vedayitādisabhāvattābhāvāti** yathākkamam

anubhavanasañjānanābhisaṅkharāṇādisabhāvattābhāvā. Na hi rūpam vedayitādisabhāvam, vedanādi vā ruppanādisabhāvam. Yato rūpādīnam vedanāsamavarodhanena “cattāro khandhā”ti-ādīnā saṅkhipitvā khandhā desetabbā siyūm. **Ruppanādito aññassābhāvāti**

ruppanānubhavanādisabhāvato aññassa atītādike gahetvā rāsivasena vattabbassa saṅkhittassa sabhāvassa abhāvā. Na hi cetasiṅkādibhāvo vedanādīnam sabhāvo. **Heṭṭhā gaṇanesūti** pañcato heṭṭhā gaṇanesu.

**Aniṭṭhānanti** apariyoṣānam. Rūpādīsu hi katipaye, ekampi vā aggahetvā vuccamānā khandhavasena desanā anavasesasaṅkhatadhammasaṅgāhinī na sambhavati. **Khandhassāti** rāsaṭṭhassa khandhassa. Tenevāha “**na hī**”ti-ādi.

**Savibhāgadhammehīti** sappabhedadhammehi.

“**Saddatthasahitam khandhasaddassa visayam dasseti**”ti etena rāsīsaddassa viya rāsaṭṭhe khandhasaddassa vācakabhāvena pavattimādaseti pariyoṣāntarabhāvato. Guṇādīsu pana kevalam tabbisayapayogabhāveneva pavatti, na vācakabhāvenāti āha “**guṇe -pa- na saddatthan**”ti.

**Khandhasaddoti** silādisadde sannidhāpito khandhasaddo. Tenevāha

“**silādiguṇavisitṭham rāsaṭṭham dīpeti**”ti. **Kecīti dhammasirittheram**

sandhāya vadati. **Etthāti** “silakkhandho samādhikkhandho”ti<sup>1</sup> ettha. Na

kevalaṅca so eva, aṭṭhakathācariyehipi ettha guṇatthatā icchitā eva. Tathā hi

**aṭṭhasāliniyam** “silakkhandho samādhikkhandhoti-ādīsu guṇaṭṭhenā”ti<sup>2</sup>

vuttam. Nanu ca kevalopi khandhasaddo “tiṇṇam kho māṇava khandhānam

vaṇṇavādī, na kho āvuso visākha tīhi khandhehi ariyo aṭṭhaṅgiko maggo

saṅgahito”ti<sup>3</sup> ca ādīsu silādivācako diṭṭhoti? Na, tatthāpi

adhikārādivacchedakavasenevassa silādīsu pavattidassanato. **Na**

**khandhasaddo paññattisaddassa atthe vattatīti**

1. Dī 3. 236 piṭṭhe.

2. Abhi-Ṭṭha 1. 185 piṭṭhe.

3. Ma 1. 375 piṭṭhe.

niruttivohārādisaddā viya<sup>1</sup> paññattipariyāyo na hotīti attho. **Dārukkhandhoti paññatti hotīti** tassa khandhasaddassa paññattivisesappavattitaṃ dasseti. **Viññāṇakkhandhoti khandhasaddoti** “viññāṇaṃ viññāṇakkhandho”<sup>2</sup>ti<sup>2</sup> ettha vutto khandhasaddo. **Samudāye niruḷhoti** atītādibhedabhinnassa paññāya abhisamyūhanena rāsikate viññāṇasamūhe niruḷho. **Tāya eva ruḷhiyā pavattatīti** tāya samudāye niruḷhatāya tadavayave ekasmimpi viññāṇe pavattatīti. Ettha ca ṇāṇasampayutte niruḷho kosallasambhūtaṭṭhena kusalabhāvo viya ṇāṇavippayutte viññāṇasamudāye niruḷho tadekadeseperi ruḷhiyā pavattatīti veditabbaṃ. Atha vā kiñci nimittaṃ gahetvā satipi aññasmim tannimittayutte kismiñciveva visaye sammutiyā cirakālatāvasena nimittavirahepi pavatti ruḷhi nāma, yathā mahiyaṃ setīti mahimso, gacchantīti gāvoti, evaṃ khandhasaddassāpi ruḷhibhāvo veditabbo.

**Rāsito guṇatoti** sabbattha bhummatthe vā nissakkavacanaṃ daṭṭhabbaṃ. **Niyametvāti** vavatthapetvā. **Piṇḍaṭṭhoti** saṅghātattho. **Tasmāti** yasmā pañceva khandhā vuttā, koṭṭhāsaṭṭhe ca khandhaṭṭhe nibbānassa vasena chaṭṭhenāpi kandhena bhavitabbaṃ, tasmā **kandhaṭṭho nāma rāsaṭṭhoti yuttam**. “**Yesam vā atītādivasena bhedo atthi**”<sup>3</sup>ti-ādinā atītādivibhāgabhinnesu ruppanādisabhāvadhammesu visum visum koṭṭhāsabhāvena gayhamānesu tabbikhāgarahitassa ekassa nibbānassa rāsaṭṭhatā viya koṭṭhāsaṭṭhatāpi na sambhavatīti dasseti. Etena paññattiyāpi khandhesu aggahaṇe kāraṇaṃ vuttanti veditabbaṃ.

Kasmā panettha phassādike viya saṅkhārakkhandhe anavarodhetvā vedanāsaññā visum khandhabhāvena gahitāti?  
Vivādamūlatādivisesadassanattham. Gahaṭṭhānaṃ hi vivādakāraṇaṃ kāmajhosānaṃ. Vuttañcetaṃ “puna caparaṃ bhikkhave kāmahetu kāmanidānaṃ kāmādhikaraṇaṃ kāmānameva hetu mātāpi puttana vivadati, puttopi mātārā vivadati”<sup>3</sup>ti-ādi<sup>3</sup>. Pabbajitānaṃ diṭṭhābhiniveso. Vuttampi cetam “ye diṭṭhimuggayha vivādayanti,

1. Niruttivohārādisaddo viya (Ka)

2. Abhi 5. 24, 25 piṭṭhesu.

3. Ma 1. 120, 128 piṭṭhesu.



‘idameva saccan’ti ca vādayanti”ti-ādi<sup>1</sup>. Tesu kāmajjhosānaṃ vedanassādena hoti, diṭṭhābhiniveso saññāvipallāsena. Saññāvipallāsena hi cittavipallāso, cittavipallāsena diṭṭhimānataṇhāpapañcānaṃ vipallāsoti. Tathā vedanānugiddho, vipallatthasañño ca saṃsarati. Vedanānugiddhassa hi vedanāpaccayā taṇhā siddhā hoti, tato ca taṇhāpaccayā upādānanti āvaṭṭati bhavacakkaṃ. Vipallatthasaññissa ca “saññānidānā hi papañcasankhā”ti<sup>2</sup> vacanato diṭṭhimānataṇhāpapañcānaṃ anupacchedato saṃsārassa anupacchedova. Iti vivādakāraṇānaṃ kāmajjhosānadiṭṭhābhinivesānaṃ kāraṇabhāvo saṃsārahetubhāvoti imassa vivādamūlatādivisesassa dassanatthaṃ saṅkhārakkhandhe anavarodhetvā vedanāsaññā visum khandhabhāvena gahitāti veditabbaṃ.

**Okāsesūti** vibhajanakiriyāya pavattiṭṭhānabhāvato atītādayo okāsāti vuttā. **Itisaddenāti** “upādāyarūpan”ti evaṃ aṭṭhakathāyaṃ vutta-itisaddena. **Nidassanathenāti** udāharaṇatthena. **Sabboti** sakalo ekādasasu okāsesu vibhatto vibhajanāyo. **Idaṅca vibhajananti** “cattāro ca mahābhūtā -pa-upādāyarūpan”ti evaṃ vibhattaṃ idaṅca vibhajānaṃ. **Oḷārikādīsūti** oḷārikasukhumahīnaṇaṇitadūrasantikesu. **Cakkhāyatananti-ādivibhajanañcāti** “cakkhāyatanānaṃ -pa- phoṭṭhabbāyatanānaṃ itthindriyānaṃ -pa- kabalīkāro āhāro rūpā saddā gandhā rasā phoṭṭhabbāti evaṃ pavattaṃ vibhajanaṅca. **Yathāsambhavanti** yathārahaṃ. Ekādasasu okāsesu yaṃ yattha vibhajanaṃ yuttaṃ, taṃ tattha yojetabbaṃ. **Evaṃ vedanākkhandhādīsūpi** yathā rūpakkhandhe yathāsambhavaṃ ekādasasu okāsesu vibhajanaṃ yojetabbanti vuttaṃ, evaṃ vedanākkhandhādīsūpi yathāsambhavaṃ ekādasasu okāsesu vibhajanaṃ yojetabbanti attho.

Tattha vedanākkhandho tāva purime okāsapañcake sukhādivedanāttikavasena vibhatto, itarasmim kusalattikavedanāttikasamāpannadukasāsavadukavasena. Saññākkhandho pana purime okāsapañcake chaphassadvāravasena, itarasmim oḷārikaduke paṭighasamphassadukavasena ceva

1. Khu 1. 409; Khu 7. 134, 135 piṭṭhesu.

2. Khu 1. 414 piṭṭhe.

yathāvuttakusalattikādivasena ca vibhatto. Sesesu kusalattikādivaseneva. Tathā saṅkhārakkhandho. Paṭighasamphassaduko panettha nattheva. Cetanāya eva cettha niddeso saṅkhārakkhandhadhammānam cetanāppadhānabhāvadassanattam. Tathā hi sā “saṅkhārakkhandho”ti vuttā. **Tatthāti** tasmim viññāṇakkhandhassa vibhajane paṭiniddese. **Tam pana dvayanti** manodhātumanoviññāṇadhātudvayam. Yañhi sattaviññāṇadhātudesanāyam “manodhātu, manoviññāṇadhātū”ti dvayam desitam, tam chaviññāṇakāyadesanāyam “manoviññāṇan”tveva vuccatīti.

**Pālinayenāti** khandhavibhaṅgapālinayena. **Aññena pakārenāti** dhammasaṅgahe,<sup>1</sup> tadaṭṭhakathāyañca<sup>2</sup> āgatena pakārantarena.

### 1. Rūpakkhandhaniddesavaṇṇanā

2. “Kiñcī”ti padam “ekaccan”ti iminā samānatthanti āha “**kiñcīti pakārantarabhedam āmasitvā aniyamanidassanan**”ti. **Ubhayenāti** pakārabhedam anāmasitvā, āmasitvā ca aniyamadassanavasena pavattena “yam kiñcī”ti padadvayena. **Adhippetatthanti** rūpam. **Aticcāti** atikkamitvā. **Pavattitoti** pavattanato. **Niyamanatthanti** nivattanattam.

“Kiñcā”ti ettha kim-saddo pucchāyam hetu-atthadīpako, karaṇe cetam paccattavacanam, ca-saddo vacanālaṅkāroti āha “**kena kāraṇena vadethā**”ti. Dutiyavikappe pana vuttanayeneva kāraṇatthe pavattam kim-saddam vadethā”ti kiriyāpadasambandhanena upayogavasena pariṇāmetvā vadati “**kaṁ kāraṇam vadethā**”ti.

**Purimasantānassa bhedanti** purimasantānassa vināsam, vināsāpadesena cettha santāne visadisuppādameva dasseti. Tenevāha “**visadisasantānuppattidassanato**”ti. Nanu ca arūpadhammānampi virodhipaccayasamavāye visadisuppatti atthīti? Saccam atthi, sā pana na pākaṭatarā, pākaṭatarā ca idhādhippetā. Tenevāha “**sītādisannipāte**”ti. Tathā cāha bhagavā “sītenapi ruppatti, uṇhenapi ruppatti”ti-ādi<sup>3</sup>. Idāni bhedasaddo ujukameva vikārāpattim vadatīti dassento “**bhedo**

1. Abhi 1. 145, 146 piṭṭhādīsu. 2. Abhi-Ṭṭha 1. 335 piṭṭhādīsu. 3. Sam 2. 71 piṭṭhe.

**cā**”ti-ādimāha. **Visadisarūpuppattiyeva**, na uppannassa aññathābhāvoti adhippāyo. Tena **kāpiliyaṃ** pariṇāmaṇāya paṭikkhipati. Yadi purimasantānato bhedo visadisuppatti ruppanaṃ, evaṃ sante lakkhaṇassa atippasaṅgo siyāti codanaṃ manasi katvā āha “**arūpakkhandhānan**”ti-ādi. Ettha **sītādīhīti ādi**-saddena yathā uṇhajighacchādayo saṅgayhanti, evaṃ āhārādīnampi saṅgaho daṭṭhabbo. **Yenāti** yena sītādīhi samāgamena. **Tatthāti** tesu rūpadhammesu. **Āhārādīkassa** vā ṭhitippattassāti sambandho. Yathā rūpadhammānaṃ ṭhitikkhaṇe sītādīhi samāgamo hoti, evaṃ arūpakkhandhānaṃ aññehi samāgamo natthi atilahuparivattito, tasmā arūpadhammā rūpadhammānaṃ viya pākaṭassa vikāraṇassa abhāvato “ruppanti”ti, “ruppanalakkhaṇā”ti ca na vuccantīti sambandho. “Ruppanti”ti padassa kattukammasādhanānaṃ vasena atthaṃ dassetuṃ aṭṭhakathāyaṃ “kuppanti ghaṭṭiyati pīḷiyati bhijjati”ti vuttanti tadatthaṃ vivaranto “**kuppanti etenā**”ti-ādimāha. **Kopādīkiriyaṃ** kopasaṅghaṭṭanapīḷanakiriyaṃ. Kopasaddo cettha khobhappariyāyo vedītabbo. **Kattubhūto, kammabhūto ca atthoti** kattukammasādhanānaṃ vasena vuccamāno bhūtopādāyarūpasaṅkhāto attho. **Kammakattutthena bhijjati-saddenāti** yadā kammakattuttho ruppanti-saddo, tadā bhijjatisaddopi tadattho eva vedītabboti attho. Tattha yadā kammakattutthena “ruppanti”ti padaṃ, tadā “sītenā”ti-ādīsu kattu-atthe karaṇavacanaṃ. Yadā pana “ruppanti”ti padaṃ kattu-atthe, kammakattu-atthe, vā, tadā hetumhi karaṇavacanaṃ vedītabbaṃ. “**Yaṃ pana ruppanti**”ti-ādīnaṃ “kuppanti”ti-ādīnaṃ kattukammakattutthenampi atthavacanaṃ vacane kāraṇaṃ dasseti. Yadi atthasaddo “pīḷanaṭṭho”ti-ādīsu<sup>1</sup> sabhāvappariyāyopi hoti, “kenatṭhenā”ti panettha abhidheyappariyāyo adhippetoti āha “**kenatṭhenāti pucchāsabhāgavasena ruppantṭhenā**”ti, ruppantasaddābhidheyabhāvenāti attho. Tenevāha “**na kevalaṃ saddatthoyeva ruppantaṃ**”ti. **Tassa atthassāti** tassa bhūtopādāyappabhedassa sabhāvadharmassa. Ruppantalakkhaṇaṇca nāmetāṃ aniccatādi viya kakkhaḷattādīto aññanti na gahetabbaṃ. Paññattiviseso hi tanti, kakkhaḷattādīnaṃyeva pana arūpadhammavidhuro sabhāvavisesoti vedītabbaṃ.

---

1. Khu 9. 20, 293 piṭṭhe.

**Mucchāpattiyāti** mucchāya mohassa āpajjanena. **Kappasaṅṭhānaṃ udakanti** kappasaṅṭhāpakamahāmeghavuṭṭhaṃ udakaṃ. **Tathāti** tappakāratāya khārabhāve **sati** udakena kappavuṭṭhānakāle viya **pathavī vilīyeyya**. Lokantariyasattānaṃ pana pāpakammabalena akhārepi khāre viya sarīrassa vilīyanā veditabbā. **Tenevāti** sa-usadanissayanirayassa vuttattā eva. Na hi avīcimhi pañcavidhabandhanādikammakāraṇaṃ karonti.

3. Pakaraṇappattaṃ rūpaṃ pakkhipitvā mātikā ṭhapitāti ānetvā sambandho. **Mahābhūtu -pa- āpajjati** tappakārabhāvena atītaṃse gaṇanaṃ gatanti vuttattāti adhippāyo. “**Na hī**”ti-ādinā dhammantaranivattanattatā, pakārantaranivattanattatā ca bhūtopādāyagahaṇassa natthīti dasseti. **Taṃdassaneti** gaṇanantaradassane. **Taṃsabhāvattāti** bhūtopādāyasabhāvattā. “**Na cā**”ti-ādinā bhūtopādāyasabhāvo atītaṃsagaṇitatāya taṃsabhāvassapi aññathā gaṇitattā, ataṃsabhāvassa ca tathā gaṇitattā akāraṇanti dasseti. “**Ajjhatta -pa- labbhati**”ti etena dutiyanaye na kevalaṃ yathāvuttova doso, atha kho abyāpitopi dosoti dasseti. Tadetaṃ pana akāraṇaṃ kāraṇabhāvasseva<sup>1</sup> anadhippetattā. Na hettha bhūtopādāyarūpabhāvo atītaṃse gaṇanassa kāraṇanti adhippetam, yato yathāvuttadosāpatti siyā.

“**Kintī**”ti ettha “**kin**”ti pubbe yaṃ “**rūpan**”ti sāmāññato gahitaṃ, tassa sarūpapucchā. **Itisaddo** nidassanattho, na kāraṇattho. Tenassa yaṃ rūpaṃ atītaṃ niruddhaṃ -pa- atītaṃsena saṅgahitaṃ atītakotṭhāse gaṇanaṃ gataṃ, taṃ kinti ce? “**Cattāro ca -pa- rūpan**”ti bhūtopādāyavibhāgadassanamukhena visesaṃ nidasseti. Yattakā hi idha visesā niddiṭṭhā cakkhāyatanādayo, tesamidaṃ nidassananti. Na cettha purimanayato aviseso. Tattha hi rūpassa bhūtopādāyatāmattasabhāvadassanatā vuttā. Tenāha aṭṭhakathāyaṃ “atītarūpampi bhūtāni cevā”ti-ādi. Idha pana bhūtopādāyena nidassanabhūtena rūpassa sabbavisesavibhāvanatā dassitā. Evañca katvā abyāpitadosopi cettha anokāsova, yaṃ rūpaṃ ajjhattaṃ -pa- upādinnaṃ, kinti? Cattāro ca -pa- rūpanti tadanñavisesanidassanassa adhippetattā. Tathā cāha “**evaṃ sabbattha attho veditabbo**”ti.

1. Tadetaṃ pana akāraṇabhāvasseva (bahūsu), tadetaṃ natthi kāraṇabhāvasseva (Ka)

**Pariyāyadesanattāti** sabhāvato pariyāyanam parivattanam pariyāyo, ujukam appavattīti attho. Pariyāyena, pariyāyabhūtā vā desanā etthāti pariyāyadesanam, suttantam. Suttantam hi veneyyajjhāsayavasena desetabbadhamme lesato labbhamānabhāvakathanam, na ujunippadesabhāvakathananti pariyāyadesanam nāma. Teneva tam “yathānulomasāsanam”ti vuccati. Abhidhammo pana desetabbadhamme ujunippadesakathananti nipariyāyadesanam nāma, yato “yathādhammasāsanam”ti vuccati. **Nicchayena desoti** vavatthānato kathanam. Tathā **bhaddekarattasuttādīsu**<sup>1</sup> viya atītādibhāvo atītānāgatapaccuppanabhāvo addhāvasena idhāpi khandhavibhaṅge suttantabhājanīyattā niddisitabbo siyāti yojanā.

**Sannipatitanti** samāgataṃ. **Santānavasenāti** pubbāparavasena. Pubbenāparassa samappamāṇatāya **anūnam anadhikam**, tato eva **ekākāram**. Pavattikālavasena vā **anūnam anadhikam**, samānasabhāvātāya **ekākāram**. Tena visabhāga-utunā anantaritataṃ dasseti. **Evam āhārepīti** ettha visabhāgāhārena anantarito anekavāram anekadivasampi bhutto sabhāgekāhāram nāma. “Tato pubbe visabhāga-utu-āhārasamuṭṭhānam atītam, pacchā anāgatan”ti hi vuttanti. “Ekāhārasamuṭṭhānam”ti pana vuttattā ekasseva āhārassa yojanā yuttarūpāti apare. **Pañcadvāravasenāti** ettha pañcadvārāvajjanato paṭṭhāya yāva tadārammaṇam, yāva javanam, yāva vā voṭṭhabbanam, tāva pavattā cittasantati ekavīthi. **Ekajavanasamuṭṭhānanti** ekajavanavārasamuṭṭhānam. Ettha ca samayam anāmasitvāva santativasena, santatiṅca anāmasitvāva samayavasena atītādivibhāgo gahetabbo.

**Tesanti** hetupaccayānam. **Kalāpassāti** rūpakalāpassa. **Kammānantarādīti** kammādi, anantarādīti paccekam ādisaddo yojetabbo. Tattha paṭhamena ādisaddena upanissayapaccayassa, āhārādino ca dutiyena samanantarānantarūpanissayādino saṅgaho veditabbo. Cittuppādassa cettha kammānantarādīpaccayavasena, itarassa kammādivaseneva janakabhāve yojanā daṭṭhabbā. Tathā cittuppādassa purejātavasena, itarassa pacchājātavasena, ubhayesampi sahajātavasena upatthambhanam

---

1. Ma 3. 226 piṭṭhe.

veditabbaṃ. Tenevāha “**yathāsambhavaṃ yojetabbaṃ**”ti. **Uppādakkhāṇeti** hetukiccakkhāṇe. Hetukiccaṃ nāma tassa tassa uppādetabbassa uppattikaraṇaṃ, tañca tasmim̃ khāṇe uppannapalattā tato paraṃ kattabbābhāvato niṭṭhitañcāti daṭṭhabbaṃ. Itaraṃ pana tīsupi khāṇesu paccayakiccaṃ daṭṭhabbanti yojanā.

6. **Aniṭṭhanāmanivattanassāti** aniṭṭhanāmanivattiyā akāraṇabhāvadassanena iṭṭhanāmalābhāpanassa akāraṇabhāvaṃ dasseti.

**Devamanussasampattibhaveti** sampattiyutte sampanne devamanussabhāve. **Samiddhasobhanatāti** abhivuddhasobhanatā. **Tato evāti** sampattivirahato eva, asampannattā evāti attho. **Tesaṃyeva hatthi-ādīnaṃ sukhassa hetubhāvaṃ na gacchanti** sāraṇādivasena dukkhapaccayattā. **Tesanti** hatthirūpādīnaṃ. “**Tassa tassevā**”ti-ādīnā yathāvuttamatthaṃ vivarati. Akusalena attanā katena nibbattaṃ dukkhassa paccayo hotīti yojanā. **Tasmāti** yasmā kammaṃ yasmim̃ santāne nibbattaṃ, tattheva sukhadukkhānaṃ paccayo hoti, na aññattha, tasmā. **Aṭṭhakathāyaṃ panāti** ekaccamatadassanaṃ. Tatha “**aniṭṭhaṃ nāma natthī**”ti yasmā paṭisedhadvayena kusalakammajassa iṭṭhabhāvo niyato, tasmā “kusalakammajameva iṭṭhan”ti evaṃ aniyametvā “kusalakammajaṃ iṭṭhamevā”ti evamettha niyamo gahetabboti dassento “**akusalakammajampī**”ti-ādīmāha. Kinti akusalakammajaṃ sobhanaṃ, yaṃ paresaṃ iṭṭhaṃ nāma siyā? Yadi duggatiyaṃ kesañci tiracchānānaṃ saṅṭhānādisampatti sugatiyaṃ sattānaṃ akusalaniissandena virūparūpatā viya kusalanissandena, kathaṃ tassā akusalakammajatā. Atha pana yaṃ kesañci amanāpampi samānaṃ rūpaṃ manāpaṃ hutvā upaṭṭhāti, taṃ sandhāya vuttaṃ, evampi yathā kesañci tiracchānādināṃ kusalakammajaṃ manussādirūpaṃ amanāpato upaṭṭhahantampi kusalavipākasappa ārammaṇabhāvato atthato iṭṭhameva nāma hoti, evaṃ akusalakammajaṃ kesañci manāpaṃ hutvā upaṭṭhahantampi akusalavipākasappa ārammaṇabhāvato atthato aniṭṭhameva nāma hoti, evañcetaṃ sampaticchitabbaṃ. Aññathā “aṭṭhānametaṃ anavakāso, yaṃ kāyaduccaritassa iṭṭho kanto manāpo vipāko uppajjeyyā”ti-ādi<sup>1</sup> aṭṭhānapāliyā virodho siyā. Tenevāha “**kusalakammajassa panā**”ti-ādi. **Sabbesanti** attano,

---

1. Ma 3. 111 piṭṭhe.

paresañca. **Iṭṭhassa abhāvo vattabboti** yathā “kusalakammajaṃ anīṭṭhaṃ nāma natthī”ti vuttaṃ, evaṃ kiñcāpi “akusalakammajaṃ iṭṭhaṃ nāma natthī”ti aṭṭhakathāyaṃ na vuttaṃ, tena pana nayadassanena akusalakammajassa abhāvo vutto eva hotīti so saṃvaṇṇanāvasena niddhāretvā vattabboti adhippāyo. Etena kusalakammajameva iṭṭhanti purimapadāvadhāraṇassa gahetabbataṃ dasseti.

Idāni “**hatthi-ādīnampī**”ti-ādīnā tamevatthaṃ vivarati.

**Kusalavipākassāti** etthāpi kusalavipākasseva ārammaṇanti attho.

**Manussānanti** ca nidassanamattaṃ daṭṭhabbaṃ. Itaresampi ca akusalakammajaṃ akusalavipākasseva, kusalakammajaṃca kusalavipākasseva ārammaṇanti dassitovāyaṃ nayoti. Kasmā pana iṭṭhāniṭṭhamissite vatthumhi manāpatāva saṅṭhātīti āha “**iṭṭhārammaṇena -pa- sakkā vattun**”ti. **Suṭṭhu vuttanti** “iṭṭhāniṭṭhaṃ ekantato vipākeneva paricchijjati”ti vadantehi iṭṭhāniṭṭhārammaṇavavatthānaṃ sammadeva vuttaṃ. **Taṃ anugantvāti** vipākavasena iṭṭhāniṭṭhārammaṇavavatthānaṃ anugantvā. **Sabbatthāti** sugatiduggatīsu, sabbesu vā ārammaṇesu.

“Aniṭṭhā”ti vacaneneva tesāṃ iṭṭhatā nivattitāti āha “**sadisaṭā ca rūpādibhāvoyevā**”ti. Iṭṭhāneva rūpādīni kāmagaṇāti sutte vuttānīti mittapaṭipakkho amitto viya iṭṭhapaṭipakkhā aniṭṭhāti adhippetāti vuttaṃ “**aniṭṭhāti -pa- vohāro viyā**”ti. **Sabbāni vāti** ettha “piyarūpaṃ sātārūpaṃ”ti<sup>1</sup> vacanato kathaṃ aniṭṭhānaṃ rūpādīnaṃ kāmagaṇabhāvāpattīti ce? Tesampi vipallāsavasena taṇhāvattubhāvato piyarūpabhāvassa adhippetattā. Yadi evaṃ kathaṃ “cakkhuvīññeyyāni rūpāni iṭṭhānī”ti-ādisuttapadaṃ<sup>2</sup> nīyatīti āha “**atisayenā**”ti-ādi.

Indriyabaddharūpavasena pāḷiyāṃ hīnadukaniddeso pavattoti dassetuṃ “**dvīsūpi hīnapaṇītapadesū**”ti-ādimāha. **Avayavayoge sāmivacanāṃ**, na kattarīti adhippāyo. “Tesāṃ tesāṃ sattānaṃ”ti indriyabaddharūpe niddiṭṭhe kasmā kammajavasena attho vutto, na catusantativasenāti āha “**sattasantāna -pa- vuttan**”ti. Padhānattā hi kammajavasena atthaṃ vatvā sesesu “evaṃ utusamuṭṭhānādīsūpi”ti aṭṭhakathāyaṃ atideso

1. Dī 2. 246; Ma 1. 85; Abhi 2. 107 piṭṭhesu.

2. Ma 1. 119; Ma 2. 117; Ma 3. 41; Saṃ 3. 18 piṭṭhādīsu.

kato. **“Tehi tehīti etasmim atthe”**ti iminā **“tesam tesan”**ti kattari sāmivacanam āsaṅkati. Tathā sati visaye vā sāmivacane laddhaguṇam dasseti **“na kammajavasenevā”**ti-ādinā, kammajaggahaṇaṅcettha upalakkhaṇam daṭṭhabbam.

**Mariyādābhūta**nti uttamamariyādābhūtam. Tenevāha **“yassa yeva manāpā, tassa teva paramā”**ti. **Tesanti** kāmaguṇānam. **Sabhāvatoti** lakkhaṇato.

**“Ekasmimyeva assādanakujjhanato”**ti-ādinā **“yasmā teyeva rūpādayo eko assādeti”**ti-ādikam suttantavivaraṇam iṭṭhāniṭṭhabhāve hetubhāvena vuttanti dasseti. **Iṭṭhāniṭṭhaggahaṇam hotīti** nibbāne viya anīṭṭhaggahaṇam saññāvīpallāsenā aññesupī ārammaṇesu iṭṭhāniṭṭhābhīniveso hotīti adhippāyo.

Vibhāgo nāma asaṅkaro, vitthāro cāti **“vibhattan”**ti padassa **“vavatthitam, pakāsitan”**ti ca atthamāha. **Aññesanti** ati-aḍḍhadaliddānam. **Idam iṭṭham, anīṭṭhañca hotīti** ettha **ca**-saddena anīṭṭham, iṭṭhañca hotīti ayampi attho vuttoti veditabbam. **Anīṭṭham iṭṭhanti** iṭṭhassa **“anīṭṭhan”**ti, anīṭṭhassa **“iṭṭhan”**ti gahaṇe yathāsaṅkhyam yojanā. **Indriyavikārāpatti-ādināti** ettha **ādi**-saddena pubbābhisaṅkhārādīm saṅgaṇhāti. Puretaram pavattacittābhisaṅkhārasenāpi hi vināva saññāvīpallāsam iṭṭham **“anīṭṭhan”**ti, anīṭṭhañca **“iṭṭhan”**ti gayhatīti.

**Tena vipākenāti** tena kusalākusalavipākena. **Ārammaṇassa iṭṭhāniṭṭhatanti** yattha tam uppajjati, tassa buddharūpādikassa, gūthādikassa ca ārammaṇassa yathākkamam iṭṭhatam, anīṭṭhatañca nidasseti. **Vijjamānepi saññāvīpallāse ārammaṇena vipākaniyamadassananti** iṭṭhārammaṇe kusalavipākova uppajjati, anīṭṭhārammaṇe akusalavipākovāti evam ārammaṇena vipākaniyamadassanam. **Ārammaṇaniyamadassanattanti** yam kusalavipākassa ārammaṇam, tam iṭṭham nāma. Yam akusalavipākassa ārammaṇam, tam anīṭṭham nāmāti dassanattam. **Ārammaṇena niyāmito** hi vipāko attano upakāraḥkassa ārammaṇassa niyāmako hotīti.



Dvārantare dukkhassa paccayabhūtaṣṣa ārammaṇassa dvārantare sukhavipākuppādanato, dvārantare sukhassa paccayabhūtaṣṣa ārammaṇassa dvārantare dukkhavipākuppādanato vipākena ārammaṇaniyamadassanena vipākavasena iṭṭhāniṭṭhatā dassitāti yojanā.

7. Duppariggahaṭṭhena kāraṇabhūtena lakkhaṇassa indriyādisabhāvassa duppaṭivijjhatā, evaṃ supariggahaṭṭhena lakkhaṇasuppaṭivijjhatā veditabbā. **“Dūre”ti avuttassā**ti lakkhaṇato **“dūre”ti akathitassa. Vuttampī**ti lakkhaṇato **“dūre”ti vuttampi** sukhumarūpaṃ.

**“Bhindamāno”**ti sambhindamānoti vuttaṃ hotīti āha **“missakaṃ karonto”**ti. Yasmā pana bhedanāṃ vibhāgakaraṇampi hoti, tasmā dutiyavikappe **“bhindamāno”**ti padassa **“visuṃ karonto”**ti atthamāha. Tatiyavikappe pana **bhindamānoti** vināsentoti attho. Tenāha **“santikabhāvaṃ bhinditvā dūrabhāvaṃ, dūrabhāvaṃca bhinditvā santikabhāvaṃ karonto”**ti. Na hi sakkā santikassa tabbhāvaṃ avināsetvā dūrabhāvaṃ kātum, tathā itarassāpi. Santikabhāvākaraṇena na bhindati na vināseti, na ca okāsadūrato lakkhaṇato dūraṃ visuṃ karaṇena bhindati vibhāgaṃ karoti, nāpi okāsadūrena lakkhaṇato dūraṃ vomissakakaraṇena bhindati sambhindatīti yojanā. **“Tidhā attho datṭhabbo”**ti saṅkhepena vuttamatthaṃ **“na hī”**ti-ādinā vivarati. Visuṃ karoti, vomissakaṃ karotīti karoti-saddaṃ ānetvā sambandho. **“Etthāpi”**ti-ādinā yathā **“okāsato dūrameva bhindatī”**ti ettha okāsato dūrassa okāsato santikabhāvākaraṇaṃ adhippetanti vināsaṇaṃ bhedanāṃ, evaṃ **“na lakkhaṇato dūraṃ bhindatī”**ti etthāpi lakkhaṇato dūrassa lakkhaṇato santikabhāvākaraṇaṃ abhedanaṃ avināsananti imamatthaṃ dasseti. Vomissakakaraṇavibhāgakaraṇatthataṃ sandhāyāha **“bhindamānoti ettha ca aññathā bhedanāṃ vuttan”**ti. Pacchimanaye vināsanatthameva sandhāya **“bhedanāṃ idha ca aññathā vuttan”**ti avoca.

Rūpakkhandhaniddesavaṇṇanā niṭṭhitā.

## 2. Vedanākkhandhaniddesavaṇṇanā

8. **Cakkhādayo pasādāti** oḷārikattabhāvapariyāpannā cakkhusotaghānājivhāpasādā, manomayattabhāvapariyāpannā cakkhusotappasādā ca. **Kāyavohāraṃ arahantīti** kāyantogadhattā, kāyekadesattā ca kāyoti vattabbataṃ arahanti. **kāyoti** hi attabhāvopi vuccati “sakkāyadiṭṭhī”ti-ādīsu<sup>1</sup>, karajakāyopi “so imamhā kāyā aññaṃ kāyaṃ abhinimmināti”ti-ādīsu<sup>2</sup>. **Tabbatthukāti** cakkhādinissitā kāyikāti pariyaēyena vuttā, nippariyāyena pana cetāsikāva. Yathāha “yaṃ tasmim̄ samaye tajjācakkhuviññāṇadhātusamphassaṃ cetāsikaṃ neva sātāṃ nāsātāṃ cetosamphassaṃ adukkhamasukhaṃ vedayitaṃ”ti-ādī<sup>3</sup>. **“Na hi cakkhādayo kāyappasādā hontī”**ti iminā kāyapasādanissitā vedanā nippariyāyena kāyikāti dasseti. **Kāyikacetāsikādibhāvenāti ādi-**saddena kusalākusalābyākatādibhāvā saṅgayhanti. **Tenāti** sukhādivedanekadesassa addhāsamayavasena atītādibhāvābhāvena. Keci panettha “heṭṭhā dassitanayattā pākaṭṭā addhāvasena, ekamuhuttādipubbaṇḍādisu utu-ādinā rūpassa viya vedanāya vibhāgo na gayhatīti samayavasena ca atītādibhedo na dassito”ti vadanti. Santānavasena pavattānampi vedanānaṃ cittena samūhato gahetabbataṃ sandhāyāha **“vedanāsamudāyo”**ti. **Tehīti** addhāsamayavasena atītādibhāvehi. **Etthāti** etasmim̄ vibhaṅge. **Teti** “vedanekadesā”ti vuttā kāyikacetāsikādibhāvena bhinnā sukhādivedanāvisesā. Yadi vedanekadesā ettha gahitā, khaṇaparicchinnāva te gahetabbā, na santatiparicchinnāti āha **“ekasantatiyaṃ panā”**ti-ādī. **Tesūti** sukhādibhedesu. **Bhedoti** viseso. **Tassāti** sukhādivisesassa. Yathā cettha, evaṃ **“tāmsahitataduppādakā”**ti etthāpi tāṃ-saddena sukhādiviseso paccāmaṭṭhoti veditabbo. Santati paricchedikā bhavituṃ arahatīti sambandho. **Santatikhaṇavaseneva paricchedo vutto**, na addhāsamayavasenaṅti adhippāyo.

**Pubbantāparantamajjhagatā**”ti niṭṭhitahetukiccā aniṭṭhitapaccayakiccāti vuttā, tāṃ pana atikkantahetupaccayakiccanti evaṃ vuttassa nayassa

---

1. Saṃ 1. 12; Saṃ 2. 151 piṭṭhesu.    2. Khu 9. 389 piṭṭhe.    3. Abhi 1. 40 piṭṭhe.

upalakkhaṇanti āha “**pubbantāparantamajjhagatāti etena hetupaccayakiccavasena vuttanayaṃ dasseti**”ti. Ettha kusalākusalakiriyavedanānaṃ rūpassa viya, vipākānaṃ viya ca ayaṃ nāma janakahetūti nippariyāyena na sakkā vuttuṃ, pariyāyena pana anantarapaccayabhūto hetūti vattabbo.

11. **Santāpanakiccanti** pariḍahanakiccaṃ. **Jāti-ādisaṅkaranti** jātisabhāvapuggalalokiyalokuttarato saṅkaraṃ sambhedanā akatvā. **Samānajātiyanti** ekajātiyaṃ. Sukhato tajjātiyā adukkhamasukhā paṇīṭāti yojetabbāti sambandho. **Samānabhedeti** bhūmantarādisamānavibhāge. **Upabrūhitānaṃ dhātūnanti** uḷārarūpasamuṭṭhāpanena paṇīṭānaṃ rūpadhammānaṃ. **Vibādhitānanti** nippīḷitānaṃ milāpitānaṃ. **Ubhayanti** sukhādivayaṃ. Ettha ca khobhanā, āluḷanā ca kāyikasukhassa vasena veditabbā. Abhisandanā jhānasukhassa. Madayanā kāmasukhassa. Tathā chādanā. Āsiṅcanā sabbassa. Chādanā āsiṅcanā vā sabbassa vasena veditabbā.

**Sabhāvādibhedena cāti** sabhāvapuggalalokiyādibhedena ca. Ekantapaṇīte lokuttare hīnapaṇīṭānaṃ paṭipadānaṃ vasena hīnapaṇīṭatā. Ekantahīne akusale chandādivasena hīnapaṇīṭatā, oḷārikasukhumatā ca. Tathā hi vuttam **aṭṭhakathāyaṃ** “yā oḷārikā, sā hīnā. Yā sukhumā, sā paṇīṭā”ti<sup>1</sup>. Akusalādisu dosasahagatādi-antarabhedavasena upādāyupādāya oḷārikasukhumatā taṃtaṃvāpanavasena vuccati, na kusalākusalādivasenāti āha “**taṃtaṃvāpanavasena kathanepi parivattanaṃ natthi**”ti. **Dosussannatāyāti** kilesādhikatāya. **Tathāti** dosussannatāya. Kathaṃ pana kusalesu dosussannatā? Upanissayavasena kilesādhikehi santāne pavattamānā kusalā dhammā kilesehi sambādihappattiyā tiṇādihi sambādihappattāni viya sassāni vipulaphala-uḷāraphalā na hontīti. **Tathāti** mandadosatāya. Kusalānaṃ mandadosabhāpi vuttanayānusārena veditabbā. **Oḷārikasukhumanikantīti** ettha antogadhavisesaṃ nikantiyā oḷārikasukhumatāsāmaññaṃ vuttam. Yathā hettha oḷārikasāmañña

---

1. Abhi-Ṭṭha 2. 17 piṭṭhe.

oḷārikoḷārikataroḷārikatamā nikantiyo gayhanti, tathā  
 sukhumasukhumatarasukhumatamā sukhumatāsāmañña gayhantīti.  
 Sukhumatamanikantivatthunti cettha yāva bhavaggaṃ vipassanāññaṇa  
 veditabbari.

13. **Yadi siyāti** yadi asampayogo visaṃsaṭṭho siyā.

**Santikato akusalatoti** akusalabhāvena santikato lobhasahagatādi-  
 akusalavedayitato. **Akusalāti** dosasahagatādi-akusalavedanā **dūreti yathā**  
**uddharīyati. Tato dūrato kusalatoti** tato akusalato dūrato  
 kāmāvacarādikusalavedayitato **kusalā** kāmāvacarādikusalavedanā. “**Na**  
**sakkā**”ti vuttaṃ uddharitum asakkuṇeyyataṃ “**tathā hi satī**”ti-ādinā vivarati.  
**Tasmāti** yasmā dūrato santikuddharaṇaṃ vuttanayena santikato  
 santikuddharaṇameva hoti, tathā sati atthaviseso na hoti, upādāyupādāya  
 dūrasantikātā idha vuccati. Tasmā santikato santikuddharaṇaṇca na sakkā  
 kātum atthavisesābhāvato, anadhippetattā cāti adhippāyo.

Nanu ca atisayavacanicchāvasena attheva atthavisesoti codanaṃ manasi  
 katvā āha “**dūradūrataratāya viya santikasantikataratāya ca**  
**anadhippetattā**”ti. **Yāti** akusalavedanā. **Tatoti** kusalavedayitato. **Idha**  
**vuttassa dūrassāti** imasmim vedanākkhandhavibhaṅge “akusalā vedanā  
 kusalābyākatāhi vedanāhi dūre”ti-ādinā<sup>1</sup> vuttassa dūrassa. **Dūrato**  
**accantavisabhāgattāti** yato yaṃ “dūre”ti vuttaṃ, tato accantavisadisattā,  
 tassa vasena **dūre santikaṃ natthīti na sakkā dūrato santikaṃ uddharitum.**  
 Ayañhettha adhippāyo—heṭṭhā yā vedanā yāya vedanāya dūreti vuttā, sā eva  
 tassā kenacipi pariyāyena santiketi na uddharitabbāti. **Santiketi**  
 vuttavedanaṃyeva sandhāya vadati. **Bhinneti** lobhasahagatādivasena  
 vibhatte. **Tatthevāti** “santike”ti vutta-atthe eva. Idaṃ vuttaṃ hoti—“akusalā  
 vedanā akusalāya vedanāya santike”ti<sup>1</sup> evaṃ vutta-akusalāya vedanāyameva  
 lobhasahagatādivasena vibhattāya dūrabhāvopi labbhati. Evaṃ sesesupīti.

1. Abhi 2. 4 piṭṭhe.

Yadi santikato dūraṃ labbhati, yadaggena dūraṃ labbhati, tadaggena dūrato santikaṃ uddhariyeyyāti codanaṃ manasi katvā āha “**upādāyupādāya dūrato ca santikaṃ na sakkā uddharitun**”ti-ādi. Tassattho—yaṃ santikato dūraṃ labbhati, yadipi taṃ visabhāgaṭṭhena labbhati, tathāpi yaṃ tattha santikaṃ labbhati, taṃ sabhāgaṭṭheneva labbhatīti santikatova santikaṃ uddhaṭaṃ siyāti. **Tasmāti** yasmā visabhāgaṭṭhena dūrataṃ, sabhāgaṭṭhena ca santikatā icchitā, tasmā. **Lobhasahagatāya dosasahagatā** visabhāgatāya dūre samānā kathaṃ santike bhavyeyyāti adhippāyo. Nanu tāsaṃ akusalasabhāgatā labbhatevāti tattha uttaramāha “**visabhāgatā**”ti-ādi. Tattha **bhedanṃ aggahetvā na pavattatīti** bhedaṃ visesaṃ asadisataṃ gahetvā eva pavattati visabhāgatā. **Dūratāyāti** idhādhippetāya dūratāya sabhāgassa abyāpakattā dūrato santikuddharaṇaṃ na sakkā kātum. Sati hi sabhāgabyāpakatte siyā santikatāti dūrato santikuddharaṇaṃ sakkā kātunti adhippāyo. “**Na hī**”ti-ādinā tamevattham pākaṭaṃ karoti. **Sabhāgatāti** sāmāññaṃ. **Bhedanti** visesaṃ. **Antogadhaṃ katvāvāti** abhibyāpetvāva. **Visabhāgabyāpakattā santikatāyāti** idhādhippetavisabhāgaṃ byāpetvā pavattanato heṭṭhā vuttasantikataṃ santikato dūruddharaṇaṃ sakkā kātum. Tamevattham “**akusalatā hī**”ti-ādinā pākaṭaṃ karoti.

Vedanākkhandhaniddesavaṇṇanā niṭṭhitā.

### 3. Saññākkhandhaniddesavaṇṇanā

17. **Tassāpīti** saññāyapi. **Tabbatthukattāti** cakkhuvatthukattā. **Paṭighaviññeyyoti** yathāvuttapaṭighato vijānitabbo paṭighavasena gahetabbo. **Uttarapadalopaṃ katvāti** purimapade uttarapadalopaṃ katvā.

**Viññeyyabhāve** na uppattiyanti adhippāyo. **Vacananti** saddo, nāmanti attho. **Vacanādhīnāti** gahetabbataṃ pati saddādhīnā, nāmāyattagahaṇāti attho. Yadettha vattabbaṃ, taṃ **nāmarūpade**<sup>1</sup> vuttameva. Adhivacanaṃ

1. Mūlaṭī 1. 56 piṭṭhe.

paññattipakāsakam̐ ñāpakam̐ etesam̐ atthīti **adhivacanā** yathā arisasoti.

**Tatojoti** adhivacanasañkhātato arūpakkhandhato jāto.

Arūpakkhandhapariyāpannattā phassepi yathāvutto attho sambhavatīti dassetuṃ “**samphassoyeva vā**”ti-ādimāha. Na kevalam̐ manodvārikaphasse eva, atha kho pañcadvārikaphassepi “viññeyyabhāve vacanam̐ adhikicca pavattā adhivacanā”ti-ādivuttappakāro attho sambhavati. **Itīti** tasmā. **Tena pariyāyenā**ti manosamphassajapariyāyena. **Tatojāpīti** pañcadvārikaphassajātāpi. **Aññappakārāsambhavatoti** paṭighasamphassajapariyāyassa asambhavato. **Āveṇikam̐** paṭighasamphassajātā. **Pakārantaram̐** adhivacanasamphassajātā.

**Yadi evanti** yadi pañcadvārikaphassehi uppannasaññā pariyāyato, nippariyāyato ca “adhivacanasamphassajā”ti vuccanti, evam̐ cattāropi arūpino khandhā evam̐ vattum̐ yuttā. Evam̐ sante saññāva kasmā “adhivacanasamphassajā”ti vuttāti āha “**tiṇṇam̐ khandhānan**”ti-ādi. Tattha **tiṇṇam̐ khandhānanti** vedanāsañkhāraviññāṇakkhandhānam̐. **Atthavasenā**ti “vacanam̐ adhikicca pavattā adhivacanā”ti-ādinā vutta-atthavasena anvatthatāvasena. **Attano pattampi nāmanti** “adhivacanasamphassajā”ti evam̐ attano anuppattampi nānam̐. **Dhammābhilāpoti** sabhāvanirutti. Pubbe catunnam̐ arūpakkhandhānam̐ sādharmaṇopi adhivacanasamphassajavohāro ruḥhivasena saññāya eva pavattoti vatvā idāni so tadaññārūpakkhandhasādhāraṇo saññāya nivesitoti dassetuṃ “**atha vā**”ti-ādimāha. **Rajjitvā olokanādisūti** ettha **ādi**-saddena kujjhitvā olokanādi viya rajjitvā savanādipi saṅgayhatīti veditabban̐, tathāsotāvadhānādinopi rattatādivijānananimittatāsambhavato. Cakkhusamphassajāsaññāya pana pākaṭabhāvam̐ nidassanavasena dassetuṃ “**olokanam̐ cakkhuvīññāvisayasamāgame**”ti-ādimāha.

Olokanassa apākaṭabhāve rattatādivijānanam̐ na hoti, pākaṭabhāve ca hotīti āha “**pasādavatthukā evā**”ti. “**Aññam̐ cintentan**”ti yam̐ pubbe tena kathitam̐, kāyena vā pakāsitam̐, tato aññam̐ kiñci attham̐ cintentan̐. Tenevāha “**ñātan**”ti.

Saññākkhandhaniddesavaṇṇanā niṭṭhitā.

#### 4. Saṅkhārakkhandhaniddesavaṇṇanā

20. “**Heṭṭhimakoṭiyāti etthā**”ti idaṃ paṭhamam “heṭṭhimakoṭiyā”ti vacanam sandhāya vuttam. Tassa hi bhummasvasena attho gahetabbo. Tenāha “**tattha hi padhānam dassitan**”ti. Heṭṭhimakoṭiyāva padhānam dassitanti imamattham gahetvā “**yadi evan**”ti-ādinā codeti. Itaro “heṭṭhimakoṭiyā padhānameva dassitan”ti evamettha niyamo gahetabboti dassento “**uparimakoṭigatabhāvenā**”ti-ādinā tam pariharati. Padhānasseva dassanam. Padhāne hi dassite appadhānampi atthato dassitameva hoṭīti. Tenāha **aṭṭhakathāyaṃ** “tam sampayuttasaṅkhārā pana tāya gahitāya gahitāva hontī”ti. Yaṃ heṭṭhimakoṭiyam labbhati, tam uparimakoṭiyampi labbhati evāti āha “**heṭṭhimakoṭi hi sabbabyāpikā**”ti. Dutiye karaṇaniddesatam dassetuṃ “**āgatāti sambandho**”ti āha. Āgamanakiriyā hi heṭṭhimakoṭiyā karaṇabhāvena tattha vuttāti. Yathā ca āgamanakiriyāya, evam vacanakiriyāyapi heṭṭhimakoṭiyā karaṇabhāvo sambhavatīti dassetuṃ “**purimepi vā**”ti-ādimāha. “**Ekūnapaññāsappabhede**”ti idaṃ lokiyacittuppāde pāli-āgatānam saṅkhārakkhandhadhammānam uparimakoṭim sandhāya vuttam. Yevāpanakadhammehi saddhim uparimakoṭiyā gayhamānāya “tepaññāsā”ti vattabham siyā, lokuttaracittuppādasvasena pana “sattapaññāsā”ti.

Saṅkhārakkhandhaniddesavaṇṇanā niṭṭhitā.

#### Pakiṇṇakakathāvaṇṇanā

Samuggama-padassa tatvato, pariyāyato ca attham dasseti “**sañjātiyaṃ ādi-uppattiyaṃ**”ti. Bhedato pana samāyoge uggamananti. Tattha kena samāyoge, kuto, kathaṅca uggamananti vicāraṇāyaṃ āha “**taṃtamāpaccayasamāyoge**”ti-ādi. **Tatthevāti** pañcavokārabhave eva. Tattha hi pañcakkhandhā paripuṇṇā samuggacchanti. **Yathādhigatānam** adhigatappakāraṇam, paṭisandhikānanti attho. Opapātikasamuggameneva cettha saṃsedajasamuggamopi gahitoti daṭṭhabbo pañcakkhandhāpariyāpannānam tadā uppajjanārahānam

uppajjanato. Tattha saṃsedajā uppajjitvā vaḍḍhanti, itare na vaḍḍhanti idametesam nānākaraṇam. Sukhumajātiyalomā eva kira keci eḷakā himavante vijjanti, tesam lomam sandhāya “**jātimanta-eḷakaloman**”ti vuttam atisukhumattā tesam lomānam. Keci pana “ajapākatikeḷakādīhi saṅkararahitānam tesam eḷakavisesānam nibbatteḷakassa lomam **jāti-uṇṇā**, tampi taṅkhaṇanibbattassā”ti vadanti. Gabbham phāletvā gahitassāti apare. **Evamsaṅṭhānanti** jāti-uṇṇamsuno paggharivā agge thitatelabindusaṅṭhānam. **Vaṇṇappaṭibhāgoti** rūpapaṭicchanno, saṅṭhānapaṭicchanno ca.

**Santatimūlānī**ti tasmim bhave rūpasantatiyā mūlabhūtāni. **Anekindriyasamāhārabhāvatoti** yathāraham cakkhādi-anekindriyasamghātabhāvato. **Padhānaṅganti** uttamaṅgam siro.

**Na tassa tassa khandhassa paripuṇṇatam**, tamtamkhandhekadesasseva vuttattāti adhippāyo. **Kāmāvacarānanti** kāmāvacarasattānam. **Parihīnāyatanassāti** parihīnassa cakkhādi-āyatanassa vasena. Tattha duggatīyam andhassa cakkhudasakavasena, badhirassa sotadasakavasena, andhabadhirassa ubhayavasena **santatisīsaḥāni veditabbā**. Napuṃsakassa pana bhāvahāni vuttā eva. Tathā andhabadhirāghānakassa cakkhusotaghānavasena. Tam pana dhammahadayavibhaṅgapāḷiyā virujjhati. Tam parato āvi bhavissati. Rūpāvacarānam pana cakkhusotavatthujīvitavasena cattāri santatisīsanīti itaresam vasena santatisīsaḥāni veditabbā.

**Tesanti** pañcannam khandhānam. **Vatthubhāvenāti** vicāraṇāya adhiṭṭhānabhāvena. **Paṭisandhiyam uppannā pavattā pañcakkhandhāti** paṭisandhikkhaṇe, pavattikkhaṇe ca pañcakkhandhe dasseti. **Bhummaniddesoti** “pañcasu khandhesū”ti ayam bhummaniddeso. **Aññathāti** niddhāraṇe anadhippete. **Bhāvenabhāvalakkhaṇatthe**”ti idam visayādi-atthānam idhāsambhavato vuttam. **Ubhayanti** rūpārūpam. **Rūpārūpasantatinti** rūpasamuṭṭhāpakam rūpasantatim, arūpasantatiṅca. “Vatthu uppādakkhaṇe dubbalam hotī”ti idam na paṭisandhikkhaṇam eva, nāpi vatthurūpam eva sandhāya vuttanti dassento āha “**sabbarūpanam uppādakkhaṇe dubbalatam sandhāya vuttan**”ti. “**Tadā hī**”ti-ādi yathāvuttassa atthassa kāraṇavacanam. Tattha **tanti** rūpam. “Kammakkhattattā”ti idam na kammajatāmattam sandhāya vuttam, atha kho



kammajassa paṭhamuppattiyam apatiṭṭhitam sandhāyāti dassento “**satipi**”ti-ādimāha. **Tato paranti** tato paṭisandhito param. Sadisasantāne yathā patiṭṭhitam, na tathā visadisasantāneti āha “**samānasantatiyan**”ti.

**Āṅabhāvanti** kāraṇabhāvam. Tenevāha “**sahāyabhāvan**”ti. **Tesam dhammānanti** yehi saddhim uppannam, tesam paṭisandhiyam cittacetasikadhammānam. **Tadāti** ṭhitikkhaṇe, bhaṅgakkhaṇe ca rūpuppādanameva natthi. Anantarādipaccayalābhena uppādakkhaṇe eva cittassa balavabhāvo, na itaratra. Tenāha “**yadā ca rūpuppādanam, tadā uppādakkhaṇe**”ti.

**Yehākārehīti** āhārindriyapaccayādi-ākārehi. **Yathāsambhavam paccayā honti**ti phassādayo āhārādivasena yathāraham paccayā honti. Vuttañhetam **paṭṭhāne** “paṭisandhikkhaṇe vipākābyākatā āhārā sampayuttakānam khandhānam, kaṭattā ca rūpānam āhārapaccayena paccayo”ti-ādi<sup>1</sup>.

Cuticittena saddhim uppajjamānam, cuticittena vā kāraṇabhūtena uppajjamānam. **Tato purimatārehi uppajjamānam viyāti** yathā cuticittato āsannehi purimatārehi uppajjamānam rūpam bhavantare na uppajjati, evam cuticittena uppajjamānampi anupacchinnepi vaṭṭamūleti akāraṇam vaṭṭamūlāvūpasamo cuticittassa rūpuppādaneti dasseti.

**Arūpassāti** āruppassa.

**Utunāti** paṭisandhicittassa ṭhitikkhaṇe uppannena utunā. **Samuṭṭhite rūpeti** paṭisandhicittassa bhaṅgakkhaṇe rūpe samuṭṭhite paṭisandhi-anantaram paṭhamabhavaṅgacittam rūpam samuṭṭhāpeti. **Uppādanirodhakkhaṇāti** yathāvuttesu soḷasasu cittesu ādicittassa uppādakkhaṇo, soḷasamacittassa nirodhakkhaṇo cāti vadanti, rūpasseva pana uppādanirodhakkhaṇā veditabbā.

**Dharamānakkhaṇe evāti** tassa utuno vijjamānakkhaṇe eva yadi gahitā, “**soḷasa cittakkhaṇāyukam rūpan**”ti **vuttam hoti** soḷasaheva cittehi tassa dharamānatāya paricchinnattā. **Uppādakkhaṇam aggahetvāti**

---

1. Abhi 8. 156 piṭṭhe Paṭṭhāne.

utuno dharamānakkhaṇe uppādakkhaṇaṃ aggahetvā nirodhakkhaṇo atha gahito, “**sattarasacittakkhaṇāyukam** rūpaṃ”ti vuttaṃ hoti uppādakkhaṇasaḥitena ca ekassa cittakkhaṇassa gahitattā. “**Adhikasolaṣacittakkhaṇāyukan**”ti vuttaṃ hoti nirodhakkhaṇassa bahikatattā.

Evam uppādanirodhakkhaṇesu gahitesu, aggahitesu ca soḷasasattarasacittakkhaṇāyukatā, tato adhikacittakkhaṇāyukatā ca siyāti dassetvā idāni tattha ṭhitapakkhaṃ dassento “**yasmā panā**”ti-ādimāha. Tattha **tassa dharamānakkhaṇe uppannesūti** tassa utuno dharamānakkhaṇe uppannesu soḷasasu cītesu paṭisandhipi yasmā gahitā, tasmā utuno **uppādakkhaṇo dharamānakkhaṇe gahitoti nirodhakkhaṇe aggahite** “rūpe dharanteyeva soḷasa cittāni uppajjitvā nirujjhanti, taṃ pana sattarasamena cītena saddhiṃ nirujjhati”ti<sup>1</sup> evaṃ aṭṭhakathāyaṃ vakkhamānā adhikasolaṣacittakkhaṇāyukatā adhippetā. Gahite vā nirodhakkhaṇe soḷasacittakkhaṇāyukatā adhippetāti sambandho. Ettha ca “**adhikasolaṣacittakkhaṇāyukatā**”ti idaṃ paṭisandhicittassa uppādakkhaṇo gahitoti katvāvuttaṃ. Yasmā pana **paṭiccasamuppādavibhaṅgavaṇṇanāyaṃ** “dve bhavaṅgāni, āvajjanaṃ, dassanaṃ, sampaṭicchanāṃ, santīraṇaṃ, voṭṭhabbanāṃ, pañca javanāni, dve tadārammaṇāni, ekaṃ cuticittanti pañcadasa cittakkhaṇā atītā honti, athāvasesa-ekacittakkhaṇāyuke”ti<sup>2</sup>, tathā tadārammaṇapariyosānāni, “ekaṃ cuticittam, tadavasāne tasmiññeva ekacittakkhaṇaṭṭhitike ārammaṇe paṭisandhicittam uppajjati”ti<sup>3</sup> ca vakkhati. Tasmā rūpassa soḷasacikkhaṇāyukatāyapi atthasiddhi hotiyeva. Tenāha “**soḷasacittakkhaṇāyukatā adhippetā**”ti. Tathāpi uppajjitvā bhavaṅgacalanassa paccayo hoti, na uppajjamānamevāti sattarasacittakkhaṇāyukatā veditabbā.

Ojāya sabhāvasukhumatā upādārūpabhāvato. Ettha ca mātarā ajjhohaṭṭā ojā bāhirabbhaṅjanaṃ viya gabbhamallinā tasmiṃ santāne ojaṭṭhamakarūpuppattiyā paccayo hoti. Āhārasamuṭṭhānarūpapaveṇiyā ojāya viya sesatisantati-ojāya rūpuppādananti udariye ojā rūpaṃ na samuṭṭhāpeti utusamuṭṭhānabhāvato, upādinnakaṭṭhāne eva pana samuṭṭhāpeti, rasaharaṇiḥi gantvā kāyānusaṭanti veditabbaṃ.

1. Abhi-Ṭṭha 2. 24 piṭṭhe. 2. Abhi-Ṭṭha 2. 150 piṭṭhe. 3. Abhi-Ṭṭha 2. 151 piṭṭhe.

**Cittañcevā**ti ettha ca-saddena paṭiyogīnaṃ kammameva samuccinoti, na cittena sampayuttadhammeti katvā āha “**cittassa pubbaṅgamatāya vuttan**”ti. “**Cittuppādaṃ gaṇhāti** ‘cittaṃ uppannaṃ hoti’<sup>1</sup>ti-ādīsu<sup>1</sup> viya, **na kammacetanaṃ viya ekadhammamevā**”ti vutte “yathā cittasamuṭṭhānarūpassa hetu-ādayo cittasampayuttadhammāpi samuṭṭhāpakāva, evaṃ kammamuṭṭhānarūpassa kammampayuttāpi”ti codanaṃ samuṭṭhāpetvā tassa parihāraṃ vattum “**kammamuṭṭhānañcā**”ti-ādīmāha.

**Rūpassāti** rūpakkaṇassa, rūpassa vā addhuno. **Nayadassanamattaṃ daṭṭhabbaṃ** paṭisandhikkhaṇe eva rūpārūpadhammānaṃ ekakkhaṇe pātubhāvoti imassa atthassa anadhippetattā. Tenevāha “**tato parampi rūpārūpānaṃ sahuppattisabbhāvato**”ti. Yathā ca “paṭisandhikkhaṇe evā”ti niyamo na gahetabbo, evaṃ “ekakkhaṇe eva pātubhāvo”tipi niyamo na gahetabboti dassento “**na panetan**”ti-ādīmāha. **Taṃdīpanatthamevāti** asamānakālatādīpanatthameva, na sahuppādadīpanattham. Addhānaparicchedakathā hi ayanti.

**Yadi evanti** yathā phalapattāni, evaṃ rūpārūpadhammā yadi dandhalahuparivattino. **Asamānaddhattāti** atulyakālattā. **Nicchiddesūti** nibbivaresu. Tena nirantarappavattim eva vibhāveti. **Ayanti** addhānaparicchedakathā. Cittajarūpādīnaṃ na tathā nirantarabhāvena pavatti, yathā kammajarūpānanti āha “**kammajarūpappavattim sandhāyā**”ti. Kammajarūpānaṃ vā itaresaṃ mūlabhāvato padhānanti “**kammajarūpappavattim sandhāyā**”ti vuttaṃ. Acittuppādakattā abyābajjhatāya nirodhasamāpattiyā nibbānapaṭibhāgatā veditabbā. **Pade padaṃ akkamitvāti** lakuṇḍakapādatāya attano akkantapadasamīpe padaṃ nikkhipivā. Yo hi sīghapadavikkamo lakuṇḍakapādo, so idhādhippetoti āha “**lahurūṃ lahurūṃ akkamitvāti attho**”ti. **Saheva nirujjhantīti** rūpaṃ kammajamidhādhippetanti katvā vuttaṃ. Utujam pana cutito uddhampi pavattati eva. **Pubbe vuttanti** “rūpassa sattarasacittakkaṇā, arūpassa tato ekabhāgo”<sup>2</sup>ti<sup>2</sup> evaṃ vuttaṃ addhānappakāraṃ.

**Ekuppādatoti** samānuppādato. Samānattho hi ayaṃ ekasaddo. **Eko daṭṭhabbākāro**ti eko nātapariññāya passitabbākāro.

1. Abhi 1. 17 piṭṭhādīsu.

2. Mūlaṭi 2. 20 piṭṭhe.

Evañhi soḷasākārā siyūṃ, itarathā vīsati, tato adhikā vā ete ākārā bhaveyyūṃ. **Tassāti** pacchimakammajassa. **Heṭṭhā soḷasaketi** pariyoṣānasoḷasakassa anantarātītasoḷasake. **Pacchimassāti** tattha pacchimacittassa. Nānānirodhabhāvaṃ viya ekuppādabhāvampi pacchimakammajassa ṭhapane kāraṇaṃ anicchanto “**yadi panā**”ti sāsāṅkaṃ vadati. “**Sabbampī**”ti-ādinaṃ tattha atippasaṅgaṃ dasseti. **Vajjetabbaṃ** nānuppādaṃ ekanirodhaṃ. **Gahetabbaṃ** ekuppādanānānirodhaṃ. Ubhayampi **tadā natthi** anuppajjanato. Tenevāha “**kammajarūpassa anuppattito**”ti. **Tato pubbeti** pacchimakammajarūpuppajjanato oraṃ. **Aññassāti** yassa cittassa uppādakkhaṇe uppannaṃ, tato aññassa cittassa. Ṭhitikkhaṇe uppannassa ekuppādatā, bhaṅgakkhaṇe uppannassa nānānirodhatā ca natthīti āha “**ṭhitibhaṅgakkhaṇesu uppannarūpāni vajjetvā**”ti. **Tenāti** rūpena. “**Saṅkhalikassa viya sambandho**”ti etena avicchinnasambandho idha “paveṇī”ti adhippetoti dasseti. **Aññathāti** vicchijjamānampi gahetvā “paveṇī”ti vuccamāne. Na hi rūpadhammānaṃ arūpadhammānaṃ viya anantarapaccayabhāvo atthīti rūpadhammānaṃ bhaṅgakkhaṇe uppannarūpadhamme aggahetvā **aṭṭhacattālīsā**”ti vuttaṃ. Tesam pana gahaṇe ekūnapaññāsāva siyāti āha “**ekūnapaññāsakammajiyavacanaṃ kattabbaṃ siyā**”ti.

**Sudīpanattāti** sukhadīpanattā, nayadassanabhāvena vā suṭṭhu dīpanattā. Tenevāha “**etena hi nayanā**”ti-ādi. Tattha **tanti** rūpaṃ. **Tenāti** rūpena. **Ubhayatthāti** pacchimakammajarūpappavattiyāṃ, tato pubbe ca. **Aññassāti** ekassa cittassa ṭhitikkhaṇe uppajjitvā tato aññassa cittassa. **Tassāti** rūpassa. Ettha ca pacchimakammajarūpappavattiyāṃ nirujjhanakanti vuttaṃ tato puretarappavattaṃ rūpaṃ veditabbaṃ. **Catusantatīkarūpenāti**-ādi yathāvuttasaṅgahagamanadassanaṃ. **Etthāti** etasmim nānuppādekanirodhatādīpane. **Ṭhitikkhaṇeti** arūpassa, rūpassa ca ṭhitikkhaṇe uppannassa rūpassa ca arūpassa ca dassitattā. **Adassitassāti** yathā eva ettha, evaṃ tattha vibhajitvā adassitassa. Kasmā panettha pacchimakammajena dīpanāyaṃ samatimsakammajarūpaggahaṇaṃ katanti āha “**samatimsa -pa-yojitan**”ti. Tato kammato jātā **taṃkammajā**, tesu. Saṅkharotīti saṅkhāro, jīvitaṅca taṃ saṅkhāro cāti **jīvitasāṅkhāro**, āyu. Jivitena saṅkharīyantīti **jīvitasāṅkhārā**, usmādayo.

**Aññassa uppādakkhaṇeti** yassa cittassa uppādakkhaṇe uppannaṃ rūpaṃ aññassa tato sattarasamassa uppādakkhaṇe, ṭhitikkhaṇe uppannaṃ aññassa ṭhitikkhaṇeti sambandho. **“Vuttanti adhippāyo”**ti idaṃ pāḷiyā virujjhantampi aṭṭhakathāyaṃ āgatabhāvadassanattaṃ vuttanti ayamettha adhippāyoti attho. **Kasmā**ti cittasamuṭṭhānarūpaṃ sandhāya pāḷi pavattā, aṭṭhakathāyaṃ pana kammajarūpanti sā tāya kena kāraṇena virujjhātī āha **“catu -pa-bhavitabbattā”**ti, nipphannassāti adhippāyo. Tenāha **aṭṭhakathāyaṃ** “yo cāyaṃ cittasamuṭṭhānassa -pa- kammādisamuṭṭhānassāpi ayameva khaṇaniyamo”ti<sup>1</sup>. **Etehi**ti yathānīto yamakapāṭho, “kāyasaṅkhāro cittasamuṭṭhāno”ti-ādiko aṭṭhakathāpadesoti etehi. **Natthiyeva** ekuppāda-ekanirodhadīpanatoti adhippāyo. Tena hi vuttaṃ “yena cittaena saddhim uppajjati, tato paṭṭhāya sattarasamena saddhim nirujjhatī”ti-ādi<sup>1</sup>.

Puna **“etehi”**ti iminā ekuppādanānānirodhanānuppāda-ekanirodhadīpanavasena pavattā aṭṭhakathāpadesā gahitāti vedittabbam, ubhayatthāpi vā etehi ācariyehīti attho. Tatiyo bhāgo, tena adhikā soḷasacittakkhaṇāyukatā **tatiya -pa- yukatā** vuttāti sambandho. **Tatiyabhāgoti** ca uppādaṭṭhitikkhaṇe upādāya bhaṅgakkhaṇo adhippeto. Yasmiṃ ekādasa cittakkhaṇā atītā, avasesapañcaccittakkhaṇāyuke, yasmiṃ pañcadasa cittakkhaṇā atītā, avasesa-ekacittakkhaṇāyuke tasmiṃyeva ārammaṇeti yojetabbam. Ubhayañcetaṃ yathākkamaṃ manodvāre, pañcadvāre ca āpāthagataṃ vedittabbam. Na kho panevaṃ sakkā viññātum ekacittakkhaṇātītaṃ ārammaṇaṃ sandhāya **paṭiccasamuppādavibhaṅgaṭṭhakathāyaṃ**<sup>2</sup> tathā vuttanti dassento **“na hi sakkā”**ti-ādimāha. **Pañcadasā**ti atirekapañcadasa cittakkhaṇā atītāti sambandho. **“Tasmā”**ti-ādinā yattha khaṇekadesaṃ aggahitanti na sakkā vattum, tameva dasseti. Evaṃ tāva na rūpaṃ sattarasacittakkhaṇāyukaṃ, nāpi tatiyabhāgādhikasolāsacittakkhaṇāyukaṃ, atha kho soḷasacittakkhaṇāyukamevāti dassitaṃ hoti.

1. Abhi-Ṭṭha 2. 26 piṭṭhe.

2. Abhi-Ṭṭha 2. 150 piṭṭhe.

Kasmā panettha rūpameva samānepi aniccasaṅkhatādibhāve cirāyukaṃ jātanti? Dandhaparivattibhāvato. Arūpadhammā hi sārammaṇā cittapubbaṅgamā, te yathābalaṃ attano ārammaṇavibhāvanavasena pavattantīti tadatthanipphattisamanantarameva nirujjhanato lahuparivattino. Tenāha bhagavā “nāhaṃ bhikkhave aññaṃ ekadhammampi samanupassāmi evaṃ lahuparivattaṃ, yadidaṃ bhikkhave cittaṃ”<sup>1</sup>. Rūpadhammā pana anārammaṇā, te ārammaṇavasena arūpadhammehi vibhāvetabbā. Sā ca nesāṃ vohārānuguṇā vibhāvetabbatā attano dandhaparivattitāya, tesaṅca lahuparivattitāya soḷasahi, sattarasahi vā cittaḅkhaṇehi nippajjati rūpamevettha cirāyukaṃ jātāṃ. Kiṅca—  
lahuviññāṇavisayasantati mattādhīnavuttitāya tiṇṇaṃ khandhānaṃ, ārammaṇūpaladdhimattabhāvato viññāṇassa ca lahuparivattitā, dandhamahābhūtappaccayatāya pana rūpassa dandhaparivattitā. Nānādhātūsu tathāgatasseva yathābhūtaññaṃ, tena ca rūpameva purejātapaccayo vutto, pacchājātapaccayo ca tassevāti na ettha aniccasaṅkhatādibhāvasāmaññaṇa rūpārūpaṃ samānāyukaṃ parikappettaṃ. Vuttanayena rūpameva cirāyukanti niṭṭhamettha gantabbaṃ.

Yathā ca rūpassa sattarasacittakkaṇāyukatā, tatiyabhāgādhikasōḷasacittakkaṇāyukatā vā na hoti, taṃ dassetvā yvāyaṃ aṭṭhakathāyaṃ cittassa ṭhitikkhaṇe rūpuppādo vutto, tattha ṭhitikkhaṇameva tāva cittassa ananujānanto **“yo cettha -pa- vicāretabbo”**ti vatvā yamake uppanna-uppajjamānavārādipāḷim āharanto **“cittayamake”**ti-ādimāha. Tattha **paripunṇavissajjaneti** ubhayampi yamakapadaṃ ahāpetvā katavissajjane. **Uppādakkhaṇe anāgatañcāti** uppādakkhaṇe ca cittaṃ, anāgatañca cittaṃ na niruddhaṃ, nirujjhamānanti attho. **Ṭhitikkhaṇābhāvaṃ cittassa dīpetīti** uppanna-uppajjamānavārādīsu “ṭhitikkhaṇe”ti avacanaṃ cittassa ṭhitikkhaṇaṃ nāma natthīti imamatthaṃ dīpeti bodheti. Na hi yathādhammaśāsane abhidhamme labbhamānassa avacane kāraṇaṃ dissatīti adhippāyo. Na kevalamabhidhamme avacanameva cittassa ṭhitikkhaṇābhāvajotakaṃ, apica

---

1. Am 1. 9 piṭṭhe.

kho suttantapāḷipīti dassento “**suttesupī**”ti-ādimāha. Tattha **aññathattarū** nāma pubbāparaviseso. **Khaṇadvayasamaṅgim** **ṭhitanti** paccuppanassa **ṭhitabhāvamāha**. Aññathattarū pana santāneyeva veditabbarū.

Ettha ca keci “yathābhūto dhammo uppajjati, kimtathābhūtova bhijjati, udāhu aññathābhūto? Yadi tathābhūtova bhijjati, na jaratāya sambhavo. Atha aññathābhūto, añño eva soti sabbathāpi **ṭhitikkhaṇassa** abhāvoyevā”ti vadanti. Tattha ekadhammādhārabhāvepi uppādanirodhānarū añño va uppādakkhaṇo, añño nirodhakkhaṇo. Uppādāvatthāñhi upādāya uppādakkhaṇo, nirodhāvattharū upādāya nirodhakkhaṇo. Uppādāvatthāya ca bhinnā nirodhāvatthāti ekasmiṃyeva sabhāvadhamme yathā icchitabbā, aññathā añño va dhammo uppajjati, añño dhammo nirujjhatīti āpajjeyya, evarū nirodhāvatthāya viya nirodhābhimukhāvatthāyapi bhavitabbarū. Sā **ṭhiti**, jaratā cāti sampaṭicchitabbametarū. Yadi evarū kasmā pāḷiyarū **ṭhitikkhaṇo** na vuttoti? Vineyyajjhāsayanurodhena nayadassanavasena pāḷi gatāti veditabbā. Abhidhammadesanāpi hi kadāci vineyyajjhāsayanurodhena pavattati. Tathā hi rūpassa uppādo “upacayo, santatī”ti bhindivā desito. Hetusampayuttadukādidesanā cettha nidassitabbā.

“**Yassa vā panā**”ti-ādi pucchāvacaṇarū. Tassa “**no**”ti vissajjanarū. **Samudayasaccarū nirujjhatīti** cittuppādassa nirodhakkhaṇo vutto. Ayamettha adhippāyo—yadi cittassa bhaṅgakkhaṇe rūparū uppajjeyya, tarū dukkhasaccanti katvā “no”ti vatturū na sakkā, vuttañcetarū. Tasmā viññāyati “cittassa nirodhakkhaṇe rūpuppādo natthī”ti. Tayidamakāraṇarū. Arūpalokarū hi sandhāya, cittasamuṭṭhānarūparū vā “no”ti sakkā vattunti. Ayañhi yamakadesanāya pakati, yadidarū yathāsambhavayojanā. Etena “na ca cittasamuṭṭhānarūpamevā”ti-ādivacaṇarū paṭikkhittarū daṭṭhabbarū. Atha vā paccāsattiñāyena yarū samudayasaccarū nirujjhati, tena yarū dukkhasaccarū uppādetabbarū cittacetāsikatappaṭibaddharūpasāṅkhātārū, tassa tadā uppatti natthīti “no”ti vissajjanarū, na sabbassa.

**Sahuppādekanirodhavacaṇatoti** “yassa kāyasāṅkhāro nirujjhati, tassa cittasāṅkhāro nirujjhatīti? Āmantā”ti<sup>1</sup> evarū sahuppādasahanirodhavacaṇato. **Tena vacanenāti** “yassa kāyasāṅkhāro”ti-ādivacaṇena.

---

1. Abhi 6. 26 piṭṭhe.

**Aññarūpānanti** kamma-utu-āhārajarūpānaṃ.

**Sahuppādasahanirodhādikānanti** etthāyaṃ yojanā—

appaṭikkhittasahuppādasahanirodha-ananuññātanānuppādanānānirodha-anivārita-abyākatabhāvānaṃ kammajādīnanti. **Etenāti** “yassa kusalā dhammā uppajjanti”ti-ādikena<sup>1</sup> pāṭhena, “na cittasamuṭṭhānarūpamevā”ti yuttivacanena ca. **Yamakapāḷi-anussaraṇeti** yathādassitacittayamakapāḷiyā yathārutavaseneva anussaraṇe vijjamāne. **Bhijjamānatāti** cittassa bhijjamānatā nāma nirujjhamānatā ṭhitiyā abhāvato. **Sahāyabhāvaṃ nāpi gacchati** nissayatthibhāvādinā paccayabhāvābhāvato. Uppādakkaṇe eva hi anantarādipaccayalābhena cittassa balavatā. **Evañca satīti** evañca utunāpi bhavaṅgacittassa uppādakkaṇeyeva rūpasamuṭṭhāpane sati.

**Taṃcittakkhaṇeti** tassa cittassa khaṇe, khaṇadvayepīti attho. **Tenevāti** atilahunarivattibhāveneva. Atha vā **tenevāti** dandhaparivattikatāya rūpassa sakalaṃ ekacittakkhaṇaṃ uppajjamānabhāveneva. **Tanti** cittaṃ.

Paṭisandhicittaṃ sampayuttadhammānaṃ viya sahaajātarūpadhammānampi sahaajātādipaccayena paccayo hotīti āha “**paṭisandhito uddhan**”ti.

Cittasamuṭṭhānānaṃ cittaṃ sahaajātādipaccayo hotiyevāti vuttaṃ “**acittasamuṭṭhānāna**”ti. **Tadanantaranti** yena cittaena sahuppannaṃ, tassa cittassa anantaraṃ. **Tanti** rūpaṃ. **Tadanantaraṃ cittanti**

sahuppannacittānantaraṃ cittaṃ. **Yadi evanti** yadi sakalaṃ cittakkhaṇaṃ rūpaṃ uppajjamānameva hoti, cittassa uppādakkaṇe eva rūpassa uppādāramboti āha “**na, citta nirodhakkhaṇe rūpuppādārambhābhāvato**”ti.

**Cittakkhaṇeti** attanā sahuppannacittassa khaṇe. **Tanti** rūpaṃ.

**Rūpasamuṭṭhāpanapurejātapaccayakiccanti** rūpasamuṭṭhāpanakiccaṇca purejātapaccayakiccaṇca. **Ṭhitippattivisesālābhanti** ṭhitippattiyā laddhabbo yo viseso, tassa alābhaṃ. **Idaṃ vuttanti** “yena sahuppajjati, taṃcittakkhaṇe rūpaṃ uppajjamānamevā”ti idaṃ pariyāyena vuttaṃ.

Yaṃ yassa sambandhibhāvena vuttaṃ, taṃ dūre ṭhitampi tena sambandhaniyanti āha “**tato paraṃ -pa- etena saha sambandho**”ti. Tasmā “tato”ti ettha taṃsaddena cutiṃ paccāmasatīti vuttaṃ “**cutito paranti attho**”ti.

1. Abhi 7. 51 piṭṭhe.



**Natthīti katvāti** yadipi yathā aṭṭhakathāyaṃ vuttam, tathā ekuppādekanirodhatā rūpānaṃ arūpehi, arūpānañca rūpehi natthi. Yathā ca amhehi vuttam, tathā atthevāti adhippāyo.

Catutthassa pakārassa vuccamānattā “**tayo pakāre āhā**”ti vuttam.

“Tesāmyeva rūpānaṃ kāyavikāro”ti-ādinā parinipphannānaṃ vikārādibhāvaṃ dassetvā “sabbaṃ parinipphannaṃ saṅkhatamevā”ti vadantena parinipphannaṭāpariyāyo dassito. **Pubbantāparantaparicchinnoti** pātubhāvavidhamsabhāvaparicchinno, udayabbayaparicchinno vā. “Ayaṃ datto nāma hotū”ti-ādinā nāmakaraṇaṃ **nāmaggaṇaṃ**. **Samāpajjanaṃ** nirodhasamāpattiyā samathavipassanānukkamena nāmakāyassa nirodhameva. **Ādi**-saddena sattakasiṇādi paññattiyā paññāpanaṃ saṅgaṇhāti. **Nippādiyamānoti** sādhiyamāno.

Pakiṇṇakakathāvaṇṇanā niṭṭhitā.

### **Kamādivinicchayakathāvaṇṇanā**

Uppattikkamādisu desanākkamopi labbhatevāti “**cattāro satipaṭṭhānāti-ādikō desanākkamovā**”ti vuttam. **Anupubbukkamsatoti** dānasīlakāmādinavādidassananekkhammakathānaṃ anukkamena ukkaṭṭhabhāvato kathānaṃ anupubbukkamsatā vuttā. Tena ukkamsakkamo nāmāyaṃ visuṃ kamoti dasseti. Tathāpi dānādīnaṃ desanākkamāvarodhane kāraṇamāha “**uppatti-ādivavattānābhāvato**”ti. Tattha **ādi**-saddena pahānapaṭipattibhūmikkame saṅgaṇhāti. “Cakkhu-ādīnampi visayabhūtan”ti iminā pañcarūpindriyagocaratā adhippetāti āha “**ekadesanā**”ti-ādi. **Ekadesanāti** bahirolārikāyatanehi. **Etthāti** “yaṃ vedayati, taṃ sañjānāti”ti etasmim̐ pade vuttanayena.

**Tamsabhāvātānivattanatthanti** anāsavadhammasabhāvātānivatta nattham. **Anāsavā khandhesveva vuttāti attho** sāsavānampi khandhesu vuttattā. Nanu ca anāsavadhammo khandhesu avuttopi atthīti? Saccam̐ atthi, khandhādhiḱāre khandhāpariyāpannā eva anāsavā gayhantīti nāyaṃ doso.

Yathā phassādayo visesato tadanuḡavuttitāya saṅkhatābhisaṅkharāṇasabhāvāti saṅkhārakkhandhe samavaruddhā, na evaṃ vedanāsaññāviññāṇānīti rūpadhammā viya tāni visuṃ khandhabhāvena vuttāni. Etena phassādīnaṃ visuṃ khandhasaddavacanīyatābhāvo vuttoti veditabbo. Tena vuttam **“phusanādayo panā”**ti-ādi. **Iti-ādīnaṃca suttānanti** ettha **ādi**-saddena “rūpe kho bhikkhave sati rūpaṃ upādāya rūpaṃ abhinivissa uppajjanti saṃyojanābhīnivesavinibandhā. Vedanāya. Saññāya. Saṅkhāresu. Viññāṇe sati viññāṇaṃ upādāya viññāṇaṃ abhinivissa uppajjanti saṃyojanābhīnivesavinibandhā”<sup>1</sup>, tathā “ahaṃ rūpaṃ, mama rūpanti pariyaṭṭhaṭṭhāyī hoti”<sup>2</sup> ca evamādīnaṃ suttapadānaṃ saṅgaho daṭṭhabbo. **Etenāti** attanā dassitasuttena. **Vakkhamānasuttavasena cāti** “rūpe kho bhikkhave satī”<sup>3</sup>ti-ādikassa<sup>3</sup> **aṭṭhakathāyaṃ**<sup>4</sup> vakkhamānassa suttassa vasena. **“Parittārammaṇādivasena na vattabbā”**ti etena navattabbārammaṇāpi diṭṭhi khandhe eva nissāya uppajjati, pageva khandhārammaṇāti dasseti.

**Vedanākāraṇāyāti** vedanāyātanāya<sup>5</sup>. **Chādāpanatoti** rocāpanato. **Bāhullenāti** bahulabhāvena. Upādānakkhandhā hi bāhullappavattikā, na itare.

**Puṭam katvāti** ca chattasadisam puṭam bandham katvā. **Vutthumhīti** cakkhādivatthumhi. **Vaṭṭagatavedanaṃ sandhāya vuttam**. Sā hi idha daṭṭhabbabbhāve ṭhitā. **Ūnehīti** vatthunā, kilesehi ca ūnehi.

**Māyāyāti** indajālādīmāyāya payogo māyāti adhippāyenāha **“māyāya dassitam rūpaṃ ‘māyā’ti āhā”**ti. **Vatthubhāvāditoti ādi**-saddena ārammaṇasampayuttādike saṅgaṇhāti. **Katthacīti** rūpakkhandhādike. **Koci visesoti** asubhādikova.

**Tassāti** ajjhattikarūpassa. Yassa kāmarāgappahānamukhena sabbarāgappahānam sambhavati, tam sandhāyāha **“kāmarāgamukhena vā sabbalobhappahānam vadatī”**ti. **Yojetabbanti** vedanāya chandarāgam pajahanto tassā

1. Saṃ 2. 152 piṭṭhe.

2. Saṃ 2. 3 piṭṭhe.

3. Saṃ 2. 39 piṭṭhe.

4. Abhi-Ṭṭha 2. 29 piṭṭhe.

5. Vedanākāraṇassāti vedanāghātanāya (bahūsu)

samudayabhūte phassepi chandarāgaṃ pajahatīti yojetabbanti.

Pariññattayassa yojanā pākaṭā eva.

**Tatoti** dukkhuppādanasukhavināsanānaṃ adassanato. **Bhindatīti** vināseti. **Tanti** manosañcetanāhāraṃ ñātātiraṇapariññāhi pariggaṇhāti tīreti.

**Taṃ pajahantoti** avijjāṃ pajahanto. **Parāmatṭhanti** parāmāsasaṅkhātāya diṭṭhiyā niccādivasena gahitaṃ. **Viññānaṃ niccato passanto diṭṭhupādānaṃ upādiyati**ti ayamattho “tadevidaṃ viññānaṃ sandhāvati saṃsarati, anaññaṃ”ti-ādisuttapadehi<sup>1</sup> dīpetabbo.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

34. **Taṃ vatvāti** taṃ bhūmivasena jānitabbataṃ “sabbāpi catubhūmikavedanā”ti-ādinā vatvā. **Sampayuttato dassitatādīti** ettha ādisaddena hetujātibhūmi-indriyavatthusamphassajabhedato dassitataṃ anavasesato saṅgaṇhāti.

Yadipi taṃ-saddo pubbe vuttassa sāmāññato paṭiniddeso, tathāpi anantameva paccāmasitum yutto itarattha asambhavatoti āha “**aṭṭha -pa-yojanā**”ti. “**Aṭṭhavidhattābhāvato**”ti iminā taṃsambhavaṃ dasseti.

**Pūraṇatthameva vutto**, apubbatābhāvatoṭi attho.

**Gahaṇavaḍḍhanavasena**ti gahaṇassa vaḍḍhanavasena. **Gahaṇanti** cettha kathanāṃ daṭṭhabbāṃ, tassa vaḍḍhanaṃ tasmim tasmim ṭhāne avuttassa kathanāṃ. Tenāha “**pubbe gahitato aññassa gahaṇaṃ vaḍḍhanan**”ti, tato eva ca “**purimagahite aññupacayavasena**”ti vuttaṃ. “**Vuḍḍhanasaddo chedanattho**”ti idaṃ yathā asivā “sivā”ti, diṭṭhañca “**adiṭṭhan**”ti vuccati, evaṃ daṭṭhabbāṃ. **Nayanīharaṇanti** nīyatīti nayo, desanā, tassa nīharaṇaṃ pavattanaṃ. **Vaḍḍhanakanayoti**

1. Ma 1. 323 piṭṭhe.

yathāvuttavaḍḍhanakavasena pavatto desanānayo. **Aññe bhedāti** ekavidhacatubbidhādayo bhedā. Yadi avisiṭṭhā, kasmā vuttāti āha “**tathāpi**”ti-ādi. Tattha **paññāppabhedajananatthanti** dhammavisayāya pabhedagatāya paññāya vineyyānaṃ nibbattanattham, vijjāṭṭhānādivasena vineyyānaṃ dhammapaṭisambhidāya uppādanatthanti attho. Abhiññeyyadhammavibhāgatāya sammasanavārassa visayabhāvato vuttam “**ekekassa vārassa gahitassa niyyānamukhabhāvato**”ti. **Itarepi bhedā vuttāti** duvidhatividhabhedānaṃ yaṃ nānattam, tassa vasena itare bhedā anānattāpi yathāvuttakāraṇato vuttā. “**Na kevalan**”ti-ādinā bhedānaṃ aññamaññapekkhataṃ dassetvā “**tasmā**”ti-ādinā tesam viṣiṭṭhataṃ dasseti.

Yathā dukamūlakādīsu bhedā gaṇanānupubbiyā pavattā pabhedantarāpekkhā, na evamete. Ete pana sattavidhātibhedā pabhedantarānirapekkhā kevalam bahuvidhabhāvasāmaññeneva vuttāti dasseti “**aññāppabhedanirapekkhā**”ti-ādinā. Dukatikapadatthānaṃ yathārahaṃ apekkhitabbāpekkhakabhāvena vuttattā yathā duke ṭhapetvā vuttā tikā tattha pakkhittā nāma jātā, evam tikadukapadatthānaṃ apekkhitabbāpekkhakabhāvena vuttattā duke vatvā vuttupesuppi tikesu te pakkhittā nāma hontīti āha “**parato -pa- yojitattā**”ti.

**Samānavīthiyanti** ekavīthiyam. **Cakkhusamghaṭṭānāyāti** cakkhurūpapaṭiḅhātena. **Soti** cakkhurūpapaṭiḅhāto. **Taduppādikāti** tassa cakkhusamphassassa uppādikā. **Sāti** āvajjanavedanā. Nanu ca vedanāpaccayo phasso vutto, na phassapaccayā vedanāti? Na, vedanāsīsena cittuppādassa gahitattāti. **Tappayojanattāti** cakkhusamphassapayojanattā. Payojayatīti **payojanam**, phalam.

**Rūpāvacarārūpāvacarānaṃ** vipākānanti adhippāyo. Te hi idha aggahitā. Tenevāha “**tesam sayameva manodvārabhūtattā**”ti-ādi. **Tatoti** bhavaṅgato. **Cakkhusamphassapaccayādikusalādīnanti** ettha purimena **ādi**-saddena “**sotasamphassapaccayā**”ti evamādayo saṅgahitā, dutiyena akusalādayo. “**Kāmāvacara-aṭṭhakusalacittavasena**”ti-ādinā kusalābyākatānampi kāmāvacarānaṃyeva yojitattā vuttam “**samānavīthiyam**

**labbhamānatā aṭṭhakathāyaṃ vuttā**”ti. Vedanāpītisanidassanattikavajjānaṃ ekūnavīsatiyā tikānaṃ vasena **ekūnavīsaticatuvīsatikā**. Yadi asamānavīthiyampi kusalādīnaṃ labbhamānatā yojetabbā, atha kasmā samānavīthiyaṃyeva yojitāti āha **“aṭṭhakathāyaṃ panā**”ti-ādi. **Tenevāti** asamānavīthiyaṃ appaṭikkhittattāyeva.

**Cittasambandho**ti cittena sambandho cittasambandhaṃ katvā cittaśisena vedanāya kathanāṃ. **Tikabhūmivasenāti** kusalattikāditikavasena, kāmāvacarādibhūmivasena ca. **Dvāratikavasenāti** cakkhādi-uppattidvāravasena, kusalattikāditikavasena ca. **Yattha katthacīti** dīpetabbassa atthassa viśesābhāvato sattavidhabhedādīsu yattha katthaci. Na ca dvāraṃ anāmaṭṭhanti yojanā. Tena sattavidhabhedato tiṃsavidhabhede viśesaṃ dasseti. Yadi pi ubhayattha bhūmiyo āgatā, rūpāvacarādibhūmī-āmasanena pana asamānavīthiyaṃ labbhamānatā dassitāti āha **“atibiyattā ca ettha samānāsamānavīthīsu labbhamānatā**”ti. **Sukhadīpanāni honti** dvārabhūmī-āmasanamukhena vedanākkhandhassa vibhattattā. **Na bhūmiyo apekkhitvā ṭhapitāti** kathetabbabhāvena bhūmiyo apekkhitvā na ṭhapitā, bhūmivibhāgena na kathitāti attho. **Apekkhitabbarahitāti** dvārabhūmīnaṃ agghatattā ākaṅkhitabbadvārādivisesarahitā.

**“Upanissayakoṭiyā**”ti ettha nipariyāyato, pariyaṃyato ca upanissayakoṭidassanamukhena idhādhippeta-upanissayakoṭiṃ dassetuṃ **“saddhaṃ upanissāyā**”ti-ādi vuttaṃ. Tattha **upanissayānanti** vedanāya upanissayabhūtānaṃ. **Dassananti** cakkhuvīññāṇaṃ, disvā vā gahaṇaṃ. **Upanissayantabhāvenāti** lāmakūpanissayabhāvena. Yadi ghāyanādīni upanissayo bhavyeṃ, pakatūpanissayāneva siyūṃ. Pakatūpanissayo ca nānāvīthiyaṃyevāti tadalābhavacanaṃ idha nānāvīthijotakanti dasseti **“ghānādidvāresū**”ti-ādinā. **Kasiṇaparikammādīnanti** kasiṇaparikammāsamaṃpattinibbattanavipassanāvaddhanādīnaṃ. **Tadalābhoti** upanissayālābho, so ca ghāyanādīhi paresaṃ paṭipattiyā jānitum asakkuṇeyyattā. Antimabhavikabodhisattādīnaṃ savanena vinā taṃphusaṃ siyā mūlūpanissayoti **“yebhuyyenā**”ti vuttaṃ.

**Sampannajjhāsayoti** vivaṭṭūpanissayasampattiyā sampannajjhāsayo.  
**Tenāti** “evaṃ cakkhuviññāṇaṃ”ti vacanena. **Tadupanissayanti** tato paraṃ  
 uppannakasiṅgarūpadassanādīnaṃ upanissayabhūtaṃ.

Thāmagamaṇaṃ nāma kāmarāgādīnaṃyeva āveṇiko sabhāvoti āha  
 “**appahīnakāmarāgādikassa vā**”ti. “Rāgo uppanno”ti-ādīnā  
 iṭṭhāniṭṭhārammaṇe rāgapatiṅghānaṃ uppattivacāraṇāva vuttā, na nesaṃ  
 kiccavisesoti kiccavisesena vutte dassento “**asamapekkhanāyā**”ti-ādīmāha.  
**Pavattā** vedanāti attho. **Pakārantarenāti** cakkhusamphassapaccayā  
 uppannakilesānaṃ samatikkamanasaṅkhātena pakārantarena.  
**Tathābhāvanāvasenāti** ettha **tathā**-saddena cakkhusamphassassa  
 catubhūmikavedanāya upanissayabhāvo eva pakārantarena kathitoti  
 imamevatthaṃ ākaḍḍhati. Bhāvanāyevettha **pakārantaram**.

**Sabbaṃ sammasanaṃ bhāvanāti** veditabbā, na  
 nīvaraṇappahānapariññāva.

**Aññamaññassa cāti** phoṭṭhabbamahābhūtesu itarītarassa, āpodhātuyā ca  
 vasena.

**Tesanti** jāti-ādīnaṃ, kammatthe cetāṃ sāmivacanaṃ. Sahajātassa  
 manosamphassassa balavapaccayabhāvaṃ dassetīti sambandho. **Tassa vā**  
**dassanassāti** tassa vā jāti-ādike bhayato dassanavasena pavattassa  
 kāmāvacarañāṇassa.

**Tadeva attano phalasseva phalabhāvenāti** “manosamphasso”ti  
 phassassa kāraṇabhāvena yaṃ vuttaṃ, tadeva viññāṇaṃ attano phalassa  
 phalabhāvena vuttassa phassassa “cakkhusamphassajan”ti-ādīnā  
 phalabhāvena vuttaṃ na yuttaṃ. “Manosamphasso”ti-ādīnā labbhamānopi  
 viññāṇaṃ paṭicca phassassa paccayabhāvo hetuphalasaṅkarapariharaṇatthaṃ  
 na vuttoti vatvā yadipi phasso viññāṇassa paccayo hoti, na pana phassassa  
 viya viññāṇaṃ so tassa visesapaccayo hotīti viññāṇassa  
 cakkhusamphassajāditā na vuttāti dassetuṃ “**yasmā vā**”ti-ādi vuttaṃ.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

150. **Taṃ taṃ samudāyanti** taṃ taṃ  
cittuppādasāṅkhātadhammasamudāyaṃ,  
anavasesarūpadhammasamudāyaṃca. **Yathāsambhavanti** copanaṃ patto  
saṃvaro chaṭṭhadvāre, itaro chasupīti evaṃ yathāsambhavaṃ. **Tatoti**  
abhijjhādomanassādito. **Yathāyoganti** yo saṃvaritabbo, tadanurūpaṃ.

**Katthacīti** te eva parivaṭṭe sāmāññena vadati. **Katthacīti** vā tesu  
parivaṭṭesu kismiñcīpi padese. **Kiñcīpi**<sup>1</sup> appakampi. **Ekova paricchedo**, na  
āyatanavibhaṅgādīsu viya nānāti adhippāyo.

**Khandhavibhaṅgavaṇṇanā niṭṭhitā.**

---

1. Kiñci (Mūlaṭī 2. 33 piṭṭhe.)

## 2. Āyatanavibhaṅga

### 1. Suttantabhājanīyavaṇṇanā

154. **Asādhāraṇatoti** āveṇikato. Tam nesaṃ asādhāraṇabhāvaṃ vipakkhavasena paṭiṭṭhāpetuṃ sādharmaṇaṃ udāharaṇavasena dasseti “**āyatanasaddattho viyā**”ti. Atha vā cakkhādi-attho eva cakkhādisaddavisesito āyatanattho ti taṃ tādisaṃ āyatanatthaṃ sandhāyāha “**āyatanasaddattho viya asādhāraṇato**”ti.

Yadi visayassādanattho cakkhusaddo, sotādīnampi ayaṃ samaññā siyāti atippasaṅgaṃ pariharanto “**satipī**”ti-ādimāha. Dutiye atthavikappe **cakkhatīti** viññāṇādhiṭṭhitāṃ samavisamaṃ ācikkhati, ācikkhantaṃ viya, vibhāventāṃ viya vā hotīti attho. **Rūpamiva** cakkhuviññeyyaṃ viya **saviggahamiva** sabimbakaṃ viya vaṇṇavācako rūpasaddo adhippetoti āha “**vitthāraṇaṃ vā rūpasaddassa attho**”ti.

**Vacanamevāti** saviññattikasaddameva. **Gamīyatīti** upanīyati. Ajjhoharaṇassa rasaggahaṇamūlatāvacanena rasassa paramparāya jīvitahetutaṃ dasseti. Rasanimittaṃ hi **rasaggahaṇaṃ**, rasaggahaṇanimittaṃ **ajjhoharaṇaṃ**, taṇnimittaṃ **jīvitanti**. Rasaggahaṇamūlatā ca ajjhoharaṇassa yebhuyyato veditabbā. Dissati apadissati etena phalanti deso, hetūti āha “**uppattidesoti uppattikāraṇaṃ**”ti. **Tathāti** cakkhāyatanādippakārena. **Manogocarabhūtāti** manaso eva gocarabhūtā. **Sāmaññalakkhaṇenevāti** anubhavanādivisesalakkhaṇaṃ aggahetvā dhammabhāvasaṅkhātasādhāraṇalakkhaṇeneva. **Ekāyatanattaṃ upanetvā vuttā** dvādasa ekasabhāvattā bhinditvā vacane payojanābhāvā. Dvārāmbanavibhāgadassanattā hi āyatanadesanāti.

**Pubbantatoti** purimabhāgato pākabhāvato. Pākabhāvo hi sabhāvadhammānaṃ pubbanto, viddhāmsābhāvo aparanto.

Nivāsaṭṭhānādīsu āyatanasaddo na āyatanatthādīsu viya padatthavivaraṇamukhena pavatto, atha kho tasmim tasmim devagharādike niruḷhatāya evamattho ti āha “**ruḷhivasena āyatanasaddassatthaṃ vattun**”ti.

**Manoti**



dvārabhūtamano. **Nissayabhāvoti** ettha nissayasadiso nissayo, sadisatā ca phalassa tappaṭibaddhavuttitāya daṭṭhabbā. **Vacaniyatto** bhāvatto.

**Tāvativatoti** tattakato. **Ūnacodanā**ti dvādasato ūnāni kasmā na vuttānīti codanā. Yadi cakkhuviññāṇādīnaṃ asādhāraṇaṃ dhammajātaṃ dhammāyatanāṃ, evaṃ sante cakkhādīnampi dhammāyatanabhāvo siyāti codanaṃ sandhāyāha “**satipī**”ti-ādi. **Dvārārammaṇabhāve**hīti na ārammaṇabhāvene va asādhāraṇaṃ, atha kho dvārārammaṇabhāvehi asādhāraṇaṃ sambhavatīti vacanaseso.

**Yebhuyyasahuppatti-ādī**hīti yebhuyyena cakkhāyatanādīni kassaci kadāci ekato uppajjanti. “Kāmadhātuyā upapattikkhaṇe kassaci ekādasāyatanāni uppajjanti”ti hi vuttaṃ. Tasmā āyatanānaṃ uppattikkamo tāva na yujjati, na pahānakkamo kusalābyākatānaṃ appahātabbato, na paṭipattikkamo akusalānaṃ, ekacca-abyākatānaṃ appaṭipajjanīyato, na bhūmikkamo aḍḍhekādasannaṃ āyatanānaṃ ekantakāmāvacarattā, itaresaṃ catubhūmipariyāpannattā, ekaccassa lokuttarabhāvato ca. Evaṃ uppattikkamādi-ayuttiyojanā veditabbā. Yesu vijjamānesu attabhāvassa paññāpanā, te “mayhaṃ cakkhun”ti-ādīnaṃ adhikasinehavatthubhūtā cakkhādayo yathā ajjhattikatāya, evaṃ dassanādikiccakara-indriyatā ca padhānāti āha “**ajjhattikabhāvena, visayibhāvena cā**”ti. **Ghānādikkamenā**ti ghānaṃ jivhā kāyoti iminā kamena.

Paccuppannārammaṇattā vā cakkhādīni paṭhamaṃ vuttāni, mano pana kiñci paccuppannārammaṇaṃ, kiñci yāvanavattabbārammaṇanti pacchā vuttaṃ. Paccuppannārammaṇesupi upādārūpārammaṇāni cattāri paṭhamaṃ vuttāni, tato bhūtarūpārammaṇaṃ. Upādārūpārammaṇesupi dūratāre dūre, sīghataraṃ sīghaṇca ārammaṇasampaṭicchanadīpanatthaṃ cakkhādīnaṃ desanākkamo. Cakkhusotadvayaṇhi dūragocaranti paṭhamaṃ vuttaṃ. Tatrāpi cakkhu dūratāragocaranti sabbapaṭhamaṃ vuttaṃ. Passantopi hi dūratāre nadisotaṃ na tassa saddaṃ suṇāti. Ghānajivhāsupi ghānaṃ

sīghataravuttīti paṭhamam vuttam. Purato ṭhapitamattassa hi bhojanassa gandho gayhatīti. Yathāṭṭhānam vā tesam desanākkamo. Imasmiñhi sarīre sabbupari cakkhussa adhiṭṭhānam, tassa adho sotassa, tassa adho ghānassa, tassa adho jivhāya, tathā kāyassa yebhuyyena, mano pana arūpībhāvato sabbapacchā vutto. Tamtamgocarattā tassa tassānantaram bāhirāyatanāni vuttānīti vuttovāyamatthoti evampi imesam kamo veditabbo.

**Tatoti** hadayavatthubhedato. Yañhi hadayavatthum nissāya ekaṃ manoviññānam pavattati, na tadeva nissāya aññam pavattati.

**Niddesavasenāti** saṅkhepavittāraniddesavasena. **Yojetabbarā**

“kusalāsamuṭṭhānam kusalāsamuṭṭhānassa sabhāgan”ti-ādīnā.

**Sabhāvoti** visayavisayabhāvo, tadabhinibbattiyañca yogyatā.

**Kāraṇasamatthātīti** kāraṇabhūtā samatthatā paccayabhāvo. **Dvārādibhāvoti** dvārārammaṇe dvāravuttibhāvo. **Imasmim attheti** anantaram vutta-atthe.

**Yasmāti** yāya dhammatāya yena dvārādibhāvena kāraṇabhūtena.

**Sambhavanavisesananti** kiriyāya parāmasanamāya. **Yaṃ** sambhavanam, dhammatāvesatī attho. **Rittakānevāti** dhuvādibhāvarittakāneva. Visamādisu ajjhāsayo etesanti visamādi-ajjhāsayāni, visamādi-ajjhāsayāni viya hontīti **visamādi-ajjhāsayāni**, cakkhādīni. **Visamabhāva -pa- vanabhāvehīti** visamabhāvādisannissita-ahi-ādisadisupādinnadhammehi cakkhādīhi, vanasannissitamakkaṭṭasadisena cittaena ca abhiramittatā. **Vanabhāvoti** hi vanajjhāsayoti attho.

**Purimantavivittatīti** pubbhāgaviraho. Uppādato purimakoṭṭhāso hi idha purimanto. **Aparanteti** aparabhāge, bhāngato uddhanti attho.

Udayabbayaparicchinno hi sabhāvadhammo. Yaṃ sandhāya vuttam

“anidhānagatā bhaggā, puñjo natthi anāgate”ti<sup>1</sup>. **Sadā abhāvoti** na sadā

abhāvapatīṭṭhāpanam sabbakālampi natthīti, atha kho

udayabbayaparicchinntā sadābhāvapaṭikkhepoti āha “**aniccalakkhaṇan**”ti.

**Sabhāvavijahananti**

---

1. Khu 7. 32 piṭṭhe.

bhaṅgappattimāha. Viparivattanam upādajārāvattahāhi santānam vinā na vikārāpattīti āha “**santānavikārāpatti vā**”ti.

**Jātidhammatādīhīti** jātijarābyādhimaraṇādisabhāvatahi. **Aniṭṭhatāti** na iṭṭhatā, dukkhatāti attho. **Purimam sāmāññalakkhaṇanti** “paṭipīlanatṭhenā”ti pubbe sāmāññato vuttam dukkhalakkhaṇam. Paccayavasena dukkhanākārena pavattamānānam sabhāvadhammānam dukkhanam puggalasseva vasena dukkhamatāti āha “**puggalassa pīlanato dukkhaman**”ti. **Dukkhavacananti** “dukkhan”ti satthu vacanam.

“**Natthi etassa vasavattako**”ti iminā natthi etassa attāti anattāti imamattham dasseti, “**nāpi idam vasavattakan**”ti iminā pana na attāti anattāti. **Attanoti** niyakajjhattam sandhāya vadati. **Parasminti** tato aññasmim. **Parassa ca attanīti** etthāpi eseva nayo. **Tam etassa natthīti** tam yathāvuttaparaparikkappitam vasavattakam etassa cakkhādino natthi, etena catukoṭikasunñatāya saṅgaho daṭṭhabbo. “Suñnam tam<sup>1</sup> tena vasavattanākārenā”ti iminā ubhayathāpi avasavattanatṭhe dassitabbe tattha tāva ekam dassetum “**parassā**”ti-ādim vatvā puna “**atha vā**”ti-ādinā itaram dasseti. Sāmi eva sāmiko, na sāmiko **assāmikoti** evam atthe gayhamāne “assāmikato”ti padassa suñnavisesanatāya payojanam natthi. **Kāmakāriyanti** yathākāmakaraṇīyam. **Avasavattanattham visesetvā dasseti** samāsadvayatthasaṅgahato.

Sasantāne dhammānam visadisuppatti idha bhāvasaṅkantigamanam nāmāti āha “**santatiyam bhāvantaruppattiyevā**”ti. Tathā visadisuppattiyam purimākāravigamo pakatibhāvavijahananti āha “**santatiyā yathāpavattākāravijahanan**”ti. Bhavatīti vā bhāvo, avatthāviseso, tassa saṅkamanam **bhāvasaṅkanti**. Sabhāvadhammo hi uppādakkhaṇam, ṭhitikkhaṇaṅca patvā bhijjatiṭti uppādāvattahāya jarāvattam, tato bhaṅgāvattam saṅkamatīti vuccati. Tathā saṅkamato ca attalābhakkhaṇato uddham jarāmarañehi taṃsabhāvapariccāgo pakatibhāvavijahananti khaṇavasena cetam yojetabbam. **Pubbāparavasenāti** ca khaṇānam pubbāparavasenāti attho sambhavati.

---

1. Suñnam, Abhi-Ṭṭha 2. 45 piṭṭhe.

**Ekatthattā**ti samānādhikaraṇattā, na pana visesanavisesitabbabhāvānaṃ ekattā. “Cakkhuṃ aniccan”ti vutte “aniccaṃ cakkhun”tipi vuttameva hotīti “yaṃ cakkhu, taṃ aniccaṃ, yaṃ aniccaṃ, taṃ cakkhun”ti āpannamevāti āha “**aniccānaṃ sesadhammānampi cakkhubhāvo āpajjati**”ti.

**Tehi ca** aniccadukkhalakkhaṇehi ca **anattalakkhaṇameva visesena dassitaṃ** “yadaniccaṃ, taṃ dukkhaṃ, yaṃ dukkhaṃ, tadanattā”ti-ādīsu<sup>1</sup> viya. **Dosalakkhaṇākāranidassanattho** dosassa lakkhitabbākāranidassanattho. **Evam dukkhenā**ti evaṃ nānappakārena akkhirogādīdukkhena ābādhatāya. **Anattalakkhaṇadīpakānanti** anattatāpaññāpanassa jotakānaṃ upāyabhūtānaṃ. Na hi ghaṭabhedakaṇṭakavedhādivasena labbhamānā aniccadukkhatā sattānaṃ ekantato anattatādhigamahetū honti. Paccayaapaṭibaddhatā-abhiṇhasamapaṭipīḷanādivasena pana labbhamānā honti. Tathā hi cakkhādīni kammādimahābhūtādi<sup>2</sup> paccayaapaṭibaddhavuttīni, tato eva ahutvā sambhavanti, hutvā paṭiventīti aniccāni, abhiṇhasamapaṭipīḷitattā dukkhāni, evambhūtāni ca avasavattanato anattakānīti pariggahe ṭhitehi samupacitaññasambhārehi passitūṃ sakkā.

Kathaṃ panetesam hutvā abhāvo jānitabboti? Khaṇe khaṇe aññathattadassanato. Taṃ kathaṃ nāyatīti? Yuttito. Kā panettha yuttīti? Visessaggahaṇaṃ. Yadi cakkhādīnaṃ khaṇe khaṇe aññathattaṃ na siyā, bahipaccayabhede yadidaṃ pacchā visessaggahaṇaṃ, taṃ na siyā. Yassa hi tādisaṃ khaṇe khaṇe aññathattaṃ natthi, tassa asati bahipaccayavisesse kathaṃ pacchā visessaggahaṇaṃ bhavēyya, bhavati ca visessaggahaṇaṃ. Tasmā atthi nesaṃ khaṇe khaṇe aññathattaṃ yaṃ saṅikaṃ saṅikaṃ vaḍḍhentaṃ pacchā pākāṭataraṃ jāyatīti. Tathā hi sarīrassa tāva ānāpānānaṃ anavatthānato,<sup>3</sup> parissamato ca visessaggahaṇaṃ. Anavatthitā<sup>4</sup> hi assāsapassāsā vātā vārena vārena pavattanato. Yadi hi assasite vā passasite vā sarīrassa koci pacchā viseso na siyā, na

1. Saṃ 2. 19, 37, 68, 69, 92, 236, 237; Khu 9. 295 piṭṭhesu.

2. Kammādimahābhūtāni (bahūsu)    3. Avavatthānato (Ka)    4. Avavatthitā (Ka)

nesaṃ koci bhedo siyā, diṭṭho ca so. Tasmā assasitaṃ sarīraṃ aññathā hontaṃ kamena tādisaṃ avatthaṃ pāpuṇāti. Yā passāsassa paccayo hoti, passasite ca puna tatheva assāsassa paccayo hotīti ānāpānānaṃ anavatthānatopi sarīrassa visesaggahaṇaṃ aññathattasiddhi. Tathā pariṣsamopi asati visese pacchā sarīrassa na siyā, yenāyaṃ iriyāpathantarādīni sevanena pariṣsamavinodanaṃ karoti.

Atha vā rūpādibhedatopi visesaggahaṇaṃ.

Rūpagandharasaphassādīnaṃ hi visesena yo sarīre, anindriyabaddhesu ca khīrūdakavatthapupphaphalosalādhidhaññādīnaṃ pacchā viseso gayhati, so asati bahipaccayaviseso nesaṃ jarādi-avatthāsu vaṇṇabalādibhedo,<sup>1</sup> rasavīriyavipākānubhāvabhedo ca khaṇe khaṇe aññathattaṃ vinā kathamupalabbheyya. Yaṃ pana taṃ dhammatārūpaṃ silādi, tattha kathanti? Tassāpi sītuṇhasamphassabhedato attheva visesaggahaṇaṃ. Taṃ khaṇe khaṇe aññathattaṃ vinā na yujjatīti. Sati ca rūpādibhede siddhova taṃnissayamahābhūtabhedopi. Na hi nissayamahābhūtabhedena vinā nissitabhedo sambhavatīti. Evaṃ tāva rūpadhammānaṃ visesaggahaṇato khaṇe khaṇe aññathattaṃ, tato ca hutvā abhāvasiddhi.

Arūpadhammānaṃ pana ārammaṇādibhedena visesaggahaṇaṃ. Yattha yattha hi ārammaṇe arūpadhammā uppajjanti, tattha tattheva te bhijjanti, na aññaṃ saṅkamanti, ārammaṇadhammā ca yathāsakaṃ khaṇato uddhaṃ na tiṭṭhantīti. Svāyamattho padīpādi-udāharaṇena vedītabbo. Aññe eva hi khaṇe khaṇe rūpādayo padīpajālāya, tathā khīradhārādīsū patantīsū, vāyumi ca paharante samphassāni. Yathā cetesaṃ khaṇe khaṇe aññathattaṃ, kimaṅgaṃ pana cittacetāsikānaṃ. Kiñca saddabhedato, saddavisesatopi tannimittānaṃ cittacetāsikānaṃ khaṇe khaṇe aññathattaṃ, tato visesaggahaṇaṃ. Pagaṇaṇhi ganthaṃ sīghaṃ parivattentassa cittasamuṭṭhānānaṃ.

---

1. Vaṇṇaphalādibhedo (Ka)

saddānaṃ bhedo diṭṭho. Na hi kāraṇabhedena vinā phalabhedo atthi. Yathā taṃ vāditasaddānaṃ, evaṃ ārammaṇabhedena arūpadhammānaṃ visesaggahaṇaṃ. Teneva nesaṃ khaṇe khaṇe aññathattaṃ veditabbaṃ. Jātibhūmisampayuttadhammabhedena visesaggahaṇepi eseva nayo. Evaṃ rūpārūpadhammānaṃ visesaggahaṇato khaṇe khaṇe aññathattasiddhi. Yato hutvā abhāvato cakkhādīni aniccānīti siddhāni, aniccattā eva abhiṅhasampañipīḷanato dukkhāni, tato ca avasavattanato anattakāni. Tenāha bhagavā “yadaniccaṃ, taṃ dukkhaṃ, yaṃ dukkhaṃ, tadanattā”ti<sup>1</sup>.

**Nirantaraṃ pavattamānassāti** abhiṅhasaddatthaṃ visesetvā vadati.

**Dhātumattatāyāti** dhātumattabhāvena. **Samūhatoti**

sasambhāracakkhādipiṇḍato. “**Cakkhādīnaṃ**”ti idaṃ “samūhato”ti padaṃ apekkhitvā sambandhe sāmivacanaṃ, “vinibbhujanaṃ”ti padaṃ apekkhitvā kammattheti veditabbaṃ. **Cattāripi ghanānīti**

santatisamūhakiccārammaṇaghanāni. **Pavattarūpādiggahaṇatoti**

ruppanādivasena pavattañca taṃ rūpādiggahaṇaṅcāti

pavattarūpādiggahaṇaṃ, tatoti yojetabbaṃ. **Aniccādiggahaṇassa sabbhāvāti**

rūpavedanādīñāṇato bhinnassa aniccādīñāṇassa labbhamānattā. Tena satipi

rūpādi-atthānaṃ aniccādibhāve ruppanādibhāvato aniccādibhāvassa

bhedamāha. Idāni tameva bhedaṃ ñātātiraṇapariññāvisayatāya pākaṭaṃ

kātuṃ “**na hi**”ti-ādīmāha. **Nātidhāvītunti** idha lakkhaṇalakkhaṇavantā bhinnā

vuttā. Tattha lakkhaṇārammaṇikavipassanāya khandhārammaṇatāvacaṇena

abhinnāti aññamaññavirodhāpādanena atidhāvītunā na yuttaṃ. Kasmāti ce?

Vuttaṃ “**te panākārā**”ti-ādi. Adhippāyopi cettha lakkhaṇānaṃ rūpādi-

ākāramattatāvibhāvananti daṭṭhabbo. “Aniccaṃ dukkhaṃ anattā”ti hi

saṅkhāre sabbhāvato sallakkhentoyeva lakkhaṇāni ca sallakkhetīti. Yathā

aniccādito aniccātādīnaṃ vuttanayena bhedo, evaṃ aniccātādīnampi satipi

lakkhaṇabhāvasāmaññe nānāññānagocarātāya, nānāpaṭipakkhatāya,

nānindriyādhikatāya ca vimokkhamukhattayabhūtānaṃ aññamaññabhedoti

dassento “**aniccanti ca gaṇhanto**”ti-ādīmāha. Taṃ suviññeyyameva.

Suttantabhājanīyavaṇṇanā niṭṭhitā.

1. Saṃ 2. 19, 37, 68, 69, 92, 236, 237; Khu 9. 295 piṭṭhesu.

## 2. Abhidhammabhājanīyavaṇṇanā

155. **Paccayayugaḷavasenā**ti ajjhattikabāhirapaccayadvayasena. **Ajjhattikabāhiravasena abbokāratoti** ajjhattikavasena ceva bāhiravasena ca asaṅkarato.

167. **Visaṅkhāraninnassā**ti nibbānaṇassa. **Vinimuttasaṅkhārassā**ti samuccheda paṭipassaddhivimuttīhi samukhena, tappaṭibaddhachandarāgappahānena ca suṭṭhu vinimuttasaṅkhārassa paramassāsabhāvena, gatibhāvena ca paṭiṭṭhānabhūte. “Nibbānaṃ arahato gati”<sup>1</sup>ti hi vuttaṃ. **Ṭhitibhāvenā**ti ca pāṭho. **Taṃsacchikaraṇābhāveti** tassa nibbānassa sacchikaraṇābhāve. **Nītoti** pāpito, pakāsitoti attho.

**Cuṇṇitanti** bheditaṃ. **Tvameva kiṃ na jānāsī**ti kiṃ tvaṃ na jānāsiyevāti attho. “Kiṃ tvaṃ ekaṃ nānaṃ jānāsi, kiṃ tvaṃ na jānāsi evā”<sup>2</sup>ti evaṃ vikkhepaṃ karontaṃ paravādiṃ “**nanu nāte**”<sup>2</sup>ti-ādinaṃ sakavādi nibandhati. **Vibhajitvā**ti “rāgādīnaṃ khīṇante uppannattā”<sup>2</sup>ti bhāvatthaṃ vibhajitvā. Rāgādīnaṃ khayā na hontīti yojanā. Sasabhāvatā ca nibbānassa āpannā hotīti sambandho.

**Nibbānārammaṇakaraṇena** kāraṇabhūtena. Hetu-atthe hi idaṃ karaṇavacanaṃ. Kilesakkhayamattataṃ vā nibbānassa icchato kilesakkhayena bhavitabbanti yojanā.

Evaṃ kilesakkhayamatte nibbāne khepetabbā kilesā bahuvadhā nānappakārā, maggo ca odhiso kilese khepeti. Svāyaṃ “katamaṃ kilesakkhayaṃ nibbānaṃ ārammaṇaṃ katvā katame kilese khepetī”<sup>2</sup>ti purimapucchādvayameva vadati. **Yadevā**ti yaṃ “avijjātaṇhānaṃ kiñci ekadesamattampī”<sup>2</sup>ti vuttaṃ, tadeva.

Ettha ca yāyaṃ “kilesakkhayova nibbānaṃ”<sup>2</sup>ti nibbānassa abhāvatācodanā, tatrāyaṃ āgamato, yuttito cassa bhāvābhāvavibhāvanā. Tañhi bhagavatā—

“Atthi bhikkhave ajātaṃ abhūtaṃ akataṃ asaṅkhatan”<sup>2</sup>ti 2.

1. Vi 5. 263 piṭṭhe.

2. Khu 1. 178, 220 piṭṭhesu.

“Atthi bhikkhave tadāyatanam, yattha neva pathavī na āpo na tejo  
na vāyo”<sup>1</sup>—

ca ādinā, tathā—

“Gambhīro duddaso duranubodho santo paṇīto atakkāvacaro  
nipuṇo paṇḍitavedanīyo”<sup>2</sup>—

“Asaṅkhatañca vo bhikkhave desessāmi asaṅkhatagāminiñca  
paṭipadam, anataṃ, anāsavaṃ, saccam, pāram, nipuṇam, sududdasam,  
ajajjaram, dhuvam, apalokitam, anidassanam, nippapañcam, santam,  
amataṃ, paṇītam, sivam, khemaṃ, taṇhākkhayam, acchariyam,  
abbhutam, anītikam, anītikadhammam, nibbānam, abyābajjham<sup>3</sup>,  
virāgam, suddhim, muttim, anālayam, dīpaṃ, leṇam, tāṇam, saraṇam,  
parāyaṇañca vo bhikkhave desessāmi parāyaṇagāminiñca  
paṭipadan”<sup>4</sup>—

Evamādīhi ca suttapadehi “appaccayā dhammā, asaṅkhatā  
dhammā<sup>5</sup>, sabbañca rūpaṃ asaṅkhatā ca dhātū”<sup>6</sup>ti-ādīhi<sup>6</sup>  
abhidhammapadesehi ca paramatthabhāveneva desitam. Na hi  
sabhāvavirahitassa abhāvamattassa gambhīrasaṅkhatādibhāvo,  
abyākatadhammādibhāvo ca yutto, vutto ca so. Tasmā na abhāvamattam  
nibbānam.

Api cāyam abhāvavādī evam pucchitabbo—yadi kilesābhāvo  
nibbānam, svāyamabhāvo eko vā siyā aneko vā? Yadi eko, ekeneva  
maggena kato, sacchikato ca hotīti uparimānam maggānam niratthakatā  
āpajjati. Na hi ekam anekehi kammappavattehi sādhetabbam diṭṭham.  
Atha siyā ekova so kilesābhāvo, na pana maggehi kātabbo, atha kho  
sacchikātabboti. Evam sati suṭṭhutarānam maggassa niratthakatā āpajjati  
kilesānam appahānato. Akaronto ca maggo kilesābhāvaṃ tassa

1. Khu 1. 177 piṭṭhe Udāne.

2. Dī 1. 31, 32; Ma 2. 291; Saṃ 1. 138; Vi 3. 5, 7, 8 piṭṭhesu.

3. Abyāpajjam (bahūsu)

4. Saṃ 2. 537 piṭṭhādīsu.

5. Abhi 1. 4 piṭṭhe.

6. Abhi 1. 238 piṭṭhe.



sacchikiriyāya kamattham sādheyya, atha maggānam  
 saṃyojanattayappahānādīpaṭṭiniyata-kiccatāya pahāyakavibhāgena  
 kilesābhāvabhedo, evaṃ sati vinā sabhāvabhedaṃ bahubhāvo natthīti  
 bahubhāvātāpadesenassa sasabhāvātā āpannā. Athāpi siyā “yesaṃ  
 abhāvo, tesāṃ bahubhāvena bahubhāvopacāro”ti, evaṃ sati yesaṃ  
 abhāvo, tesāṃ sabhāvātāya sasabhāvopacāropi siyā. Tathā tesāṃ  
 kilesasaṅkhatādītāya kilesasaṅkhatādibhāvā ca siyūṃ, na cetāṃ yuttanti  
 na tesāṃ bahubhāvopacāro yutto. Ekabhāvopi cassa asabhāvātāya eva  
 vatthum na sakkāti ce? Na, abhāvasāmaññato, abhāvasāmaññena  
 abhedasāmaññāya ekattaniddeso. Sati ca ekatte pubbe  
 vuttadosānativatti.

Bahubhāve ca sasabhāvātā siddhā. Yādipi siyā yathā bahubhāvo  
 sasabhāvātāṃ, evaṃ sāmāññena sasabhāvātā bahubhāvāṃ na  
 byabhicareyyāti sasabhāvapakkehi nibbānassabahubhāvo āpajjatīti?  
 Taṃ na, kasmā? Tathā sāmāññābhedato. Na hi evaṃ vatthum labbhā  
 yathā kharabhāvo sasabhāvātāṃ na byabhicarati, evaṃ sasabhāvātāpi  
 kharabhāvāṃ na byabhicareyyāti. Evañhi sati  
 tadaññasabbadhammābhāvappasaṅgo siyā, tasmā bahubhāvo  
 sasabhāvātāpekkho, na sasabhāvātā bahubhāvāpekkhāti na sasabhāvassa  
 nibbānassa bahubhāvāpatti. “Ekaṃ hi saccaṃ na dutiyamatthi<sup>1</sup>, ekā  
 niṭṭhā na puthuniṭṭhā”ti-ādivacanato.

Api cettha kilesābhāvo nāma rāgādīnaṃ samucchedo  
 accantappahānaṃ anuppādanirodho. Tassa ca ekatte ekeneva maggena  
 sādhetabbatā kiccavisesābhāvātoti dassanādimaggavibhāgo na siyā.  
 Icchīto ca so odhisova kilesānaṃ pahātābattā. So ca maggavibhāgo  
 saddhādīnaṃ indriyānaṃ nātīkkha tikkha tikkhatara  
 tikkhatamabhāvena ekasmimpi

---

1. Khu 1. 416; Khu 7. 226, 227 piṭṭhesu.

samucchedappahānayo gyabhāve sacchikiriyāviseṣena hotīti nibbānassa sasabhāvatāyaye va yutto. Abhāvo pana kilesānaṃ maggena kātabbo siyā “mā maggassa niratthakatā ahoṣī”ti, na sacchikātabbo. Ko hi tassa sabhāvo, yo tena sacchikariyeyya. So ca kilesābhāvo ekeneva maggena sādhetabbo siyā, na catūhi “mā catubhāvanibbānatāpatti, nibbānaviseṣāpatti ca ahoṣī”ti. Tato dassanādimmaggavibhāgo na siyāti sabbāṃ āvattati.

Yadi ca abhāvo bhāvassa siyāti tassa bhāvadhammatā icchitā, evaṃ sati yathā saṅkhatadhammassa tassa jarāmaṇādīnaṃ viya saṅkhatadhammatāpi āpannā, evaṃ bahūnaṃ kilesānaṃ dhammassa tassa bahubhāvādippasaṅgopi dunnivāroti ataṃsabhāvassa asaṅkhatassekassa sasabhāvassa nibbānabhāvo veditabbo.

Yadi evaṃ kasmā “rāgakkhayo dosakkhayo mohakkhayo”ti<sup>1</sup> vuttanti? Khayena adhigantabbatā. Khayo hi ariyamaggo. Yathāha “khaye ñāṇaṃ, anuppāde ñāṇaṃ”ti<sup>2</sup>. Tena rāgādikkhayapariyāyena ariyamaggena adhigantabbato “paramatthaṃ gambhīraṃ nipuṇaṃ duddasaṃ duranubodhaṃ nibbānaṃ rāgādikkhaya”ti vuttaṃ. Rāgādippahānamukhena vā tathā pattabbato, yathā aññatthāpi vuttaṃ “madanimmaddano pipāsavinayo”ti-ādi<sup>3</sup>.

Apica yathā pariññeyyatāya sa-uttarānaṃ kāmānaṃ, rūpānaṃ paṭipakkhabhūtaṃ tabbidhurasabhāvaṃ nissaraṇaṃ paññāyati, evaṃ sasabhāvānaṃ sabbesampi saṅkhatadhammānaṃ paṭipakkhabhūtena tabbidhurasabhāvena nissaraṇena bhavitabbaṃ. Yaṅca tannissaraṇaṃ, sā asaṅkhatā dhātu. Kiṅca bhiyyo—saṅkhatadhammārammaṇaṃ vipassanāñāṇaṃ api anulomañāṇaṃ kilese tadaṅgavasena pajahati, na samucchedavasena pajahituṃ sakkoti. Tathā sammutisaccārammaṇaṃ paṭhamajjhānādīsu ñāṇaṃ vikkhambhanavaseneva kilese pajahati, na

1. Saṃ 2. 447, 455 piṭṭhesu.

2. Abhi 1. 16 piṭṭhe.

3. Am 1. 343; Khu 1. 254 piṭṭhesu.

samucchedavasena. Iti saṅkhatadhammārammaṇassa, sammutisaccārammaṇassa ca ñāṇassa kilesānaṃ samucchedappahāne asamatthabhāvato tesāṃ samucchedappahānakaṛassa ariyamaggañāṇassa tadubhayaviparītasabhāvena ārammaṇena bhavitabbaṃ, sā asaṅkhatā dhātu. Tathā “atthi bhikkhave ajātaṃ abhūtaṃ akataṃ asaṅkhatan”<sup>1</sup> idañ nibbānassa paramatthato atthibhāvajotakaṃ vacanaṃ aviparītatthaṃ bhagavatā bhāsittā. Yañhi bhagavatā bhāsitaṃ, taṃ aviparītatthaṃ yathā taṃ “sabbe saṅkhārā aniccā, sabbe saṅkhārā dukkhā, sabbe dhammā anattā”<sup>2</sup>, tathā nibbānasaddo katthaci visaye yathābhūtaparamatthavisayo upacāravuttisabbhāvato seyyathāpi sīhasaddo. Atha vā attheva paramatthato asaṅkhatā dhātu itaratabbiparītavimuttisabhāvattā seyyathāpi “pathavīdhātu vedanā cā”<sup>3</sup>ti evamādīhi nayehi yuttitopi asaṅkhatāya dhātuyā paramatthato atthibhāvo veditabbo.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

168. **Kiñcīti** kiñci ārammaṇaṃ. **Ālambanatoti** ārammaṇakaraṇato.

**Āyatanavibhaṅgavaṇṇanā niṭṭhitā.**

1. Khu 1. 178, 220 piṭṭhesu.

2. Khu 1. 53; Khu 2. 117; Khu 10. 7, 53 piṭṭhesu.

### 3. Dhātuvibhaṅga

#### 1. Suttantabhājanīyavaṇṇanā

172. **Abhidhamme ca āgatā**ti imasmim dhātuvibhaṅge abhidhammabhājanīyapañhapucchakesu, nikkhepaṅgaḍḍhammahadayavibhaṅgādīsū ca desanāruḷhā. Yathā pana suttante, abhidhamme ca āgatā khandhādayo suttante desitaniyāmena khandhavibhaṅgādīsū suttantabhājanīyavasena vibhattā, evamidhāpi cakkhudhātādayo suttantabhājanīyavasena vibhajitabbā siyūm. Tattha khandhādīnaṃ sabbaṅgāhako abhidhammadesanāviseṭṭho suttante āgato añño desetabbākāro natthīti te rūpakkhandhādivaseneva suttantabhājanīye desitā, dhātūnaṃ pana so atthīti te tiṇṇaṃ dhātuchakkānaṃ vasena idha desitāti dassento āha “**suttantesveva -pa- vibhattanti veditabban**”ti. Tenāha aṭṭhakathāyaṃ “sabbā dhātuyo chahi chahi dhātūhi saṅkhipitvā”ti.

Kathaṃ pana chasu chasu dhātūsu aṭṭhārasannaṃ dhātūnaṃ samavarodhoti? sabhāvanissayadvārārammaṇasampayogasāmaññato. Tattha paṭhamachakke tāva pathavītejovāyodhātuyo sabhāvato phoṭṭhabbhadhātu. Āpodhātu-ākāsadhātuyo dhammadhātu-ekadeso. Viññāṇadhātu sattivīññāṇadhātuyo. Catudhātuggahaṇena cettha tadāyattavuttikā nissayāpadesena, viññāṇadhātuyā dvārārammaṇabhāvena vā avasiṭṭhā rūpadhātuyo samavaruddhā, viññāṇadhātuggahaṇena taṃsampayogato dhammadhātu-ekadesoti evaṃ sabbadhātusamavarodho daṭṭhabbo. Dutiye chapi dhātuyo sabhāvato, dhammāyatane kadeso, taṃsampayogato sattivīññāṇadhātuyo, yathārahaṃ tesāṃ nissayadvārārammaṇabhāvato avasiṭṭhadhātuyo samavaruddhā. Tatiyachakkepi eseva nayo. Evamettha chasu chasu dhātūsu aṭṭhārasannaṃ dhātūnaṃ samavarodho daṭṭhabbo. Tena vuttaṃ “sabbā dhātuyo, chahi chahi dhātūhi saṅkhipitvā”ti.

**Suññoti** attasuñño, tena, sasabhāvatāya ca idha dhātuvohāroti āha “**suññe sabhāvamatte niruḷho dhātusaddo**”ti. Taṃtambhūtavivittatā rūpapariyantova ākāso ti yehi vivitto,

yesañca paricchedo, tehi asamphuṭṭhatā tesam byāpakabhāve sati na hotīti āha “**catūhi mahābhūtehi abyāpitabhāvo**”ti. Paricchinnavuttīni hi bhūtānīti.

173. Avayavavinimutto samudāyo nāma koci natthīti purimattham asambhāvento “**dve eva vā**”ti-ādinā samudāyena vinā dutiyatthamāha. **Paccattam attani jātatanti** pāṭipuggalikatam.

**Pāṭiyekko koṭṭhāsoti** vā lomādi-itarakoṭṭhāsehi asammisso visum eko pathavīkoṭṭhāsoti attho.

**Payoganti** bhāvanāpayogam. **Vīriyanti** bhāvanānippādakam ussāham. **Āyūhananti** tādīsam cetanam.

**Dhātupaṭikkūlavaṇṇamanasikārānanti** dhātumanasikārapaṭikkūlamana-sikāravaṇṇamanasikārānam. **Abyāpāratāyāti** “ahametam nippādemi, mama esā nippādanā”ti cetanārahitatāya. **Karontīti** ābhogapaccavekkhāṇāni uppādentī.

**Lakkhaṇavasenāti** sabhāvavasena. So pana yasmā pathavīdhātuyā kakkhaḷakharatā hotīti āha “**kakkhaḷam kharigatanti-ādivacanam sandhāya vuttan**”ti.

**Vekantakam** nāma sabbalohacchedanasamattham loham. Tathā hi tam vikantati chindatīti vikantam, vikantameva vekantakanti vuccati. **Lohasadisanti** lohākāram lohamalam viya ghanasahitam hutvā tiṭṭhati. Tāpetvā tāḷitam pana chinnaṃ chinnaṃ hutvā visarati, mudu maṭṭham kammaniyaṃ vā na hoti, tena “**lohavijātī**”ti vuccatīti. **Tiputambādīhīti** tiputambe missetvā katam **kaṃsaloham**, sīsatambe missetvā katam **vaṭṭaloham**, jasadatambe<sup>1</sup> missetvā katam **ārakūṭam**. Yam pana kevalam jasadadhātu<sup>2</sup> viniggatam, yam “pittalan”tipi vadanti, tam idha nādhippetaṃ, yathāvuttamissakameva pana gahetvā “**kittiman**”ti vuttam.

**Nidassanamattanti** muttānam jātito anekabhedatā vuttam. Tathā hi hatthikumbham varāhadāṭham bhujaṅgasīsam valāhakūṭam veṇupabbarṃ macchasiro saṅkho

1. Rasakabhamme (bahūsu)

2. Rasakadhātu (bahūsu)

sippīti aṭṭha muttāyoniyo. Tattha **hatthikumbhajā** pītavaṇṇā pabhāhīnā. **Varāhadāṭṭhajā** varāhadāṭṭhavaṇṇāva. **Bhujāṅgasīsajā** nīlādivaṇṇā suvisuddhā, vaṭṭalā ca. **Valāhakajā** bhāsurā dubbibhāgarūpā rattibhāge andhakāraṃ vidhamantā tiṭṭhanti, devūpabhogā eva honti. **Veṇupabbajā** kāraphalasamānavāṇṇā, na bhāsurā, te ca veḷavo amanussagocare eva padese jāyanti. **Macchāsīsajā** pāṭhīnapiṭṭhisamānavāṇṇā, vaṭṭalā, laghavo ca honti pabhāvihīnā, te ca macchā samuddamajjheyeva jāyanti. **Saṅkhajā** saṅkhoracchavivaṇṇā, kolappamāṇāpi honti pabhāvihīnāva. **Sippijā** pana pabhāvisesayuttāva honti nānāsaṅṭhānā. Evaṃ jātito aṭṭhavidhāsu muttāsu yā macchasaṅkhasippijā, tā sāmuddikā. Bhujāṅgajāpi kāci sāmuddikāti vadanti, itarā asāmuddikā. Tena vuttaṃ “**sāmuddikamuttāti nidassanamattametam, sabbāpi pana muttā muttā evā**”ti. Bahulato vā aṭṭhakathāyaṃ etaṃ vuttaṃ “**muttāti sāmuddikamuttā**”ti. Bahulaṃ hi loke sāmuddikāva muttā dissanti. Tatthāpi sippijāva, itarā kadāci kācīti.

174. **Idha natthi** niyamo kevalaṃ dravabhāvasseva adhippetattā.

175. **Nisitabhāvenāti** santāpanādivasappavattena tikhiṇabhāvena. Usmākāraṃ hi nisānaṃ idha nisitabhāvo. **Pākatikoti** sābhāviko kāyusmāti adhippeto. **Sadāti** sabbakālaṃ yāva jīvitindriyaṃ pavattati. **Petaggi** nijjhāmatāṇhikapetaggi. **Idhāti** bāhiratejodhātukathāyaṃ.

176. **Vāyanam** bijanam, taṃ pana thāmasā pavattīti āha “**savegagamanavasena**”ti. **Samudīraṇam** allaparisosanam, bhūtasāṅghātassa desantaruppattihetubhāvo vā.

177. Bhitticchiddādivasena labbhamānaṃ ajaṭākāsaṃ nissāyeva paricchedākāsassa parikammakaraṇanti āha “**ajaṭākāsassa ca kathitatan**”ti.

179. **Sukhadukkhaphoṭṭhabbasamutṭhāpanapaccayabhāvenāti** iṭṭhāniṭṭhaphoṭṭhabbānaṃ nibbattakabhūtena paccayabhāvena. Kassa pana so paccayabhāvoti āha

“sarīraṭṭhaka-utussā”ti. **Paccayabhāvenā**ti ca hetumhi karaṇavacanāṃ. Tena hi kāraṇabhūtena sukhadukkhaphoṭṭhabbānaṃ yathāvuttasamatthatā hotīti. “**Tathevā**”ti iminā “yathābalaṃ sarīrekadesasakalasarīraṃ”ti idaṃ anukaḍḍhati. **Evanti** attano phalūpacārasiddhena pharaṇappakārena. **Etesanti** sukhādīnaṃ. “**Oḷārikappavatti eva vā pharaṇaṃ**”ti iminā nirupacāraṃ etesaṃ pharaṇaṭṭhaṃ dasseti. **Ubhayavatoti** sukhadukkhavato, somanassadomanassavato ca, pharaṇāpharaṇaṭṭhānavato vā.

181. **Ettha vuttaṃ saṅkappanti** etasmim “saṅkappo kāmo”ti-ādike<sup>1</sup> niddesapadese vuttaṃ saṅkappaṃ. Tattha hi kilesakāmoḅva “saṅkapparāgo purisassa kāmo”ti-ādīsu<sup>2</sup> viya. Vatthukāmassa tathā tathā saṅkappanato parikappanato “saṅkappo”ti vutto, na vitakkoti ayamettha attho vutto. Ṭikāyaṃ pana vitakkavasena atthaṃ dassetuṃ “**sopi hi**”ti-ādi vuttaṃ. Tatrāpi purimo evattho adhippetoti ce, sampiṇḍanattho **pi**-saddo niratthako siyā, “kilesasanthavasambhavato”ti ca na vattabbaṃ siyā, parato ca “byāpādavacanena byāpādavitakkaṃ dasseti”ti vakkhati. **Kilesakāmo vibhatto** kilesasampayuttattāti adhippāyo. **Kāmapaṭibaddhāti** ettha **kāma**-saddena vatthukāmāpi saṅgahitāti daṭṭhabbā.

182. **Ubhayattha uppannoti** sattesu, saṅkhāresūti ubhayattha uppanno, sattākāro, saṅkhārākāroti vā ārammaṇassa ubhayākāraggahaṇavasena uppanno. Kamma-pathaviseso, kamma-pathavināsako ca kamma-pathabhedoti dassetuṃ “**abhijjhāsaṃyogenā**”ti-ādi vuttaṃ. Tatthā vihiṃsāya vihiṃsāvitakkaṃ dassetiyojanā. **Vihimsāyāti** ca vihiṃsāvacanenāti attho. **Yāthāsambhavaṃ pāṇātipātādivasenāti ādi**-saddena adinnādānamusāvādapesuññapharusavācāsamphappalāpe saṅgaṇhāti. **Sabba -pa- saṅgāhakehi** kāmanekkhammadhātūhi. **Dve dveti** byāpādavihimsādhātuyo, abyāpāda-avihiṃsādhātuyo ca. “**Etthāti panā**”ti-ādinā saṃkilesavodānānaṃ saṅkarabhāvassa, aṇiṭṭhāpajjanassa ca dassanena purimaṃyeva atthaṃ byatirekamukhena sampādeti.

Suttantabhājanīyavaṇṇanā niṭṭhitā.

1. Khu 7. 2; Khu 8. 36 piṭṭhesu.

2. Aṃ 2. 359; Abhi 4. 275 piṭṭhesu.

## 2. Abhidhammabhājanīyavaṇṇanā

183. Āveṇikattho, atisayattho ca visesasaddo hotīti tadubhayaṃ dassetuṃ “**puggalantarāsādhāraṇaṃ, nīlādisabbarūpasādhāraṇaṅcā**”ti vuttaṃ. Asādhāraṇakāraṇenāpi hi niddeso hoti yathā “bherisaddo, yavaṅkuro”ti. Atisayakāraṇenapi yathā “atītānāgatapaccuppannānaṃ kammāsāmādānānaṃ ṭhānaso hetuso vipākaṃ yathābhūtaṃ pajānātī”ti<sup>1</sup>. **Dhātu-attho evāti** “dhātu”iti imassa dhātusaddasseva attho. Dhātuvacanīyo hi attho upasaggena jotiyati.

**Purimena asadiso** vidhānadhāraṇatthānaṃ pākaṭo bhedoti. **Visabhāgalakkhaṇā** visadisasabhāvā **avayavā** bhāgā, tesu.

**Yathāsambhavanti** kiriyāmanodhātu upanissayakoṭiyā, vipākamanodhātu vipākamanoviññāṇassa anantarādināpi, itarassa sabbāpi upanissayakoṭiyāva. Dhammadhātu pana vedanādikā sahaḥajāta sahaḥajātinā, asahaḥajāta anantarādinā, upanissayena, ārammaṇādinā ca manoviññāṇassa paccayoti evaṃ manodhātudhammadhātūnaṃ manoviññāṇassa hetubhāvo yathāsambhavaṃ yojetabbo. Dvārabhūtaṃmanopi sutte “manodhātu”ti vuccatīti āha “**dvārabhūtaṃmanovasena vā**”ti. Tassā manodhātuyā manoviññāṇassa hetubhāvo yathāsambhavaṃ yojetabboti sambandho.

**Purimanayenāti** visesanaṃ dutiyanayassa hīnattikavaseneva vibhattattā. Nānādhātūnaṅca cakkhudhātu-ādīnanti sambandho.

**Na hi dve manoviññāṇadhātuyo santi** aṭṭhārasadhātuvibhāgadassaneti adhippāyo. Khandhāyatanadhātindriyānaṃyeva vasena saṅkhepādivibhāgadassanaṃ tesaṃ bahulaṃ pariññeyyadhammasaṅgaṇhanato. Saccadesanā pana atisaṅkhittabhāvatoyevettha bahikatā.

**Nijjivassāti**-ādi visesato sattasuññatādīpanatthā dhātudesanāti katvā vuttaṃ. Purimanayo aññesampi kamavuttīnaṃ dhātūnaṃ sambhavatīti

---

1. Abhi 4. 175; Khu 9. 356 piṭṭhesu.



adhippāyena vuttoti “**manodhātuyeva vā**”ti-ādinā dutiyanayo vutto. Tattha **avijjamānepi purecarānucarabhāveti** purecarānucarābhisandhiyā abhāvepi kevalam anantarapubbakāla-anantarāparakālatāya manodhātu purecarānucarā viya daṭṭhabbāti vuttā.

“**Aññam aggahetvā pavattitum asamatthatāyā**”ti etena viññāṇassa ekantasārammaṇatādassanena “ārammaṇena vinā sayameva nīlādi-ābhāsam cittaṃ pavattati”ti evam pavattitaṃ viññāṇavādaṃ paṭisedheti.

184. **Ekanānāsantānagatānanti** ekasantānagatānaṃ abhinnasantānagatānaṃ dvārānaṃ, nānāsantānagatānaṃ bhinnasantānagatānaṃ ārammaṇānanti yojanā. **Ekanānājātikattāti** cakkhādi-ekekajātikattā dvārānaṃ, nīlādi-anekejātikattā ārammaṇānaṃ.

Cakkhādi ekampi viññāṇassa paccayo hoti, rūpādi pana anekameva saṃhatanti imassa vā atthavisesassa dassanatthaṃ cakkhurūpādīsu vacanabhedo kato. Kiṃ pana kāraṇaṃ cakkhādi ekampi viññāṇassa paccayo hoti, rūpādi pana anekamevāti? Paccayabhāvavisesato. Cakkhu hi cakkhuvīññāṇassa nissayapurejāta-indriyavippayuttapaccayehi paccayo hontaṃ atthibhāveneva hoti tasmim sati tassa bhāvato, asati abhāvato, yato taṃ atthi-avigatapaccayehissa paccayo hotīti vuccatīti. Tamnissayatā cassa na ekadesena allīyanavasena icchitabbā arūpabhāvato, atha kho garurājādīsu sissarājapurisādīnaṃ viya tappaṭibaddhavuttitāya. Itare ca paccayā tena tena visesena veditabbā. Svāyaṃ paccayabhāvo na ekasmim na sambhavatīti ekampi cakkhu cakkhuvīññāṇassa paccayo hotīti dassetuṃ pāḷiyaṃ “cakkhuṅca paṭiccā”ti ekavacananiddeso kato.

Rūpaṃ pana yadipi cakkhu viya purejāta-atthi-avigatapaccayehi paccayo hoti puretaraṃ uppannaṃ hutvā vijjamānakkhaṇeyeva upakārakattā, tathāpi anekameva saṃhataṃ hutvā paccayo hoti ārammaṇabhāvato. Yañhi paccayadhammaṃ sabhāvabhūtaṃ

parikappitākāramatthaṃ vā viññāṇaṃ vibhāventāṃ pavattati, tadaññesaṅca satipi paccayabhāve so tassa sārammaṇasabhāvato yaṃ kiñci anālambitvā pavattitum asamatthassa olubbha pavattikāraṇatāya ālambanīyato ārammaṇaṃ nāma. Tassa yasmā yathā yathā sabhāvūpaladdhi viññāṇassa ārammaṇapaccayalābho, tasmā cakkhuvīññāṇaṃ rūpaṃ ārabha pavattamānaṃ tassa sabhāvaṃ vibhāventameva pavattati. Sā cassa indriyādhīnavuttikassa ārammaṇasabhāvūpaladdhi na ekadvikalāpagatavaṇṇavaseneva hoti, nāpi katipayakalāpavaṇṇavasena, atha kho ābhogānurūpaṃ āpāthagatavaṇṇavasenāti anekameva rūpaṃ saṃhaccakāritāya viññāṇassa paccayo hotīti dassento bhagavā “rūpe cā”ti bahuvacanena niddisi.

Yaṃ pana “rūpāyatanaṃ cakkhuvīññāṇadhātuyā, taṃsampayuttakānaṅca dhammānaṃ ārammaṇapaccayena paccayo”ti<sup>1</sup> vuttaṃ, taṃ kathanti? Tampi yādisaṃ rūpāyatanaṃ cakkhuvīññāṇassa ārammaṇapaccayo, tādisameva sandhāya vuttaṃ. Kīdisaṃ pana tanti? Samuditantim pākaṭoyamattho. Evaṅca katvā yadeke vadanti “āyatanasallakkhaṇavasena cakkhuvīññāṇādayo sallakkhaṇārammaṇā, na dabyasallakkhaṇavasenā”ti, taṃ yuttameva hoti. Na cettha samudāyārammaṇatā āsaṅkitabbā samudāyābhogasseva abhāvato, samuditā pana vaṇṇadhammā ārammaṇapaccayā honti. Kathaṃ pana paccekaṃ asamatthā samuditā ārammaṇā honti, na hi paccekaṃ daṭṭhum asakkontā andhā samuditā passantīti? Nayidamekantikaṃ viṣum asamatthānaṃ sivikāvahanādīsu samatthatāya dassanato. Kesādīnaṅca yasmim̐ ṭhāne ṭhitānaṃ paccekaṃ vaṇṇaṃ gahetuṃ na sakkā, tasmim̐yeva ṭhāne samuditānaṃ taṃ gahetuṃ sakkāti bhiyyopi tesāṃ saṃhaccakāritā paribyattā. Etena kiṃ cakkhuvīññāṇassa paramāṇurūpaṃ ārammaṇaṃ, udāhu taṃsamudāyoti-ādikā

---

1. Abhi 8. 1 piṭṭhe Paṭṭhāne.

codanā paṭikkhittā veditabbā. “Sotañca paṭicca sadde cā”ti-ādīsupi ayameva nayo.

**Evampi attho labbhatī** “manodhātuyāpi”ti pi-saddena na kevalam javanapariyosānā manoviññāṇadhātuyeva sampiṇḍiyati, atha kho tadārammaṇabhavaṅgasāṅkhātāpi sampiṇḍiyatīti evampi attho labbhati, sambhavatīti attho. **Evam satīti** evam aññamanodhātuppavattiyā oram pavattacittānaṃ manoviññāṇadhātutādassane sati. Satipi manaso sambhūtabhāve manodhātuyā manoviññāṇadhātubhāvappasaṅgo na hotiyeva taṃsabhāvasseva manoviññāṇadhātubhāvena niddiṭṭhattā. Idāni tamevattham **“pañcaviññāṇadhātumanodhātū”**ti-ādinā pākaṭataram karoti. **Tabbidhurasabhāvenāti** pañcaviññāṇadhātūhi visadisasabhāvena. **Uppattiṭṭhānena cāti** manodhātukiriyamanoviññāṇadhātu-ādīhi paricchinnena uppajjanaṭṭhānena ca. Idāni ekattaggahaṇaṃ vināpi yathāvuttassa atthassa sambhavaṃ dassetuṃ **“anupanītepi”**ti-ādi vuttaṃ. Tattha **sāmaññivasenāti** sadisatāvasena. **Tassāti** bhavaṅgānantaram uppannacittassa. **Amanoviññāṇadhātubhāvāsiddhitoti** manodhātubhāvāsiddhito. Na hi “manoviññāṇadhātuyāpi uppajjitvā niruddhasamanantaram uppajjati cittaṃ -pa- tājā manoviññāṇadhātū”ti idaṃ vacanaṃ bhavaṅgānantaram uppannacittassa manodhātubhāvaṃ sādheti. Siddhe hi manodhātubhāve taṃ tassa nivattakaṃ siyāti adhippāyo. Manoviññāṇadhātuyā pana uppannassa cittassa manoviññāṇadhātubhāvadīpakaṃ vacanaṃ tādisāya manodhātuyāpi manoviññāṇadhātubhāvameva dīpeyyāti kathaṃ tassā nivattakaṃ siyāti āha **“na hi yaṃ codiyati, tadeva parihārāya hoti”**ti.

Yadi evam pañcadvārāvajjanassa manoviññāṇadhātubhāvāpatti evāti codanaṃ manasi katvā āha **“manodhātuyāpi”**ti-ādi. Pañcaviññāṇehi, manodhātūhi ca viṣiṭṭho sabhāvo **pañcavi -pa- sabhāvo**, tassa vasena. **Cutipaṭisandhibhavaṅgānanti** tadārammaṇampi bhavaṅgantogadham katvā vuttaṃ. **Javanāvasānānti** vā javanārammaṇattā tadārammaṇampi gahitaṃ daṭṭhabbam. Tenevāha **“chadvārikacittehi vā”**ti-ādi.

**Visuṃ kātuṃ yuttanti** āvajjanampi yadipi rūpādivisayaṃ hoti, javanaṃ viya ārammaṇarasānubhavanaṃ pana na hotīti edise ṭhāne visuṃ kātabbameva.

**Mano cāti ca-saddo** “manañca paṭicca”ti-ādīsu viya na sampiṇḍanattho, atha kho byatirekattho daṭṭhabbo.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

**Heṭṭhā vuttanayattāti** dhammadhātumanoviññāṇadhātūnaṃ “pañcapaṇṇāsa kāmāvacaradhamme ārabba rajjantassā”ti-ādinā<sup>1</sup> parittārammaṇādibhāve dassiyamāne “cittuppādarūpavasena taṃ taṃ samudāyaṃ ekekaṃ dhammaṃ katvā”ti-ādinā<sup>2</sup> tadatthassa khandhavibhaṅgavaṇṇanādīsu vuttanayattā.

**Dhātuvibhaṅgavaṇṇanā niṭṭhitā.**

1. Abhi-Ṭṭha 2. 40, 51 piṭṭhesu.

2. Mūlaṭī 2. 33 piṭṭhe.

## 4. Saccavibhaṅga

### 1. Suttantabhājanīyavaṇṇanā

#### 189. Saccavinimuttaṃ natthi

pavattinivattitadubhayahetusandassanavasena pavattanato. **Saccesu kamatīti** saccesu visayabhūtesu pavattati. Desetabbatthavisayā hi desanāti. **Etesu kamatīti** etesu ariyasaccesu pariññādikiccasādhanavasena pavattati. “Sīlasamādhipaññāsaṅkhātān”ti vuttaṃ atthasabhāvaṃ kamanakiriyāya kattubhāvena gahitanti pākaṭataraṃ katvā dassetuṃ “**kiṃ kamatī**”ti pucchati. **Tabbohārenāti** tadupacārena. Etena nippariyāyena atthasabhāvaṃ sāsanaṃ, pariyāyena vacanasabhāvanti dasseti.

**Tamsabhāvāti** dukkhādisabhāvā. **Amusāsabhāvāti** bādhanādibhāvena bhūtasabhāvā. **Aññākārahitāti** abādhanādi-ākāravivittā. **Dvidhāti** dukkhadukkhātānimmittatāhi. Rāgādikilesapariḷāho **kilesadāho**. Santānassa avipphārikatākaraṇaṃ **puggalahimsanaṃ**. **Attano eva tikhiṇabhāvoti** saṅkhataadhammassa attano sabhāveneva rujāvahatikkhabhāvo. **Sarasenevāti** sabhāveneva. Sampiṇḍakassa samudayassa, kilesasantāparahitassa maggassa, avipariṇāmassa nirodhassa dassanena yathāsaṅkhyāṃ dukkhassa saṅkhatasantāpavipariṇāmaṭṭhā āvi bhavanti āha “**itare yathākkamaṃ samudayamagganirodhadassanehi āvibhavanākārā**”ti. **Byāpetvāti** bhavādīsu, nānārammaṇesu ca visaṭā hutvā. Anekattattā dhātūnaṃ “**ūhanaṃ rāsikaraṇan**”ti vatvā puna tadatthaṃ vivarati “**dukkhanibbattanan**”ti. Ekavokārabhavepi hi rāsibhūtaeva dukkhaṃ nibbattati anekadhammasamūhato, pageva catupañcavokārabhavesu. Ettha ca byāpanatthaṃ ākāraṃ, tassa ca yakārāgamaṃ katvā sampiṇḍanatthaṃ **āyūhananti** padaṃ veditabbaṃ. **Nidadātīti** dukkhassa ekantakāraṇattā taṃ nidassentaṃ viya janetīti dassento “**idaṃ taṃ dukkhan**”ti-ādimāha. **Dukkha-pa- āvi bhavati** rogadoassanena viya roganidānaṃ. **Samyoga -pa- dassanehīti** samyogaṭṭho visamyogasabhāvassa nirodhassa, palibodhaṭṭho niyyānasabhāvassa maggassa dassanena āvi bhavati attho. **Teti** samyogapalibodhaṭṭhā.

**Etthāti** etasmim ārammaṇabhūte sati. Samudayato viveko **vivekaṭṭho**. Nirodho ca taṇhākkhayabhāvato samudayato vivitto, tasmā avivekabhūtassa samudayassa dassanena nirodhassa vivekaṭṭho āvi bhavati, nibbānādhigamahetubhūtassāpi maggassa sappaccayatāya saṅkhatabhāvaṃ passato appaccayassa nirodhassa asaṅkhataṭṭho āvi bhavati, tathā maraṇadhammatāya dukkhaṃ vinassantaṃ passato amaraṇadhammassa nirodhassa amataṭṭho āvi bhavatīti imamattaṃ dasseti “**vivekā**”ti-ādinā. **Itare samudayanirodhadukkhadassanehīti** ettha samudayadassanena “nāyaṃ hetu nibbānādhigamāya, ayaṃ pana hetū”ti hetuṭṭho āvi bhavati. Tathā paramagambhīrassa nipuṇatarassa duddasassa nirodhassa dassanena dassanaṭṭho sukhumarūpadassanena cakkhuno viya, dukkhadassanena pana anekarogāturakapaṇajanadassanena issarajanassa uḷārabhāvo viya maggassa ādhipateyyaṭṭho āvi bhavati.

Te panete hetuṭṭhādike sarūpato dassetuṃ “**tattha palibodhupacchedavasena**”ti-ādi vuttaṃ. Tattha **palibodhupacchedavasena**ti samudayappahānavasena. “**Maggādhīpatino dhammā**”ti vacanatoti yasmā satipi jhānādīnaṃ ārammaṇādhīpatibhāve “jhānādhīpatino dhammā”ti evamādi na vuttaṃ, “maggādhīpatino dhammā”iceva pana vuttaṃ. Tasmā sātisayo maggaṅgadhammānaṃ ārammaṇādhīpatibhāvo. Tenāha “**visesato vā ārammaṇādhīpatibhūtā maggaṅgadhammā hontī**”ti. **So tesam ākāro**ti yo maggaṅgānaṃ garuṃ katvā paccavekkhaṇavasena pavattadhammānaṃ ārammaṇādhīpatipaccayatāsaṅkhāto ākāro, so maggassa ādhipateyyaṭṭho. Purimo pana ādhipateyyaṭṭho sahaḷādhīpativasena vutto. **Abhisametabbaṭṭhoti** yathāvuttapīḷanādi-atthameva paṭivijjhītabbatāya ekajjhaṃ katvā vadati. Tena abhisamayasaddaṃ kammaṭṭhaṃ dasseti. **Abhisamayassāti** nāṇassa. **Pavatti-ākāro**ti pariḷānaṇādivisesākāro. So hi maggakkhaṇe asammohato siddho, pacchā paccavekkhaṇādinā pākaṭo hoti. Ākāropi nāṇena araṇīyato **atthoti** vuccatīti katvā tatiyanayo dassito. **Pīḷanādinā dassito** visayavibhāgenapi visayivibhāgo hoti yathā “rūpasaññā, saddasaññā”ti<sup>1</sup>.

---

1. Saṃ 2. 52 piṭṭhe.

**Kucchitaṃ khanti** garahitaṃ hutvā asāraṃ. “**Samāgamo**”ti-ādinā anvayato, byatirekato ca **saṃ**-saddassa saṃyogattahajotakattamāha. “Uppannaṃ uditaṃ”ti-ādīsu kevalassa **panna**-saddassa, **ita**-saddassa ca payoge uppatti-atthassa anupalabbhanato, **u**-saddassa ca payoge upalabbhanato so uppatti-atthaṃ dīpetīti āha “**evaṃ uppannaṃ uditanti etthāpi**”ti. **Visuṃ payujjamānā**ti āgama-ita-padehi vinā payujjamānā. **Sadhātukanti** antonītena dhātunā sadhātukaṃ. Teneva te “**upasaggā**”ti ca vuttā.

**Dukkhavivekabhāvanti** dukkhavivittataṃ. **Nivattiyāti** nibbānassa. **Nivattetvāti** anuppādasaddena visesanavasena nivattetvā. Nirodhapaccayatā nirodhassa maggassa ārammaṇapaccayatā. **Puggalasacchikiriyādharmabhāvehi**ti puggaladharmabhāvena, sacchikaraṇadharmabhāvena ca. **Phalanti** ariyaphalaṃ. **Tassāti** niṭṭhānabhūtāya phalasaṅkhātāya **dukkhanirodhappattiyā** abhisamayabhūtāya dukkhanirodhappattiyā paṭipadatā daṭṭhabbā.

Paṭivijjhanakāle nipariyāyena buddhādisamaññāti āha “**paṭividdhakāle pavattan**”ti. **Tato evāti** tena pakāsittā eva.

**Tannimittabhāvoti** jāti-ādi viya adhiṭṭhānabhāvena dukkhassa kāraṇabhāvo, na samudayasaccaṃ viya pabhavabhāvena. Udayabbayapīlītabhāvo saṅkhāradukkhatā. **Pavattanamevāti** pavatti eva. **Kiccaṃ rasoti** rasassa kiccattataṃ dasseti. **Pavattinivattīsūti** niddhāraṇe bhumbaṃ. **Avikāratā** vikārabhāvo niccatā.

**Marīcimāyā-attānanti** marīciyā, māyāya, attano ca, **ariyañāṇassāti** ariyānaṃ ñāṇassa. Tena ariyānaṃ maggañāṇānusārena pavattanakañāṇampi saṅgahitaṃ hoti. Tenāha “**avitathagāhakassā**”ti-ādi. **Tesanti** paṭivedhapaccavekkhaṇañāṇaṃ. Tattha paṭivedhañāṇassa paṭivijjhitabbatā gocarabhāvo, itarassa ārammaṇabhāvo. Paṭivijjhitabbatā, ārammaṇabhāvo vā paṭivedhañāṇassa gocarabhāvo, itarassa ārammaṇabhāvova.

**Bādhakappabhavabhāvenāti** bādhakassa uppādakabhāvena visuṃ gahitattā na taṇhā bādhakabhāvena gahitā pavattipavattihetūnaṃ asaṅkaravasena bodhanato. Evañca katvā abhidhammabhājanīyepi ayamattavaṇṇanā

yujjateva. Yadipe evaṃ “dukkhameva bādhakan”ti niyamānupapatti, samudayabhāvappasaṅgo cāti codanaṃ sandhāyāha “**jāti-ādīnaṃ viya vā**”ti-ādi. Bādhakattassa bādhakatte ca niyamoti āha “**dvidhāpi bādhakatthāvadhāraṇenā**”ti. Yathā hi bādhakattassa dukkhe niyatatā, evaṃ dukkhassa ca bādhakatte niyatatāti. Suttantabhājanīye taṇhāya eva samudayabhāvassa dassitattā taṇhāvasena niyamaṃ dassento “**na taṇhāya vinā**”ti-ādimāha. Suttantabhājanīyavaṇṇanā hesāti. “**Kusalehi vinā**”ti-ādinā dukkhahetutāya taṇhāya padhānabhāvamāha. Tathā hi sā kammavicittatāya hetubhāvaṃ gacchantī vīsesena kammaṃ sahaṅgikāraṇaṃ hotīti. **Dvidhāpi niyamenāti** maggoṃ niyyānaṃ, niyyānameva ca maggoti dvippakārena niyameva.

Vacīsaccaṃ saccavācā, taṃsamuṭṭhāpikā cetanā cāti āha “**viratisacceti musāvādaviratiyaṃ**”ti. Keci pana “viratisaccaṃ samādānavirati”ti vadanti, tesampi na samādānamattaṃ viratisaccaṃ, atha kho samādānavisaṃvādanaṃ. Taṃ pana paṭiññāsaccattā musāvādaviratiyeva hoti. Tenāha “**na hi aññaviratiṃ saccasaddo nirulho**”ti. Satipi dukkhasamudayāvabodhe yāvadeva nirodhamaggādhigamattā paññābhāvanāti pacchimadvayasappaṃ saccatthaṃ sātisaṃyamaṃ, tadadhigamaṃ ca avivādahetukaṃ sutte vibhāvitāṃ dassento “**tassa panā**”ti-ādimāha.

**Ṭhānaṃ natthīti** attano vādapaṭiṭṭhāpanakāraṇaṃ natthīti attano. Attabhāvapaṭiṭṭhābheneva sattānaṃ jāti-ādīnaṃ patti, sammukhībhāvo ca jāyatīti āha “**sampattatā, paccakkhatā ca paṭhamatā**”ti. Bhagavato desanākkameneva vā paṭhamāditā daṭṭhabbā.

**Parijānanādīhīti** pariññāppahānasacchikiriyābhāvanāhi, nissakkavacanañcetaṃ aññasaddapekkhāya. **Dhammaññakiccanti** sabhāvadhammāvabodhacchāraṇaṃ. **Pariññeyyādīni etapparamānevāti** ito paraṃ neyyaṃ natthīti dasseti.

Dukkhādīnaṃ ariyasaccabhāvassa anurūpaṃ yuttaṃ, ācariyaparamparāgataṃ vā savanaṃ **anussavo**. Sutānusārena, aññathā vā kakkhaḷaphusaṇādi-aniccādisabhāvasāmaññākārapariggaṇhanaṃ **ākāraparivitakko**. Yathāvitakkitākārassa diṭṭhisāṅkhātāya dassanabhūtāya paññāya nijjhānakkhamaṇaṃ rocanaṃ



**diṭṭhinijjhānakkhanti. Ādicco viya pabhāya nirodham phusati** sacchikaroti kilesandhakāram viddhamseti. **Cattāripi saccāni passatīti** vuttaṃ “yo bhikkhave dukkham passatī”ti-ādinā.

**Kālantaradassananti** nānābhisamayaṃ vadati. **Ekadassinoti** ekasaccadassino. **No yojetabbā siyāti** yojanāyañca sabbadassanaṃ dassanantaraparamanti dassanānuparamo āpajjeyya, saccānañca nānābhisamaye dukkhadassanādīhi paṭhamamaggādippaheyyānaṃ saṃyojanattayādīnaṃ ekadesappahānaṃ āpajjati. Tathā ca sati ekadesasotāpattimaggaṭṭhatā, tadanantarañca pattabbena phalena ekadesasotāpannatā ca āpajjati, tasmā na saccānaṃ nānābhisamayo yutto. Yathā ca nānābhisamayo na yutto, evaṃ ārammaṇābhisamayopi. Yadi hi ārammaṇakaraṇena catusaccābhisamayo icchito, na maggo sayameva attānaṃ ārammaṇaṃ karotīti aparipuṇṇo saccābhisamayo siyā. Aññena maggena maggo ālambīyatīti paripuṇṇovāti ce? Evaṃ sati yena maggena maggo ālambito, sopi aññena, sopi aññenāti anavaṭṭhānaṃ siyā, tasmā na ārammaṇapaṭivedhato catusaccābhisamayo yutto, vuttanayeneva pana yutto. Kiñca paricchinditabbaṃ, samucchinditabbañca ālambivā paricchedasamucchedadabhāvanā maggañāṇassa na yuttā tato anissaṭabhāvato, sabbasaṅkhatavinissaṭaṃ nibbānameva pana ārammaṇatā yuttā. **Ahetukadiṭṭhi akiriyadiṭṭhiggahaṇena gahitā** hetubyāpārova paramatthato kiriyāti katvā.

**Pavattetīti** sajjati, pavattiyā vā hetu hoti. **Nivattetīti** saṃharati palayaṃ gameti, palokatādivasena vā mokkhaḥetu hoti. **Padhānatoti** pakatito, yaṃ “abyattan”tipi vuccati.

“Kālo karoti bhūtāni, kālo saṃharatī pajā.

Kālo sutte jāgarati, kālo hi duratikkamo”ti—

evaṃvādā **kālavādino**. “Kaṇṭakassa tikhiṇatā, kapiṭṭhaphalādīnaṃ parimaṇḍalatā, migapakkhisarīsapādīnaṃ vicittabhāvoti evamādayo kena kāritā? Sabhāvene va siddhā, evaṃ sabbampi, na ettha kassaci kāmakāro”ti evaṃvādā **sabhāvavādino**. “Loko niyato

acchejjasuttāvutābhejjamaṇisadisō, na ettha kassaci purisakāro”ti  
evampavattavādā **niyativādino**—

“Yadicchāya pavattanti, yadicchāya nivattare.

Yadicchāya sukhadukkhaṃ, tasmā yadicchatī pajā”ti—

evampavattavādā yadicchāvādisaṅkhātā **adhiccasamuppattivādino** ca ettha  
sabhāvavāde eva antogadhāti daṭṭhabbā. **Aṇūhi loko pavattatīti**  
ājīvakavādaṃ sandhāyāha. So hi akāraṇapariggaho. Kaṇḍavādo pana  
issaricchāvasena aṇūnaṃ saṃyogaviyogato lokassa pavattinivattiṃ vadati.  
**Padhānassa appavattīti** mahatādibhāvena aparīṇāmo, anabhibyatti vā.  
“Ahamañño, pakati aññā”ti evaṃ pavattapakatipurisantarajānanena  
attasukhadukkhamohesu avibhāgaggahaṇe nivattite kira vuttanayena  
padhānaṃ nappavattati, so vimokkhoti kāpilā. **Evamādīti ādi**-saddena  
mahābrahmuno samīpatā, saṃyogoti evamādīnampi saṅgaho veditabbo.

**Ekattāti** ekabhāvato ekopi vutto. **Tayoti** kiccavibhāgena. **Tānīti**  
sammāvācādisīlāni. Chandassa saddahanānukūlāpi chandanavasena pavatti  
hotīti saddhindriyasaddhābalehi saddhiṃ chandiddhipādo vutto. Tādise kāle  
upekkhānimittānubrūhanena upakārā samādhissa samavāhitāvasena  
tādisakiccāva<sup>1</sup> upekkhā veditabbā.

**Vighātakattāti** saṃharaṇīyavasena vihantabhāvato.

**Ariyasaccadvayanti** samudayamaggasaccadvayaṃ. **Tenevāti**  
yathāvuttadukkhādi-saddānaṃ pariññeyyādivācakkattā eva. **Ādipadasaṅgahoti**  
“dukkhaṃ, na ariyasaccan”ti iminā catukke ādīpade saṅgaho. **Tadapekkhanti**  
ariyasaccasaddāpekkhaṃ dukkha-saddaṃ. **Catutthapadasaṅgahoti** “neva  
dukkhaṃ, na ariyasaccan”ti iminā padena saṅgaho. **Avasesakilesādayoti**  
taṇhāvajjakilesā avasesākusalā, sāsavāni kusalamūlāni, sāsavā ca  
kusaladhammā. Te hi abhidhammabhājanīye samudayabhāvena vuttā, na  
ariyasaccabhāvenāti āha “**samudayo, na ariyasaccan**”ti. **Aññāni**  
**maggaṅgānīti** phalasammādiṭṭhi-ādayo. **Iminā nayanāti** etthāyaṃ yojanā—

1. Sadisakiccāva (Ka)

atthi samudayo, na ariyasaccaṃ, atthi ariyasaccaṃ, na samudayo, atthi samudayo ceva ariyasaccañca, atthi neva samudayo, na ariyasaccaṃ. Tattha paṭhamapadam vuttattham. Nirodho ariyasaccaṃ, na samudayo, taṇhā samudayo ceva ariyasaccañca, maggasampayuttā dhammā, sāmaññaphalāni ca yassa pahānāya bhagavati brahmacariyaṃ vussati, tadabhāvato neva samudayo, na ariyasaccaṃ. Itarasaccadvayaṃ ariyasaccaṃ tassa tassa pabhāvakaṭṭhena siyā samudayo, na pana yassa pahānāya bhagavati brahmacariyaṃ vussati tathatthena. Itaracatukkadvayepi ādipadam vuttatthameva. Sesesu samudayo ariyasaccaṃ, na nirodho, asaṅkhatadhātu nirodho ceva ariyasaccañca, maggasampayuttā dhammā, sāmaññaphalāni ca yassa sacchikiriyāya bhagavati brahmacariyaṃ vussati tathatthena neva nirodho, na ariyasaccaṃ. Itarasaccadvayaṃ ariyasaccaṃ, nirodhadhammatāya siyā nirodho, na pana yassa sacchikiriyāya bhagavati brahmacariyaṃ vussati tathatthena. Tathā nirodho ariyasaccaṃ, na maggo, ariyamaggo maggo ceva ariyasaccañca, maggasampayuttā dhammā, sāmaññaphalāni ca yassa bhāvanāya bhagavati brahmacariyaṃ vussati tathatthena neva maggo, na ariyasaccaṃ. Itarasaccadvayaṃ siyā maggo upapattimaggabhāvato, na pana yassa bhāvanāya bhagavati brahmacariyaṃ vussati tathatthena.

**Santantisamānam.** **Evamītaresupīti** kātābbāpi kiriyā kārakarahitā kevalaṃ attano paccayehi tāya pavattamānāya paccayasāmaggi kiriyāṃ karotīti vohāramattaṃ hoti. Nibbutigamakesupi eseva nayo.

**Sāsavatā asubhatā** kilesāsucipaggharaṇato. **Dukkhādīnanti** dukkhasamudayamaggānam. **Samudayādibhāvoti** dukkhassa samudayamaggabhāvo, samudayassa maggadukkhabhāvo, maggassa dukkhasamudayabhāvo ca, na pana nirodhabhāvo dukkhādīnanti sambandho. **Aññamaññasamaṅgītī** dukkhādīnaṃ itarītarasabhāvayogo. **Taṇhāyāti** ādhāre bhummaṃ. **Punabbhavassāti** punabbhavasāṅkhātassa āyatidukkhassa. **Pakativādīnanti** kāpilānam. **Vikārāti** mahatādayo byattā. **Vibhāvato**ti abhibyattito, pariṇāmato vā pubbe. **Paṭippalinā cāti** pacchā pakatiyaṃ palayaṃ gatā vesammaṃ muñcitvā sattādisamabhāvena anto samoruddhā. Tenāha “**pakatibhāveneva tiṭṭhanti**”ti. **Pakatibhāvenevāti**

abyattabhāveneva. **Samudayabhāvenā**ti taṇhāsaṅkhātāpabhavabhāvena. Aññathā taṃsampayutta-avijjādīnampi samudayabhāvo labbhatevāti. **Avibhattehi**ti vesammavirahena pakatibhāvaṃ gatehi. “**Vikārehi**”ti sāmaññato vutte “**mahantā**”ti-ādinā sarūpato dasseti. Tattha **mahantoti** mahābuddhi. Tañhi kāpilā “mahā-ajjhāsayo”ti ca voharanti. Rūpatammattādayo pañca tammattā, ahaṃkāro cāti cha **avisesā**. Cakkhu sotaṃ ghānaṃ jivhā kāyo vācā pāṇi pādo pāyu upatthamā manoti ekādasindriyāni. Pathavī āpo tejo vāyo ākāsaṃti pañca **bhūtavisesā**, tehi. “**Pakatibhāveneva thitehi**”ti iminā “avibhattehi”ti padassa atthamā vadati. **Sagabbhāti** sabijā asuññatā. **Tantūsū**ti suttesu samavāyikāraṇabhūtesu. Tathā **kapālesu**. Tividhamā hi te kāraṇamā vadanti upādānakāraṇamā nimittakāraṇamā samavāyikāraṇanti. Tattha turivemasalākādayo **upādānakāraṇamā**. Tantavāyo **nimittakāraṇamā**. Tantavo **samavāyikāraṇanti**. **Dvīsu aṇūsū**ti pathavībhūtesu vā āpotejovāyobhūtesu vā dvīsu paramaṇūsū. **Idhabuddhivohārajanakoti** “idha tantūsū paṭo, idha kapālesu ghaṭho, idha bīraṇesu ghaṭo”ti-ādinā nayena hetuphalānaṃ sambandhabhūtena sattānaṃ idhabuddhivohārā jāyanti. So govīsāṇānaṃ viya avisuṃ sahasiddhānaṃ sambandho **samavāyo**. Khāṇusenānaṃ viya pana visuṃsiddhānaṃ sambandho **saṃyogo**. Tīsu aṇūsū ti-aṇukaṃ phalaṃ samavetaṃ ekībhūtamiva sambandhanti yojanā. “Samavetan”ti etassa “ekībhūtamiva sambandhan”ti idaṃ atthavivaraṇamā. **Mahāparimāṇanti** mahantaparimāṇamā mahāpathavī-ādikaṃ ekaṃ phalaṃ, yaṃ te “kāriyamā drabyan”ti vadanti. Yehi kāraṇehi āradhamā kāriyadrabyamā, tadantogadhāni eva tāni kāraṇāni maññantīti āha “**attano antogadhehi kāraṇehi**”ti. Sati samavāye hetumhi phalaṃ samavetanti phale hetu siyā, taṃ natthīti dassento āha “**samavāyābhāvā phale hetu natthīti hetusuññamā phalan**”ti.

Āhārabhedeti kabaḷīkārādi-āhāravisesese. **Tappaccayadhammabhedeti** ajjhoharaṇīyavatthusaḷāyatana-avijjā-abhisāṅkhārasāṅkhāte tesamā paccayabhūtadhammavisesese, ojaṭṭhamakarūpavedanāpaṭisaṅdhiviññāṇāmarūpasāṅkhāte vā tannibbattadhammavisesese, te paccayā etesamā dhammavisesānanti

**tappaccayadhammabhedā.** Rūpādi-ārammaṇavasena vāti yojanā. **Yānadvayavasenā**ti samathavipassanāyānadvayavasena. Kiñcāpi maggakkhaṇe samathavipassanā yuganaddhāva, yathā pana suññatādisamaññā, evaṃ samathavipassanāsamaññāpi āgamanato maggassa siyunti āha “**āgamanavasena vutto**”ti. Yassa vā paññindriyaṃ adhikaṃ, tassa maggo vipassanā, itarassa samathoti evamettha attho daṭṭhabbo.

**Samādhijāti** samādhānaṭṭhova. **Tato evāti** samādhi-anuṇṇakiriyattāva.

**Ādāya uhitvāti** gahetvā viya takketvā vitakketvā. **Dvinnanti** sammādiṭṭhisammāsankappānaṃ. **Purimakālassa viya niddeso** yathā “ekam khandham paṭicca tayo khandhā”ti<sup>1</sup>, “ekam mahābhūtaṃ paṭicca tayo mahābhūtā”ti<sup>1</sup> ca.

**Ogāhitunti** ñāṇena paṭivijjhitaṃ. Gahetaṃ asakkuṇeyyatāya **saṇhattaṃ.** Sukhumāya paññāya gahetabbatāya **sukhumattaṃ.** **Itīti** iminā kamenāti ayamatthoti adhippāyenāha “**itisaddena vijānanakkamaṃ dasseti**”ti. **Evaṃ pakārehīti evaṃ-saddena** jotiyamāno eva attho **pakāra-saddena** vuccatīti “**evaṃ-saddena vijānanakāraṇabhūte naye dasseti**”ti vuttaṃ. **Itīti** vā nidassanattho. Tena vuttappabhede paccāmasanavasena nidasseti. **Evaṃ-saddo** idamattho. Tena **evaṃ pakārehīti** idampakārehi, idischīti attho.

Uddesavaṇṇanā niṭṭhitā.

## 1. Dukkhasaccaniddesa

### Jātiniddesavaṇṇanā

190. “**Jāti-ādiniddese**”ti iminā “tathā”ti padassa atthaṃ vadati. **Dukkhamātikāti** dukkhadukkhādīnaṃ dukkhavisesānaṃ uddeso. **Padadvayeti** “pariyāyadukkhāṃ, nipariyāyadukkhāṃ”ti etasmiṃ padadvaye.

1. Abhi 8. 19 piṭṭhe Paṭṭhāne.

**Dukkhattāyevā**ti nippariyāyadukkhatam vadati. **Sabhāvena nāmaṃ visesetī**ti anvatthasaññatam dasseti. **Purimena** sabhāvadukkhavācakena **dukkhasaddena**. So hi visesanam avacchedakabhāvato pacchimanam saṅkhāradukkhaṭṭham viseseti. So hi nivattetabbagahetabbasādhāraṇattā avacchinditabbo. **Tenā**ti vipariṇāma-adhiṭṭhānādipakāravisesena.

Desetabbassa atthassa saṅkhipanam idha saṅkhepo, so ca tabbibhāgānam sādharmaṇabhāvoti āha “**saṅkhepo sāmāññan**”ti. **Antokarivā**ti antogadhe katvā, saṅgahetvā vā. **Ubhayathāpī**ti saṅkhepatopi vitthāratopi. Sādharmaṇabhāgānam vibhajanam vibhāgo, vitthāroti āha “**vitthāro pana viseso**”ti. **Visesantaranivattakoti** vibhāgantarāsaṅgāhako.

191. **Aparatthā**ti bhummavacanam sāmī-atthe yathā “sabbattha pādakan”ti āha “**sāmī-atthehi hi aparatthasaddo sijjhatī**”ti. Siddhi pana “itarāhipi dissatī”ti iminā veditabbā. Yasmā ca evam saddo sambhavati, tasmā pāliyam sāmivasena vuttam atthakathāyam bhummavasena dassitanti dīpento “**tesam tesanti vā**”ti-ādimāha. **Aparassā**ti aparassa sattassa. Manussādibhedo upapattibhavo gati, tabbisesabhūtā khattiyādisāmaññādhiṭṭhānā khandhā jāṭīti dassento “**pañcagativasenā**”ti-ādimāha.

**Tiṇākā**roti tiṇavikappo, tiṇavisesoti attho. **Evanti** nidassane. Tena vuttappakāram paṭhamam viññāṇapātubhāvam paccāmasati. **Tadupādāyā**ti tato paṭṭhāya. **Ariyabhāvakarāṇattā**ti ariyabhāvakarāṇattā. Karotīti hi karaṇam. Ariyasadisattā vā **ariyasīlam**. Puthujjanakalyāṇakānampi hi catupārisuddhisīlam ariyasīlasadisam. **Ākāravikārā**ti uppajjanādi-ākāravikatiyo. **Sahuppādakā**ti uppādasahitā uppādāvattā khandhā. **Āyatanavasenā**ti paripuṇṇāparipuṇṇāyatanavasena. **Yonivasenā**ti aṇḍajādiyoniavasena. **Ekekeneva padenā**ti yathā dutiyanaye jāṭī-ādipadesu dvīhi dvīhi padehi paripuṇṇāparipuṇṇāyatanayonivibhāgena sabbasatte pariyādiyitvā jāṭī dassitā, na evamidha. Idha panetesu ekekeneva padena

avibhāgato **sabbasatte pariyādiyitvā. Ubhayatthāti** purimapacchimanayesu bhāvaniddesova yutto. Anabhihite vibhattividhānaṃ, nābhihiteti. **Pākaṭā nibbattīti** abhibyattā nibbatti.

**Dvinnam dvinnanti** ekavokārabhave rūpāyatanadhammāyatanavasena dvinnam, catuvokārabhave manāyatanadhammāyatanavasena dvinnam.

**Seseti** pañcavokārabhave. **Pañcannanti**

cakkhusotamanorūpadhammāyatanavasena pañcannam. Tāni hi rūpabhava pañcavokāre upapattikkhaṇe uppajjanti. Kāmadhātuyam paṭisandhikkhaṇe uppajjamānānanti yojanā. **Vikalāvikalindriyānanti**

aparipuṇṇaparipuṇṇāyatanānam sattānam. Indriyavaseneva hi āyatanānam vekallaṃ icchitabbaṃ. Tattha vikalindriyassa sattannaṃ navannaṃ

dasannaṃ punapi dasannaṃ, itarassa ekādasannaṃ āyatanānam vasena saṅgaho veditabbo. **Sattannanti**

kāyamanorūpagandharasaphoṭṭhabbadhammāyatanavasena sattannaṃ.

Gabbhaseyyakaṃ hi sandhāyetaṃ vuttaṃ. **Navannanti**

cakkhusotasaddāyatanavajjānam navannaṃ. Andhabadhiravasena hidam

vuttaṃ. **Dasannanti** cakkhusaddavajjānam. **Puna dasannanti**

sotasaddavajjānam. Andhavasena, badhiravasena cetam dvayam vuttaṃ.

**Ekādasannanti** saddavajjānam.

**Tamdukkhabhāvoti** pariyāyadukkkhabhāvo. **Tattha nibbattinivāraṇenāti** uppalapadumādāsi uppatipañikkhepena abhāvakathanena.

**Dukkhuppattikāraṇeti** dukkhuppattiyā hetubhūte dukkhuppattiṭṭhāne.

### **Maraṇaniddesavaṇṇanā**

193. **Khandhabhedassāti** khandhavināsassa. **Soti** khandhabhedo.

**Pabandhasamucchedoti** pabandhassa accantasamucchedo. **Tabbhāvatoti**

sammutimaraṇabhāvato. **Tadekadesabhāvatoti** tadavayavabhāvato. **Tasseva nāmanti asammohatthaṃ vuttaṃ** sabbassāpi

ekakammanibbattajīvitindriyappabandhavicchedabhāvato.

Sammutimaraṇameva hi jātikkhayamaraṇam, tam pana jātikkhayamaraṇam

upakkamamaraṇam, sarasamaraṇanti duvidham. Tattha sarasamaraṇampi

āyukkhayamaraṇam, puññakkhayamaraṇanti duvidham. Evametesam

tadekadesatā veditabbā. Yañcetha upakkamamaraṇam, tam akālamaraṇam.

Sarasamaraṇam kālamaraṇam. Maraṇena sattā yathāladdha-attabhāvena

viyujjantīti āha “**sampattibhavakkhandhehi viyojetī**”ti.

**Kāraṇatthoti** mūlattho. Mūlañhi “ādī”ti vuccati “ko cādi kusalānaṃ dhammānaṃ? Sīlaṅca suvisuddhaṃ, diṭṭhi ca ujukā”ti-ādīsu<sup>1</sup>. Tenāha “sandhibandhanacchedamūlakanti attho”ti.

Phalakiriyāgabbhā īdisī hetukiriyāti katvā vuttaṃ “**antogadhā**”ti. Byasanassa hi āpātakehi āpādanaṃ āpādetabba-āpattiyā saheva sijjhatīti.

### Sokaniddesavaṇṇanā

194. Sukhaṃ hinoti pavattati etenāti sukhakāraṇaṃ **hitam**.

**Bhogabyasanādīpadatthavisesanti** bhogabyasanaṃ, sīlabhyasanti evaṃ bhogasīlapadānaṃ vasena atthavisesaṃ. **Samāsavisesanti** “rogoyeva byasanaṃ, diṭṭhi eva byasanaṃ”ti samānādhikaraṇavasena samāsavisesaṃ. Annapānavatthayānādi paribhuñjitabbato **bhogoti** adhippeto, so ca dhammasamūhabhāvena. **Tabbināsāti** ñātibhogabyasanaṃ vuttānīti te vikārabhāvena paññāpetabbatā **paṇṇattimattā**. Parinipphannaṃ nāma khandhapañcakam. Atāmsabhāvattā paṇṇatti aparinipphannā, anipphannā ca hotīti vuttaṃ “**aparinipphannataṃ sandhāya anipphannānīti āhā**”ti. Na hi paṇṇatti kenaci nipphādīyati. Aññatthāpi aparinipphanne anipphannavohāro āgatoti dassetuṃ “**aparinipphannatamyevā**”ti-ādīmāha. Kāmañcettha aparinipphannaṃ “anipphannaṃ”ti vuttaṃ, “nipphannaṃ”ti pana na parinipphannameva vuccati, nāpi sabbo sabhāvadhammoti dassento “**khandhavibhaṅge cā**”ti-ādīmāha. Nipphannatā vuttāti sambandho. **Anipphannatā** sabhāvadhammattepi kenaci na nipphādīyatīti katvā.

**Saṅkucitaṃ cintananti** pītisomanassapaṭipakkhato, dosasampayogato ca ārammaṇe anabhiratippavattimāha. Anto attano nissayassa niddahanavasena vā jhānaṃ cintanaṃ **antonijjhānaṃ**. Satipi anusocanabhāve attano katākatakusalākusalavisayo manovilekhabhūto vippaṭisāro **kukkuccam**, yathāvutta-antonijjhānaṃ **sokoti** ubhinnaṃ viseso vedītabbo.

“**Manodvārajanakkhaṇe**”ti paribyattamantonijjhānaṃ sandhāyāha, itaraṃ pana pañcadvārajanavesupi labbhateva. Tenaha “**kāyaviññāpādī**”ti-ādī.

1. Saṃ 3. 124 piṭṭhe.



**Domanassassā**ti asocanākārassa domanassassa, socanākārassāpi vā nānāvīthikassa. Tampi hi dukkhamevāti. **Aññathā**ti manodvārajavane eva gahite. **Tatthā**ti kāyavatthukamanodvārikesu.

### Paridevaniddesavaṇṇanā

195. **Ādevanasaddaṃ katvāti** ādevitvā, vilapitvāti attho. **Puggalassa sambhamabhāvoti** yassa sattassa uppajjati, tassa anavaṭṭhānabhāvo. Sambhamaṃ vā abbhantaragataṃ tassa paccupaṭṭhāpeti pākaṭabhāvakaraṇenāti **sambhamapaccupaṭṭhāno**.

Muṭṭhīhi pothanādīni **muṭṭhipoathanādīni**.

**Yena** domanassena. **Pubbe vuttadukkhato**ti “attano khandhaṃ muṭṭhīhi potheti”ti-ādinā vuttadukkhato. **Tamnidānanti** paridevanidānaṃ.

### Dukkhadomanassaniddesavaṇṇanā

196-7. Kāyadukkhābhībhūtassa patikārābhilāsāya tādīsadukkhāvahapayogakālādīsu kāyikadukkhassa tadupanissayatā veditabbā. **Etena dukkhenāti** anāthatahatthapādacchedanādidukkheṇa.

### Upāyāsaniddesavaṇṇanā

198. Dukkhatṭhānanisajjādīni **dukkhatṭhānādīni**. Domanassassa vatthu hoti upāyāsoti sambandho.

### Appiyasampayoganiddesavaṇṇanā

199. Aññasāpekkhasaddo asamatthasamāsoti taṃ dasseti “**yena samāso, na tassāyaṃ paṭisedhako a-kāro**”ti.

**Pacchimadvayanti** “samodhānaṃ missībhāvo”ti idaṃ padadvayaṃ. **Tadatthavasenāti** samodhānatthassa, missībhāvatthassa ca vasena saṅkhāresu labbhati. Āgatehi ca tehi saṅkhārehi puggalassa saṃyogo hotīti yojanā.

**Taṃgahaṇamattanti** āpāthagatārammaṇaggahaṇamattaṃ.

### Icchāniddesavaṇṇanā

201. **Tam kālanti** cuticittanirodhato uddham kāmam. “**Yampi**”ti yaṁ-saddo karaṇatthe paccattanti **yenapīti attho vutto**. “Yaṁ icchan”ti yaṁ-saddo yadā icchāpekkho, tadā “na labhatī”ti ettha alābhapadhānābhāvato icchā visesīyatīti āha “**alābhaviṣiṭṭhā icchā vuttā hotī**”ti. “Iccham na labhati yan”ti evaṁ kiriyāparāmasanabhūto yaṁ-saddo yadā “na labhatī”ti etaṁ apekkhati, tattha guṇabhūtā icchā, padhānabhūto alābhōti āha “**tadā icchāvisiṭṭho alābho vutto hotī**”ti.

Hirottapparahitā chinnikā, dhuttikāti vuccantīti āha “**chinnabhinnagaṇenāti nillajjena dhuttagaṇenā**”ti. **Kappaṭikā** sibbitapilotikadhārino.

**Alabbhaneyya-icchanti** alabbhaneyyavatthusmim iccham.

### Upādānakkhandhaniddesavaṇṇanā

202. **Tādisassa vatthuno sabbhāvāti** sāmāññato anavasesaggahaṇam sandhāyāha.

**Atipākaṭena** ati viya pakāsenā dukkhenāti attho.

Dukkhasaccaniddesavaṇṇanā niṭṭhitā.

## 2. Samudayasaccaniddesavaṇṇanā

203. **Mano viyāti** mano-saddassa viya. **Ika-saddenāti** “ponobhavikā”ti ettha **ika-saddena**. **Gamiyatthattāti** nāpitatthattā. Karaṇasīlatā hi idha sīlattho, so ca **ika-saddena** vuccatīti **kiriyāvācakassa** karaṇasaddassa adassanam appayogā. Vuttatthānam hi appayogo. Sati paccayantarasamavāye punabbhavassa dāyikā, tadabhāve adāyikāti vuttāti āha “**adāyikāpi punabbhavam deticceva**”ti taṁsabhāvānativattanato. Tenevāha “**samānasabhāvattā, tadānubhāvattā cā**”ti. Tattha **sabhāvo** taṇhāyanam.

**Ānubhāvo** paccayasamavāye phalanipphādanasamatthatā. **Itaresūti** avasiṭṭhakilesādīsu. Pavattivipākadāyino kammassa sahāyabhūtā taṇhā “upadhivepakkā”ti adhippetāti āha “**upadhimhi yathānibbatte**”ti-ādi. **Yathānibbatteti** attano paccayehi nibbattappakāre. **Nandanam** samuppilāvanam abhitassanam. **Rañjanam** vatthassa viya raṅgajātena cittassa vipariṇāmanam, ramāpanam vā. **Rāgasambandhenāti** rāgapadasambandhena “**uppannassā**”ti pulliṅgavasena vuttam. **Rūpārūpabhavarāgo visum vakkhatīti** ettha **vakkhatikiriya**padam kammatthe veditabbam.

“**Savatthukam cakkhun**”ti iminā sakalam cakkhudasakamāha, dutiyena sasambhāracakkhum. **Chiddanti** kaṇṇassa chiddapadesam. **Kaṇṇabaddhanti** kaṇṇapāli. **Vaṇṇasaṅṭhānato** rattakambalapatalam viya, **kiccato** mudusiniddhamadhurarasadam maññanti. **Sāmaññena gahitāti** visayena avisesetvā gahitā. **Visayavisiṭṭhāti** cakkhādivisayavisiṭṭhā. **Ettha uppajjātīti** samudāyāvayavehi viya sāmaññavisesehi na nānattavohāro na hoti yathā “rukko simsapā”ti. Na hi sabbo rukko simsapā. Tasmā kiriyābhedasabbhāvato “sayānā bhuñjanti sadhanā”ti-ādīsu viya “uppajjamānā”ti ettha kiriyāya lakkhaṇatā, itarattha lakkhitabbatā ca vuttā. **Yadi uppajjamānā hotīti** anicchitattā sāsaṅkam uppādakiriyaaya atthibhāvamāha. Tena uppāde satīti ayametassa atthoti “uppajjamānā”ti ettha uppādo hetubhāvena vutto, itaro ca tassa phalabhāvanāti āha “**so hi tena upayojito viya hotī**”ti. **Uppajjamānāti** vā taṇhāya tattha uppajjanasīlatā uppajjanasabhāvo, uppajjanasamatthatā vā vuttā. Tattheva cassā uppajjanasīlatā sakkāyato aññasmim visaye pavattiyā abhāvato, samatthatā paccayasamavāyena, aññathā asamatthatā, yato kadāci na uppajjati. **Nivisamānā nivisatīti** etthāpi iminā nayena attho veditabboti.

Samudayasaccaniddesavaṇṇanā niṭṭhitā.

### 3. Nirodhasaccaniddesavaṇṇanā

204. Taṇhāya virajjanam haliddirāgassa viya palujjananti katvā āha “**khayagamanavasenā**”ti. Vicchinnaṃ nirujjhananti vuttam “**appavattigamanavasenā**”ti. Cajanaṃ chaḍḍanaṃ, hāpanaṃ vāti āha “**anapekkhatāya cajanavasena, hānivasena cā**”ti.

**Tadappavatti viyāti** tassā titta-alābuvalliyā appavatti viya. Appavattihetubhūtampi nibbānaṃ taṇhāya appavatti viya gayhatīti āha “**tadappavatti viyā**”ti yathā “**rāgakkhayo**”ti<sup>1</sup>. **Appavattibhūtaṃ** taṇhāya appavattiyā pattam, pattaḅbanti attho. Nibbānaṃ āgamma niruddhāyapi taṇhāya piyarūpasātarūpesu niruddhāti vattabbatādassanattamaṃ vuttāti yojanā. Ettha ca yasmā maggo, nibbānaṃ taṇhāya samucchedasādhanam, tasmā “**purimā vā upamā**”ti-ādinaṃ upamādvayaṃ ubhayattha yathākkamaṃ yojitaṃ, ubhayatthāniyaṃ pana ubhayatthāpi labbhateva.

Nirodhasaccaniddesavaṇṇanā niṭṭhitā.

### 4. Maggasaccaniddesavaṇṇanā

205. **Titthiyehi kappitassa maggassa** pakatipurisantarañāṇādikassa. **Ariyaṃ labhāpetīti** ariyaṃ sāmāññaphalam labhāpeti.

**Tabbipakkhaviratisabhāvāti** tassā sammāvācāya vipakkhato micchāvācāya viratisabhāvā. **Bhedakaramicchāvācā** piṣuṇavācā, sabbāpi vā micchāvācā viṣamvādanādivasena bhedakarīti āha “**bhedakaramicchāvācāpahānenā**”ti. Viṣamvādanādikiccatāya hi lūkhānaṃ apariggāhakānaṃ musāvādādīnaṃ paṭipakkhabhūtā siniddhabhāvena pariggāhakasabhāvā sammāvācā tappaccayasubhāsitasamapaṭiggāhake jane, sampayuttadhamme ca pariggaṇhantī pavattatīti **pariggahalakkhaṇā**. Tenāha “**jane, sampayutte ca pariggaṇhanakiccavāti**”ti. **Cīvarakammādikō** tādiso payogo. **Kātabbam** cīvararajanādikam. **Niravajjasamuṭṭhāpanakiccavāti** niravajjassa kattabassa, niravajjākārena vā samuṭṭhāpanakiccavā. **Sampayuttadhamme ca samuṭṭhāpentoti** ettha.

1. Saṃ 2. 447, 455 piṭṭhesu.

samuṭṭhāpanaṃ micchākammantapaṭipakkhabhūtaṃ attano kiccaṃ  
anugaṇabhāvena sampayuttānaṃ pavattanameva, ukkhipanaṃ vā nesaṃ  
kāyikakiriyāya bhārukkhipanaṃ viya. Sampayuttadhammānaṃ, ājīvasseva  
vā visodhanaṃ **vodāpanaṃ**.

**Diṭṭhekaṭṭhā**ti diṭṭhiyā sahaṃjapahānekaṭṭhā,  
paṭhamamaggasammādiṭṭhivaseneva taṃ veditabbaṃ. “Diṭṭhekaṭṭha-  
avijjādayo”ti pāṭho. Etasmiṃ pakkhe catumaggasammādiṭṭhiyā saṅgaho  
kato hoti. Uparimaggasammādiṭṭhiyā pana diṭṭhiṭṭhāne taṃtaṃmaggavajjho  
māno gaṭhetabbo. So hi “ahan”ti pavatti-ākārato diṭṭhiṭṭhāniyo. **Pakāseti**  
kiccaṃpaṭivedhena paṭivijjhati. **Teneva hi aṅgenā**ti teneva  
sammādiṭṭhisāṅkhātena maggaṅgena. Tathāpavattitena karaṇabhūtena, tena  
vā karaṇena. Aṅgasaddo hi karaṇatthopi hoti. **Tatthā**ti magge,  
maggacittuppāde vā.

**Imassevā**ti ariyamaggapariyāpannasseva. Yadiṭṭhi viramitaṃbato  
viramantassa cetanāpi labbhateva, viratiyā eva pana tadā padhānabhāvoti  
āha “**viramaṇakāle vā viratiyo**”ti. **Subhāsītādī**ti asamphappalāpādi. **Ādi-**  
saddena apisuṇādi saṅgahitā. **Bhāsanādī**ti ettha pana kāyasucaritādi.  
**Amaggaṅgattā**ti amaggasabhāvattā. Tameva cetanāya amaggasabhāvataṃ  
dassetuṃ “**ekassa nānassā**”ti-ādi vuttaṃ. Tattha sammāvācādikiccattayaṃ  
nāma micchāvācādināṃ tiṇṇaṃ pāpadhammānaṃ samucchindanaṃ,  
maggacetanā ca taṃsabhāvā na hoti na tassā maggakkhaṇe  
sammāvācādiḥbhāvasiddhi. **Tāmsiddhiyanti** kiccattayasiddhiyaṃ. Yathā  
panassā pubbabhāge subhāsītāvācādiḥbhāvo, evaṃ maggakkhaṇepi siyā.  
Evaṃ sante yathā tattha ekassa sammāsaṅkappassa tikiccatā, sammādiṭṭhi-  
ādīnaṃ ekekaṇaṃ catukiccatā, evaṃ ekā maggacetanā  
sammāvācādikiccattayassa sādhiḥ bhaveyya, tathā ca sati magge  
sammāvācādinī tiṇi aṅgāni na bhaveyyuṃ, chaṅgiko ca ariyamaggo siyāti  
tayidamāha “**ekāya cetanāyā**”ti-ādinā. Yasmā panetaṃ natthi, tasmā  
maggapaccayatāvacaṇato ca na cetanāya maggabhāvoti maggakkhaṇe  
viratiyova sammāvācādayo.

**Brūhanaṃ** sukhaṃ. **Santasukhaṃ** upekkhā. Sā hi “upekkhā pana  
santattā, sukhamicceva bhāsītā”ti<sup>1</sup> vuttā. **Vitakkādīnanti** teyeva  
abhiniropānādayo pākāṭapariyāyena vuttā.

---

1. Visuddhi 2. 203; Abhi-Ṭṭha 2. 171 piṭṭhesu.

Vacīsaṅkhārabhāvato **vacībhedassa upakārako vitakko**. “**Sāvajjā -pa-upakārako evā**”ti iminā vacībhedataṃsamuṭṭhāpakacetanānaṃ viya viratīyāpi visesapaccayo vitakkoti dasseti. **Vacībhedanīyamikā vācāti** vacīduccaritaviratimāha. Sā hi sammāvācābhūtā micchāvācāsu saṃyamīnī. Tattha yathā viśaṃvādanādīmicchāvācato avirato micchākammantatopi na viramateva. Yathāha “ekam dhammaṃ -pa- akāriyaṃ”ti<sup>1</sup>. Tathā avisaṃvādanādinā sammāvācāya ṭhito sammākammantampi pūreṭiyevāti āha “**vacībheda -pa- upakārikā**”ti. Dhammānaṃ pavattiniṭṭhābhāvato yathā gatīti nibbatti vuccati, evaṃ pavattibhāvato rasalakkhaṇānipīti āha “**kiccādisabhāve vā**”ti.

**Abhinandananti** taṇhādivasena abhinandanānaṃ.

Vācuggatakaṛaṇaṃ **uggaho**, atthaparipucchanānaṃ **paripucchāti** tadubhayaṃ savanādhīnanti āha “**savanañāṇe eva avarodhaṃ gacchantī**”ti. Ñāṇena paricchinditvā gahaṇaṃ **pariggaṇhanaṃ**.

**Tassāti** payogassa.

**Soti** kāmavitakkappavattiyā kāraṇabhūto subhanimutte ayonisomanasikāro. **Tassāti** kāmavitakkassa. Gataṃ gamaṇaṃ pavatti, tassa upāyoti **gatamaggo**.

**Pahātabba-ekattanti** pahātabbatāsāmaññaṃ.

**Maggabhāvena catubbidhampi ekattenāti** sotāpattimaggādivasena catubbidhampi maggabhāvena ekattena sāmaññaṇato gahetvā “assā”ti ekavacanena vuttanti attho. Sabbassa maggassa aññaṃamaññaṃ sadisatā, tathā asadisatā ca ekaccasadisatā ca **jhānaṅgavasena**<sup>2</sup>**sabbasadisāsabbāsadisā-ekaccasadisatā**, so eva visesoti yojetabbaṃ. Vipassanānīyāmaṃ dhuraṃ katvā āhāti sambandho. **Idha panāti** imissā sammohavinodaniyaṃ. **Sammasi -pa- nivattanatoti** paṭhamattheravādaṃ vadanto tadajjhāsayaṃ purakkhatvā vadatīti adhippāyena vuttaṃ. Itarathā itaravādāpettha dassitā evāti. **Pādakajjhānaniyāmaṃti** pādakajjhānaniyāmaṃ dhuraṃ katvā āhāti yojanā.

1. Khu 1. 39 piṭṭhe Dhammapade.

2. Jhānavasena (Mūlaṭṭi 2. 73 piṭṭhe.)

“Vipassanā -pa- daṭṭhabbo”ti kasmā vuttaṃ. Na hi tassā idha paṭikkhepatā atthi. Tathā hi vuttaṃ “keci vuṭṭhānagāminivipassanā niyāmetīti vadanti”ti? Nayidamevaṃ. **Idhāpīti** idha pādakajjhānaniyāmepe vipassanāniyāmo na paṭikkhiṭṭoti ayañhettha attho. Tenevāha “**sādhāraṇattā**”ti. “Idha panā”ti imināpi paṭhamattheravādo saṅgahitoti veditabbo. Yadi evaṃ kasmā vipassanāniyāmo visuṃ gahitoti? Vādattayāvidhuratādassanattham. **Aññe cācariyavādāti** sammasitajjhānapuggalajjhāsavādā.

“**Āruppetikacatukkajjhānam -pa- na lokiyan**”ti idaṃ theravāde āgataṃ porāṇaṭṭhakathāyaṃ tantim katvā ṭhapitanti **aṭṭhasālīniyam** saṅgahetvā vuttanti āha “**vuttaṃ aṭṭhasālīniyanti adhippāyo**”ti. **Yesūti** pacchimajjhānavajjāni sandhāya vadati. Tattha hi arūpuppattiyam saṃsayo, na itarasmim. “Catukkapañcakajjhānan”ti vutte avisesato sāsavānāsavaṃ apekkhīyati, nivattetabbagahetabbasādhāraṇavacanenettha sāsavato avacchindanattham “tañca lokuttaran”ti vatvā nivattitadhammadassanattham “na lokiyan”ti vuttanti dassento āha “**samudāyañca -pa- āhā**”ti. Itarathā byabhicārābhāvato “lokuttaran”ti visesanaṃ niratthakaṃ siyā. **Tayo maggāti** dutiyamaggādayo. **Tajjhānikanti** tikacatukkajjhānikam sotāpattiphalādim. **Aññajjhānikāpīti** tikacatukkajjhānato aññajjhānikāpi catukkajjhānikāpi maggā uppajjanti. **Pi-saddena** tajjhānikāpi tikacatukkajjhānikāti attho. Yadi evaṃ catuvokārabhavepi pañcavokārabhave viya maggassa tikacatukkajjhānikabhāve kenassa jhānaṅgādinīyamoti āha “**jhānaṅgādinīyamikā pubbābhisāṅkhārasamāpattī**”ti. **Pubbābhisāṅkhārasamāpattīti** ca pādakabhūtā attanā atikkantadhammavirāgabhāvena vipassanāya pubbābhisāṅkhārakārī arūpasamāpattī, phalassamāpattī vā. Tenāha “**pādakan**”ti. **Na sammasitabbāti** na sammasitabbā samāpattī jhānaṅgādinīyamikā sammasitabbānaṃ tikacatukkajjhānānaṃ tattha anuppajjanato, itarattha ca visesābhāvato. **Phalassapīti** catutthapañcamajjhānikaphalassapi.

**Dukkhañāṇādīnanti** dukkhasamudayañāṇānaṃ.

**Tamtaṃkusalārammaṇārammaṇattāti** kāmāvacarādīsu yena yena kusalena siddhim nekkhammasaṅkappādayo uppajjanti, tassa tassa kusalassa ārammaṇaṃ ārammaṇaṃ etesanti

taṁtaṁkusalārammaṇārammaṇā, tabbhāvato. **Taṁtaṁviramitabbādi ārammaṇattā**ti visaṁvādanavattu-ādi-ārammaṇattā. Vītikkamitabbato eva hi viratīti. “**Angānan**”ti idaṁ “nekkhammasaṅkappādīnan”ti etthāpi yojetabbaṁ avayavena vinā samudāyābhāvato. **Visesapaccayo**ti bhinnasīlassa, aparisuddhasīlassa vā sammappadhānāsambhavato samādhānassa viya vāyāmassa sīlaṁ visesapaccayo. Ayañca attho yadipi purimasiddhasīlavasena yutto, sahaḥjātavasenāpi pana labbhatevāti dassento “**sampayuttassāpi**”ti āha. Sahajameva cettha adhippetanti āha “**sampayuttasseva cā**”ti-ādi. Sammoso pamādo, tappaṭipakkho **asammoso** appamādo, so cittassa ārakkhāti āha “**cetaso rakkhitatā**”ti.

**Sīlakkhandho cāti ca**-saddena samādhikkhandho ca. Khantippadhānattā sīlassa adosasāadhanatā, nīvaraṇajeṭṭhakassa kāmaccchandassa ujuvipaccanīkabhāvato samādhissa alobhasāadhanatā daṭṭhabbā. **Sāsananti** paṭivedhasāsanam, “sāsanabrahmacariyan”ti ca vadanti.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

206-214. “Pariññeyyabhāvarahite ekantapahātabbe”ti kasmā vuttaṁ, nanu taṇhāyapi cakkhādīnam viya taṇhāvattutāvacanena pariññeyyatā vuttā. Yathāha “rūpataṇhā loke piyarūpaṁ sātārūpaṁ, etthesā taṇhā uppajjamānā uppajjati, ettha nivisamānā nivisatī”ti-ādi<sup>1</sup>. Tappaṭibaddhasaṅkilesappahānavasena samatikkamitabbatā hi pariññeyyatā. Ekantapahātabbatā ca na taṇhāya eva, atha kho avasesānam saṅkilesadhammānampi. Tathā hi tesam sabbaso accantappahāyikā dassanabhāvanāti? saccametaṁ, tathāpi yathā “dukkhaṁ ariyasaccaṁ pariññeyyan”ti<sup>2</sup> taṇhāvajje upādānakkhandhapañcake pariññeyyabhāvo niruḷho, na tathā taṇhāya, taṇhāya pana “yāyam taṇhā ponobhavikā”ti-ādīnā<sup>1</sup> samudayabhā-

1. Dī 2. 246; Ma 1. 85; Abhi 2. 107 piṭṭhesu.

2. Saṁ 3. 382 piṭṭhe.

3. Abhi 2. 106; Dī 2. 246; Ma 1. 60, 373; Saṁ 3. 369; Vi 3. 15; Khu 9. 39 piṭṭhesu.



vo viya sātisayaṃ pahātabbhāvo niruḥhoti dassetuṃ “**pariññeyyabhāvarahi ekantappahātabbe**”ti vuttaṃ. Yassa asaṅgahito padeso atthi, so **sappadeso**, ekadesoti attho. **Tatthā**riyasaccasaddo. **Samudayoti** samudayattho. “Nippadesato samudayaṃ dassetuṃ”ti samudayassevatta gahaṇe kāraṇaṃ dassetuṃ “**dukkhanirodhā paṇā**”ti-ādi vuttaṃ. Tattha **dukkhanirodhā**ti dukkhaṃ, nirodho ca. **Ariyasaccadesanāyanti** ariyasaccadesanāyampi saccadesanāyaṃ viya. **Dhammatoti** desetabbadhammato nippadesā eva. “Avasesā ca kilesā”ti-ādinā desanābhedo eva hi tattha viseso. Tenāha “**na hi tato añño**”ti-ādi. **Apubbo natthīti** dhammato apubbo natthīti attho. **Tassāti** samudayassa. **Sabbattha tīsupi vāresūti** aṭṭhaṅgikapañcaṅgikasabbasaṅgāhikabhedesu mahāvāresu, tadantogadhesu ca pañcasu koṭṭhāsesu. **Apubbassāti** “avasesā ca kilesā”ti-ādinā taṇhāya apubbassa. Avasiṭṭhakilesādināṃ hi samudayatāvacaṇaṃ idha apubbadassanaṃ. Tassa yadipi dutiyatativāresu viseso natthi, pañcasu pana koṭṭhāsesu uparūpari apubbaṃ dassitanti katvā evaṃ vuttaṃ. Tañhi samudayavisesadassanaṃ, itaraṃ pana maggavisesadassanaṃ. Tassa ca dhammato apubbābhāvo dassitoyeva. Yadi evaṃ dutiyādikōṭṭhāsesu, paṭhamakoṭṭhāsepi vā kasmā taṇhā gahitāti āha “**apubbamudayadassanatthāyapi hī**”ti-ādi. **Kevalāyāti** tadaññakilesādinirapekkhāya. **Desanāvasena na vuttoti** na dhammavasenāti adhippāyo. Tasmā dukkhādīni tattha ariyasaccadesanāyaṃ sappadesāni dassitāni honti pariyāyenāti daṭṭhabbaṃ. Abhidhammadesanā pana nippariyāyakathāti katvā aṭṭhakathāyaṃ “nippadesato samudayaṃ dassetuṃ” icceva vuttaṃ. **Paccayaasaṅkhātanti** paccayābhimataṃ paccayabhūtaṃ, paccayakoṭṭhāsaṃ vā.

**Tesanti** kusaladhammānaṃ. **Paccayānaṃ pahānavasenāti** hetunirodhena phalanirodhaṃ dasseti, tappaṭibaddhakilesappahānena vā kusalānaṃ pahānaṃ vuttaṃ. Yathā “dhammāpi vo bhikkhave pahātabbā”ti<sup>1</sup>. Iti pariyāyato kusalānaṃ pahānaṃ vuttaṃ, na nippariyāyato tadabhāvatoti āha “**na hi kusalā pahātabbā**”ti. Yathā ca kusaladhammesu,

---

1. Ma 1. 188 piṭṭhe.

abyākatadhammesupi eseva nayo. **Nirodhanti** asaṅkhatadhātum.

**Appavattibhāvoti** yo nirodhassa nibbānassa taṇhādi-appavattihetubhāvo, taṃ pahānanti vuttanti attho.

**Kāyakammādisuddhiyāti** pubbhāgākāyakammavacīkamma-  
ājīvasuddhiyā dūratarūpanissayataṃ ariyamaggassa dassetīti sambandho.  
**Pañcaṅgīkaṃ -pa- pavattataṃ dīpeti**, na pana ariyamaggassa pañcaṅgikattāti  
adhippāyo. **Ñāpakanidassananti** ñāpakabhāvanidassanaṃ, etena “**vacanato**”ti  
idaṃ hetu-atthe nissakkavacananti dasseti. **Vacanatoti** vā īdisassa vacanassa  
sabbhāvato. Paṭipadāya ekadesopi **paṭipadā evāti** attho. **Niddiṭṭho**  
**dhammasaṅgāhakehi** saṅgāyanavasena.

**Jhānehi desanāpaveso** “lokuttaraṃ jhānaṃ bhāveti”ti<sup>1</sup> jhānasīsenā  
desanāva. Tathā **bhāvanāpaveso**. **Pāḷigamananti** pāḷipavatti pāṭhadesanā.  
**Yāthāvijjamānadhammavasenāti** tasmim cittuppāde  
labbhamānavitakkādidhammavasena.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

215. **Tassāti** suttantabhājanīyassa. **Evaṃ panāti** “apicesā sammādiṭṭhi  
nāma pubbhāge nānākkhaṇā nānārammaṇā”ti ādippakārena. **Evañca**  
**katvāti** lokuttaramaggasseva maggasaccabhāvassa adhippetattā. **Tenāti** tena  
kāraṇena, ariyamaggasseva uddisitvā niddiṭṭhattāti attho.

Saccavibhaṅgavaṇṇanā niṭṭhitā.

---

1. Abhi 1. 72 piṭṭhe.

## 5. Indriyavibhaṅga

### 1. Abhidhammabhājanīyavaṇṇanā

219. **Cakkhudvārabhāveti** cakkhudvārabhāvahetu. **Tamdvārikehī** tasmim dvāre pavattanakehi cittacetasikehi. Te hi “tam dvāram pavatti-okāsabhūtam etesaṃ atthi”<sup>1</sup>ti tamdvārikā. Nanu ca tabbatthukehipi tam indaṭṭham kāreti. Tenāha aṭṭhakathāyaṃ “tikkhe tikkhattā, mande ca mandattā”<sup>2</sup>ti? Saccam kāreti, tabbatthukāpi pana idha “tamdvārikā” icceva vuttā. Apariccattadvārabhāvānyeva hi cakkhu nissayaṭṭhena “vatthū”<sup>3</sup>ti vuccati. Atha vā tamdvārikesu tassa indaṭṭho pākaṭoti “tamdvārikehī”<sup>4</sup>ti vuttam. Indaṭṭho parehi anuvattanīyatā paramissarabhāvoti dassento “**tañhi -pa- anuvattanti**”<sup>5</sup>ti āha. Tattha tanti cakkhum. Teti tamdvārike. Kiriyāniṭṭhānavācī avī-saddo “vijitāvī”<sup>6</sup>ti-ādīsu<sup>1</sup> viyāti āha “**pariniṭṭhitakiccajānanan**”<sup>7</sup>ti.

“Cha imāni bhikkhave indriyāni. Katamāni cha? Cakkhundriyam -pa-manindriyam”<sup>2</sup>ti<sup>2</sup> evaṃ katthaci chapindriyāni āgatāni, kasmā pana suttante khandhādayo viya indriyāni ekajjham na vuttāni, abhidhamme ca vuttānīti āha “**tattha suttante**”<sup>3</sup>ti-ādi. **Nissaraṇūpāyādibhāvatoti** ettha lokuttaresu maggapariyāpannāni nissaraṇam, itarāni nissaraṇaphalaṃ, vivaṭṭasannissitena nibbattitāni saddhindriyādīni nissaraṇūpāyo, itaresu kānīci pavattibhūtāni, kānīci pavatti-upāyoti veditabbāni.

**Khīṇāsavassa bhāvabhūtoti** chaḷaṅgupekkhā viya khīṇāsavasseva dhammabhūto.

**Dve atthāti** indaliṅga-indasiṭṭhaṭṭhā. **Attano paccayavasenāti** yathāsakaṃ kammādi paccayavasena. **Tamsahitasantāneti** itthindriyasahite, purisindriyasahite ca santāne. **Aññākārenāti** itthi-ādito aññena ākārena. Anuvattanīyabhāvo itthipurisindriyānam ādhipaccanti yojanā. **Imasmiṅcattheti** ādhipaccatthe.

1. Dī 1. 83; Dī 2. 14; Dī 3. 117 piṭṭhādīsu.

2. Sam 3. 180, 181 piṭṭhesu.

**Tesanti** anaññātaññassāmītindriyādīnaṃ tiṇṇaṃ. Yā sukhadukkhindriyānaṃ iṭṭhāniṭṭhākārasambhogarasatā vuttā, sā ārammaṇasabhāveneva veditabbā, na ekaccasomanassindriyādīnaṃ viya parikkappavasenāti dassento “**ettha cā**”ti-ādimāha.

Yadipi purisindriyānantaraṃ jīvitindriyaṃ rūpakaṇḍepi<sup>1</sup> desitaṃ, taṃ pana rūpajīvitindriyaṃ, na ca tattha manindriyaṃ vatvā itthipurisindriyāni vuttāni. Idha pana aṭṭhakathāyaṃ indriyānukkamo vutto sabbākārena yamakadesanāya saṃsandatīti dassento āha “**so indriyayamakadesanāya sameti**”ti. **Purimapacchimānaṃ ajjhattikabāhirānanti** cakkhādīnaṃ purimānaṃ ajjhattikānaṃ, itthindriyādīnaṃ pacchimānaṃ bāhirānaṃ. **Tesaṃ majjhe vuttaṃ** ubhayesaṃ upakāraḥkāṭāḍīpanatthanti adhippāyo. Tena evampi desanantarānurodhena jīvitindriyassa anukkamaṃ vattum vaṭṭatīti dasseti. Kāmañcetha evaṃ vuttaṃ, parato pana kiccavinicchaye idha pāḷiyaṃ āgataniyāmeneva manindriyānantaraṃ jīvitindriyassa, tadanantarañca itthipurisindriyānaṃ kiccavinicchayaṃ dassessati. **Sabbaṃ taṃ dukkhaṃ** saṅkhāradukkhabhāvena, yathārahaṃ vā dukkhadukkhātādibhāvena. **Duvidhattabhāvānupālakassāti** rūpārūpavasena duvidhassa attabhāvassa anupālakassa. Rūpārūpavasena duvidhampi hi jīvitindriyaṃ idha gahitaṃ. “**Pavattī**”ti etena sahaḥjātadhammānaṃ pavattanarasena jīvitindriyena vedayitānaṃ pavattetabbataṃ dīpeti. “**Bhāvanāmaggasampayuttan**”ti iminā phalabhūtaṃ aññindriyaṃ nivatteti. Bhāvanāgahaṇaṅcetha sakkā avattum. “**Bhāvetabbattā**”ti vuttattā bhāvanābhāvo pakaṭova. **Dassanānantarā**ti samānajātibhūmikenā abyavahitataṃ sandhāyāha, na anantarapaccayaṃ.

**Tassāti** indriyapaccayabhāvassa. **Anaññasādhāraṇattāti** aññehi anindriyehi asādhāraṇattā. Evaṃ sāmattiyato kiccavisesaṃ vavatthapetvā pakaraṇatopi taṃ dasseti “**indriyakathāya ca pavattattā**”ti. **Aññesanti** aññesaṃ indriyasabhāvānampi sahaḥjātadhammānaṃ. Yehi te indaṭṭhaṃ kārenti, tesaṃ vasavattāpanaṃ natthi, yathā manindriyassa pubbaṅgamasabhāvābhāvato sayañca te aññadatthu manindriyasappa vasa vattanti. Tenāha “**taṃsampayuttānipi hī**”ti-ādi. Yadi evaṃ kathaṃ tesaṃ indaṭṭhoti? “**Sukhanādilakkaṇaṃ sampayuttānaṃ attākārānuvidhāpanamattan**”ti<sup>2</sup>

1. Abhi 1. 147 piṭṭhe.

2. ...vidhānamattanti (Ka)

vuttovāyamatto. “**Cetasikattā**”ti iminā sampayuttadhammānaṃ cittassa padhānataṃ dasseti. Tato hi “cetasikā”ti vuccanti. **Sabbatthā**ti vasavattāpanaṃ saha-jātadhammānupālananti evaṃ yāva amatābhimukhabhāvapaccayatā ca sampayuttānanti taṃkiccaniddese. “Anuppādane, anupatthambhe ca satī”ti padaṃ āharitvā sambandhitabbaṃ. Na hi padattho sabbhāvaṃ byabhicaratīti janakupatthambhakattābhāvepīti vuttaṃ hoti. **Tappaccayānanti** itthipurisanimittādipaccayānaṃ kammādīnaṃ. **Tappavattane nimittabhāvoti** itthinimittādi-ākārarūpanibbattane kāraṇabhāvo. Svāyaṃ itthindriyādīnaṃ tattha atthibhāvoyevāti daṭṭhabbaṃ. Yasmiñhi sati yaṃ hoti, asati ca na hoti, taṃ tassa kāraṇanti. “**Nimittabhāvo anuvidhānaṃ**”ti iminā **anuvidhāna**saddassa kammaṭṭhataṃ dasseti. **Sukhadukkhabhāvappattā viyāti** sayāṃ sukhadukkhasabhāvappattā viya, sukhantā, dukkhamantā ca viyāti attho. **Asantassa -pa-** **majjhatakkārānupāpanaṃ** aññānupekkhanādivasena veditabbaṃ. **Samānajatīyanti** akusalehi sukhadukkhehi akusalūpekkhāya, abyākatehi abyākatūpekkhāya, kusalasukhato kusalūpekkhāya. Tatthāpi bhūmivibhāgenāyamattho bhinditvā yojetabbo. Taṃ sabbam **khandhavibhaṅge** vutta-oḷārikasukhumavibhāgena dīpetabbaṃ. **Ādisaddenāti** “kāmarāgabyāpādādī”ti ettha vutta-ādisaddena. Saṃyojanasamucchindanatanadupanissayatā eva sandhāya aññātāvindriyassa kiccantarāpasutā vuttā, tassāpi uddhambhāgiyasāmyojanapaṭippassaddhippahānakiccatā labbhateva. Abyāpībhāvato vā aññātāvindriyassa paṭippassaddhippahānakiccaṃ na vattabbaṃ, tato aññindriyassāpi taṃ aṭṭhakathāyaṃ anuddhaṭṭam. Maggānantarañhi phalaṃ “tāya saddhāya avūpasantāyā”ti-ādi<sup>1</sup>vacanato kilesānaṃ paṭippassambhanavasena pavattati, na itaraṃ. Aññathā ariyā sabbakālaṃ appaṭippassaddhakilesadarathā siyūṃ. Itarassa pana nicchandarāgesu sattavohāro viya ruḥhivasena paṭippassaddhikiccatā veditabbā.

Etthāha—kasmā pana ettakāneva indriyāni vuttāni, etāni eva ca vuttānīti? Ādhipaccatthasambhavatoti ce. Ādhipaccaṃ nāma issariyanti vuttametam. Tayidaṃ ādhipaccaṃ attano kicce balavanti aññesampi sabhāvadhammānaṃ labbhateva. Paccayādhīnavuttikā hi

1. Abhi-Ṭṭha 1. 329 piṭṭhe.

paccayuppannā. Tasmā te tehi anuvattīyanti, te ce te anuvattantīti?  
 Saccametaṃ, tathāpi atthi tesam viseso. Svāyaṃ viseso  
 “cakkhuvīññāṇādippavattiyañhi cakkhādīnaṃ siddhamādhīpaccaṃ”ti-  
 ādinā<sup>1</sup> aṭṭhakathāyaṃ dassitoyeva.

Apica khandhapañcake yāyaṃ sattapaññatti, tassā visesanissayo  
 cha ajjhattikāni āyatanānīti tāni tāva ādhīpaccattham upādāya  
 “cakkhundriyaṃ -pa- manindriyaṃ”ti-ādito vuttāni. Tāni pana yena  
 dhammena pavattanti, yaṃ so dhammo tesam ṭhītihetūti dassanattam  
 jīvitam. Tayime indriyapaṭibaddhā dhammā imesaṃ vasena “itthī,  
 puriso”ti voharīyantīti dassanattam bhāvadvayaṃ. Svāyaṃ sattasaññito  
 dhammapuñjo pabandhavasena pavattamāno imāhi vedanāhi  
 saṃkilissatīti dassanattam vedanāpañcakaṃ. Tato visuddhatthikānaṃ  
 vodānasambhāradassanattam saddhādīpañcakaṃ. Tato  
 vodānasambhārā imehi visujjhanti, visuddhipattā niṭṭhitakiccā ca  
 hontīti dassanattam ante anaññātaññassāmīti indriyādīni tīni vuttāni.  
 Sabbattha “ādhīpaccattham upādāyā”ti padaṃ yojetabbaṃ. Ettāvata  
 adhippetatthasiddhīti aññesaṃ aggahaṇaṃ.

Atha vā pavattinivattīnaṃ nissayādidassanattampi etāni eva  
 vuttāni. Pavattiyā hi visesato mūlanissayabhūtāni cha ajjhattikāni  
 āyatanāni. yathāha “chasu loko samuppanno”ti-ādi<sup>2</sup>. Tassā uppatti  
 itthipurisindriyehi. Visabhāgavattusarāganimitā hi yebhuyyena  
 sattakāyassa abhinibbatti. Vuttañhetam “tiṇṇam kho pana mahārāja  
 sannipātā gabbhassāvakkanti hoti, idha mātāpitaro ca sannipatitā honti,  
 mātā ca utunī hoti, gabbho ca paccupaṭṭhito hoti”ti<sup>3</sup>. Avaṭṭhānaṃ  
 jīvitindriyena tena anupāletabbato. Tenāha “āyūṭhiti yapanā yāpanā”ti-  
 ādi<sup>4</sup>. Upabhogo

1. Abhi-Ṭṭha 2. 119 piṭṭhe.

2. Khu 1. 304 piṭṭhe sutthanipāte.

3. Ma 1. 332; Ma 2. 363; Khu 11. 126 piṭṭhe.

4. Abhi 1. 19 piṭṭhe.

vedanāhi. Vedanāvasena hi iṭṭhādisabbavisayupabhogo. Yathāha “vedayati vedayatīti kho bhikkhave, tasmā vedanāti vuccatī”<sup>1</sup>. Evam pavattiyā nissayasamuppādaṭṭhitisambhogadassanattam cakkhundriyam yāva upekkhindriyanti cuddasindriyāni desitāni. Yathā cetāni pavattiyā, evam itarāni nivattiyā. Vivatṭasannissitena hi nibbattitāni saddhādīni pañca indriyāni nivattiyā nissayo. Uppādo anaññātāññassāmītindriyena tassa paṭhamam uppajjanato. Avatṭhānam aññindriyena. Upabhogo aññātāvindriyena aggraphalasangamupabhogato. Evampi etāni eva indriyāni desitāni. Ettāvattā yathādhippetatthasiddhito aññesam aggaḥamam. Etenāpi nesam desanānukkamopi samvaṇṇito veditabbo.

220. **Kusalākusalavīriyādīnī**ti ettha **ādi**-saddena kusalasamādhi-ādīnam, abyākatavīriyādīnañca saṅgaho daṭṭhabbo. **Paccayādī**ti **ādi**-saddena desārammaṇādayo gahitā, yathāvuttavīriyādīni, cakkhādīni ca saṅgaṇhāti. Icevam sabbasaṅgāhikāni viriyindriyādīpadāni, cakkhundriyādīpadāni ca. **Tenā**ti “evam santepī”ti-ādīnā bhūmivibhāgakathanena. **Tannivattanē**ti sabbesam sabbabhūmikattanivattanena. **Avijjamāna**<sup>2</sup> **saṅgāhakattanti** tassam tassam bhūmiyam anupalabbhamānassa indriyassa saṅgāhakatā.

Abhidhammabhājanīyavaṇṇanā niṭṭhitā.

## 2. Pañhapucchakavaṇṇanā

**Idha** imasmim “sattindriyā anārammaṇā”ti evam ekantānārammaṇatte vuccamāne **na ābhaṭṭham** jīvitindriyam na bhāsitam. Tīkāyam pana **anābhaṭṭhanti** katasamāsam katvā vuttam. **Rūpadhammesu saṅgahitatanti** “rūpan”ti gaṇititam. **Arūpakotṭhāsena** arūpabhāvena siyāpakke saṅgahitam. Kasmā?

1. Sam 2. 71 piṭṭhe.

2. Avijjamānassa (Mūlaṭī 2. 81 piṭṭhe.)

tassa parittārammaṇādītā atthīti. Yasmā pana rūpārūpamissakasseva vasena siyāpakkhasaṅgaho yutto, na ekadesassa, tasmā ekadesassa taṃ anicchanto āha **“adhippāyo”**ti. Idāni tamatthaṃ pakāsetuṃ **“arūpakotṭhāsena panā”**ti-ādi vuttaṃ. **Navattabbatā**ti parittārammaṇādibhāvena navattabbatā. Kathaṃ pana rūpakotṭhāsena anārammaṇassa navattabbatāti codanaṃ sandhāyāha **“na hi anārammaṇan”**ti-ādi. **“Avijjamānārammaṇānārammaṇesū”**ti iminā **“anārammaṇā”**ti bāhiratthasamāso ayanti dasseti. **Navattabbesūti** sārammaṇabhāvena navattabbesu. **Anārammaṇattāti** ārammaṇarahitattā. **“Navindriyā siyā parittārammaṇā, siyā mahaggatārammaṇā, siyā appamāṇārammaṇā, siyā na vattabbā ‘parittārammaṇā’tipi ‘mahaggatārammaṇā’tipi ‘appamāṇārammaṇā’tipī”**ti-ādīsu<sup>1</sup> viya na sārammaṇasseva navattabbataṃ dasseti. Yathā ca na sārammaṇasseva navattabbatāpariyāyo, atha kho anārammaṇassāpīti sārammaṇe niyamābhāvo. Evaṃ navattabbaṃ sārammaṇamevāti ayampi niyamo natthīti dassento **“navattabbassa vā sārammaṇatan”**ti āha. Tassa na dassetīti sambandho. **“Na hī”**ti-ādinā tamevatthaṃ vivarati.

Tattha rūpanibbānānaṃ sukhādisampayuttabhāvena navattabbatā, na parittārammaṇādibhāvenāti codanaṃ manasi katvā āha **“athāpī”**ti-ādi. Tattha athāpī vattatīti sambandho. **Siyā anārammaṇantipi vattabbaṃ siyāti** anārammaṇaṃ dhammāyatanāṃ sārammaṇehi visuṃ katvā evaṃ vattabbaṃ siyā. **Navattabba**-saddo yadi sārammaṇesveva vatteyya, na cevaṃ vuttaṃ, avacane ca aññaṃ kāraṇaṃ natthīti dassento āha **“na hi pañhapucchake sāvasesā desanā atthī”**ti. Tasmā **na vattabba**-saddo anārammaṇesupi vattatevāti adhippāyo. Yāpi **“aṭṭhindriyā siyā ajjhattārammaṇā”**ti ajjhattārammaṇādibhāvena navattabbatā vuttā, sā jīvitindriyassa ākiñcaññāyatanakāle paṭhamārūppaviññābhāvamattārammaṇataṃ sandhāya vuttā, na sārammaṇasseva navattabbatādassanattaṃ, nāpi anārammaṇassa parittārammaṇādibhāvena navattabbatābhāvadassanattanti

---

1. Abhi 2. 133 piṭṭhe.



dassento “**atṭhindriyā siyā ajjhattārammaṇāti ettha cā**”ti-ādimāha. Tattha **siyā ajjhattārammaṇāti iti**-saddo ādi-attho. Tena avasiṭṭhapāḷisaṅgaṇhanena “siyā na vattabbā ‘ajjhattārammaṇā’tipi ‘bahiddhārammaṇā’tipi ‘ajjhatabhiddhārammaṇā’tipī”ti imāya pāḷiyā vuttamattham jīvitindriyassa dassento “**jīvitindriyassa -pa- navattabbatā veditabbā**”ti āha, tam vuttatthameva.

**Indriyavibhaṅgavaṇṇanā niṭṭhitā.**

## 6. Paṭiccasamuppādavibhaṅga

### 1. Suttantabhājanīya

#### Uddesavāraṇṇanā

225. “**Vuttattā**”ti idaṃ nissakkaṃ kiṃ lakkhaṇaṃ? Hetulakkhaṇaṃ. Yadi evaṃ taṃhetuko vibhajjavādibhāvo āpajjati. Na hi moggaliputtatissattherena vuttattā buddhasāvaka vibhajjavādino ahesunti? Nayidamevaṃ. Tividho hi hetu nāpako, kārako, sampāpakoti. Tesu nāpakahetu idhādhippeto, tasmā tena mahātherena “kiṃvādī bhante sammāsambuddho”ti puṭṭhena “vibhajjavādī mahārājā”ti tadā vuttavacanena nāyati “sammāsambuddhasāvaka vibhajjavādino”ti imamatthaṃ dasseti **kiṃ -pa- vuttattā -pa- vibhajjavādino**”ti. “Ahañhi brāhmaṇa vinayāya dhammaṃ desemi rāgassā”ti-ādiṃ vatvā “no ca kho yaṃ tvaṃ sandhāya vadesī”ti-ādinā<sup>1</sup> verañjabrāhmaṇassa bhagavatā venayikādibhāvo vibhajja vuttoti taṃ anuvadantā sāvakaṃpi tathā vadantīti āha “**te hi venayikādibhāvaṃ vibhajja vadanti**”ti. **Cīvarādīnanti ādi**-saddena somanassādīnaṃ saṅgaho daṭṭhabbo. Tānīpi hi sevitabbāsevitabbabhāvena vibhajja vuttāni. Vibhajjavādīparisā **vibhajjavādimaṇḍalanti** etasmīṃ atthe yathā taṃ otiṇṇo nāma hoti, taṃdassanatthaṃ “**ācariye anabbhācikkhantonā**”ti-ādi vuttaṃ. Sakasamayāvokkamādi hi paramatthato tadotāro. “Asaṃkiliṭṭhāpi avijjā atthi amaggavajjhā, yāya nivutā khīṇāsavāpi nāmagottādīsu ekaccaṃ na jānanti, sā kusalacittuppādesupi pavattatī”ti nikāyantariyā. Taṃ sandhāyāha “**avijjā puññāneñjābhisankhārānaṃ hetupaccayo hotīti-ādiṃ vadanto**”ti. Upalakkhaṇaṃhetuṃ sahaṃjātaṃkoṭiyā. **Ādi**-saddena akusalacittanāpi nāṇaṃ uppajjati, yā saṃkiliṭṭhā paññāti, acetasikaṃ sīlaṃ, aviññattisaṃkhātāṃ rūpabhāvaṃ dussilyanti evamādiṃ saṅgaṇhāti. Parasamayāyūhanaṃ parasamaye byāpārāpattiyā. Yo tatha sakasamayena viruddho attho, tassa vā dīpanena siyā, parasamaye vādāropanena

vā. Tesu purimaṃ “ācariye anabbhācikkhantenā”ti iminā apanītanti itaraṃ dasseti “**parasamayaṃ -pa- anāyūhantenā**”ti. **Asampiṇḍentenā**ti upacayatthaṃ sandhāya vadanti. Āyūhanasaddo pana upacayattho na hotīti kecivādo na sārato gahetabbo.

**Tabbipariyāyenā**ti yathāvinayaṃ avaṭṭhānena. Sāvajjassa anavajjatādīpanādinā **kammantaraṃ bhindanto** vināsento, āloḥento vā **dhammataṃ** dhammasabhāvaṃ **vilometi** viparītato dahati. **Mahāpadeseti** mahā-apadese, buddhādayo mahante mahante apadisitvā vuttāni mahākāraṇāni. **Mahāpadeseti** vā mahā-okāse, mahantāni dhammassa paṭiṭṭhānaṭṭhānānīti vuttam hoti. Tatrāyaṃ vacanatto—apadisīyatīti apadeso, buddho apadeso etassāti buddhāpadeso. Esa nayo sesesupi. Atthato cāyaṃ mahāpadeso “sammukhā metaṃ bhagavato sutan”ti-ādinā kenaci ābhatassa “dhammo”ti vā “adhammo”ti vā vinicchayane kāraṇaṃ. Kim pana tanti? Tassa yathābhatassa suttotaraṇādi eva. Yadi evaṃ kathaṃ cattāroṭi? Dhammassa dve sampadāyo bhagavā, sāvakā ca. Tesu sāvakā saṃghaṇapuggalavasena tividdhā. Evaṃ “amumhā mayā ayaṃ dhammo paṭiggahito”ti apadisitabbānaṃ bhedena cattāro. Tenāha “**sammukhā metaṃ bhagavato sutan**”ti-ādi. Nettiyampi vuttam “buddhāpadeso saṃghāpadeso sambahulattherāpadeso ekattherāpadeso”ti<sup>1</sup>.

**Suttasuttānuloma-ācariyavāda-attanomatimahāpadeseti** ettha tisso saṅgītiyo āruḥhāni tīṇi piṭakāni atthasūcanādi-atthena **suttam**. Yathāvuttassa suttassa anulomato yathāvuttā eva cattāro mahāpadesā **suttānulomaṃ**. Pāḷiyā atthagāhaṇena dhammatāyaṃ paṭiṭṭhāpanato aṭṭhakathā **ācariyavādo**. Nayaggāhena anubuddhiyā attano paṭibhānaṃ **attanomati**. Ettha ca sutta-ācariyavāda-attanomatīnampi kenaci ābhatassa dhammādhammādhāvavinnicchayane kāraṇabhāvasabhāvato mahāpadesatā vuttāti veditabbā. **Santiṭṭhati** appaṭibāhanto, avilomento ca. Tabbipariyāyena atidhāvati. Ekassa padassa ekena pakārena atthaṃ vatvā tasseva puna pakārentarena atthaṃ

---

1. Khu 10. 20 piṭṭhe.

vadanto vā aparehi pariyāyehi niddisati nāma yathā “avijjā dukkhasaccassa yāthāvasarasalakkhaṇaṃ paṭivijjhituṃ na deti”ti-ādiṃ vatvā puna “ayaṃ avijjā dukkhādisu aññāṇaṃ”ti vuttāpi “dukkhasaccassa ekadeso hoti”ti-ādivacanaṃ. Atha vā hetubhāvena vuttassa atthassa puna phalabhāvena vacanaṃ tamevatthaṃ punarāvattetvā niddisanaṃ yathā “viññāṇapaccayā nāmarūpan”ti vatvā pana “nāmarūpapaccayā saḷāyatanan”ti vacanaṃ. Atha vā “sabbametaṃ bhavacakkaṃ kammañceva vipāko ca.

Kilesakammavipākavasena tividhan”ti ca ādinā vuttassevatthassa duvidhatividhādivibhāgadassanaṃ tamevatthaṃ punarāvattetvā niddisananti evamettha attho veditabbo.

**Sattavohāro**ti “satto”ti samaññā. Ye hi dhamme samūhabhūte santānavasena vattamāne upādāya sattapaññatti, tassā tato aññathānāññathā-accantābhāvasaṅkhāte ante anupagamma yāthāvato saṅghaṇaṃ, bodhanañca dhammatāyaṃ akusalassa dukkaraṃ durabhisambhavanti. Avijjādikassa paccayadhammassa saṅkhārādipaccayuppannadhammaṃ pati hetu-ādinā paccayena paccayabhāvo **paccayākāro**, paṭiccasamuppādoti attho.

**Vuttanayenā**ti “ācariye anabbhācikkhantenā”ti-ādinā vuttanayena. Kāmañcetta sabbāpi atthavaṇṇanā imināva nayena kātabbā, paṭiccasamuppādavaṇṇanāya pana garutarabhāvaṃ dassento evaṃ vadati.

**Pāḷidhammanti** teṭṭakabuddhavacanaṃ. **Paṭiccasamuppādanti** paṭiccasamuppāda pāḷiṃ.

**Atthaṃ katvā**ti hitaṃ katvā. Yathāyaṃ hitāvaho hoti, evaṃ katvā. **Aṭṭhiṃ katvā**ti vā attānaṃ atthikaṃ katvā. Sutacintāmayādiṃ **ñāṇavisesaṃ**. Tadaṅgavikkhambhanādinā **kilesakkhayavisesaṃ**.

Bhavādisu ādinavappaṭicchādanato, balavūpanissayato, kammassa visesahetubhāvato ca vaṭṭassa mūlakāraṇaṃ avijjā. Vipākavaṭṭanimittassa kammavaṭṭassa kāraṇabhūtampi kilesavaṭṭaṃ avijjāmūlakanti dassanatthaṃ avijjā ādito vuttā. Tanhāpi hi avijjāya paṭicchāditādinave eva visaye assādānupassino pavattati, na aññathā. **Mūlādiddassanasāmaññañcā**ti valliya mūlamajjhapariyosānassa dassanena paṭiccasamuppādassa taṃdassanasāmaññañca yojetabbaṃ, samantacakkhunā sabbassa

diṭṭhattepi desanākāle desanāñāṇacakkhunā bodhetabbatāvasena ekadesadassanassa adhippetattā.

Diṭṭhisahitāya, mānasahitāya vā taṇhāya “ahan”ti, itarāya “maman”ti **abhivadato**. “Abhinandanato”ti hi iminā sappītikāya taṇhāya pavatti dassitā. “**Abhivadato**”ti iminā tato balavatarāya diṭṭhisahitāya, mānasahitāya vā. “**Ajjhosāya tiṭṭhato**”ti iminā pana tatopi balavatamāya diṭṭhisahitāya, kevalāya vā taṇhāya pavatti dassitā. Gilitvā pariniṭṭhāpetvā ṭhānañhi ajjhosānaṃ. **Tappaccayanti** taṇhāpaccayaṃ. Kathaṃ pana nandivacanena catubbidhampi upādānaṃ vuttanti āha “**nanditā**”ti-ādi. Tattha **nanditātadavippayogatāhī**ti nandibhāvena sabhāvato taṇhupādānaṃ, tāya nandiyā taṇhāya avippayogena avinābhāvena diṭṭhupādānaṃ vuttanti veditabbaṃ. “**Diṭṭhābhinandanabhāvenā**”ti iminā diṭṭhiyāpi nandibhāvamāha.

**Paṭisandhipavatti**phassādayoti paṭisandhiyaṃ, pavatte ca uppannaphassamanosañcetanāviññāṇāni. “**Vipākavattābhūte**”ti ca idaṃ pavattavisesanaṃ daṭṭhabbaṃ. **Vaṭṭūpatthambhakā**ti vaṭṭattayūpanissayā. **Itareti** akammajā. **Tasminti** yathāvutte āhāracatukke. **Vattuṃ vaṭṭantī**ti taṇhānidānūpanissayato “taṇhānidānā”ti vatthuṃ yujjanti.

Yathā ariyamaggo antadvayavajjitamajjhimaṭṭapadābhāvato “ñāyo”ti vuccati, evaṃ paṭiccasamuppādoṭī āha “**ñāyoti maggo, soyeva vā paṭiccasamuppādo**”ti. **Attano paṭivedhāya saṃvattati** asammohapaṭivedhena paṭivijjhitaḍḍattā. **Saṃvattatī**ti ca nimittassa kattūpacāravasenetaṃ vuttaṃ yathā “ariyabhāvakarāni saccāni ariyasaccāni”ti. **Pakati-ādayo** hetṭhā saccavibhaṅge hetuvippaṭipattikathāyaṃ dassitā eva. **Akāraṇaṃ “kāraṇaṃ”ti gaṇhanti** yathā kāpilādayo. **Na kiñci kāraṇaṃ bujjhanti** yathā taṃ aññe bālaputhujjanā. **Itarāsanti** majjhato paṭṭhāya yāva pariyoṣānā desanādīnaṃ tissannaṃ. **Tadatthātāsambhavepī**ti yathāsakehi kāraṇehi pavattidassanattatāsambhavepi. **Atthantarasabbhāvatoti** payojanantarasabbhāvato. Vuttāni hi aṭṭhakathāyaṃ<sup>1</sup>

1. Abhi-Ṭṭha 2. 125 piṭṭhe.

“jarāmarañādikassa dukkhassa attanā adhigatakāraṇasandassanattamā.  
 Āhāranidānavavattāpanānusārena yāva atītam addhānam atiharitvā puna  
 atītaddhato pabhuti hetuphalapaṭipāṭisandassanattamā.  
 Anāgataddhahetusamuṭṭhānato pabhuti anāgataddhasandassanattan”ti  
 tissannaṃ yathākkamaṃ tīṇi payojanāni.

**Tamtaṃphalapaṭivedhoti** jāti-ādīnaṃ jarāmarañāditaṃtamphalāvagamo.  
**Anuvilokayatoti** purime vikappe vipassanānimittam anuvilokanaṃ, dutiye  
 desanānimittam. Kāmuṇāpādānabhūtā taṇhā manosañcetanāhārasaṅkhātassa  
 bhavassa, taṃsampayuttānaṃ, tannimittānaṃca sesāhārānaṃ visesapaccayo  
 hotīti āha “**āhāratāṇhādayo paccuppannaddhā**”ti. **Ādi**-saddena yāva  
 viññānaṃ gahetabbaṃ. **Āhāratāṇhādayoti** ettha  
 paccuppannakammavaṭṭapariyāpanne āhāre gahetvā addhayojanaṃ katvā  
 anāgatavipākavaṭṭapariyāpanne gahetvā yojetuṃ vuttam “**āhārā vā taṇhāya  
 pabhāvetabbā anāgato addhā**”ti. **Pabhāvetabbāti** āyatim uppādetabbā.  
**Yujjatīti** phalabhūte āhāre paccuppanne paccakkhato dassetvā “tamnidānaṃ  
 taṇham tassā nidānaṃ”ti-ādīnā phalaparamparāya, kāraṇaparamparāya ca  
 dassanaṃ tathābujjhanakānaṃ puggalānaṃ ajjhāsayaṇulomato,  
 dhammasabhāvāvilomanato ca yuttiyā saṅgayhati<sup>1</sup>. Yadi taṇhādayo atīto  
 addhā, taṇhāggahaṇeṇeva saṅkhārāvijjā gahitāti kimattham puna te gahitāti  
 āha “**saṅkhārāvijjā tatopi atītataro addhā vutto saṃsārassa  
 anādibhāvadassanattan**”ti<sup>2</sup>. **Atītanti** vā atītataśamaññena atītatarampi  
 saṅgahitaṃ daṭṭhabbaṃ.

**Punabbhavābhiniḥḥatti-āhārakā**ti punabbhavūpapattipaccayā. **Iti  
 vacanatoti** evaṃ vuttavacanasabbhāvato. Viññānāhāro tāva  
 punabbhavābhiniḥḥattiyā hetu, itare pana kathanti āha “**taṃsampayuttattā  
 -pa- kabalīkārāhārassā**”ti. Tassa āyatim punabbhavābhiniḥḥatti-āhārakā  
 cattāro āhārāti sambandho. Saddhādīnaṃ upanissayatā pariccagādi kāle,  
 rāgādīnaṃ gadhitassa bhojanādikāle. Tena yathākkamaṃ  
 kusalākusalakammaviññāyūhanaṃ dassitam. **Tasmāti** yasmā āyatim  
 punabbhavābhiniḥḥatti-āhārakā cattāro āhārā gayhanti, tasmā.

1. Saṅgacchati (Ka)

2. Ṭikāyaṃ pana aññathā pāṭho diṭṭho.

**Purimoyevatthoti** “āhāraṇhādayo paccuppannaddhā”ti-ādinā vutta-attho. **Atītetī** atīte addhani. **Tato paranti** tato atītaddhato param paccuppanne, anāgate ca addhani “saṅkhārapaccayā viññāṇan”ti-ādinā. **Paccakkhānanti** paccuppannabhavapariyāpannatāya paccakkhabhūtānam. **Paccuppannam** **hetuntī** etarahi vattamānam taṇhādikaṃ āhārādīnam hetum.

**Suttam āharati** “āsavasamudayā avijjāsamudayo”ti<sup>1</sup>. **Vatṭahetunoti** vipākavaṭṭahetuno, sakalavaṭṭahetuno vā. Akusalam hi kammam kammavaṭṭassa, kilesavaṭṭassa ca paccayo hotiyeva. **“Bhavataṇhāyapi hetubhūtā”**ti iminā kilesavaṭṭassāpi avijjāya paccayabhāvamāha. **Evañcetaṃ bhikkhave vuccati**”ti-ādinā vaṭṭasīsānampi avijjātaṇhānam sappaccayatādassanāpadesena sabbesampi saṅkhatadhammānam hetuphalaparamparāvicchedavuttiyā purimāya koṭiyā apaññāyanam vibhāveti.

**Avijjam taṇhā anuvattatīti** dukkhe taṇham abhibhavivā pavattiyā tato avijjāya balavabhāvamāha. Avijjābhibhūtā hi sattā satipi taṇhāparitassite ekantānattasaññitam attakilamathānuyogadukkhamanuyuñjanti. **Taṇham avijjā anuvattatīti** sukhe avijjam abhibhavivā pavattiyā tato taṇhāya balavabhāvamāha. Yadi pi sāvajjasukhānubhave balavatīyeva avijjā vijjamāna-ādīnavam paṭicchādenti tiṭṭhati, taṇhā pana tatopi balavataratāya satte vipulānattasaññite anariye sukhe niyojetīti avijjāya tadanuvattanam vuttam.

Āyatanachakkaṃ vā kāyoti sambandho. **Cakkhādinissaye sesadhammeti** cakkhādinissayabhūte, tappatibaddhe ca sasantānapariyāpanne dhamme. **Cakkhādinissite eva katvāti** cakkhādiggaḥṇeneva gahite katvā. **Cakkhādikāyanti** cakkhādidhammasamūham paresam pañcakkhandham. **Phassena phuṭṭhoti** ārammaṇam phusantena viya uppannena sukhavedaniyena, dukkhavedaniyena ca phassena phuṭṭho. Phasse hi tathā uppanne taṃsamaṅgīpuggalo phuṭṭhoti vohāro hotīti.

Yathā saḷāyatanāni phassassa visesapaccayo, evam vedanāyapīti dassento **“saḷāyatanānam vedanāya visesapaccayabhāvan”**ti āha.

---

1. Ma 1. 67 piṭṭhe.

**Tannissitanti** saḷāyatananissitaṃ. **Atītaddhāvijjātaṇhāmūlakoti** atītaddhabhūta-avijjātaṇhāmūlako. **Kāyassa bhedā kāyūpagoti** ubhayatthāpi kāyasaddena upādinnakkhandhapañcako gahito. Tadupagatā upapajjanam paṭisandhiggahaṇam. **Ubhayamūloti** avijjātaṇhāmūlo.

**Anabhisamayabhūtattāti** abhisamayassa paṭipakkhabhūtattā. **Avijjāyāti** avijjāya sati.

**Gahaṇanti**<sup>1</sup> gahetabbataṃ. **Tasmāti** yasmā sati saṅkhārasaddena āgatasāṅkhārattepi avijjāpaccayā saṅkhārā padhānatāya visum vuttā gobalībaddaṅāyena, tasmā. **Tattha vuttampīti** saṅkhārasaddena āgatasāṅkhāresu vuttampi abhisāṅkharaṇakasaṅkhāram **vajjetvā** aggahetvā itare saṅkhārā yojetabbā. Evañhi atthassa uddharaṇuddharitabbatādvayam asaṅkarato dassitaṃ hoti. “**Idha vaṇṇetabbabhāvenā**”ti iminā avijjāpaccayā saṅkhārānaṃ satipi saṅkhārasaddena āgatasāṅkhārabhāve yathāvuttameva padhānabhāvaṃ ulliṅgeti. “Avijjāpaccayā saṅkhārā”ti tadekadeso vuttoti sambandho. Imasmim atthavikappe saṅgaṇhanavasena saṅkhārasaddena āgatasāṅkhārehi saṅgahitāpi avijjāpaccayā saṅkhārā idha vaṇṇetabbabhāvena padhānāti visum gahitā, purimasmim te vajjetvāti ayaṃ viseso. Tenāha “**vaṇṇetabbasabbasaṅgahaṇavasena duvidhatā vuttā**”ti. Sāmaññato saṅgayhamānampi padhānabhāvajotanattham visum gayhati yathā taṃ “puññañāṇasambhārā”ti.

Yena kusalākusalahammā “vipākadhammā”ti vuccanti, taṃ āyūhanam, kim pana tanti? Anupacchinnataṇhāvijjāmāne santāne sabyāpāratā. Tenāha “**paṭisandhi -pa- āyūhanarasā**”ti. Cetanāpadhānattā pana tassa cetanākiccaṃ katvā vuttam. **Rāsikaraṇam, āyūhananti** ca rāsibhūtassa rūpārūpasāṅkhātassa phalassa nibbattanato vuttam. “**Anārammaṇatā abyākatatā**”ti idaṃ abyākatasseva anārammaṇattā abyākatasambandhinī anārammaṇatāti katvā vuttam. **Āyatanam, ghaṭananti** ca taṃtaṃdvārikadhammappavattanameva daṭṭhabbam.

Ananubodhādayo avijjāpadaniddese āgatā. Avijjāpadasambandhena **diṭṭhivippayuttāti** itthilinganiddeso. **Asaṅghānattāti** aviggahattā.

---

1. Saṅkhārasaddagahaṇenāti ṭikāyam, saṅkhārasaddena gahaṇanti pana mūlapāṭhena tattha bhavitabbam.



**Sokādīnaṃ sabbhāvāti** “jātipaccayā jarāmaraṇaṃ”ti anittāpetvā tadanantaraṃ sokādīnaṃpi vuttānaṃ vijjamaṇattā tesāṃ vasena **aṅgabahuttappasaṅge** paṭiccasamuppādaṅgānaṃ bahubhāve āpanne. **Dvādasevāti** kathaṃ dvādaseva, nanu sokādayopi dhammantarabhūtā paṭiccasamuppādadesanāyaṃ vuttāti? Saccāṃ vuttā, na pana aṅgantarabhāvenāti dassento “**na hī**”ti-ādimāha. Tattha **phalenāti** phalabhūtena jarāmaraṇaṅgasaṅgahitena sokādīnā. **Mūlaṅgaṃ dassetunti** imāya paṭiccasamuppādadesanāya mūlabhūtaṃ avijjāṅgaṃ socanādihi sammohāpattikathanena dassetuṃ **te** sokādayo **vuttā** bhavacakkassa avicchedadassanattamaṃ. Jarāmaraṇaṃ kāraṇaṃ etesanti jarāmaraṇakāraṇā, sokādayo, tabbhāvo **jarāmaraṇakāraṇatā**. Jarāmaraṇaṃ nimittaṃ etassāti **jarāmaraṇanimittaṃ**. **Taṃ tannimittānanti** ettha **tanti** suttāṃ. **Tannimittānaṃ** dukkhanimittānaṃ sokādīnaṃ. **Tato parāyāti** anāgate dutiyattabhāvato parāya tatiyattabhāvādīsu paṭisandhiyā. **Hetuhetubhūtāti** kāraṇassa kāraṇabhūtā. Paṭisandhiyā hi saṅkhārā kāraṇaṃ, tesāṃ avijjā. **Suttanti** “assutavā puthujjano”ti<sup>1</sup> imaṃ suttāṃ sandhāya vadati. **Avijjā sokādīnaṃ kāraṇanti dassitā** assutavatāya avijjābhivhavanadīpaniyā taduppattivacanato. “Na sokādīnaṃ bālassa jarāmaraṇanimittatāmattassa sādhaṃ suttāṃ”ti vuttamatthaṃ pākaṭaṃ kātuṃ “**na cā**”ti-ādi vuttāṃ. Tena na ca jarāmaraṇanimittameva dukkhaṃ dukkhaṃ, atha kho avijjānimittampettha vuttanayena yojetabbanti dasseti. Evaṃ jarāmaraṇena sokādīnaṃ ekasaṅkhepaṃ katvā dvādaseva paṭiccasamuppādaṅgāni veditabbāni.

Kasmā panettha jarāmaraṇantā eva desanā katā, kiṃ tato parā pavatti natthīti? No natthi, appahīnakilesassa hi kammato, viññāṇādīpariyosānabhūtāya ca cutiyā paṭisandhipātubhāvoti pavattitaduparamabhūtaṃ jarāmaraṇaṃ punabbhavābhiniḥḥattinimittaṃ. Taṃ pana kammūpapattibhavato jātiyā dassitattā “bhavapaccayā jāti”ti imināva pakāsītanti na puna vuccati, na tato paraṃ pavattiyā abhāvato. Ekakammanibbattassa ca

---

1. Ma 1. 1, 9; Saṃ 1. 319; Abhi 1. 208 piṭṭhesu.

santānassa jarāmarañam pariyoṣānam. Sati kilesavaṭṭe kammunā tato punabbhavūpapatti, asati pana tasmim̄ “esevanto dukkhassā”ti jarāmarañapariyoṣānāva desanā katā. Yasmā pana na amaraṇā jarā atthi sabbesam̄ uppattimantānam pākānantarabhedato, na cājaram̄ marañam̄ apākabhedābhāvā, tasmā tadubhaya<sup>1</sup> mekamaṅgam̄ katam̄, na nāmarūpaṃ viya ubhayaṭṭhāne ekajjham̄ uppattiyā, saḷāyatanam̄ viya vā āyatanabhāvena kiccasamatāya. Yā panāyam̄ oṣānam̄ gatā punabbhavābhiniḃbatti dīpitā, tāya “viññāṇapaccayā nāmarūpan”ti-ādi, kilesakammābhāve tadabhāvato “avijjāpaccayā saṅkhārā”ti evamādi eva vā atthato pakāsito hotīti vaṭṭattayassa anavaṭṭhānena paribbhamanam̄ dassitam̄ hoti. Atha vā jarāgahaṇena paripakkaparipakkatarādikkamena vattamānam̄ nāmarūpādi, sokādi ca gayhati, tathāssa paripākakālavattinī avijjā ca. Yathāha—

“Sa kho so bhikkhave kumāro vuddhimanvāya indriyānam̄ paripākamanvāya pañcahi kāmagaṇehi samappito samaṅgībhūto paricāreti cakkhuviññeyyehi rūpehi -pa- kāyaviññeyyehi phoṭṭhabbehi -pa- rajanīyehi. So cakkhunā rūpaṃ disvā piyarūpe rūpe sārājati, appiyarūpe rūpe byāpajati, anupaṭṭhitakāyasati ca viharati parittacetaso, tañca cetovimuttim̄ paññāvimuttim̄ yathābhūtam̄ nappajānāti, yatthassa te pāpakā akusalā dhammā aparisesā nirujjhantī”ti-ādi<sup>2</sup>.

Ettha hi paripakkindriyassa chasu dvāresu sarāgādiggahaṇena tadavinābhāvitāya vimuttiyā appajānane ca sokādīnam̄ paccayabhūtā avijjā pakāsitā. Apica “piyappabhavā sokaparidevadukkhadomanassupāyāsā”ti vacanato kāmāsavabhavāsavehi, “tassa ‘aham̄ rūpaṃ, mama rūpanti pariyoṭṭhaṭṭhāyino -pa- rūpavipariṇāmaññathābhāvā uppajjanti sokaparidevadukkhadomanassupāyāsā”ti<sup>3</sup> vacanato diṭṭhāsavato,

---

1. Dubhayaṃ (Ka)

2. Ma 1. 333 piṭṭhe.

3. Sam 2. 3 piṭṭhe.

“Assutavā”ti-ādivacanato avijjāsavato sokādīnaṃ pavatti dīpitāti tesam hetutāya taggahaṇena gahitā āsavā. Tesam sayañca jarāsabhāvatāya jarāgahaṇena gayhanti, tato ca “āsavasamudayā avijjāsamudayo”ti vacanato āsavanimittāya ca avijjāya jarāgahaṇena gahaṇaṃ. Tato ca “avijjāpaccayā saṅkhārā”ti āvaṭṭati bhavacakkaṃ. Apica “saṅkhārapaccayā viññāṇaṃ”ti vatvā “bhavapaccayā jāti”ti vadantenapi bhavacakkassa anavaṭṭhānato paribbhamanaṃ dassitaṃ. Ettha hi viññāṇena avijjānivutassa punabbhavo dassito, jātiyā taṇhāya sampayuttassa, ubhayattha ubhinnaṃ anuvattamānattāti avijjātaṇhānimittaṃ bhavacakkaṃ anavaṭṭhānato paribbhamatīti ayamattho dīpitoti jarāmarāṇantāpi desanā na tato paraṃ pavattiyā abhāvaṃ sūceti atadattattā, na ca paccayantaradassanattameva puna vacananti sakkā viññātum ekatreva tadubhayadesanāya tassa siddhattā. Tathā yaṃ kammaṃ avijjāhetukaṃ, taṃ taṇhāhetukampi. Yaṃ taṇhāhetukaṃ, taṃ avijjāhetukampi veditabbaṃ. Kasmā? Dvinnam bhavamūlānaṃ aññamaññāviraḥato. Yathā hi taṇhāpaccayā kāmupādānahetukaṃ kammabhavaṣaṅkhāraṃ vadanto na vinā bhavataṇhāya avijjā saṅkhārānaṃ paccayoti dasseti. Tathā tameva avijjāpaccayaṃ desento na antarena avijjāya bhavataṇhā kammabhavassa paccayoti. Tato ca pubbe pavattā avijjādipaccayā saṅkhārādayo, taṇhupādānadipaccayā bhavādayo ca, tathā taṇhāhetu-upādānapaccayā bhavo, avijjāpaccayā saṅkhārā, bhavapaccayā jāti, saṅkhārapaccayā viññāṇaṃ, jātipaccayā jarāmarāṇaṃ, viññāṇādipaccayā nāmarūpādīti evametesam āngānaṃ pubbāparasambandho dassito hotīti veditabbaṃ.

Uddesavāraṇṇanā niṭṭhitā.

### Avijjāpadaniddesavaṇṇanā

226. **Pitā kathiyatīti** asuko asukassa pitāti pitubhāvena kathiyati. Kathiyamāno ca asandehattham aññehi mittadattehi visesetvā kathiyatīti tam dassento āha “**dīgho -pa- datto**”ti.

**Yāthāvoti** aviparīto. **Kiccajātīti** paṭicchādanakiccato, uppajjanaṭṭhānato ca.

**Gahaṇakāraṇavasenāti** gahaṇassa kāraṇabhāvavasena. Aññasetādīnam nivattakānīti padaṃ ānetvā sambandho.

**Chādentiyāti** chādanākārena pavattantiyā. Tathā pavattanahetu **taṃsampayuttā** avijjāsampayuttā **dukkhārammaṇā** hontī.

**Tasmāti** sabhāvato agambhīrattā tesam duddasabhāvakaraṇī tadārammaṇatā avijjā uppajjati. **Itaresanti** nirodhamaggānam. Samānepi paṇīta-asamkilesikādibhāve sappaccayato appaccayassa visesaṃ dassetuṃ “**maggassā**”ti-ādi vuttaṃ.

Avijjāpadaniddesavaṇṇanā niṭṭhitā.

### Saṅkhārapadaniddesavaṇṇanā

“**Sodheti apuññaphalato**”ti iminā puññassa vipākadukkhavivittataṃ āha, “**dukkhato**”ti iminā cetodukkhavivittataṃ, “**saṃkilesato**”ti iminā kilesadukkhavivittataṃ. “**Apuññaphalato**”ti vā iminā puññassa āyatim hitataṃ dasseti. “**Dukkhasamkilesato**”ti iminā pavattihitataṃ, pavattisukhataṅca dasseti. **Taṃnipphādanenāti** hitasukhanibbattanena. Pujjabhavanibbattako **pujjanibbattako**.

“Evamidam puññam pavaḍḍhatī”ti-ādīsu puññaphalampi puññanti vuccatīti āha “**puññupaganti bhavasampattupagan**”ti.

**Ādibhāvanāti** “pathavī pathavī”ti-ādinā kaṣiṇesu pavattabhāvanā. **Pathavī pathavīti** vā ettha **īti**-saddo ādi-attho, pakārattho vā.

Tena itarakasiṇānaṃ gahaṇaṃ. **Ādibhāvanā**ti ādibhūtā bhāvanā. Sā hi “parikammaṃ”ti vuccati. **Maṅḍalakaraṇaṃ** kasiṇamaṅḍalakaraṇaṃ.

**Dānavasenā**ti deyyadhammapariccāgavasena. **Cittacetāsikā dhammā dānaṃ** diyyati etenāti. **Tatthā**ti tesu cittacetāsikesu. **Dānaṃ ārabbhā**ti tehi nibbattiyamānaṃ pariccāgaṃ uddissa. Yathā vā so nippajjati, tathā ṭhapetvā. **Adhikiccā**ti tasseva vevacanaṃ. Yathā vā sampayuttehi nibbattiyamānā dānakiriyā nipphattivasena adhikataṃ pāpuṇāti, tathā katvā. Cetanāvaseneva hi dānādikammaṇipphatti. **Itaresū**ti “sīlaṃ ārabbhā”ti-ādīsu.

**Asarikkhakampī**ti attanā asadisampi kaṭattārūpanti sambandho. **Vināpi** catutthajjhānavipākena. **Rūpaṇhāsāṅkhātassā**ti “rūpaṇhā”ti ettha vuttarūpaṇhamāha. **Guṇjanti** guṇjaphalaparimāṇaṃ dhāraṇīyavatthuraṃ. Tathā **taṇḍula**.

“**Vacavisesamattamevā**”ti atthavisesābhāvo vuttoti atthavisesābhāvamāha “**kāyadvāre pavatti eva hi ādānādīpāpanā**”ti. **Purimenā**ti “kāyadvāre pavattā”ti iminā. Tañhi pavattimattakathanato dvārūpalakkhaṇaṃ hoti. **Pacchimenā**ti “ādānā”divacanaṃ.

**Kāyavacīsaṅkhārāggaṇeti** uddesaṃ sandhāyāha. **Kāyavacīsaṅcetanāggaṇeti** niddesaṃ. **Viññāṇassa**ti paṭisandhiviññāṇassa. Sahajātassa, pana anantarassa ca paccayo hotiyeva. “**Kusalā vipākadhammā cā**”ti idaṃ sekkhaputhujjanasantāne abhiññācetanā idhādhippetā na itarāti katvā vuttaṃ. Tena yathāvutta-abhiññācetanāpi paṭisandhiviññāṇassa paccayo siyā kusalasabhāvattā, vipākadhammattā vā tadaññakusalākusalacetanā viyāti dasseti. Tayidaṃ lokuttarakusalāya anekantikaṃ. Na hi sā paṭisandhiviññāṇassa paccayo. Atha vipākadāyinīti vucceyya, evampi ahosikammaṇa anekantikaṃ. Na hi tassā vipākuppādanāṃ atthīti āha “**na vipākuppādanena kusalatā vipākadhammatā cā**”ti. Kevalañhiyā aññesaṃ vipākadhammānaṃ sabyāpārā sa-ussāhā pavatti, tadākārāvassā appahīnakilese santāne pavattīti vipākadhammatā, anavajjaṭṭhena kusalatā ca vuttā. Evampi yadi vipākadhammā abhiññācetanā, kathaṃ avipākāti? Asambhavatoti

taṃ asambhavaṃ dassetuṃ “**sā panā**”ti-ādi vuttaṃ. Abhiññācetanā hi yadi vipākaṃ uppādeyya, sabhūmikaṃ vā uppādeyya aññabhūmikaṃ vā. Tattha aññabhūmikkassa tāva uppādanaṃ ayuttaṃ paccayābhāvato, tathā adassanato ca. Tenāha “**na hī**”ti-ādi. Sabhūmikaṃ navattabbārammaṇaṃ vā uppādeyya parittādi-ārammaṇaṃ vā, tesu attano kammasamānārammaṇatāya rūpāvacaravipākassa dassitattā, parittādi-ārammaṇattā ca abhiññācetanāya navattabbārammaṇaṃ na uppādeyya. Tathā ekantanavattabbārammaṇattā rūpāvacaravipākassa parittādi-ārammaṇaṃ na uppādeyyāti ayamasambhavo. Tenāha “**attanā sadisārammaṇañcā**”ti-ādi. Tattha **tiṭṭhānikanti** paṭisandhibhavaṅgacutivasena ṭhānattayavantaṃ. “Pathavīkaṣiṇaṃ āpokasiṇaṃ”ti-ādinā kusalena abhinnaṃ katvā vipākassa ārammaṇaṃ desitanti āha “**cittuppādakaṇḍe -pa- vuttattā**”ti. “Rūpāvacaratikacatukkajjhānāni kusalato ca vipākato ca kiriyato ca catutthassa jhānassa vipāko ākāśānañcāyatanāṃ ākiñcaññāyatanāṃ ime dhammā navattabbā “parittārammaṇā”tipi ‘mahaggatārammaṇā’tipi ‘appamāṇārammaṇā’tipi”ti vacanato rūpāvacaravipāko ekantanavattabbārammaṇoti āha “**na ca rūpāvacaravipāko parittādi-ārammaṇo atthī**”ti. Svāyamasambhavo parittādi-ārammaṇāya abhiññācetanāya vipākābhāvaṃ sādheti, na navattabbārammaṇāya. Navattabbārammaṇāpi hi sā atthīti na byāpīti vipākānuppādane tassā aññaṃ kāraṇaṃ dassetuṃ “**kaṣiṇesu cā**”ti-ādimāha. Samādhivijambhanabhūtā abhiññā samādhissa ānisaṃsamattanti “**samādhiphalasadisā**”ti vuttaṃ. Tassa tassa adhiṭṭhānavikubbanadibbasaddasavanādikassa yadicchitassa kiccassa nipphādanamattaṃ pana abhiññācetanā, na kālantaraphalā, diṭṭhadhammavedanīyaṃ viya nāpi vipākaphalā, atha kho yathāvutta-ānisaṃsaphalā daṭṭhabbā.

Keci pana “samānabhūmikato āsevanalābhena balavantāni jhānānīti tāni vipākaṃ denti samāpattibhāvato, abhiññā pana satipi jhānabhāve tadabhāvato tasmim tasmim ārammaṇe āgantukāvāti dubbalā, tasmā vipākaṃ na detī”ti vadanti. Taṃ akāraṇaṃ punappunaṃ parikkammavasena abhiññāyapi vasībhāvasabbhāvato. Yaṃ pana vadanti “pādakajjhāne attanā samānasabhāvehi javanehi laddhāsevane sammadeva

vasībhāvappatte parisuddhatādi-aṭṭhaṅgasamannāgamena sātisaye jāte abhiññā nibbattanti, tāsāṅca catutthajjhānikattā catutthajjhānabhūmiko eva vipāko nibbatteyya, so ca yathāvuttaguṇena balavatā pādakajjhāneneva katokāsenā sijjhatīti anokāsātāya abhiññā na vipākaṃ detī”ti. Tampi akāraṇaṃ avipākabhāvato tāsāṃ. Sati hi vipākadāyibhāve vipākassa anokāsacodanā yuttā, avipākatā ca tāsāṃ vuttanayā eva.

**Na hotīti** viññāṇassa paccayo na hotīti. Uddhaccacetanāpi abhiññācetanāto nibbisesena vuttāti maññamāno “vipāke”ti ca vacanaṃ na vipākārahatāmattavācako, atha kho vipākasabbhāvavācako ti āha “**vicāretabban**”ti. Tathā ca vuttaṃ “na hi ‘vipāke’ti vacanaṃ vipākadhammavacanaṃ viya vipākārahataṃ vadatī”ti. Tattha yaṃ vicāretabbaṃ, taṃ heṭṭhā vuttameva. Idaṃ panettha sanniṭṭhānaṃ—yasmā uddhaccetanā pavattivipākameva deti, na paṭisandhivipākaṃ, tasmā tassā pavattivipākassa vasena vibhaṅge vipāko uddhaṭo. Ubhayavipākadāyikāya pana cetanāya nānākkhaṇikakammappaccayo vuccatīti tadabhāvato paṭṭhāne tassā so na vutto. Yaṃ pana aṭṭhakathāyaṃ “viññāṇassa paccayabhāve apanetabbā”ti<sup>1</sup> vuttaṃ, taṃ paṭisandhiviññāṇameva sandhāya vuttaṃ. “**Evaṃ uddhaccacetanāpi na hotī**”ti idampi viññāṇassa paccayatābhāvamattaṃ gahetvā vuttaṃ. Evañhettha aññamaññaṃ pāḷiyā, aṭṭhakathāya ca avirodho daṭṭhabbo.

**Etthāti** uddhaccacetanāya vipākadāne. **Amataggapatheti** evaṃnāmake pakaraṇe. “Puthujjanasantāne akusalā dassanena pahātabbā, sekkhasantāne bhāvanāya pahātabbā”ti imassa atthassa vuttattā “**puthujjanānaṃ panā**”ti-ādi vuttaṃ. “**Na vuccantī**”ti iminā puthujjane pavattabahiddhāsāmyojanādīnaṃ bhāvanāya pahātabbapariyāyābhāvaṃ dasseti. “**Yadi vucceyyun**”ti-ādīnā tamevatthaṃ yuttito ca āgamato ca vibhāveti. Tattha **kesaṅcīti** sakabhaṅge chandarāgādīnaṃ. **Kecīti** sakkāyadīṭṭhi-ādayo. **Kadācīti** atītādike kismiñci kāle.

---

1. Abhi-Ṭṭha 2. 137 piṭṭhe.

**Cattattāti**-ādi pariyāyavacanāṃ. **Upanissāyāti** upanissayapaccaye katvā.

**Itaresanti** nadassanenapahātabbānaṃ. Na ca na hontīti sambandho. **Evañca katvāti** yathāvuttapāḷiyaṃ uddhaccaggahaṇena uddhaccasahagatacittuppādo gahito, na yattha katthaci uddhaccanti evamatthe sati. **Tanti** diṭṭhim. “Atītādibhāvena navattabbatte”ti kasmā vuttam, nanu anāgatā eva pahātabbāti? Na, uppajjanārahā nippariyāyena anāgatā nāma, pahātabbā pana na uppajjanārahāti tesam atītādibhāvena navattabbatā vuttā. **Dassanam apekkhitvāti** bhāvitam dassanamaggaṃ upanidhāya. **Sahāyavirahāti** dassanapahātabbasankhātasahakārikāraṇābhāvato. **Vipākaṃ na janayantīti** sakalakilesaparikkhaye viya ekaccaparikkhaye pi tannimittam tam ekaccam kammaṃ na vipaccatīti adhippāyo. **Vipāko vibhaṅge vuttoti** paṭisandhipavattibhedam duvidham pi vipākaṃ sandhāyāha.

**Akusalānanti** yathāvuttavisesānaṃ puthujjanasantāne akusalānaṃ. **Appahātabbānanti** appahātabbasabhāvānaṃ kusalādīnaṃ. **Appahātabbaviruddhasabhāvātā** sāvajjatā. “**Evampī**”ti-ādi dosantaradassanaṃ. Tena yadipi tesam akusalānaṃ imasmim tike tatiyapadasaṅgaho na siyā, navattabbatā pana āpajjatīti dīpeti. Sabbena sabbam dhammavasena asaṅgahitassa tikadukesu navattabbatāpattīti āha “**nāpajjati**”ti. Idāni tam navattabbatānāpajjanaṃ “cittuppādakaṇḍe”ti-ādinaṃ kāraṇato, nidassanato ca vibhāveti. **Yatthāti** yasmim tike. **Niyogatoti** niyamato ekantato. **Tesanti** padattayasaṅgahitadhammānaṃ. **Yathā vuttapadesu viyāti** yathāvuttetu paḥamādīsu tīsu padesu. Yathā bhinditabbā cittuppādā, itare ca yathārahaṃ rāsittayavasena bhinditvā bhajāpitā tamtamkoṭṭhāsato katā, evam. **Tatthāpīti** catutthakoṭṭhāsepi. **Bhajāpetabbeti** navattabbabhāvam bhajāpetabbe. **Tadabhāvāti** tassa catutthakoṭṭhāsassa abhāvā. **Tathāti** navattabbabhāvena.

Uppannattike atītā, idha yathāvutta-akusalā na vuttā, apekkhitabbabhāvanārahitāpi tamabhāvanativattanato tathā vuccantīti navattabbatāpattidosam pariharanto tassa udāharaṇam tāva dassetuṃ



“**atha vā yathā sappatighehi**”ti-ādimāha. Taṁsabhāvo ceththa sāvajjatāvisiṭṭho dassanapahātabbabhāvābhāvo. “**Evañca sati**”ti-ādinā imasmim pakkhe laddhaguṇam dasseti. **Bhāvanāya pahātabbānanti** pariyāyena, nipariyāyena ca bhāvanāya pahātabbānam, tattha purimānam amuchyasabhāvattā, pacchimānam avipākattā nānākkhaṇikakammapaccayatā na vuttāti adhippāyo. Yathā ca bhāvanāya pahātabbānam nānākkhaṇikakammapaccayabhāvo natthi, evaṁ dassanena pahātabbānam vasena tesam paccayalābhopi natthīti dassento “**na ca -pa- vuttā**”ti vatvā tattha kāraṇamāha “**ye hi -pa- pavattanti**”ti. Tattha **na te dassanato uddham pavattanti**ti ye dassanena pahātabbapaccayā kilesā, te dassanena pahātabbapakkhikā evāti tesam bhāvanāya pahātabbapariyāyo eva natthi, katham tesam vasena dassanena pahātabbā bhāvanāya pahātabbānam kenaci paccayena paccayoti vucceyyāti attho. Atha vā ye puthujjanasantāne na dassanena pahātabbā, na te paramatthato bhāvanāya pahātabbā. Ye pana te sekkhasantāne, na tesam paccayabhūtā dassanena pahātabbā atthīti evampi dassanena pahātabbā bhāvanāya pahātabbānam kenaci paccayena paccayoti na vuttāti veditabbam. Yadi dassanenapahātabbapaccayā kilesā dassanapakkhikā, tappaccayam uddaccasahagatam dassanena pahātabbam siyāti katham tassa ekantabhāvanāya pahātabbatā vuttāti codanam sandhāyāha “**dassanena pahātabbapaccayassā**”ti-ādi. **Tasmāti** yasmā sarāgavītarāgasantānesu sahāyavekallena kammaṣṣa vipākāvipākadhammatā viya puthujjanasekkhasantānesu uddhaccasahagatassa vuttanayena savipākāvipākatā siddhā, tasmā. **Tassati** uddhaccasahagatassa. **Tādisassevāti** uddhaccasahagatabhāvena ekasabhāvassa.

Ettha ca yaṁ “na bhāvanāya pahātabbampi atthi uddhaccasahagatan”ti-ādi amataggapathe vuttam, taṁ akāraṇam, kasmā? Tassa ekantena bhāvanāya pahātabbatā. Yathāha “katame dhammā bhāvanāya pahātabbā? Uddhaccasahagato cittuppādo”ti<sup>1</sup>. Yadi hi uddhaccasahagatam na bhāvanāya pahātabbampi abhavissa, yathā atītārammaṇattike “niyogā anāgatārammaṇā

---

1. Abhi 1. 293 piṭṭhe.

natthī”ti vatvā “kāmāvacarakusalassa vipākato dasa cittuppādā”ti-ādinā puna vibhajitvā vuttaṃ, evamidhāpi “katame dhammā bhāvanāya pahātabbā? Niyogā bhāvanāya pahātabbā natthī”ti vatvā “uddhaccasahagato cittuppādo siyā bhāvanāya pahātabbo, siyā na vattabbo ‘dassanena pahātabbo’tipi ‘bhāvanāya pahātabbo’tipī”ti-ādi vattabbaṃ siyā, na ca tathā vuttaṃ. Yā ca tamatthaṃ paṭipādentena “yadi vucceyyun”ti-ādinā yutti vuttā, sāpi ayutti. Kasmā? Dassanena pahātabbārammaṇānaṃ rāgadiṭṭhivicikicchuddhaccānaṃ dassanena pahātabbabbhāvasseva icchitattā.

Yañca “uddhaccaṃ uppajjati”ti uddhaccasahagatacittuppādo vuttoti dassetuṃ adhipatipaccayaniddese uddhaccassa anuddharaṇaṃ kāraṇabhāvena vuttaṃ, tampi akāraṇaṃ aññathāpi sāvasesapāṭhadassanato. Tathā hi “atīto dhammo paccuppanassa dhammassa, anāgato dhammo paccuppanassa dhammassa ārammaṇapaccayena paccayo”ti<sup>1</sup> etesaṃ vibhaṅge cetopariyaññāggahaṇaṃ katvā “paccuppano dhammo paccuppanassa dhammassā”ti<sup>1</sup> imassa vibhaṅge labbhamānampi cetopariyaññāggahaṇaṃ na kataṃ.

Sahāyabhāvo ca dassanena pahātabbānaṃ bhāvanāya pahātabbassa vipākadānaṃ pati vicāretabbo. Kiṃ avijjādi viya dānādīnaṃ uppattiyā eva vikuppādanasamatthatāpādanena dassanena pahātabbā bhāvanāya pahātabbānaṃ sahaṅgikāraṇaṃ honti, udāhu kilesa viya kammaṃsa paṭisandhidāne satīti<sup>2</sup>, kiñcettha—yadi purimanayo, sotāpannādisekkkhasantāne bhāvanāya pahātabbassa kiriyabhāvo āpajjati, sahaṅgavekallena avipākasabhāvatāya āpāditattā khīnataṇhāvijjāmāne santāne dānādi viya. Atha dutiyo, bhāvanāya pahātabbābhīmatassāpi dassanena pahātabbābhāvo āpajjati, paṭisandhidāne sati apāyagamanīyasabhāvanativattanato. Yaṃ panettha vattabbaṃ, taṃ heṭṭhā vuttameva, tasmā pāḷiyā,

1. Abhi 9. 412 piṭṭhe Paṭṭhāne.

2. Paṭisandhidānaṃ patīti (?)

aṭṭhakathāya ca avirujjhanavasenettha atthavinicchayo vuttanayeneva veditabbo.

**Sāti** uddhaccacetanā. **Viññāṇapaccayabhāveti** sampuṇṇavipākaviññāṇapaccayabhāve. **Kāraṇaṃ dassentoti** avikalaphaluppādanādhikāre tadabhāvato yadipi uddhaccacetanā viññāṇassa paccayabhāve apanetabbā, avijjāya pana paccayuppannabhāve gahetabbāti imaṃ kāraṇaṃ dassento. **Sabbāpīti** vīsati. Tenāha “**ekavīsati vattabban**”ti. **Tanti** yena kāraṇena saṅkhāraggahaṇena abhiññācetanāya aggahaṇaṃ, taṃ kāraṇaṃ. **Itarāvacaṇassāpīti** uddhaccacetanāvacaṇassāpi. Kim pana taṃ? Viññāṇassa paccayabhāvābhāvo eva. **Bhedābhāvāti** kāyavacīsaṅkhāravasena vibhāgābhāvato. **Samyogoti** tikantarapadavasena saṃyojanaṃ, tathā saṅgahoti attho.

Sukhasaññāya gahaṇaṃ assādananti adhippāyenāha “**sukhasaññāya -pa-dasseti**”ti. “**Sukhasaññāyā**”ti ca idaṃ karaṇatthe karaṇavacaṇaṃ. Vipallāso hi dukkhe sukhasaññā. Yaṃ pana aṭṭhakathāyaṃ “aññāṇenā”ti vuttaṃ, taṃ hetumhi karaṇavacaṇaṃ vipallāsassādanānaṃ avijjāya hetubhāvadassanato. “Ratho setaparikkhāro”ti-ādīsu<sup>1</sup> parivāratthopi parikkhārasaddo hotīti vuttaṃ “**taṇhāya parivāre**”ti. **Taṇhāparivāreti** ca taṇhāya kiccāsādhanaṃ saṅkhārānaṃ saḥkārikāraṇabhāvaṃ sandhāya vuttaṃ. Parikkhāraṭṭho saṅkhāraṭṭho viya bhūsaṇaṭṭho hotīti dassento “**saṅkhate alaṅkate**”ti āha. **Parikkharoti** yathā phaladānasamatthā honti, tathā saṅkharoti. **Amaṇaṭṭhāti** amatatthā, nibbānaṭṭhāti attho. **Dukkarakiriyāti** pañcātapatappanādidukkaracariyā. Devabhāvāya tapo **devabhāvattamaṃ tapo**. Māretīti **maro** hetu-atthamaṃ antonītaṃ katvā. Amaṅgalampi maṅgalapariyāyena voharanti maṅgalikāti vuttaṃ “**ditṭhe aditṭhasaddo viyā**”ti yathā “asive sivā”ti.

Papātaṃ patanadukkhahasadisanti katvā vuttaṃ “**jāti-ādipapāta dukkhaṃ**”ti. Indaduddabrahmakūṭhasaññītapabbatasikharappapāto **marupapāto**. Taṃ puññaphalaṃ attho payojanaṃ etassāti **tadattho**.

1. Saṃ 3. 5 piṭṭhe.

**Paribbājikāya** taruṇiyā. **Asavaso** aserivihārī. Kilesāsucipaggharaṇena paṇḍitehi **jigucchaniyaṃ**. Rāgādipariḷāhena, kaṭukavipākatāya ca **dukkhaṃ**. **Ārabhati** karoti. Sabhayassāpi pisācanagarassa kāmagaṇasamiddhiyā sukhavipallāsahetubhāvo viyāti yojanā. Bhinnajātiyena avomissatā **nirantaratā**. Jarāya, maraṇena ca aññathattaṃ **vipariṇāmo**.

“Na tāvāhaṃ pāpima parinibbāyissāmī”<sup>1</sup>ti vacanato “tāta ehi, tāva idaṃ rajjaṃ paṭipajjāhī”ti-ādīsu yadipi parimāṇa niyamana kama padapūraṇamattādīsupi **tāva**-saddo dissati, idha pana vakkhamānattāpekkho adhippetoti vuttaṃ “**tāvāti vattabbantarāpekkho nipāto**”ti. **Avijjāpaccayā pana -pa- dassetī**ti pubbenāparaṃ aṭṭhakathāyaṃ avirujjhanamāha.

**Rāgādi-assādanakālesūti** rāgādīnaṃ assādanakālesu.  
 “Rāgādīṭṭhisampayuttāyā”ti ettha rāgasampayuttāya tāva avijjāya yojanā hotu rāgassa assādanabhāvato, diṭṭhisampayuttāya pana kathanti āha “**tadvippayuttā ca diṭṭhī -pa- veditabbā**”ti. **Tāmsampayuttasaṅkhārassāti** rāgādisampayuttasaṅkhārassa. **Avijjārammaṇādītanti** avijjāya ārammaṇādītaṃ. **Ādi**-saddena ārammaṇādhipati-ārammaṇūpanissayapakatūpanissaye, anantarādike ca paccaye saṅgaṇhāti. **Anavijjārammaṇassāti** na-avijjārammaṇassa avijjāṃ anārabba pavattassa. **Ārammaṇādhipati-anantarādipaccayavacanesūti** ārammaṇādhipati-ārammaṇūpanissayapaccayavacanesu avuttassa anavijjārammaṇassa, anantarādipaccayavacanesu avuttassa paṭhamajavanassa, dvīsipi vuttassa avijjārammaṇassa dutiyādivanassāti yojetabbaṃ. Anantarapaccayalābhino anantarādīnā, sahaḷātassa hetu-ādīnā, asahaḷātassa upanissayādīnā saṅkhārassa avijjā paccayo hotīti ayamatto “**yaṃ kiñci**”ti-ādīnā dassitoti veditabbaṃ. **Samatikkamabhavapattanāvasenāti** avijjāsamatikkamatthāya arūpāvacarajjhānāni uppādentassa, avijjāsammūḷhattā arūpabhavasampattiyo patthetvā tāneva jhānāni nibbattentassāti puññābhisāṅkhāre vuttana nayena, vuttanayānusārenāti attho.

---

1. Dī 2. 82, 88, 89 piṭṭhesu.

**Ekakāraṇavādo āpajjati** yathā pakati-issarapajāpatipurisakālādivādā. Ekasmimīveva lokassa kāraṇabhūte sati tato sakalāya pavattiyā anavasesato, sabbadā ca pavattitabbaṃ apekkhitabbassa kāraṇantarassa abhāvato. Na cetam atthi kameneva pavattiyā dassanato. Kāraṇantarāpekkhatāya pana ekakāraṇavādo apahato siyā ekassa ca anekasabhāvatābhāvā. Yattakā tato nibbattanti, sabbehi tehi samānasabhāveheva bhavitabbaṃ, na visadisehi, itarathā tassa ekabhāvo eva na siyāti imamatthamāha “**sabbassa -pa- pattito cā**”ti. **Pārisesenā**ti ekato ekaṃ, ekato anekaṃ, anekato ekanti imesu **tīsu pakāresu avijjamānesu** anupalabbhamānesu pārisesañāyena. Anekato anekanti ekasmim **catutthe eva ca** pakāre **vijjamāne**. Yadidaṃ “avijjāpaccayā saṅkhārā, phassapaccayā vedanā”ti-ādinā ekahetuphaladīpanaṃ, taṃ ettha desanāvīlāsena, vīneyyajjhāsayasena vā dhammānaṃ padhānapākaṭṭhāraṇabhāvavibhāvanattanti ekahetuphaladīpanaṃ **na nupapajjati** upapajjatiyevāti dasseti “**yasmā**”ti-ādinā.

### **Yathāphassanti**

sukhavedanīyādicakkhusamphassāditaṃtamphassānurūpanti vuttaṃ hotīti dassento “**sukhavedanīyan**”ti-ādiṃ vatvā “**vedanāvavattihānato**”ti padassa atthaṃ dassetuṃ “**samānesū**”ti-ādi vuttaṃ. Tattha **samānesū**ti avisiṭṭhesu. **Phassavasenā**ti sukhavedanīyādiphassavasena. **Vipariyāyābhāvato**ti byattayābhāvato. Na hi kadāci sukhavedanīyaṃ phassaṃ paṭicca dukkhavedanā, dukkhādivedanīyaṃ vā phassaṃ paṭicca sukhavedanā uppajjati. **Sukhādicakkhusamphassajādīnanti** sukhādīnaṃ, cakkhusamphassajādīnaṃca vedanānaṃ. **Oḷārikasukhumādīti ādi**-saddena hīnapañīṭādisaṅgaho daṭṭhabbo. Tattha yaṃ upādāya yā vedanā “oḷārikā, hīnā”ti vā vuccati, na taṃyeva upādāya tassā kadācīpi sukhumatā, paṇītatā vā atthīti vuttaṃ “**oḷārikasukhumādisaṅkarābhāvato**”ti.

**Yathāvuttasamphassassā**ti sukhavedanīyādiphassassa.

Sukhavedanīyaphassatoyeva sukhavedanā, na itaraphassato.

Sukhavedanīyaphassato sukhavedanāva, na itaravedanā. Tathā sesesupīti ubhayapadaniyamavasena yathāphassaṃ vedanāvavattihānaṃ, yathāvedanaṃ phassavavattihānanti padadvayena kāraṇantarāsammissatā phalassa,

phalantarāsammissatā ca kāraṇassa dassitā paṭhamapakkhe  
 asaṅkiṇṇatāvavattḥānanti katvā. Dutiyapakkhe pana paccayabhedabhinnena  
 kāraṇavisesena phalaviseso, phalavisesena ca kāraṇaviseso nicchīyatīti  
 ayamattho dassito sanniṭṭhānaṃ vavattḥānanti katvā. Purimasmiṅca pakkhe  
 dhammānaṃ asaṅkarato vavattḥānaṃ vuttam, dutiyasmiṅca  
 yathāvavattḥitabhāvajānananti ayametesam viseso. **Utu-ādayoti ādi-**saddena  
 cittavisamācārā pittavātādayopi saṅgayhanti. Ekasmim dose kupite itarepi  
 khobham gacchanti. Santesupi tesu **semhapaṭikārena rogavūpasamato** semho  
 pākaṭoti attho.

“Bhavo”ti vuttānaṃ saṅkhārānaṃ kāraṇassa pakāraṇaṃ, kāraṇameva vā  
 taṅhāti āha **“taṅhāya saṅkhārakāraṇabhāvassa vuttattā”**ti. **Tassāpīti**  
 taṅhāyapi. Taṅhā hi kāmāsavo, bhavāsavo ca. Kāmāsavabhavāsavā  
 kāmupādānaṃ, diṭṭhāsavo itarūpādānanti āha **“caturupādānabhūtā**  
**kāmabhavadiṭṭhāsavā”**ti. Te ca “upādānapaccayā bhavo”ti vacanato  
 upādānaṅca “taṅhāpaccayā upādānaṃ”ti vacanato taṅhā ca saṅkhārassa  
 kāraṇanti pākaṭā. Anassādanīyesu anekādīnavavokiṇṇesu saṅkhāresu  
 assādānupassanā avijjāya vinā na hotīti dassento āha **“assādānupassino -pa-**  
**dassitā hoti”**ti. **Khīṇāsavassa saṅkhārābhāvato**ti byatirekenapi avijjāya  
 saṅkhārakāraṇabhāvam vibhāveti. Ekantena hi khīṇāsavova viddasu. Etena  
 bālānaṃ eva sambhavato avijjāya asādhāraṇatā vuttāti dasseti.  
 Vatthārammaṇādīni hi itaresampi sādāhāraṇāni.  
 Vatthārammaṇataṅhupādānādīni viya avijjāpi puññābhisāṅkhārādīnaṃ  
 sādāhāraṇakāraṇanti codanaṃ manasi katvā āha **“puññābhavādī”**ti-ādi. Tattha  
 ādi-saddena apuññāneñjabhavā gahetabbā. **Puññābhavoti**  
 puññābhisāṅkhārahētuko upapattibhavo. Esa nayo sesesu. Ettha ca  
 kiccakaraṇaṭṭhānabhedena kiccavatī avijjā bhinditvā dassitā. Na hi  
 yadavatthā avijjā puññābhisāṅkhārānaṃ upanissayo, tadavatthā eva itaresam  
 upanissayoti sakkā viññātum. Ettha ca **bhavādīnavappaṭicchādananti** atthato  
 puññābhisāṅkhārādīnaṃ  
 taṃtambhavasāṅkhātadukkhahetusabhāvānābhisamayanimittatā.

**Ṭhānanti** dharamānatā adhippetāti vuttaṃ “**ṭhānaviruddhoti atthitāviruddho**”ti. Ṭhānaviruddhā cakkhurūpādayo. “Purimacittañhī”ti-ādinā ṭhānaviruddho ca udāhaṭoti āha “**na idaṃ ekantikāṃ siyā**”ti. “Cakkhurūpādayo”ti-ādinā hi parato ṭhānaviruddhā udāhariyantīti. Purimasippādisikkhā hi pacchā pavattamānasippādikiriyānaṃ samodhānāsambhavā ṭhānavirodhoti yathāvuttamatthaṃ samatthetum “**na ca sippādīnaṃ**”ti-ādi vuttaṃ. Tattha **tanti** paṭisandhi-ādiṭhānaṃ. **Idhāti** ṭhānasabhāvakkiccadiggahaṇe. **Ādi**-saddena ārammaṇabhūmisantānādiviruddhā gahetabbā, te ca anulomato gotrabhussa, gotrabhuto maggassa liṅgaparivattanādivasena ca pavattiyāṃ veditabbā. namanaruppanavirodhā sabhāvaviruddho paccayoti yojanā. Tattha **namanaruppananti** arūparūpabhāvameva dasseti. Kammaṃ cetanāsabhāvaṃ, rūpaṃ ruppanasabhāvanti sabhāvaviruddhaṃ. **Madhurambilarasādīti** khīraṃ madhurarasaṃ puttupasamaṇaṃ madhuravipākasabhāvaṃ, dadhi ambilarasaṃ pittabrūhanaṃ kaṭukavipākasabhāvanti ato sabhāvavirodhā.

**Dadhi-ādīnīti** dadhipalālāni. **Bhūtiṇakassāti** bhūtiṇakanāmakassa osadhivisesassa. **Avī** nāma eḷakā, tā pana yebhuyyena rattalomakā hontīti vuttaṃ “**rattā eḷakā**”ti. Vipākānampi paccayabhāvato, avipākānampi paccayuppanabhāvato na vipākadhammavipākāpekkhā paccayapaccayuppannatāti vuttaṃ “**vipākāyeva te ca nā**”ti. Tenāha “**tasmā**”ti-ādi. **Tadavipākānanti** tassā avijjāya avipākabhūtānaṃ. **Na na yujjati** yujjati eva paccayuppannatāmattassa adhippetattā. **Tadaviruddhānanti** tāya avijjāya aviruddhānaṃ.

**Pubbāpariyavavattḥānanti** kāyapavattigatijāti-ādīnaṃ yathārahaṇaṃ pubbāparabhāvena pavatti, sā pana kenaci akaṭā akaṭavidhā paṭinīyatasabhāvāti dassetum niyatīvādinā vuttanidassanaṃ āharanto “**acchejjasuttāvutābhejjamaṇīnaṃ viyā**”ti āha. Dutiyavikappe **saṅgatīti** adhiccasamuppādo yādicchikatā, yaṃ sandhāya “yadicchāya pavattanaṃ nivattanaṃ yadicchāyā”ti-ādi vuccati. **Bhāvoti** dhammaṇaṃ sabhāvasiddhitā, yaṃ sandhāya vadanti “kaṇṭakassa koṭitikhīṇabhāvaṃ, kapiṭṭhaphalassa vaṭṭabhāvaṃ, migapakkhīnaṃ vā vicittavaṇṇasaṇṭhānāditaṃ ko abhisankharoti, kevalaṃ sabhāvasiddhovāyaṃ viseso”ti. Tenāha “sabbe sattā, sabbe

pāṇā, sabbe bhūtā, sabbe jīvā avasā abalā avīriyā  
niyatisaṅgatibhāvaparīṇatā”<sup>1</sup>. **Etehi vikappanehīti** cuti-ādīsu sammūḷhatāya  
“satto maratī”<sup>2</sup>ti ādivikappanehi kāraṇabhūtehi. **Akusalaṃ cittaṃ katvāti**  
ayonisomanasikāraparibrūhanena cittaṃ akusalaṃ katvā.

**Suttādidhammanti** suttageyyādipariyattidhammaṃ. Pariyattidhammañhi  
sammadeva jānanto paṭipattidhammaṃ paripūretvā paṭivedhadhamme  
paṭiṭṭhahati. **Tanti** taṃ jānanaṃ, nibbānābhisaṃmayoti attho.

Saṅkhārapadaniddesavaṇṇanā niṭṭhitā.

### Viññānapadaniddesavaṇṇanā

#### 227. Yathāvuttasaṅkhārapaccayāti

puññābhisāṅkhārādivuttappakārasaṅkhārapaccayā. Viññāṇādayo  
vedanāpariyosānā etarahi vipākavaṭṭabhūtā idhādhippetāti āha  
“**taṃkammanibbattameva viññāṇaṃ bhavituṃ arahatī**”<sup>1</sup>ti. Ayañca  
atthavaṇṇanā dhātukathāpāḷiyā na sametīti dassento “**dhātukathāyaṃ  
panā**”<sup>2</sup>ti-ādimāha. Tattha dhātukathāyaṃ vacanato  
sabbaviññāṇaphassavedanāpariggaho kato dhātukathāyanti yojanā.  
**Sappadesāti** sāvasesā, vipākā evāti adhippāyo. Viññāṇādīsu hi vipākesuyeva  
adhippetesu yathā—

“Vipākehi dhammehi ye dhammā vippayuttā, te dhammā  
asaṅkhataṃ khandhato ṭhapetvā pañcahi khandhehi dvādasahāyatanehi  
terasahi dhātūhi saṅgahitā. Katihi asaṅgahitā? Na kehici khandhehi na  
kehici āyatanehi pañcahi dhātūhi asaṅgahitā”<sup>2</sup>—

vipākavippayuttānaṃ saṅgahāsaṅgahā vissajjitā, evamidhāpi vissajjitabbaṃ  
siyā. Tenāha “**vipākā dhammāti imassa viya vissajjanaṃ siyā**”<sup>1</sup>ti. **Tasmāti**  
yasmā vippayuttena saṅgahitāsaṅgahitapadaniddese nippadesāva  
viññāṇaphassavedanā gahitā, tasmā. **Tatthāti** dhātukathāyaṃ.

1. Dī 1. 50 piṭṭhe.

2. Abhi 3. 92 piṭṭhe.



**Abhidhammabhājanīyavasenā**ti imasmim paṭiccasamuppādavibhaṅge abhidhammabhājanīyavasena. Tenāha “**avijjāpaccayā saṅkhārā cā**”ti-ādi. Tena yathāvutta-atthavaṇṇanā suttantabhājanīyavasena vuttāti yathādassitam virodham pariharati. Yadi abhidhammabhājanīyavasena dhātukathāpāḷi pavattā, atha kasmā “kāmabhavo pañcahi khandhehi ekādasahāyatanehi sattarasahi dhātūhi saṅgahito. Rūpabhavo pañcahi khandhehi pañcahāyatanehi aṭṭhahi dhātūhi saṅgahito”ti-ādinā<sup>1</sup> upādinnakkhandhavasena bhavo vissajjitoti codanaṃ manasi katvā āha “**bhavo pana -pa- na. abhidhammabhājanīyavasena gahito**”ti. **Evañca katvā**ti abhidhammabhājanīyavasena aggahitattā eva. **Tatthā**ti dhātukathāyaṃ. **Vipākañhetanti hi**-saddo hetu-attho. Yasmā yathāvuttabāttimsavidhaviññānaṃ vipākaṃ, tasmā taṃ saṅkhārapaccayanti imamatthaṃ dassento “**viññānaṃ vipākattā**”ti-ādimāha.

“**Somanassasahagatāneva sandhāya vuttan**”ti idaṃ vicāretabbaṃ upekkhāsahagatakusalākusalajavanānantarampi somanassasahagatatadārammaṇassa icchitattā. Tathā hi **aṭṭhakathāyaṃ** “catunnaṃ pana duhetukakusalacittānaṃ aññatarajavanassa pariyosāne ahetukacittaṃ tadārammaṇabhāvena patiṭṭhātī”ti<sup>2</sup> vatvā “iṭṭhārammaṇe pana santīraṇampi tadārammaṇampi somanassasahagatamevā”ti<sup>2</sup> vuttaṃ. Kusalākusalañhi abhi-iṭṭhampi ārammaṇaṃ tathābhisaṅkharāṇena kadāci na majjhattaṃ katvā na pavattati, vipākaṃ pana yathāsabhāvato va ārammaṇarasam anubhavati. Tenāha “na sakkā vipākaṃ vañcetun”ti. Kiriya javanānaṃ pana visayābhisaṅkharāṇassa balavabhāvato tadanantarānaṃ tadārammaṇānaṃ yathāvisayaṃ vedanāvasena tadanugūṇatā icchitā. Ye pana kiriya javanānantaraṃ tadārammaṇaṃ na icchanti, tesam vattabbameva natthi. Yaṃ pana “javanena tadārammaṇaṃ niyametabban”ti vuttaṃ, taṃ kusalaṃ sandhāya vuttanti ca vuttaṃ. Tasmā yathāvutto vicāretabbo. Tihetukajavanāvasāne ca duhetukajavanāvasāne cāti samuccayattho **ca**-saddo. Keci pana vibhāgaṃ akatvā “kusalajavanāvasānepi ahetukatadārammaṇaṃ hotīti ‘yebhuyenā’ti vuttan”ti vadanti. Lobhacittassa vā sattānaṃ bahulaṃ uppajjanato

1. Abhi 3. 13 piṭṭhe.

2. Abhi-Ṭṭha 1. 316 piṭṭhe.

“**yebhuyyenā**”ti vuttam. “**Sakim vā**”ti vacanasiliṭṭhatāvasena vuttam yathā “**aṭṭha vā dasa vā**”ti dassetuṃ “**dirattatirattādīsu viya veditabban**”ti āha. **Vā-saddassa abhāvā**ti suyyamānassa **vā-saddassa abhāvena** vuttam. Atthato pana tatthāpi **vā-saddo** labbhateva. Tirattam pana vāsādike labbhamāne diratte vattabbameva natthīti dirattaggahaṇam visum na yojetīti adhippāyena “**vacanasiliṭṭhatāmattenā**”ti vuttam. Kevalam “**tirattan**”ti vutte aññattha vāsādinā antaritampi tirattam gaṇheyya, dirattavisiṭṭham pana tirattam vuccamānam tena anantaritameva tirattam dīpetīti āha “**nirantaratirattadassanattham vā**”ti. **Balavarūpādike ārammaṇeti** atimahati rūpādi-ārammaṇe. “**Adhippāyo**”ti etena ekacittakkhaṇāyukepi visaye kadāci tadārammaṇam uppajjeyyāti “**sakim evā**”ti-ādinā vuttamattham ulliṅgeti. “**Sabbadvāresu tadārammaṇe dve eva cittavārā āgatā**”ti vuttattā ayampi attho vicāretvā gahetabbo. **Anurūpāya paṭisandhiyā**ti attano attano anucchavikena paṭisandhānakiccena.

“**Kati paṭisandhiyo, kati paṭisandhicittāni**”ti-ādinā paṭisandhivicāro parato vitthārato kathīyatīti āha “**paṭisandhikathā mahāvisayāti katvā pavattimeva tāva dassento**”ti. **Ahetukadvayādīnanti ādi-saddena** mahāvīpākamahaggatavīpāke saṅgaṇhāti. **Dvāraniyamāniyamāvacananti** dvārassa niyatāniyatāvacanam, niyatadvāram, aniyatadvāranti vā avacananti attho. **Anuppattitoti** na uppajjanato. Yādipi “**anurūpāya paṭisandhiyā**”ti paṭisandhipi heṭṭhā gahitā, “**pavattiyam panā**”ti adhikatattā pana pavattiyeva paccāmaṭṭhā. Paccayuppanabhāvena paṭhamuddiṭṭhāni sabbānīpi lokiyavīpākacittāni anvādesam arahantīti āha “**tatrassāti pavattiyam bāttimsavidhassā**”ti.

Yathā kāmāvacarapaṭisandhiviññāṇasaṅkhātassa bījassa abhāvepi rūpabhāve cakkhusotindriyapavatti-ānubhāvato cakkhusotaviññāṇānam sambhavo, evam teneva kāraṇena sampañcchanādīnampi tattha sambhavoti dassento “**indriyapavatti-ānubhāvato evā**”ti-ādīmāha. Tattha **cakkhusotadvārabhedenāti** cakkhusotadvāravisesena bhavitabbanti sambandho. **Tassāti** cakkhusotadvārassa. Dvāravantāpekkho dvārabhāvoti āha “**viññānavīthibhedāyattattā**”ti. **Tasmiṅca satīti**

tasmim̄ dvārabhede, vīthibhede ca sati. **Bhāvoti** uppatti. **Janakaṃ anubandhati nāmāti** taṃsadise tabbohāraṃ katvā vuttaṃ.

**Idaṃ pana vatvāti** rūpārūpāvacaradhamme ārabha tadārammaṇānuppattiṃ vatvā. **Bhāvanāyāti** akusalabhāvanāya saṃkilesavaḍḍhanena, saṃkiliṭṭhasamādhānenāti attho. Tathā hi lobhadosaśahagatacittuppādepi samādhi “avaṭṭhiti avisāhāro avikkhepo avisāhaṭamaṇasatā”<sup>1</sup>ti-ādinā<sup>1</sup> niddiṭṭho. **Avatthubhāvadassanattanti** aṭṭhānabhāvadassanattanti, anārammaṇabhāvadassanattanti attho.

“Kena katthā”<sup>2</sup>ti padassa “**kena cittena kasmim̄ bhave**”<sup>2</sup>ti saṅkhepena vuttamatthaṃ vitthārato dassetuṃ “**ekūnavīsati**”<sup>2</sup>ti-ādi vuttaṃ. Tattha **tena tena cittenāti** tena tena ahetukadvayādicittena saddhim̄ pavattamānā paṭisandhikkhaṇe rūpārūpadhammā ekūnavīsati paṭisandhiyoti yojanā. **Tena tena cittena** sahaḷāṭṭadipaccayatāya hetubhūtena, karaṇabhūtena vā. **Tattha tattha bhave**.

Anussaraṇattho byāpāro **anussaraṇabyāpāro**. **Kecīti dhammasirittheraṃ** sandhāya vadati. **Tīsu javanavāresu -pa- bhavitabbanti** kammādi-upaṭṭhānassa parato tīhi javanavārehi pavattitabbanti attho. Tenāha “**aneka -pa- abhippalambanaṅca hotī**”<sup>2</sup>ti. **Tasmāti** yasmā ekajavanavārasseva kammādi-upaṭṭhānena maraṇaṃ na sambhavati, tasmā. **Phoṭṭhabbassāti** pahāraphoṭṭhabbassa. Bhavaṅgacitte vattamāne, antarantarā pañcadvāravīthiyā vā vattamānāya phoṭṭhabbasamāyoge paṭhamaṃ kāyadvāravajjanappatti yuttā, tathāpi kismiñci cintiyamāne tamevārabha ekasmim̄ javanavāre pavatte pacchā kāyadvāravajjanappatti siyā cittaśa lahu-parivattibhāvatoti keci vādassa adhippāyo. Yathā niddāyantassa phoṭṭhabbasamāyogena pabujjhanakāle manodvāravajjanameva āvaṭṭeti, na kāyadvāravajjanam̄. “Pañcahi viññāṇehi na paṭibujjhati”<sup>2</sup>ti<sup>2</sup> hi vuttaṃ. Evaṃsampadaṃ vā etaṃ daṭṭhabbaṃ. **Lahukapaccupaṭṭhānanti** lahu-upaṭṭhānaṃ. **Manodvārassa visayo** kammādiko. **Lahukatāti** lahu-paṭṭhānatā. **Rūpānanti** cakkhādirūpadhammānaṃ. **Visayabhāvepiṭi** rūpāyatanādivisayasabbhāvepi. **Yesam̄ visayo atthīti** yesam̄

1. Abhi 1. 19 piṭṭhe.

2. Abhi 2. 324 piṭṭhe.

nippariyāyena visayo atthi. **Tarṇdassanattamevā**ti tesam  
sārammaṇānaṃyeva dassanattamaṃ. **Tenā**ti tasmā.

“**Bhūmicittuppādādivasenā**”ti idam kammaṃ sandhāya vuttaṃ,  
kammanimittassapi vasena labbhateva tassa chaḷārammaṇabhāvato.  
Gatinimittassa pana pabhedo nīlādikoyeva.

**Anupacchinesu** maggena appahīnesu. **Tañca** kammādim.  
**Bhavantarannāditā** cittasantānassa bhavapatthanāya tathābhisankhatattā.  
Yasmiñhi cittasantāne puññādicetanāya viya bhavapatthanāya paribhāvanā  
anupacchinnā, tattheva bhavantarapariyāpannacittuppatti. Tam pana cittaṃ  
tathā uppajjamānaṃ tāya vināmitaṃ viya hotīti vuttaṃ  
“**anupacchinnakilesabalavināmitan**”ti. **Sabbatthā**ti sugatiduggatīsu. **Itarāyā**ti  
sugatipaṭisandhininnāya cutiyā. “**Nicchinantī**”ti vuttassa nicchayassa  
nibandhanaṃ āgamaṃ dassento “**nimittassādagadhitaṃ vā**”ti-ādimāha.

Akusale hi duggatūpanisseye niyamite kusalaṃ sugatūpanissayoti  
niyamitameva hotīti.

**Aniṭṭhaṃ ārammaṇaṃ āha** yato duggatipaṭisandhidassiyatīti adhippāyo.  
Yadi evaṃ “**rāgādihetubhūtan**”ti kasmā vuttanti āha “**tampi hi -pa- hotī**”ti.  
**Tampī**ti aniṭṭhārammaṇampi. Yasmā pana hīnaṃ ārammaṇanti  
ārammaṇabhūtakammanimittaṃ adhippetam, tasmā  
“**akusalavipākajanakakammasahajātānaṃ vā**”ti-ādi vuttaṃ.  
Kammanimittabhūtañhi ārammaṇaṃ yaṃ vipākassa janakaṃ kammaṃ, tena  
sahajātānaṃ, tassa kammassa sadisāsannajavanasahajātānañca rāgādīnaṃ  
ārammaṇapaccayasankhāto hetu hoti, so eva cassa hīnabhāvoti dassetuṃ  
“**tañhī**”ti-ādi vuttaṃ. **Kammavasena aniṭṭhanti** hīnassa akusalakammassa  
ārammaṇato ārammaṇatāvasena hīnanti katvā aniṭṭhaṃ, sabhāvena iṭṭhampiti  
adhippāyo. “**Aññāthā cā**”ti-ādinā kammanimittārammaṇassa  
akusalavipākassa na sambhavoti dasseti.  
**Āsannakatakammārammaṇasantatiyanti** āsannakatassa kammassa  
ārammaṇasantāne. **Tamsadisanti** yathāvuttakammārammaṇasadisaṃ.  
**Paṭisandhi-ārammaṇūpaṭṭhāpakanti** paṭisandhiyā ārammaṇassa  
upaṭṭhāpakaṃ. Cuti-āsannajavanānaṃ paṭisandhijanakatte ayamatto  
labbheyyāti codanaṃ

manasi katvā āha “**na ca paṭisandhiyā**”ti-ādi. **Taṃsamānavīthiyanti** tāya paṭisandhiyā ekavīthiyam. **Na assāditānīti** assādanabhūtāya taṇhāya na āmaṭṭhāni.

**Samattāti** paripuṇṇā, pariyattā vā. “Marañakāle -pa- samādinna”ti vacanato yathāvuttacuti-āsannajavanānam paṭisandhidānam siddhanti codanam sandhāyāha “**na ca dubbalehi**”ti-ādi. “**Vakkhati cā**”ti-ādinā vuttamevattham upacayena pākaṭataram karoti.  
 Ñānavatthuvibhaṅgavaṇṇanāyañhi “pañcahi viññāṇehi na kañci dhammam paṭivijānātī”ti<sup>1</sup> padānam attham vivaranto vakkhati “**sabbampi -pa- paṭikkhittānī**”ti. Tattha **paṭivijānanādīti ādi**-saddena iriyāpathakappanakāyavacīkammupaṭṭhāpanakusalākusaladhammasamādāna samāpajjanavuṭṭhānāni saṅgaṇhāti. Upapajjanasupinadassanādīnam manodvārikacitteneva pavatti pākaṭāti tāni bahi karonto “**cavanapariyosānam kiccan**”ti āha. **Sahajavanakānīti** javanasahitāni, pañcadvārikajavanehi sandhinti attho.

**Tatthāti** “pañcahi viññāṇehi na kañci dhammam paṭivijānātī”ti pālivaṇṇanāyam. **Na kañci dhammam paṭivijānātīti** ettha na sabbe rūpādiddhammā dhammaggaṇena gahitāti yathādhippetadhammadassanattam “manopubbaṅgamā dhammāti<sup>2</sup> evam vuttam ekampi kusalam vā akusalam vā na paṭivijānātī”ti aṭṭhakathāyam vuttanti dassavā tassa attham vivaranto “**yesan**”ti-ādimāha. Tassattho— **yesam** kusalākusaladhammānam **paṭivibhāvanappavattiyā** siddhā vipākadhammatā yonisomanasikāra-ayonisomanasikārasamuṭṭhānā, yāya **sukham vā dukkham vā** taṃsantāne **anveti** anugacchati, pañcaviññāṇanam **sā** vipākadhammatā **paṭikkhittā** paṭisedhitāti. **Tādisamevāti** kusalākusaladhammapaṭivijānanasadisameva. Yadi pañcadvāre yathāvuttakiccassa karaṇe sahajavanakāni vīthiccittāni paṭikkhittāni, katham tattha cavanupapajjanāni sambhavantīti codanam sandhāyāha “**tadārammaṇānantaram panā**”ti-ādi. Nippariyāyena manodvārikabhāvo manodvāravajjanuppattipubbakoti tadabhāvenāha “**iminā adhippāyenā**”ti. Avasesekacittakhaṇāyuke rūpādihīti yojanā.

**Upacāro viya datṭhabbā** samānārammaṇattā, upapattinimittattā ca. **Kecīti dhammasirittheram** sandhāya vadati. **Mahaggatāvasānam vadantīti** yathāpaccayam

1. Abhi 2. 321 piṭṭhe.

2. Khu 1. 13 piṭṭhe.

mahaggatasamāpattim samāpajjitvā vuṭṭhitassa sā vīthi uppajjati, tato cuticittam hotīti vadanti. **Atītārammaṇā ekādasavidhā**ti nava kāmāvacarasugaticutiyo, dve viññāṇañcāyatanevasaññānāsaññāyatana-ārūppacutiyo evaṃ atītārammaṇā ekādasavidhā sugaticutiyo. Pañca rūpāvacarā, vuttāvasesā dve arūpāvacarāti **navattabbārammaṇā sattavidhā** cutiyo. Duggaticuti pana parato vuccatīti idha na gahitā. Tathā hi vakkhati “duggaticutiya pana -pa- na dassitā”ti.

**Evamādiketi ādi-**saddena “suddhāya vā javanavīthiyā”ti-ādivacanam saṅgaṇhāti. Tathā hi vuttam “suddhāya vāti mahaggatakammanimittārammaṇāya javanavīthiyā”ti. “**viññāyati**”ti iminā yadipi “pathavīkasiṇādī”ti-ādisaddena arūpāvacarajjhānārammaṇassāpi saṅgaho sambhavati, “cakkhusotānam vā”ti pana dvāradvayasseva vasena vikappantarakaraṇam yathādhippetassa atthassa nāpakanti dasseti. Nāpakaṇca nāma agatikā gatīti yathāvuttam nāpakam asambhāvento “**athāpi**”ti-ādimāha. Yo yattha sambhavati, tassa yojanā **yathāsambhavayojanā**, tāya. **Ayampi paṭisandhī**ti āruppacutiya anantaram paṭisandhim vadati. **Tatthevāti** “pathavīkasiṇādikam vā nimittam”ti vutte paṭhame vikappe eva. Heṭṭhimā heṭṭhimā paṭisandhi natthīti yojanā. **Tenāti** tasmā. **Tatoti** catutthārūppacutito. **Tatthevāti** catutthārūppe eva. **Atītārammaṇā** paṭisandhi, tato catutthārūppacutito **kāmāvacare atītapaccuppannārammaṇā paṭisandhi**. **Itarāhī**ti āruppacutihi. Dutiyā āruppapaṭisandhi atītārammaṇā, itarā navattabbārammaṇāti āha “**yathāsambhavan**”ti. **Atītapaccuppannārammaṇā ca kāmāvacarapaṭisandhī**ti etthāpi itarāhīti sambhandho. Sabbattha ca “yojetabbā”ti sambandhitabbam. **Imassa visesassāti** “tenā”ti-ādinā yathāvuttassa visesassa. **Visum uddharaṇam kataṃ** adhikavacanamaññamattam bodhetīti.

**Ārammaṇavasena ekavidhāyāti** atītārammaṇatāvasena ekavidhāya. **Duvidhāti** atītārammaṇā, paccuppannārammaṇā cāti dvippakārā. Duggaticutiya ārammaṇavasena “ekavidhāyā”ti padam ānetvā yojetabbam. Atītapaccuppannārammaṇatāya dvippakārā kāmāvacarapaṭisandhi,

navattabbārammaṇatāya ekappakārā rūpāvacarapaṭisandhi,  
 navattabbātītārammaṇatāya dvippakārā āruppapāṭisandhīti āha “**dvi-  
 ekadvippakārānaṃ kāmārūpārūppānaṃ vasenā**”ti. “**Tathevā**”ti iminā “dvi-  
 ekadvippakārānaṃ kāmārūpārūppānaṃ vasenā”ti padadvayam ākaḍḍhati.  
**Duvidhāyā**ti navattabbātītārammaṇatāvasena duvidhāya. **Paccekanti** visum  
 visum. **Dvinnam dvinnam kāmārūppānanti** etthāyaṃ yojanā—  
 navattabbārammaṇāya āruppacutiya anantarā atītārammaṇā  
 paccuppannārammaṇā ca dve kāmapaṭisandhī, navattabbārammaṇā  
 atītārammaṇā ca dve āruppapāṭisandhī, tathā atītārammaṇāyapīti imāsam  
 vasena aṭṭhavidhā.

“**Dvidvī**”ti gāthāya vuttamevattham sukhaggahaṇattham saṅgahetvā  
 dasseti. Yadipi “kammassa katattā”ti-ādināpi kammassa vipākānaṃ  
 upanissayapaccayabhāvo gahitoyeva hoti, “kusalākusalam kamman”ti-ādinā  
 pana visum upanissayapaccayabhāvo dassīyatīti “**kāmāvacarassa -pa- ādinā  
 nānākkhaṇikakammapaccayabhāvo dassitappakāro**”ti āha.

**Ādinā vimissaviññāpenā**ti ekassa bhavassa ādibhūtena rūpavimissena  
 paṭisandhiviññāpena. **Aññatthā**ti saṃsedaja-opapātikayoniyam. Avacanaṃ  
 paṭikkhepaṃ maññamāno “**gandharasāhārānaṃ paṭikkhattattā**”ti vatvā  
 sabbena sabbam rūpabhava te natthīti adhippāyenāha  
 “**cakkhusotavatthusattakajjivitachakkabhāvepi**”ti. **Pāḷiyanti**  
 dhammahadayavibhaṅgapāḷiyam. **Pañcāyatanāni**  
 cakkhusotamanarūpadhammāyatanāni. **Pañca dhātuyoti** tā eva pañca  
 dhātuyo. Vuttañhi “rūpadhātuyā upapattikkhaṇe katamāni pañcāyatanāni  
 pātubhavanti? Cakkhāyatanam rūpāyatanam sotāyatanam manā yatanam  
 dhammāyatanam. Imāni pañcāyatanāni pātubhavanti. Katamā pañca dhātu  
 yo pātubhavanti? Cakkhudhātu -pa- dhammadhātu. Imā pañca dhātuyo  
 pātubhavanti”ti<sup>1</sup>. **Cha āyatanāni** saddāyatanena saddhim tāniyeva. **Nava  
 dhātuyoti**

cakkhurūpacakkhuvīññāṇasotasaddasotaviññāṇamanodhammamano viññāṇad  
 hātuyo. **Sabbasaṅgahavasenā**ti anavasesapariggahavasena. **Tatthā**ti  
 rūpadhātuyam. “**Kathāvatthumhi cā**”ti-ādinā na kevalam  
 dhammahadayavibhaṅgapāḷiyamēva, atha kho pakaraṇantarepi gandhādayo  
 paṭikkhattāti dasseti. Tattha **ghānāyatanādīnam viyā**ti  
 sadisūdāharaṇadassanam.

1. Abhi 2. 433 piṭṭhe.

Yathā ghānāyatanādīnaṃ tattha rūpabhāve bhāvo atthi, tā paṭikkhittā, evaṃ gandhāyatanādīnaṃcāti. **Atthi tattha ghānāyatananti** pucchā sakavādissa. Yañhi tattha āyatanam natthi, tassa vasenāyaṃ codanā. Tato paravādī yaṃ tattha ajjhattikānaṃ tiṇṇaṃ āyatanānaṃ ghānādikaṃ saṅghānanimittam, tadeva āyatananti laddhiyā “**āmantā**”ti paṭijānāti. Bāhirānaṃ gandhāyatanādīnaṃ vasena puṭṭho yasmā ghānappasādādayo tattha na icchati, tasmā tesam gocaraṃ paṭisedhento “**na hevaṃ vattabbe**”ti paṭikkhipati. **Ādi**-saddena “atthi tattha jivhāyatananti? **Āmantā**. Atthi tattha rasāyatananti? Na hevaṃ vattabbe”ti-ādinayappavattānaṃ anulomapaṭilomasamsandanapañhādīnaṃ saṅgaho daṭṭhabbo. **Aphoṭṭhabbāyatanānanti** phoṭṭhabbāyatanabhāvarahitānaṃ, aphoṭṭhabbasabhāvānanti attho.

Idāni anāyatanasabhāve gandharase paṭijānitvāpi dosaṃ vadanto “**yadi cā**”ti-ādimāha. **Avacane natthi kāraṇam** yathādhammasāsane abhidhamme, tesam vā nisattanijjivasabhāvattāti adhippāyo. Yathā ca dhātubhāvo, evaṃ dhammabhāvo ca tesam ekantiko, tathā āyatanabhāvo cāti sabbathāpi tattha vijjamānānaṃ gandharasānaṃ āyatanesu avacane kāraṇam natthīti dassento “**dhammabhāvo cā**”ti-ādimāha. **Aññassa** paramatthassa abhāvā. **Koci āyatanasabhāvoti** dhammāyataneva sandhāya vadati. Tena yadi rūpabhāve gandharasā vijjanti, yathāvuttakāraṇato gandharasāyatanabhāvena avuccamānāpi dhammāyatanabhāvena vattabbā siyūṃ, na ca vuttā. Tasmā niṭṭhamettha gantabbam “nattheva rūpabhāve gandharasā”ti dasseti. Kiñca rūpadhātuyam gandharasabhāvena avuttānaṃ, kāmādhātuyam vuttānaṃ tesam kiṃ gandharasabhāvato aññena sabhāvena rūpadhātuyam atthibhāvo, udāhu gandharasabhāvena. Yadi purimo pakkho dhammāyatane tesam saṅgaho siyā anāyatanasabhāvassa sabhāvadhammassa abhāvā, atha dutiyo teneva kāraṇena nesam gandharasāyatanabhāvo siddhoti imamatham dassento “**yadi cā**”ti-ādimāha. **Tasmāti** yasmā gandharasā dhammahadayavibhaṅge na vuttā, kathāvutthumhi ca tesam bhāvo paṭikkhitto, phusitum asakkuṇeyyā pathavī-ādayo viya ghāyitum, sāyituñca asakkuṇeyyā te natthi, dhātusaddena ca te gahitā, dhammabhāvo ca tesam ekantiko,



tasmiñca sati siddho āyatanabhāvo, tasmā. **Tathā**ti pāḷiyam avuttadhamme hāpetvā cakkhusattakādivasena. **Evanti** cakkhusattakādivasena rūpaḡaṇanāya kariyamānāya. **Dhammatā**ti pāḷidhammo, rūpabhava vā pavattanakarūpadhammatā. **“Na vilomitā”**ti iminā yathāpaṭiññātam dhammam dīpitaṃ ulliṅgeti.

Ettha ca rūpāvacarasattānam ghānajivhāyatanābhāvato vijjamānāpi gandharasā āyatanakiccaṃ na karontīti te anāmasitvā pāḷiyam “pañcāyatanāni pātubhavanti, cha āyatanāni”ti-ādi vuttam. “Tayo āhārā”ti ca ajjhoharitabbassa āhārassa abhāvena ojaṭṭhamakarūpasamuṭṭhāpanasaṅkhātassa āhārakiccassa akaraṇato, na sabbena sabbam gandharasānam, ojāya ca abhāvato. Iti visayino, kiccassa ca abhāvena visayo, kiccavā ca dhammo na vutto. Yasmiñhi bhava visayī natthi, tasmim tamhetuko nippariyāyena visayassa āyatanabhāvo natthīti vijjamānassāpi avacanam, yathā rūpabhava pathavītejovāyodhātūnam phoṭṭhabbāyatanabhāvena. Yassa pana yattha vacanam, tassa tattha visayīsabbhāvahetuko nippariyāyena āyatanabhāvo vutto diṭṭho yathā tattheva rūpāyatanassa. Yadi visayīsabbhāvahetuko visayassa nippariyāyena āyatanabhāvo, katham asaññasattānam devānam dve āyatanāni pātubhavanti. Asaññasattānāhi cakkhāyatanam natthi, acakkhāyatanabhāvena ca nesaṃ rūpāyatanam aññesaṃ avisayoti? Nāyam virodho. Yena adhippāyena rūpadhātuyam saññīnam gandhāyatanādīnam avacanam, tena rūpāyatanassāpi avacananti asaññīnam ekaṃ āyatanam vattabam. Yathāsakañhi indriyagocarabhāvāpekkhāya yesam nippariyāyena āyatanabhāvo atthi, tesu niddisiyamānesu tadabhāvato rūpadhātuyam saññīnam gandhādike visum āyatanabhāvena avatvā dhammasabhāvānavattanato, manoviññāṇassa ca visayabhāvūpagamanato dhammāyatanantogadhe katvā “pañcāyatanāni”ti pāḷiyam vuttam. Etadatthañhi “dhammāyatanam”ti sāmāññato nāmakaraṇam, piṭṭhivaṭṭakāni vā tāni katvā “pañcāyatanāni”ti vuttam. Yena ca pana adhippāyena asaññīnam rūpāyatanam vuttam, tena saññīnampi gandhādīnam visum gahaṇam kātabbanti imassa nayassa dassanattam “asaññasattānam devānam dve āyatanāni

pātubhavanti”<sup>1</sup>ti vuttam. Asatipi hi attano indriye rūpassa vaṇṇāyatanasabhāvātikkamo nathevāti tam rūpāyatanantveva vuccati. Iminā ca nayadassanena gandhādīni tīṇi pakkhipitvā saññīnam aṭṭha āyatanāni, asaññīnam pañcāti ayamattho dassito hoti. Evañcetaṃ sampaṭicchitabbaṃ. Aññathā rūpaloke phusitumasakkuṇeyyatāya pathavī-ādīnam vacīghoso eva na siyā. Na hi paṭighaṭṭanānighamsamantarena saddappavatti atthi, na ca phusanasabhāvānam katthaci aphanasabhāvata<sup>2</sup> sakkā viññātum. Phoṭṭhabbāyatanasaṅkhātassa ca bhūtattayassa abhāve rūpabhāve rūpāyatanādīnampi sambhavo eva na siyā, tasmā phusitum sakuṇeyyatāyapi pathavī-ādīnam tattha kāyindriyābhāvena tesam phoṭṭhabbabhāvo na vutto. Evañca katvā rūpadhātuyam tesam sappaṭighavacanañca samatthitam hoti. Vuttañhi “asaññasattānam anidassanasappaṭigham ekaṃ mahābhūtam paṭicca dve mahābhūtā”<sup>3</sup>ti-ādi<sup>3</sup>. Paṭigho hettha bhūtattayassa kāyappasādam pati tamnissayabhūtaghaṭṭanadvārena abhimukhabhāvo, so ca phusitum asakuṇeyyasabhāvassa ghaṭṭanāya abhāvato natthi. Nanu “dve āyatanāni”<sup>4</sup>ti ettha pariyāyāyatanam adhippetam, atha kasmā gandhāyatanādīnipi gahetvā “pañcāyatanāni”<sup>4</sup>ti na vuttanti? “Nayadassanavasena desanā pavattā”<sup>4</sup>ti vuttovāyamattho. Atha vā tattha rūpāyatanasseva vacanam kadāci aññabhūmikānam pasādassa visayabhāvam sandhāya, na pana itaresam abhāvato. Nāpi pariyāyena gandhāyatanādīnam āyatanasabhāvābhāvato. Asaññīnañhi rūpāyatanam samānabhūmikānam vehapphalānam, uparibhūmikānañca suddhavāsānam pasādassa visayabhāvam gacchati, na pana gandharasāti tesamyeva tathāvacanam yuttam. Kathāvattumhi ca nippariyāyena gandhāyatanādīnam atthibhāvam paṭijānantam sandhāya paṭisedho kato. Yadipi cetam vacanam tattha gandhāyatanādīnam abhāvavibhāvanam na hoti, atthibhāvādīpanampi pana aññavacanam nathevāti? Nayidamevam aṭṭhakathāsu tattha nesam atthibhāvassa niddhāretvā vuttatā. Yañhi aṭṭhakathāvacanam pāḷiyā na virujjhati, tam pāḷi viya pamāṇabhūtam agarahitāya ācariyaparamparāya yāvajjatanā āgatattā<sup>4</sup>. Tattha siyā—yam pāḷiyā na virujjhati aṭṭhakathāvacanam, tam pamāṇam. Idam pana virujjhatīti? Nayidamevam yathā na

---

1. Abhi 2. 434 piṭṭhe.

3. Abhi 9. 472 piṭṭhe.

2. Aghaḍḍanasabhāvata (Ka)

4. Ābhatattā (?)

virujjhati, tathā paṭipāditattā. Cakkhādīnaṃ āyatanānaṃ, tannissayānañca viññāṇānaṃ sattuṇṇatāsandassanatthaṃ bhagavato dhātudesanāti āyatanabhāvena vuttānaṃyeva dhātubhāvadīpanato dhātubhāvassāpi nesam avacanaṃ yujjati eva, tasmā yathā pāḷiyā avirodho hoti, tathā cakkhudasakādivasena aṭṭhakathāyaṃ rūpaṇaṇā katāti na ettha dhammatāvilomanāsānkāya okāsoti veditabbaṃ.

Elakassa jātakāle uṇṇā **jāti-uṇṇāti** paṭhamo attho. Tato sukhumatarataṃ sandhāya **“gabbhaṃ -pa- itipi vadanti”**ti vuttaṃ. Sambhavanassa bhedo vā **sambhavabhedo**, pavattibhedoti attho.

**Rūpībrahmesūti** adhikaraṇe bhummaṃ, **opapātikayonikesūti** niddhāraṇeti dassento **“opapā tikayonikehi rūpībrahme niddhāreti”**ti āha. Tena **“opapātikayonikesū”**ti sāmāññato vuttarāsito **“rūpībrahmesū”**ti visesaṃ niddhāreti. **Na sametīti** na saṃsandati, virujjhatīti attho. Yāya pāḷiyā na sameti, taṃ dassento **“dhammahadayavibhaṅge hī”**ti-ādimāha.

**Ekādasāti** paripuṇṇāyatanassa saddāyatanavajjāni ekādasāyatanāni. **Kassaci dasāyatanānīti** andhassa cakkhāyatanavajjāni. **Kassaci aparāni dasāyatanānīti** badhirassa sotāyatanavajjāni. **Kassaci navāyatanānīti** andhabadhirassa cakkhusotāyatanavajjāni. **Kassaci sattāyatanānīti** gabbhaseyyakassa rūpagandharasakāyaphoṭṭhabbamanodhammāyatanavasena vuttaṃ.

**“Na vuttaṃ aṭṭhāyatanāni pātubhavanti”**ti idaṃ **“na hi pāḷiyā -pa-vuttā”**ti etassa atthavivaraṇaṃ. Cakkhusotaghānavikalassa hi upapajjamānassa aṭṭheva āyatanāni siyunti. Sati ca aghānakupapattiyāṃ punapi **“kassaci aparāni dasāyatanāni pātubhavanti”**ti vattabbaṃ siyā. Tathā ca sati yathā andhabadhirassa vasena **“kassaci navāyatanāni pātubhavanti”**ti<sup>1</sup> ekavāraṃ vuttaṃ, eva andhāghānakassa, badhirāghānakassa ca vasena **“kassaci aparāni navāyatanāni, kassaci aparāni navāyatanāni pātubhavanti”**ti vattabbaṃ siyā, evaṃ na vuttanti imamattaṃ dasseti **“tathā -pa-**

---

1. Abhi 2. 427 piṭṭhe.

na ca taṃ vuttan”ti. **Evam dhātupātubhāvādipañhesūti** “kassaci ekādasā dhātuyo pātubhavanti, kassaci dasā dhātuyo, kassaci aparā dasā dhātuyo, kassaci nava dhātuyo, kassaci satta dhātuyo pātubhavanti”ti<sup>1</sup> evam dhātupātubhāvapañho veditabbo. **Ādi-saddena** “kassaci cuddasindriyāni pātubhavanti”ti-ādi<sup>1</sup> nayappavattā indriyapañhādayo saṅgahitā.

Ettha ca yathā “sattati ukkaṃsato ca rūpāni”ti<sup>2</sup> padam “saṃsedajopapātīsū”ti ettha yonidvayavasena yojīyati, na evam “avakāmsato timsā”ti idam, idam pana saṃsedajayonivaseneva yojetabbam, ekayoganiddiṭṭhasāpi ekadeso sambandham labhatīti. Saṃsedajasseva ca jaccandhabadhira-aghānakanapumsakassa jivhākāyavatthudasakānam vasena timsā rūpāni uppajjantīti vuttam, na opapātikassāti ayamettha aṭṭhakathāya adhippāyo. Ye pana “opapātikassa jaccandha -pa- uppajjantīti **mahā-aṭṭhakathāyam** vuttan”ti vadanti, tam na gahetabbam. So hi pamādapāṭho. Evañca katvā āyatanayamakavaṇṇanāya “kāmadhātuyam pana aghānako opapātikō natthi. Yadi bhaveyya, ‘kassaci aṭṭhāyatanāni pātubhavanti’ti vadeyyā”ti<sup>3</sup> vakkhati. Apare panāhu “kassaci ekādasāyatanāni pātubhavanti, yāva ‘kassaci navāyatanāni’ti pāli opapātike sandhāya vuttā. Tasmā pubbenāparam aṭṭhakathāyam avirodho siddho hoti, tathā ca yathāvuttapāliyā ayamatthavaṇṇanā aññadatthu saṃsandati sametiyevā”ti. Yam paneke vadanti “opapātikaggahaṇena saṃsedajāpi saṅgayhanti. Tathā hi **dhammahadayavibhaṅge** ‘kāmadhātuyā upapattikkhaṇe kassaci ekādasāyatanāni pātubhavanti’ti-ādīnam<sup>4</sup> uddese ‘opapātikānam petānan’ti-ādīnā opapātikaggahaṇameva katam, na saṃsedajaggahaṇan”ti, tam paripuṇṇāyatanānamyeva saṃsedajānam opapātikesu saṅgahaṇavasena vuttanti veditabbam. Tathā hi vakkhati “saṃsedajayonikā paripuṇṇāyatanāparipuṇṇāyatanabhāvena opapātikasaṅgaham katvā vuttā”ti “padhānāya vā yoniyā sabbam paripuṇṇāyatanayonim dassetum ‘opapātikānan’ti vuttan”ti ca. Aṭṭhakathāyam

1. Abhi 2. 427 piṭṭhe.

2. Sattati ukkaṃsatova rūpāni (Abhi-Ṭṭha 153 piṭṭhe.)

3. Abhi-Ṭṭha 3. 309 piṭṭhe.

4. Abhi 2. 426 piṭṭhe.

pana yonidvayaṃ sarūpeneva pakāsetuṃ, saṃsedajayonivaseneva ca avakāmsato pavattim dassetuṃ opapātikayoniyā itaraṃ asaṅghetvā “saṃsedajopapātīsū”ti vuttanti. Sabbam taṃ vīmaṃsitvā gahetabbam.

**Cutipāṭisandhīnanti** anantarātītacutiyā, tadanantarāya missāmissabhedāya paṭisandhiyā. **Khandhādīhīti** khandhārammaṇagatihetuvedanāpītivitakkavicārehi. Mahaggata-ajjhattārammaṇāya mahaggata-ajjhattārammaṇā, amahaggatabahiddhārammaṇāya amahaggatabahiddhārammaṇāti evamādino arūpabhūmīsuyeva cutipāṭisandhīnaṃ bhedābhedavisesassa sambhavato “**nayamukhamattaṃ dassetvā**”ti vuttaṃ. **Ekaccasugatīti** mahaggatavajjasugati adhippetāti āha “**rūpārūpāvacarānan**”ti-ādi. Keci pana “yathā mahaggatāvajjā, evaṃ uttarakurukavajjā”tipi vadanti. **Ekaccasugaticutiyāti** vuttasugaticutiyā. Yadiipi “ayaṃ nāma duggatipāṭisandhi na hoti”ti niyamo natthi, desanā pana sotapatitā gatāti vadanti. Niyatabodhisattāpekkhāya vā evaṃ vuttaṃ. Tesaṃhi ekaccaduggatipāṭisandhi natthi avīci-ādīsū anupapajjanato. “**Ekaccaduggaticutiyā**”ti etthāpi iminā nayena attho veditabbo.

**Ekaccasugatipāṭisandhīti** pana kāmāvacarasugatipāṭisandhi veditabbā. **Sayamevāti** attanā eva. “**Bhedaviseso eva ca evaṃ vitthārena dassito**”ti idaṃ “amahaggatabahiddhārammaṇāyā”ti-ādim sandhāya vuttaṃ. “**Catukkhandhāya -pa- paṭisandhi hotī**”ti idaṃ pana abhedavisesadassanamevāti. **Ekekasmim bhedeti** “amahaggatabahiddhārammaṇāyā”ti evamādike ekekasmim bhāge. **Tattha tatthevāti** “amahaggatabahiddhārammaṇāya mahaggatabahiddhārammaṇā, amahaggatajjhattārammaṇāya mahaggatajjhattārammaṇā”ti-ādinā tasmim bhede, **tattha tattheva** vā bhavādike cavitvā upapajjantassa vasena cutipāṭisandhiyojanā veditabbā. Bhummatthe ayaṃ to-saddoti dassento “**tato hetuṃ vināti tattha hetuṃ vinā**”ti āha. Tassattho—tasmim purimabhava nipphannaṃ avijjasaṅkhārādikaṃ kāraṇaṃ vinā na hotīti.

**Atimandabhāvūpagamaṇaṃ** sakiccāsamatthatā. Pañcadvārikaviññāṇavasena cuti paṭisiddhā, na tadanantaraviññāṇavasena. Svāyamattho “pañcannaṃ

dvārānan”ti-ādinā heṭṭhā aṭṭhakatthāyamāgatoti āha  
**“pañcadvārikaviññāṇānantarampi hi pubbe cuti dassitā”**ti. Tattha yaṃ  
vattabham, taṃ heṭṭhā vuttameva. Cuticcitena saddhim cakkhāyatanādīnaṃ  
nirodho hotīti dassetuṃ **“yamake cā”**ti-ādi vuttam. **Pariṇatattāti**  
paripākavasena pariyosānaṃ gatattāti adhippāyo. **Phassādayo**  
yathāvuttacetanāsahajātaphassādayo. Yathā-upaṭṭhite kammādi-ārammaṇe  
anekavāraṃ uppattiyā santānassa abhisankharaṇaṃ tattha  
paṭisandhiviññāṇapaṭiṭṭhānassa **hetubhāvo**.

Santānavasena nippajjamānānaṃ namanādikiriyaṇaṃ ekasmim  
paṭisandhiviññāṇeyeva atthasiddhīti dassento āha **“namana -pa- dassetī”**ti.  
**Pathaviyaṃ sabalapayogehīti** pathaviyā ādhāraṇabhūtāya attano balena,  
payogena ca karaṇabhūtena.

**Saddahetukoti** saddassa padhānādibhāvaṃ sandhāya vuttam. Tādiso  
pabbatakucchi-ādipadesopi tassa hetuyeva. **Padīpantarādīti ādisaddena**  
telavaṭṭi-ādike saṅgaṇhāti. **Tato** saddādippavattito pubbe abhāvā.  
Paṭighosādīnaṃ hi saddādippavattito sati purimasiddhiyaṃ te  
saddādipaccayadesaṃ gaccheyyūṃ, na pana te atthīti vuttam **“tato pubbe**  
**abhāvā”**ti. Upameyyepi evameva attho yojetabbo. Yathā ca hetudesam na  
gacchati hetusamuppannaṃ, evam tato nāgacchatīti āha **“tasmā na -pa-**  
**āgatan”**ti. Te saddādayo paccayā etesanti **tappaccayā**. **Vuttanayenāti**  
upamāyaṃ vuttanayeneva. Purimabhava hetudese sannihitaṃ hutvā  
paṭisandhiviññāṇaṃ tato aññatra bhavantare taṃ upagantvā tappaccayaṃ na  
hotīti attho. Paccayato nibbattamānaṃ paccayuppannaṃ aññatra agantvā  
paccayadesaṃ anupagatameva hutvā nibbattatīti paṭhamo attho. Paṭhamam  
paccayena samodhānagataṃ hutvā tato aññatra gantvā  
paccayuppannavatthubhāvaṃ nāpajjatīti dutiyo attho. **Yathāsambhavanti**  
yāya “na khīrato dadhi sambhūtaṃ siyā, na khīrasāmino dadhi siyā”ti ca  
khīradadhīsu ekantaṃ ekatāya, nānatāya ca dosayojanā katā. Iminā nayena  
bījādīsu sabbahetūsu, aṅkurādīsu sabbahetusamuppannesu yathāsambhavaṃ  
hetu-anurūpaṃ, hetusamuppannānurūpaṅca dosayojanā kātābbā.  
Santānabaddhesu dhammesu ekanta-ekatāpaṭisedhena sassatagāhassa  
paṭisedhitattā vuttam

“**sayaṃkatarāṃ sukhāṃ dukkhanti imaṃ diṭṭhiṃ nivāreti**”ti. Tathā ekantanānatāpaṭisedhena ucchedagāho paṭisedhito hotīti āha “**paramkatarāṃ sukhāṃ dukkhāṃ añño karoti, añño paṭisaṃvedetīti imaṃ diṭṭhiṃ nivāreti**”ti. Tena katanāso, akatāgamo ca nivattito hotīti adhiccasamuppannadiṭṭhinivāraṇeneva niyatisabhāvavādapaṭisedhopi katoti daṭṭhabbāṃ.

**Tatthā**ti ankurādippabandhasaṅkhāte bhūtopādārūpasantāne. **Tanti** vijjāpāṭavādi. **Aññassā**ti bālakāle katavijjāpariyāpuṇanādito aññassa. Saṅkhārato añño taṇhādiko **aññapaccayo**.

Niyyātanādi eva phalaṃ niyyātanādiphalaṃ, aphalitaṃ niyyātanādiphalaṃ etassāti **aphali -pa- phalaṃ**, yathāvuttakiriyākaraṇaṃ<sup>1</sup>.

**Piṇḍavasena**ti akatāvayavavibhāgassa samudāyassa vasena. **Sabbatthā**ti puññābhisaṅkhārādike sabbasmim paccayadhamme, paṭisaṅghibhede vā paccayuppannadhamme. **Balavakamma**ssa **vasena yojetabbo**. Bhuso nissayo hi **upanissayo**. “Avisesena”ti vuttepi kāmāvacarapuññābhisaṅkhāro cakkhuviññāḍīnaṃ pañcannaṃ pavatte, itaro paṭhamajjhānavipākādīnaṃ pavatte ca paṭisaṅghiyaṅca paccayo hotīti pākaṭoyamatthoti taṃ avibhajitvā “**sabbapuññābhisaṅkhāraṃ saha saṅgaṇhāti**”ceva vuttaṃ.

**Dvādasākusalacetanābhedoti** nayidaṃ samāsapadaṃ, sandhivasena panetaṃ vuttaṃ. **Dvādasā**ti ca bhummatthe paccattavacanaṃ, dvādasasu akusalacetanāsu. **Akusalacetanābhedoti** ekādasākusalacetanāpabhedo, dvādasākusalacetanāpabhedo cāti attho veditabbo. Evañhi sati na ettha kiñci vicāretabbāṃ heṭṭhā vitthāritattā. Keci pana “dvādasā kusalacetanābhedoti idaṃ ‘channaṃ pavatte’ti-ādinā yojetabban”ti vadanti, tesāṃ matena uddhaccacetanāya gahaṇe payojanaṃ vicāretabbameva paṭisaṅghiyāpi paccayabhāvassa vuttattā. **Ekassā**ti ettha eva-saddo luttaniddiṭṭhoti āha “**ekasseva paccayabhāvaniyamo**”ti. **Milātamālādīnanti** milātamālakiliṭṭhavatthādīnaṃ. Manopadosikānaṃ tadaññavatthūnampi **aniṭṭhatā kathaṃ na siyā**, siyā evāti adhippāyo. **Aṭṭhakathāyaṃ**<sup>2</sup> pana pacuratābhāvato taṃ anāmasitvā “**tathā kāmāvacaradevalokepi**”ti

1. Tathāvuttakiriyākaraṇaṃ (Ka)

2. Abhi-Ṭṭha 2. 158 piṭṭhe.

vuttaṃ. Keci pana “devaloke aniṭṭhaṃ nāma parikkappanavasena, sabhāvato pana tatthuppannaṃ iṭṭhamevā”ti vadanti.

“**Ekūnatimsacetanābhedampī**”ti iminā uddhaccacetanāyapi pavattivipākadāyitaṃ anujānāti, aṭṭhakathā-adhippāyavasena vā evamāha. Pañcadasannaṃ ahetakavipākaviññāṇaṃ pañcaṭṭhānāni dve apanetvā avasesānaṃ **terasannaṃ**. Dve dve cakkhusotasampaṭicchanaviññāṇāni, tīṇi santīraṇānīti **navannaṃ**. **Ekadesapaccayabhāvenāti** ekadesassa vīsaticetanābhedassa kāmāvacaracittasaṅkhārassa paccayabhāvena ekūnatimsacetanābhedo samudāyo vutto. **Svevāti** avayavagatenāpi visesena samudāyo voharīyati yathā “alaṅkato rājakumāro”ti.

**Yatthāti** pañcavokārabhavaṃ sandhāyāha. Tattha hi “kāmāvacarasugatiyaṃ tāva ṭhitassā”ti-ādinā<sup>1</sup> paṭisandhiyaṃ, pavattiyañca vipākassa vitthārapakāsaṇaṃ kataṃ. **Catutthajjhānabhūmīti** vehapphalabhūmiṃ vadati. Tenāha “**asaññārūppavajjā**”ti. Catutthajjhānameva hi bhāvanāvisesappavattaṃ asaññabhūmiṃ, āruppabhūmiñca nipphādeti, catukkanayavasena vā saṃvaṇṇanā vuttāti veditabbā. Aṭṭha mahāvīpākā, parittavīpākesu pacchimo, pañca rūpāvacaravīpākāti evaṃ **cuddasannaṃ**. **Sattannanti** sesānaṃ parittavīpākānaṃyeva sattannaṃ.

**Bhavādayoti** bhavayonigatisattāvāse. **Tiṇṇaṃ viññāṇānanti** purimānaṃ tiṇṇaṃ āruppavīpākaviññāṇaṃ. **Tisūti** pañcamādīsu tīsu viññāṇaṭṭhitīsu. **Vuttanayenāti** “kāmabhava pana duggatiyaṃ aṭṭhannampi parittavīpākaviññāṇaṃ tatheva paccayo pavatte, no paṭisandhiyaṃ”ti-ādinā<sup>2</sup> vuttanayeneva.

Viññāṇapadaniddesavaṇṇanā niṭṭhitā.

### Nāmarūpapadaniddesavaṇṇanā

228. Yadipi suttante, abhidhamme ca paṭiccasamuppādaniddese rūpapadassa desanābhedo natthi, abhidhamme pana “sabbaṃ rūpaṃ na hetū”ti-ādinā<sup>3</sup>

1. Abhi-Ṭṭha 2. 149 piṭṭhe.

2. Abhi-Ṭṭha 2. 157 piṭṭhe.

3. Abhi 1. 145 piṭṭhe.



suttantato tassa desanābhedo atthevāti āha “**suttantā -pa- bhedo**”ti. Saṅkhyeyyesu paricchedato gahitesu atthasiddho tattha saṅkhyāparicchedoti vuttam “**atthato pana vuttameva hoti**”ti.

**Opapātikasattesūti** vā sāmāññato sabbe opapātikā vuttā. Tesu brahmakāyikādiggaḥaṇena rūpāvacarāva vuttāti tadaññe sandhāya **sesa-opapātikānanti** sesaggaḥaṇam sātthakameva. **Vuttanayenāti** “dve vā tayo vā dasakā, omato ādinā sahā”ti-ādinā<sup>1</sup> rūpamissakaviññāṇe vuttanayena.

“Dve santatisīsānī”ti ārabha yāva “satta santatisīsānī”ti<sup>2</sup> ettakam aṭṭhakathāpāṭham sandhāya vuttam “**sattakapariyosānan**”ti. Ekekacittakkaṇe tikkhattum rūpuppattim ananujānanto āha “**iminādhippāyenā**”ti. Cittassa uppādakkhaṇeyeva sabbam rūpam uppajjatīti hi attano adhippāyo.

“**Rūpājanakakammajan**”ti idam bhūtakathanamattam daṭṭhabbam pañcaviññāṇanam atamsabhāvatābhāvā. **Rūpājanakakammajanti** vā cuticittam sandhāya vuttam. Paṭisandhicittam pana “pavattiyam”ti imināva nivattitam. “Sabbesampi cuticittam rūpam na samuṭṭhāpeti”ti<sup>3</sup> aṭṭhasālinītikāyam vuttovāyamattho. Pañcaviññāṇakkhaṇe tappaccayā rūpuppattiyā abhāvena vuttam “**pañcaviññāṇappavattikālam sandhāyā**”ti. Tatthāpi asahajātaviññāṇapaccayā attheva rūpuppattīti āha “**sahajātaviññāṇapaccayañcā**”ti. **Bhavaṅgādīti** bhavaṅgasampañicchanasantīraṇatadārammaṇāni. **Aññenāti** yathāvuttakammaviññāṇato aññena abhisāṅkhāraviññāṇena. Rūpameva hi kusalākusalakiriyacittappavattikkhaṇe abhisāṅkhāraviññāṇapaccayā uppajjati, na nāmam bhavaṅgam. **Tamjanakenāti** bhavaṅgādijanakena. Kammaviññāṇappaccayā vipākacittappavattikāle vipākanāmassa, kammasamuṭṭhānarūpassa ca vasena. Sahajātaviññāṇapaccayā pana itaracittappavattikālepi vipāko vipākanāmasena, cittasamuṭṭhānarūpavasena ca nāmarūpassa sambhavo dassetabboti āha “**sahajāta -pa- yojetabban**”ti. Rūpasaddena ca attano ekadesenāti sambandho. “Sarūpanam ekadeso ekavibhattiyam”ti<sup>4</sup> saddalakkhaṇam

1. Abhi-Ṭṭha 2. 152 piṭṭhe.

3. Mūlaṭī 1. 152 piṭṭhe.

2. Abhi-Ṭṭha 2. 161 piṭṭhe.

4. Pāṇinī 1. 2. 64. sutte.

sandhāyāha “**sarūpānaṃ ekadesso**”ti. Icchito hi ekadesarūpānampi ekadeso yathā “nidassitavipakkhehi”ti. Nidassito ca nidassitavipakkho ca **nidassitavipakkhoti** ayañhettha attho. “**Ṭhānan**”ti iminā sesasaddassa attham vadati. Sarūpena ṭhapanāñhi idha sesanam.

**Yaṃ-taṃ**-saddānaṃ abyabhicāritasambandhattā avuttampi tato-saddaṃ ānetvā āha “**tato yuttameva idanti yojetabban**”ti. Vipākassa ajanakaṃ vipākājanakaṃ, nissandaphalamattadāyakakammaṃ, taṃ samuṭṭhānaṃ etassāti **vipākājanakakammasamuṭṭhānaṃ**. **Vuttanayenāti** “vatthukāyavasena rūpato dve santatisīsāni, tayo ca arūpino khandhā”ti-ādinā<sup>1</sup> vuttana nayena. **Ubhayanti** nāmaṃ, rūpañca.

**Kammārammaṇapaṭisandhi-ādikāleti** ettha **ādi**-saddena sammasanādikālasaṅgaho datṭhabbo. **Tanti** abhisāṅkhāraviññānaṃ.

Yadipi “atthi rūpaṃ cittasamuṭṭhānaṃ”ti-ādi<sup>2</sup>vacanato rūpassapi viññāṇapaccayatā suttato jānitabbā, viññāṇasannissitā iṭṭhānubhavanādayo tasmim sati sabbhāvato, asati ca abhāvato yathā saddheyādivatthumhi saddhādayoti nāmassapi yuttito viññāṇapaccayatā siddhā, aṭṭhakathāyaṃ pana vuttamattham dassento “**suttato nāmaṃ -pa- jānitabban**”ti āha. Yāvadeva paccayapaccayuppannadhammattatāvibhāvanamukhena aviparītato pavattinivattisandassanaṃ paṭiccasamuppādadesanā, tāvadeva ca dhammacakkappavattananti dassento “**yasmā**”ti-ādimāha. Yasmā pana pavattinivattivibhāvanato saccadesanāva paccayākāradesanā, saccadesanā ca dhammacakkappavattanaṃ. Yathāha “idam dukkhanti me bhikkhave -pa- bārāṇasiyaṃ Isipatane migadāye anuttaraṃ dhammacakkaṃ pavattitan”ti-ādi<sup>3</sup>, tasmā “viññāṇapaccayā nāmarūpan”ti padassa saccadesanābhāvadīpanena dhammacakkappavattanabhāvaṃ dassetuṃ “**nāmarūpamattatāvacaneneva vā**”ti-ādi vuttam.

Nāmarūpapadaniddesavaṇṇanā niṭṭhitā.

1. Abhi-Ṭṭha 2. 161 piṭṭhe.

2. Abhi 1. 146 piṭṭhe.

3. Saṃ 3. 369; Vi 3. 15; Khu 9. 330 piṭṭhesu.

### Saḷāyatanapadaniddesavaṇṇanā

229. **Yathāsambhavanti** sambhavānurūpaṃ. Tena catunnaṃ tāva bhūtānaṃ sahaajātanissaya-atthi-avigatavasena cakkhāyatanādīnaṃ pañcannaṃ paccayabhāvo, vatthūsu pana hadayavatthuno chaṭṭhāyatanassa paṭisandhiyaṃ sahaajātanissaya-aññamaññavippayutta-atthi-avigatavasena, pavattiyaṃ yasmā anantaracittena saddhiṃ uppannameva vatthu ṭhitippattiyā balavabhāvena tassa nissayo bhavituṃ sakkoti, na sahaajātaṃ, tasmā purejātanissayavippayutta-atthi-avigatavasena. Itaravatthūnaṃ pañcaviññāṇasaṅkhātassa chaṭṭhāyatanassa indriyapaccayavasena ca, jīvitassa indriya-atthi-avigatavasena paccayabhāvo vuttoti daṭṭhabbo. **Ekappakārenevā**ti yathā cakkhādīnaṃ manāyatanassa paṭinīyatadassanādikkicānuvidhānato niyato ekappakārenea paccayabhāvo, na evaṃ rūpāyatanādīnaṃ, tesāṃ pana rūpārammaṇādīnā pakārantarena tassa paccayabhāvoti **“aniyamato”**ti vuttaṃ. Keci pana “niyamato”ti padaṃ “sasantatipariyāpannan”ti iminā sambandhitvā atthaṃ vadanti “ekantena sasantatipariyāpannan”ti.

**“Chaṭṭhāyatanañca manāyatanañca chaṭṭhāyatanaṃ”**ti iminā viggahena atthato, itarehi dvīhi saddatopi atthatopi sarūpataṃ dasseti. **“Cakkhādīhi saha ‘saḷāyatanaṃ’ti vuttan”**ti vuttanayena ekasesaṃ katvā manāyatanāṃ cakkhādīhi saddhiṃ “saḷāyatanaṃ”ti pāḷiyaṃ vuttaṃ “nāmarūpapaccayā saḷāyatanaṃ”ti. **Yathāvuttoti** “chaṭṭhāyatanañca manāyatanañcā”ti-ādīnā attanā vuttappakāro. **Sabbatthāti** nāmarūpasaddena, saḷāyatanasaddena ca saddasarūpatāsu, atthasarūpatāsu vā. Yadi suttantabhājanīye vipākachaṭṭhāyatanaṃ eva adhippetāṃ, atha kasmā “itaraṃ panā”ti-ādi vuttaṃ. Avipākāñhi tattha itaranti adhippetanti codanaṃ sandhāyāha **“paccayanaye panā”**ti-ādi.

Sahaajātādīsu hetu-āhārindriyapaccaye pakkipitvā **dasadhā**, tato ekaṃ apanetvā **navadhā**, tato ekaṃ apanetvā **aṭṭhadhā** paccayabhāvo veditabbo. Evamettha sādharmaṇavasena **avakāṃso**, hetu-ādi-asādhāraṇavasena **ukkāṃsoti** jhānādīnampi vasena veditabbo.

Paṭisandhiyaṃ arūpadhammā kammajarūpassa uppādakkaṇe paccayā hontīti “**pavatte**”ti viseseti. “**Pacchājātavippayuttādayo evā**”ti niyamena saha-jātapurejātavippayuttādayo nivatteti.

“Avasesamanāyatanassā”ti avasesaggahaṇampi pakaraṇato viṣiṭṭhavisayamevāti dassetum “**pañcakkhandhabhave**”ti-ādimāha, yato aṭṭhakathāyaṃ “vutthurūpan”ti-ādi vuttam. **Yathāsambhavaṃ yojetabboti nāmarūpassa** paṭisandhiyaṃ saha-jāta-aññamaññanissaya-atthi-avigatādipaccayabhāvo **sahajātādisādhāraṇapaccayabhāvo**, sampayuttavipākahetu-āhārindriyādipaccayabhāvo **sampayuttādi-asādhāraṇapaccayabhāvo** nāmassa, rūpassa pana vippayuttapaccayabhāvo yojetabbo.

Saḷāyatanapadaniddesavaṇṇanā niṭṭhitā.

### Phassapadaniddesavaṇṇanā

230. **Tadabhedavasenā**ti tassa phassassa abhedavasena, phassabhāvasāmaññenāti attho. **Na yuttam** ekasseva vacanam. **Aññassāpī**ti yathāvuttato aññassāpi. Sabbāyatanato hi ekassa phassassa asambhavacodanāyaṃ tappasaṅgena ekāyatanato anekassāpi sambhavo natthīti codanā “īdisī dhammatā natthī”ti nāpanatthāti dasseti “**aññassāpī**”ti-ādinā. **Nidassanavasenā**ti udāharaṇadassanavasena. **Ekaphassassa sambhavatoti** kāraṇāpadeso. Ekaphassasambhavassa labbhamānattā “saḷāyatanapaccayā phasso”ti bhagavatā vuttanti parihāraṃ dassentoti yojanā. **Sesesū**ti ekanti-ādīsu. Navadhā paccayatte ekam vipākamanāyatanam vibhāvaye. **Tathā cāti** ārammaṇapurejāta-atthi-avigatavasena. Yvāyaṃ paccayabhāvo yādisānam hoti, tam dassetum “**paccuppannāni -pa- sandhāya vuttan**”ti āha. Atītānāgatakālavimuttānampi ārammaṇamattatāya sambhavato āha “**ārammaṇa -pa- sandhāya vuttan**”ti. Tattha **tanti** rūpāyatanādīm.

Phassapadaniddesavaṇṇanā niṭṭhitā.

### Vedanāpadaniddesavaṇṇanā

231. **Anantarādīhī**ti anantarasamanantarūpanissayanatthivigata-paccayehi. **Upanissayeti** anantarūpanissaye. Anantarasamanantarapaccayā hi anantaratāvaseneva anantarūpanissaye antogadhā. Natthivigatapaccayā pana anantarasamantarapaccayadhammānaṃyeva tathābhāvato tadantogadhā. **Tassāti** upanissayassa.

**Sabbassāti** vipākassa, avipākassa ca.

Paṭisandhibhavaṅgacuticittasampayuttāya hi vedanāya sahajātamanosamphasso vuttanayena aṭṭhadhā paccayo hoti. Anantaro anantarādīnā, anānantaro upanissayavaseneva paccayo hoti. Sambhavadassanaṃ cetam, na tāsam manodvārikabhāvadassananti daṭṭhabbam.

Vedanāpadaniddesavaṇṇanā niṭṭhitā.

### Taṇhāpadaniddesavaṇṇanā

232. Yathā ca rasāyanajāni ojaṅjivītāni, evaṃ taṃnimittam sukham, tadapaneyyam jarādidukkaṅca dhammārammaṇabhāvena yojetabbam.

Kammaphalābhīpatthanāvasena sattā kammānipi āyūhantīti sātisayam taṇhāya vipākavedanā upanissayo, na tathā itarāti āha “**vipākā visesena -pa-avisesena itarā cā**”ti. **Itarāti** avipākāti attho. “**Sukhamicceva bhāsītā**”ti idaṃ iṭṭhasabhāvaṃyeva upekkham sandhāya vuttam, na aniṭṭhasabhāvam. Tenāha “**upekkhā panā**”ti-ādi. **Sabbassāti** avītarāgassa, vītarāgassa ca vedanāvato puggalassa.

**Vedanāpaccayā evāti** ayaṃ niyamo niyamantarānivattanaparoti nāssa paccayantarānivattanatthā daṭṭhabbā. Etena paccayuppannantarapaṭikkhepopi nivattito hoti.

Taṇhāpadaniddesavaṇṇanā niṭṭhitā.

### Upādānapadaniddesavaṇṇanā

233. **Purimadiṭṭhinti** “sassato attā”<sup>1</sup>ti pageva abhiniviṭṭham  
 sassatagāham sandhāya vuttam. Tenāha “**attaggahaṇam -pa- datṭhabban**”ti.  
**Upādiyamānanti** gaṇhantaṃ. **Lokoti vā gahaṇanti** yaṃ “loko sassato”ti  
 gahaṇam, sā diṭṭhīti attho. Tenāha “**Diṭṭhupādānabhūtan**”ti.  
**“Dhammasaṅkhepa -pa- diṭṭhimattamevā”**ti idaṃ byavahitānaṃ padānaṃ  
 sambandhadassanaṃ. Tattha saṅkhepato taṇhādaḷhattaṃ, saṅkhepato  
 diṭṭhimattameva cattāri upādānānīti adhippāyo.

**Dhammasaṅkhepavithhāratoti** samudāyabhūgato dhammasaṅkhepavithhārato  
 tadavayavabhūtaṃ saṅkhepaṃ, vitthāraṅca niddhāreti.

Sassatagāhapubbaṅgamo, ucchedagāhapubbaṅgamo ca attagāhoti  
 yojanā. **Tesanti** yathāvuttasassatucchedagāhānaṃ mūlabhāvena vidhāyakattā  
**sāmbhūto. Ādinā vāti** “paṭhamaṃ attavādupādānaṃ”ti-ādinā vā vākyena.

Yena bhavassādena gadhitacitto bhavanibbattaṃ kammaṃ katvā  
 upapanno, sā bhavanikanti santāne cirānubāndhā abhiṇhuppattikā  
 upapannamattassa uppajjatīti āha “**yadipi -pa- pavattitabbattā**”ti.  
 Arahattamaggavajjhataṃ bhavarāgassapi kāmupādānabhāvo atthevāti āha  
**“taṇhādaḷhattaṃ na hotīti maññamāno”**ti. Bhavarāgopi hi savisaye daḷhaṃ  
 pavattatīti. **Sabbāpi taṇhā kāmupādānanti** etthāpi tassa  
 arahattamaggavajjhataṃ vuttāti ānetvā yojetabbaṃ.

**Uppattiṭṭhānabhūtā** na ārammaṇabhūtāti adhippāyo. **Tenāti** khandhānaṃ  
 ālayabhāvena. **Ārammaṇānantarapakatūpanissayāti** ārammaṇūpanissaya-  
 anantarūpanissayapakatūpanissayā. **Anantarapaccayādīnanti**  
 anantarasamanantara-ārammaṇapaccayādīnaṃ.

Upādānapadaniddesavaṇṇanā niṭṭhitā.

### Bhavapadaniddesavaṇṇanā

234. “**Bhavatī**”ti idaṃ upapattibhavanibbacanaṃ. **Dvayassāti** kammupapattibhavadvayassa. **Nippādanaphalaṃ** phalassa uppādanasamatthatā. **Nibbattanaṃ** nippādanaṃ.

“Bhagavaṇṇamūlakā”ti<sup>1</sup> viya “saññāvaṇṇabhavo”ti vattabbe atthi-atthe vā **vaṇṇ**-saddo luttaniddiṭṭhoti āha “**saññābhavo**”ti. **Tassa vā attheti** tassa vantusaddassa atthe, atthi-attheti attho. **Akāraṃ katvā**ti yathā “pītisukhaṃ assa atthi”ti atthe akāraṃ katvā uppādetvā jhānaṃ pītisukhanti vuccati, evaṃ saññā assa atthīti sañño, bhavo, sova **saññābhavo**. **Ekasminti** rūpakkhandhe eva. **Pavattattā**ti pavattakapavattanaṭṭhānānaṃ abhedepi upacāravasena bhinnaṃ viya katvā dasseti.

**Kammasaṅkhātanti** “kamman”ti vattabbataṃ, kammakoṭṭhāsataṃ vā. “Cetanāhaṃ bhikkhave kammaṃ vadāmi”ti-ādinā<sup>2</sup> suttepi cetanāya kammabhāvo āgatova. Nippariyāyena pana cetanāva kammabhavoti vuttamatthaṃ abhidhammapāḷiyāva sādheṇto “**vuttañhi**”ti-ādimāha. Imāya hi vedanāsaññāviññāṇakkhandhehi, manāyatanamanoviññāṇadhātūhi, saṅkhārakkhandhadhammāyatanadhammadhātu-ekadesena ca kammabhavassa sampayuttataṃ vadantiyā dhātukathapāḷiyā tassa cetanābhāvo dīpitoti.

**Dhammabhedatoti** cetanācetanāsampayuttabhāvena, kusalākusalābyākatabhāvena ca dhammavibhāgato. “Punavacanan”ti imināva punaruttidosāpatti paṭiññātāti parassa āsaṅkaṃ dassento “**sāttakamevidaṃ punavacananti etaṃ na yuttanti ce**”ti āha. **Bhavekadesabhāvenā**ti kammabhavassa ekadesattā saṅkhārānaṃ. Tena yesaṃ dhammānaṃ samudāyo bhavo vutto, tadekadesā saṅkhārā, samudāyekadesā ca atthato bhinnā evāti vuttamevetanti dasseti. Puna yathāvuttameva bhedaṃ manasi katvā atthato punavacanaṇṇabhāvaṃ dassento “**parena vā**”ti-ādimāha.

**Antogadheti** kāmaṇṇavādi-antogadhe saññābhavādike.  
**Kāmaṇṇavādiketi** kāmarūpārūpabhava.

**Upādānabhedanti** kāmuṇṇavādi-upādānavisesaṃ.

1. Am 3. 152, 163, 340, 553 piṭṭhesu.

2. Am 2. 363 piṭṭhe.

**Tenāti** sīlabbatupādānena. **Vakkhamānenāti** “idaṃ sīlabbataṃ nāma”ti-ādinā<sup>1</sup> **aṭṭhakathāyaṃ** vakkhamānena pakārena. **Purāṇaṃ** brahmaṇḍalingakhandapurāṇādi<sup>2</sup>. “Setavadhayajjaṃ ārabhate bhūtikāmo”ti-ādinā<sup>3</sup> pasumāraṇavidhānayutto yaññavidhi **pasubandhavidhi**.

Attano suddhimaggaparāmāsamattattā sīlabbatupādānassa attavādupādānanimittaṃ vuttaṃ.

**Maggapaccayā hontī** micchāniyyānasabhāvattā. Anantarassa pana kāmakammabhavassa anantarasamanantara-anantarūpanissayanatthivigatāsevanapaccayehi upādānassa paccayabhāvo pākaṭoyevāti na vutto.

Bhavapadaniddesavaṇṇanā niṭṭhitā.

### Jātijarāmarāṇādīpadaniddesavaṇṇanā

235. **Upapattibhavuppattīti** upapattibhave, upapattibhavabhāvena vā upādinnakakhandhānaṃ uppatti. **Jāyamānassa** khandhassa. **Jāti** nibbattivikāro. Upapattibhavopi jātiyā paccayo. Kasmā? Upapattibhave asati jātiyā abhāvāti yojanā. “**Jāyamānarūpapadaṭṭhānatā**”ti-ādināpi tassa jātiyā paccayabhāvāmyeva vibhāveti.

Satipi sukkasoṇitādike pitugatavisesādikāraṇe bāhire paccaye tassa pana aniyatattā, hīnapanītādivisesassa ca adhippetattā vuttaṃ “**ajjhata -pabhāvā**”ti.

Jātijarāmarāṇādīpadaniddesavaṇṇanā niṭṭhitā.

### Bhvacakkakathāvaṇṇanā

242. Sambandhaṃ itaṃ gatanti **samitaṃ**. Tenāha “**saṅgatan**”ti.

**Bhvacchando** bhavarāgo. **Tassārūpakathāsavananti** tassa bālabhāvassa ayuttakāritāya anucchavikakathāsavanam. Etena parūpavādahetukādidukkaṃ dasseti, “**kammakāraṇādassanan**”ti iminā daṇḍahetukaṃ, itarena

1. Abhi-Ṭṭha 2. 178 piṭṭhe.

3. Visuddhi-Ṭṭi 2. 332 piṭṭhepi.

2. ...khandhapurāṇādi (Ka)



duggatinibbattihetukam. **Gamentīti** nāpenti. Phalenāpi hi abyabhicārinā hetu nāyati, vuṭṭhinimittena viya mahoghena uparidese vuṭṭhinipāto. Tena vuttam “**bodhentī**”ti.

**Visesanivatti-attho mattasaddo** “avitakkavicāramattā”ti-ādīsu<sup>1</sup> viya. Appahīnāvijjā kāraṇalābhe uppatti-arahaṭāya samīpeyvāti āha “**sannihitabhāvakarāṇenā**”ti. **Vedetīti** vedayati. Tassa atthavacanam **anubhavatīti**. Vedaṃ vā nāṇam karoti uppādetīti **vedeti**. Tassa atthavacanam **jānātīti**. **Vediyatīti** pana kammakattukammānam vasena niddesoti tassapi attham dassento “**jānāti, nāyati cā**”ti āha. **Ca-saddatthoti** samuccayattho, brahmādinā ca kārakena, attanā ca vedakena rahitanti attho. **Ca-saddatthasamāsanti** dvandasamāsamāha.

**Catubbidhampi vā suññatanti** dhuvabhāvādisuññatam, attādisuññatañca sandhāya vadati.

**Pubbantatoti** atītakoṭṭhasato. Vedanāvasānampi bhavacakkam paripuṇṇamevāti dassetum “**vedanā vā**”ti-ādi vuttam. Avijjāgahaṇena vā taṇhupādānāni, saṅkhāraggaṇena bhavo, viññāṇādiggaṇena jātijarāmarāṇāni, sokādayo ca gahitāti evampi **vedanāvasānam bhavacakkanti yuttamevetam**. **Taṇhāmūlake cāti** taṇhupādānaggahaṇena avijjā gahitāti-ādinā yojetabbam. Tenāha “**dvinnam -pa- hotī**”ti. Tattha **dvinnanti** purimapacchimānam ubhinnaṃ hetuphalavajjānam. **Viparītābhinivesam karontīti** nimittam kattu-upacārena vadati. Anupacchedameva pakāsetīti yojanā.

Hetuphalasandhi, phalahetusandhi, punapi hetuphalasandhīti evam hetu-ādīpubbakā **hetuphalahetupubbakā**. **Hetuphalahetuphalavasenāti** avijjādihetu, viññāṇādīphala, taṇhādīhetu, jātiphalavasena. Upasaggavisesena atthaviseso hotīti “**ākiriyantī**”ti padassa **pakāsīyantīti** attho vutto. **Kilesakammavipākāti** avijjādike vedanāpariyosāne vadati. **Vipākakilesakammehīti** viññāṇādīhi bhavapariyosānehi. Puna kammaassa vipākasambandho vuttanayattā na gahito.

---

1. Abhi 1. 2 piṭṭhe.

“**Vatṭānī**”ti ca idaṃ “tīṇi vatṭānī”ti viggahavasena labbhamānaṃ gahetvā vuttaṃ.

“Purimakammabhavasmiṃ moho”ti-ādinā<sup>1</sup> aṭṭhakathāya āgatattā āsannapaccakkhataṃ sandhāya vuttaṃ “**imissā**”ti. **Vibhaṅgapāliya vasena dassitaṃ**, tasmā na aṭṭhakathāya pubbāparavirodho yathāpāṭhaṃ atthassa pakāsitattāti adhippāyo. Tattha cetanāsampayuttānañca cetanāya ca saṅkhārabhāvena, kammabhavabhāvena ca vattabbamevāti pālidvayādhippāyavivaraṇavasena dassetuṃ “**tatthā**”ti-ādi vuttaṃ. **Bhavassāti** upapattibhavassa. “Bhavo”ti vuttā cetanāsampayuttāti sambandho. **Gahaṇanti** nikāmanavasena ārammaṇassa gahaṇaṃ. Tenāha “**kāmupādānaṃ kiccenāhā**”ti. Itarāni kiccenāhāti yojanā. **Tīsu atthavikappesūti** “taṃ kammaṃ karoto purimā cetanāyo”ti-ādinā<sup>1</sup> vuttesu tīsu āyūhanacetanānaṃ atthavikappesu. Nanu ca tatiye atthavikappe āyūhanassa avasāne cetanā na vuttāti? Yadi pi sarūpato na vuttā, “taṃsampayuttā”ti pana saddato padhānabhāvena vuttassa āyūhanassa appadhānabhāvena vuttā avasāne pacchato vuttā viya hotīti imaṃ pariyāyaṃ sandhāya “**tīsupi -pa- avasāne**”ti vuttaṃ.

Nippariyāyena pana yesu āyūhanassa avasāne cetanā vuttā, te dassetuṃ “**dvīsu -pa- āhā**”ti vuttaṃ. **Tatiye** atthavikappe **vutte** āyūhanasaṅkhāre taṃsampayuttāti āhāti yojanā. **Kammaṃ paccayabhūtaṃ** saṅkhārapaccayaṃ. Tena “kammakaraṇakāle”ti ettha kamma-saddena sabbassapi saṅkhārassa gahitaraṃ dasseti. Tenāha “**na kammasampayuttamevā**”ti.

**Kammānevāti** kammāniyeva. Vipākadhammatāya **kammasarikkhakā**. Sahajātakotiya, upanissayakotiya ca tassa kammaṃ upakāraṇatī **tadupakāraṇakā**. **Samkhippanti** samkhipiyanti saṃyūhīyanti. “Samkhippanti etthā”ti adhikaraṇasādhanavasena saṅkhepasaddassa atthaṃ vatvā puna kammasādhanavasena vatthuṃ “**saṃkhipiyatī**”ti-ādi vuttaṃ.

---

1. Abhi-Ṭṭha 2. 182 piṭṭhe.

**Tatthāpīti** “kamman”ti vuttakammasambhārepi. **Gamanadhammanti** bhaṅgupagamanadhammaṃ. Tena **ittaranti** bhaṅgaparanti vuttaṃ hoti. **Tenāti** vinassanadhammatādīpakena ittarasaddena. **Nissārataṃ** attasārābhāvaṃ dīpeti. Evaṃ “ittaran”ti-ādinā aniccaṃ calaṃ ittaraṃ addhuvanti catunnaṃ padānaṃ atthavisesavācitaṃ dasseti. **Ṭhānasoti** ettha vuttaṭṭhānaṃ nāma paccayo. **Aññampīti** aññattha vuttaṃ. **Tassa tassa** phalassa. Dhammamattasambhave sati vaṭṭupacchede satīti yojanā. **Evanti** vuttappakārena samuccayatthe ca-sadde sati.

Saccāniyeva pabhavoti samānādhikaraṇapakkhaṃ sandhāyāha “**saccappabhavatoti saccato**”ti. “Yassa pahānatthaṃ bhagavati brahmacariyaṃ vussatī”ti evambhūtaṃ ariyasaccaṃ **visesaṃ akatvā**.

**Tehi** sokādīhi. “Sokadomanassupāyāsā avijjāya aviyogino”ti-ādinā pubbe vuttanayena **siddhāya avijjāya**. **Attanoyevāti** paccayuppannaṃ anapekkhitvā attanoyeva pavattasāṅkhātakkiccatto.

**Sokādayopi hīti** ettha **hi**-saddo hetu-attho. Yasmā “sokādayo paccayāyattā avasavattino”ti idaṃ “jātipaccayā -pa- sambhavanti”ti etena vacanena siddhaṃ, tasmā taṃ “attā socatī”ti-ādidassananivāraṇanti attho.

Sati ca pariggahe rajjaṃ viya gatiyo anekānatthānubandhanā, tāhi ca viññāṇassa upaddutatātī dassetuṃ “**saṅkhārapariggahitaṃ -pa- rajje**”ti vuttanti evaṃ vā ettha attho daṭṭhabbo. Yathā-upaṭṭhitāni kammādīni cuti-āsannajavanchi parikappetvā viya gahitāni paṭisandhiviññāṇenapi parikappitāni viya hontī, taṃ panassa parikappanaṃ atthato ārammaṇakaraṇamevāti vuttaṃ “**pari -pa- to**”ti. Saṅkappanaṃ vā parikappananti vuttaṃ “**vitakkena vitakkanato**”ti. Sasambhāracakkhu-ādayo saḷāyatanassa **patitṭhāviseso**.

Yadākārāya jātiyā yadākāraṃ jarāmarāṇaṃ sambhavati, sambhavantañca<sup>1</sup> yathānupubbaṃ pavattaṃ, so attho **jātipaccayasambhūtasamudāgataṭṭho**,

---

1. Sambhūtañca (?)

sahitassa samuditassa puggalassa jīraṇabhijjanāvattā dhammā jarāmaraṇāpadesena vuttā, sā ca nesam avattā jātipubbikā, te ca samuditā eva pavattantīti evam jātito jarāmaraṇassa sambhūtasamudāgataṭṭho veditabbo. Jātito jarāmaraṇam na na hoti hotiyeva ekantena jātassa jarāmaraṇasambhavato, na ca jātim vinā hoti ajātassa tadabhāvototi jarāmaraṇassa jātipaccayataṃ anvayabyatirekehi vibhāveti “**na jātito**”ti-ādinā. **Itthanti** jātipaccayā jarāmaraṇassa nibbattākāraṃ vadati.

**Nirodhā nirodhasaṅkhātanti** paccayanirodhā paccayuppannanirodhasaṅkhātāṃ. Anulomadesanāya ca vemajjhato paṭṭhāyāti yojanā.

**Apuññābhisāṅkhārekadeso sarāgo** rāgena sahajetaṭṭhoti katvā. **Sabbopi apuññābhisāṅkhāro sarāgo** pahānekaṭṭhabhāvato. Yasmā pana akusaladhammo akusaladhammassa sabhāgo, anakusaladhammo visabhāgo, yathārahaṃ paccayo ca hoti, tasmā “apaṭipakkkhabhāvato, rāgappavaḍḍhako”ti ca vuttāṃ. “Tadeva viññāṇam sandhāvati saṃsarati”ti micchābhinivesasabbhāvato saṃsaraṇakiriyāyapi sabyāpāratā viññāṇassa vuttā. Sabyāpāratābhinivesabalavatāya, saṅkanti-abhinivesabalavatāyāti paccakaṃ yojetabbaṃ. “**Asahavattanato, sahavattanato**”ti etena asahavutti vinibbhogo, sahavutti avinibbhogoti dasseti.

Sabhāvādhigamanimittatā **obhāsanam**. Cakkhādisannissayena hi pañcaviññāṇāni rūpādisabhāvaṃ upalabhanti. **Itare** phusanasāṅgatisannipātaṭṭhā. **Channanti** channampi samphassānaṃ.

**Ādānanti** upasaddena vināpi daḥhagāho adhippetoti āha “**ādānaṭṭho catunnampi upādānānaṃ samāno**”ti. **Gahaṇanti** nikāmanavasena visayassa paṭicchannanti vuttāṃ “**gahaṇaṭṭho kāmupādānassā**”ti. **Itaresanti** diṭṭhupādānādīnaṃ. **Tasmāti** vibhattiyā aluttabhāvato. **Tenāti** khipanasaddena. Hāni vā khīṇabhāvo khayoti “**khayaṭṭho vā**”ti-ādi vuttāṃ. **Dvinnanti** jarāmaraṇānaṃ. Maraṇūpanayanarasattā vā jarāyapi maraṇaṭṭho eva dassito.

Nīyanti gamentīti **nayā**, ekattādayo. Kēhi nīyantī? Avijjādi-atthehīti imamatthamāha “**avijjādi**”ti-ādinā. **Sena bhāvenāti** sakena avijjādibhāvena, taṃ amuñcivā eva. Na hi avijjādivinimuttaṃ ekattaṃ nāma kiñci paramatthato atthi. **Sena bhāvenāti** vā sakena ekattādibhāvena. Avijjādisu viññāyamāno hetuphaladhammānaṃ ekasantatipatitādisankhāto ekattādibhāvo teneva sabhāvena ñāyati, na avijjādibhāvenāti. Te hi netabbāti **tesaṃ nayā. Atthā eva vā** avijjādayo. Anekepi samānā dhammā yena santānānupacchedena “ekan”ti ñāyanti voharīyanti, so tatha karaṇabhāvena vattabbataṃ arahati, tathā itarepīti āha “**ekattādīhi ca atthā ‘ekan’ti-ādinā nīyantī**”ti. Tatha **nīyantīti** ñāyanti, paññāpīyanti ca. Purimappacchimānaṃ dhammānaṃ nirodhuppādanirantarātāya nāmakāyassa, sambandhavuttitāya rūpakāyassa, ubhayassa ca aññamaññasannissitatāya duviññeyyanānato ekībhūtassa viya ghanabhāvappabandho hetuphalabhāvena sambandho sammā tānoti santāno, tassa anupacchedo tathāpavatti ekattanti āha “**santānānupacchedo ekattan**”ti.

**Sambandharahitassāti** hetuphalabhāvena aññamaññasambandhabhāvarahitassa. **Sattantaroti** añño satto. **Ucchedadiṭṭhimupādiyatīti** yathānurūpakāraṇato phalappavattim̄ asamanupassanto nānāsantāne viya asambandhanānattadassanato hetubhāvarahitānaṃ nippayojanānaṃ purimuppānānaṃ dhammānaṃ nirodhe hetuniyamābhāvato ekantena uppattī, na yuttā, tathā santānena uppattī, sadisabhāvena uppattī, samānajātidesapariṇāmaṃvayarūpabalasaṅghānānaṃ uppattī na yuttāti-ādīni vikappento ucchedadiṭṭhim̄ gaṇhāti.

**Kasmā uppattī na siyāti** vālikāhi viya tilehipi telassa, ucchuto viya gāvītopi khīrassa aññābhāvato kena kāraṇena tehi tesaṃ uppattī na siyā, itarehi eva ca nesaṃ uppattī hotīti **tasmāti** aññassa aññato uppattiyāṃ sabbassa sabbaso uppattiyā bhavitabbaṃ, na cetāṃ atthi, tasmā. Yasmā niyatīvādī anurūpā hetuto phaluppattim̄ na icchati, sabhāvasiddhameva ca dhammappavattim̄ icchati, tasmā “**avijjamānepi hetumhī**”ti vuttam̄. Sabhāvasiddhā eva hi acchejjasuttāvutābhejjamaṇi

viya kamalaṅghanarahitā tathā tathā sarīrindriyasukhādibhāvaparīṇāmāya niyatiyāva kāyā samāgacchanti, yato gatijātibandhā, apavaggo ca hotīti niyatīvādo. Tenāha “**niyatatāya -pa- pavattantī**”ti. Niyati-attho vuttōyeva.

**Etassa** atthassa **sādhakaṃ** suttaṃ. Ākulameva, ākulabhāvo vā **ākulakaṃ**. **Jaṭitā**ti heṭṭhupariyavasena pavattamānehi kilesakammavipākehi jātajaṭā. **Nīdanti** kulāvakaṃ. **Saṃsāranti** idha sampattibhavappabandhamāha apāyādipadehi duggatippabandhassa vuttatā.

Bhavacakkakathāvaṇṇanā niṭṭhitā.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

243. **Taṃ** paṭiccasamuppādaṃ. **Ekekacittāvaruddhanti** abhidhammabhājanīye viya ekekaṃ citte avaruddhaṃ antogadhaṃ akatvā. **Asahajātānañca** “asahajātānaṃ, sahajātānañcā”ti evaṃ paṭhamapade ekasesaniddeso daṭṭhabbo. “Saṅkhārapaccayā viññāṇaṃ”ti asahajātāyeva paccayapaccayuppannā dassitā vipākaviññāṇasseva adhippetatā. “Avijjāpaccayā saṅkhārā, viññāṇapaccayā nāmarūpaṃ”ti<sup>1</sup> ca evamādisu asahajātā, sahajātā ca. “**Ekekena nāyena**”ti purātano pāṭho, etarahi pana “ekekena catukkena”icceva bahūsu potthakesu pāṭho. **Nayacatukkavārā**ti nāyesu catukkānaṃ vārā, avijjāmūlakādisu navasu nāyesu paccekāṃ paccayacatukkādīnaṃ catunnaṃ catukkānaṃ “nāmapaccayā chaṭṭhāyatanan”ti-ādi visesabhinnā cattāro vārāti attho. **Vavatthitā**ti yathāvuttavisesena asaṃkiṇṇā. **Catukkānanti** vāracatukkānaṃ vārasoḷasakassa nayabhāvatoti adhippāyo.

### 1. Paccayacatukkavaṇṇanā

Paccayasahitapaccayuppannāni aṅgabhāvena vuttāni, na kevalaṃ paccayā. Tasmā “chaṭṭhāyatanapaccayā phasso”ti ettha na chaṭṭhāyatanassa aṅgatā.

1. Abhi 2. 142 piṭṭhe.

Tena vuttaṃ “**na, tassa anaṅgattā**”ti. **Evañca katvāti** paccayasahitassa paccayuppannessa aṅgabhāvato. **Tīsu pakāresūti** “paṭhamo sabbasaṅgāhikaṭṭhenā”ti-ādinā<sup>1</sup> aṭṭhakathāyaṃ vuttesu tīsupi pakāresu. **Paccayavisesādīti** ettha nāmaṃ, chaṭṭhāyatanañca paccayaviseso. **Ādi-**saddena yoniviseso, āyatanānaṃ apāripūripāripūribhavaviseso ca gahito. Te hi dutiyavārādīnaṃ nānattakarā. **Atthavisesenāti** yadipi aññattha “saḷāyatanapaccayā phasso”ti saḷāyatanapaccayo vutto, tathāpi saḥajātādīnaṃmasannissayena pavattanato nāmapaccayāpi so hotīti paṭiccasamuppādassa nānāyavicittatānumitassa gambhīrabhāvassa vibhāvanasaṅkhātena, anavasesanāmapaccayadassanasāṅkhātena ca atthavisesena. Tathā hi “yehi ānanda ākārehi yehi liṅgehi yehi nimittehi yehi uddesehi nāmakāyassa paññatti hoti, tesu ākāresu -pa- uddesesu asati api nu kho rūpakāye adhivacanasamphasso paññāyethā”ti<sup>2</sup> phassassa nāmapaccayatāvibhāvanavasena mahānidānadesanā pavattā. Tathā “nāmarūpapaccayā phassoti iccassa vacanīyan”ti<sup>3</sup> “nāmarūpapaccayā”ti vadantena “nāmapaccayā”tipi vuttameva hotīti.

Vāracatukke “saṅkhāro”ti vuttaṃ, sokādayo na vuttā, purimasmim vāradvaye rūpaṃ na vuttaṃ, vārattaye saḷāyatanānaṃ na vuttanti yojetabbānaṃ.

**Sabba -pa- raṇatoti** sabbassa viññāṇassa pavattiṭṭhānabhūtasabbabhavasādhāraṇato, viññāṇassa vā pavattiṭṭhānabhūtasabbabhavasādhāraṇato. **Samānaṃ phalaṃ** samāno **paccayo** saḥajātādīpaccayehi upakattabbato, upakārakato ca. **Tassa** viññāṇassa. **Viññāṇāharaṇanti** vipākaviññāṇanibbattaṇaṃ. **Assa** viññāṇassa.

**Gatisūcakoti** hi-saddaṃ loke gati-atthaṃ vadantīti katvā vuttaṃ. “Vigatan”ti ettha vi-saddo paṭisedhadīpakoti dve paṭisedhā pakatim nāpentīti āha “vigatatānivāraṇavasena gati eva hotī”ti.

**Tidhā catudhā pañcadhā vāti** ettha saññāmanasikārādayo saḥajātānissaya-atthipaccayavasena tidhā, phassacetanādayo tesañceva

1. Abhi-Ṭṭha 2. 190 piṭṭhe.

2. Dī 2. 53 piṭṭhe.

3. Dī 2. 48 piṭṭhe.

āhārādīnañca vasena catudhā, vedanāvittakkādayo tesañceva jhānindriyādīnañca vasena pañcadhā. Yathā samādhi, evaṃ vīriyampi daṭṭhabbāṃ. Tampi hi adhipatindriyamaggapaccayehi **chadhā** paccayo hoti.

“**Vacanasena**”ti iminā imasmiṃ catukke sahaḥajātapaccayaṃ dhuraṃ katvā desanā pavattāti tesāṃ adhippāyoti dasseti. **Atthoti** paccayadhammo. **Katthacīti** kismiñci vāre attano paccayuppanassa yathāsakehi paccayo na na hoti. “**Atthato**”ti ca pāṭho. “Bhavapaccayā jāti”ti-ādi na vattabbaṃ siyā, vuttañca taṃ. Tasmā sahaḥajātapaccayavaseneva paṭhamacatukko vuttoti na gahetabbanti dasseti. Tenāha “**na ca taṃ na vuttan**”ti-ādi. Imassa ca “bhavapaccayā jāti-ādi na vattabbaṃ siyā”ti iminā sambandho vedittabbo. **Paccayavacanamevāti** “avijjāpaccayā”ti-ādīsu vuttapaccayavacanameva ca. **Tesanti** tesāṃ ācariyānaṃ. Ayojetvā vuttanti sambandho. Kathaṃ pana vuttanti āha “**sāmaññena -pa- sandhāya vuttan**”ti. Ettha ca “**sahaḥajātasūcakan**”ti-ādinā yathādhippetassa atthassa vacanato asiddhimāha, “**sahaḥajātato**”ti-ādinā pana atthāpattito. Asambhave hi aññassa atthato sījheyya vacanato vā atthato vā adhippetatthasādhanāti.

**Aññatthāti** aññasmiṃ sutte. Atītaddhaṃ niddhāretvā paccuppanānāgatehi saddhiṃ **addhattayadassanattarāṃ**. **Tarādesanāpariggahattanti** mahānidānadesanāpariggahattarāṃ. So ca ubhinnaṃ desanānaṃ aññamaññaṃ saṃsandanaabhāvadassanattarāṃ. Evaṃ sabbaññubuddhabhāsītā desanā aññadatthu saṃsandatīti.

**Imassāti** imassa tatiyavārassa.

Aparāpekkhatāya, aparikiliṭṭhupapattitāya, asuci-amakkhitatāya kāmāvacaradevānaṃ, sabbesañca brahmānaṃ tathā upapajjanato ca opapātikayoniyā padhānatā vedittabbā. **Saṅghanidassanasena**ti opapātikayoniyā eva saṃsedajayoniyā saṅgahassa nidassanasena udāharaṇavasena. Ārammaṇapaccayassāpi phassassa satipi pavattihetubhāve so pana sahaḥajātipaccayabhūtaṃ ajjhattikassa chaṭṭhāyatanassa viya na sātisayoti vuttāṃ “**ārammaṇapaccayo cettha pavattako na hoti**”ti.



**Kesañcīti** paripuṇṇāyatanānaṃ gabbhaseyyakānaṃ. “**Pacchima -pa-sadā sambhavati**”ti idaṃ gabbhaseyyakānaṃ viya itarayonikānaṃ kamena āyatanuppatti natthīti vuttaṃ. Tathā cāha aṭṭhakathāyaṃ “sahuppattidīpanato”ti.

Paccayacatukkavaṇṇanā niṭṭhitā.

## 2. Hetucatukkavaṇṇanā

244. **Abhāvatoti** bhāvābhāvato. Yañhi jātikkaṇamattēyeva bhavati, na tato paraṃ, taṃ jātiyā avigatapaccayo siyā avigatapaccayaniyamasabbhāvato. Bhavo pana yasmā jātikkaṇato parampi bhavati, tasmā na so tassā avigatapaccayo hoti. Tena vuttaṃ “**tato uddham bhāvatoti attho**”ti. **Bhaveti** bhavapade, bhave vā nipphādetabbe. Esa nayo **jāti-ādīsūti** etthāpi. “**Yathā panā**”ti-ādinaṃ “avigatapaccayassa abhāvato, niyamābhāvato cā”ti vuttānaṃ hetūnaṃ vuttanayena abyāpibhāvavibhāvanena akāraṇataṃ dasseti ayāvabhāvino paccayuppannaṃ, paccayadhammaṃ ca avigatapaccayabhāvadassanato. **Saṅkhārakkhandheti**-ādi maggasodhanavasena vuttaṃ. Tassa parihāraṃ sayameva vadati. So khaṇo etassa atthīti taṅkhaṇiko, na taṅkhaṇiko **ataṅkhaṇiko**, tassa sabbhāvā<sup>1</sup>, ayāvabhāvikasabbhāvāti attho. Yathā pana hetū honti, taṃ dassetuṃ “**saṅkhatalakkhaṇānaṃ panā**”ti-ādimaṃha.

**Evanti** evaṃ yathāvuttanaye sati, evaṃ santeti attho. “**Na hi -pa- atthī**”ti iminā jāti-ādīnaṃ avigatapaccayavasena paccayuppannabhāvo viya paccayabhāvopi natthīti dasseti. Tattha kāraṇamaṃha “**asabhāvadhammattā**”ti.

Kathaṃ pana asabhāvadhammānaṃ jāti-ādīnaṃ paccayuppannatā, paccayatā cāti āha “**jāyamānānaṃ panā**”ti-ādi. **Tassāti** jātijarāmaṇassa. **Vattabbapadesoti** “ṭhapetvā”ti vattabbapadeso. Ko pana soti? Yathāvuttaṃ nāmaṃ, nāmarūpaṅca saṅkhārakkhandhena, rūpakkhandhena ca jarāmaṇānaṃ.

1. Atakkhaṇikasambhavā (Ṭikā)

saṅgahitattā. “**Yo bhavo jātiyā paccayo**”ti etena bhavaṣaṅgahitānīpi jāti-  
ādinī jātiyā appaccayattā eva “ṭhapetvā”ti na vuttānīti dasseti,  
paccayabhāvāsankā eva nesam tassā natthīti adhippāyo. Teneva  
**ṭhapetabbagahetabbaviseṣe satīti** sāsankam vadati.

Hetucatukkavaṇṇanā niṭṭhitā.

#### 4. Aññamaññacatukkavaṇṇanā

246. **Paccayuppanassāti** paccayuppanabhāvino. **Visum ṭhitassāti**  
bhavena asaṅgahitassa. **Sappadesameva gahitam** idha  
vedanādikkhandhattayasseva adhippetattā, nirulhattā ca. Paccayuppanam  
ṭhapetvā paccayabhūtamyeva nāmam gahitam, avigatapaccayaniyamābhāvo  
viya bhava upādānassa aññamaññapaccayaniyamābhāvoti yojanā.  
**Vuttanayenāti** “saṅkhatalakkhaṇānam panā”ti-ādinā vuttanayena.

Aññamaññapaccayo viya **aññamaññapaccayoti** ayamatto  
idhādhippetoti dassento “**aññamañña -pa- adhippeto siyā**”ti āha. Tathā ca  
vadanti “aññamaññañcetta na paṭṭhāne āgata-aññamaññavasena  
gahetabban”ti. **Cakkhāyatanupacayādīnanti** uparūpari citāni viya  
uppannacakkhāyatanādīni, cakkhāyatanādīnam vā upatthambhakāni  
cakkhāyatanupacayādīni.

Aññamaññacatukkavaṇṇanā niṭṭhitā.

#### Saṅkhārādimūlakanayamātikāvaṇṇanā

247. Yāpīpi sāmāññato gataviseṣo, tathāpi sāmāññaggahaṇena nayagato  
viseṣo sarūpato dassito hotīti “**nāmapaccayā avijjā**”ti vatvāpi  
nāmapaviseṣānam tassā paccayabhāvo dassetabboti āha “**nāmapaviseṣānam -pa-  
vuttā**”ti. “Yadeva pana nāman”ti-ādi kasmā vuttam, nanu nāmaggaṇena  
aggahitopi jāti-ādi bhavaggahaṇena gahitoti dassitovāyamattothi codanam  
sandhāyāha “**bhavaggahaṇena cā**”ti-ādi. **Idhāpīti** “bhavapaccayā avijjā”ti  
idhāpi.

**Na siyāti** “avijjāpaccayā avijjā”ti vuttaṃ na siyā. **Tasmāti** yasmā sāmaññacoditaṃ visesacoditameva na hoti, tasmā. **Soti bhavo. Tenāti** sabhāvāsabhāvadhammasaṅgahaṇena.

Upādānassapi bhavekadesattā vuttaṃ “**upādānapaccayā -pa-aggahite**”ti. “Bhavapaccayā jāti”ti idaṃ vacanaṃ sandhāyāha “**bhavasaddo -pa-vuccamāno**”ti. “Nāmapaccayā avijjā”ti ettha paccayuppannaṃ ṭhapetvā paccayassa gahaṇato avijjāvinimuttā eva cattāro khandhā nāmasaddena vuccantīti āha “**na nāmasaddo niravasesabodhako**”ti. Na cettha ekaṃsato kāraṇaṃ maggitabbaṃ. Yena **bhava-saddo** niravasesabodhako, **na nāmasaddo**ti āha “**evaṃsabhāvā hi etā niruttiyo**”ti. **Iminā adhippāyenāti** bhavasaddo niravasesabodhako upādinnacatukkhandhavisayattāti iminā adhippāyena. Jāyamānādiddhammavikārabhāvato jāyamānādikkhandhapaṭibaddhā jāti-ādayo vucceyyuṃ, na pana jāti-ādipaṭibaddhā jāyamānādikkhandhāti na ekacittakkhaṇe jāti-ādīnaṃ avijjāya paccayabhāvo sambhavatīti imamatthamāha “**jāyamānānaṃ panā**”ti-ādīnā. Nānācittakkhaṇe pana jāti-ādayo avijjāya upanissayapaccayo hontīti “**ekacittakkhaṇe**”ti visesitaṃ. **Tenevāti** asambhaveneva.

Mātikāvaṇṇanā niṭṭhitā.

### Akusalaniddesavaṇṇanā

248-9. **Tanti** diṭṭhupādānaṃ. **Itarassāti** kāmupādānassa. **Taṇhāgahaṇenāti** “taṇhāpaccayā”ti ettha taṇhāgahaṇena gahitattā. Yadi evaṃ nāmaggaṇena gahitā taṇhā kasmā puna vuttāti āha “**nāme viya visesapaccayattābhāvā**”ti. “Nāmapaccayā chaṭṭhāyatanan”ti ettha hi kāmataṇhāpi nāme saṅgahitāti nāmassa yathārahaṃ chaṭṭhayatanassa paccayabhāvo vuttoti atthi tattha visesapaccayattaṃ, upādānassa pana bhavasāṅgahopi atthīti “taṇhāpaccayā upādānan”ti etena “kāmupādānapaccayā bhavo”ti etassa nattheva visesoti vuttaṃ “**nāme viya visesapaccayattābhāvā**”ti. Taṇhā etissā paccayoti **taṇhāpaccayā**,

diṭṭhi. **Bhavassa paccayabhūtā**ti duvidhassapi bhavassa kāraṇabhūtā. Ubhayenapi upādānassa bhavaniddese ṭhapetabbatāmyeva vibhāveti. **Paccayuppannaṃ paccayo ca ekamevā**ti “taṇhāpaccayā upādānaṃ”ti ettha vuttapaccayuppannaṃ, “upādānapaccayā bhavo”ti ettha vuttapaccayo ca eko evattho, tasmā paccayo visum paccayuppannato bhinnaṃ katvā na vibhatto.

252. **Upatthambhakasamuṭṭhāpanapacchājātapaccayavasenā**ti upatthambhakassa cittasamuṭṭhānarūpassa samuṭṭhāpanavasena, pacchājātapaccayavasena ca.

254. **Pañcannanti** cakkhāyatanādīnaṃ pañcannaṃ. **Sahajātādipaccayoti** sahajātanissaya-atthi-avigatādipaccayo. **Vatthusāṅkhātāṃ** rūpaṃ. **Purejātādipaccayoti** purejātanissayavippayutta-atthi-avigatapaccayo. **Pacchājātādipaccayoti** pacchājātavippayutta-atthi-avigatapaccayo. **Chaṭṭhassa sahajātādīti ādi-**saddena aññamaññanissayasampayutta-atthi-avigatādayo gahitā.

264. **Yassā**ti “yassa ca hotī”ti ettha vuttaṃ “yassā”ti padaṃ sandhāya vuttaṃ. Tenāha “**hotīti yojetabban**”ti.

280. **Tassā**ti “balavakilesabhūtāya vicikicchāyā”ti<sup>1</sup> padassa. **Tenā**ti “taṇhāṭṭhāne”ti padena. **Cittuppādakaṇḍādīsūti ādi-**saddena imasmim paṭiccasamuppādavibhaṅge suttantabhājanīyādīṃ saṅgaṇhāti.

Akusalaniddesavaṇṇanā niṭṭhitā.

### Kusalābyākataniddesavaṇṇanā

306. **Sabyāpārānī**ti sa-ussāhāni, vipākadhammānīti attho. Parihīnaṃ avijjāṭṭhānaṃ etesanti **parihīnāvijjāṭṭhānā**.

**Sandhāyā**ti adhippāyaṃ vibhāvanto viya vadati, sarūpeneva pana “na ca cakkhaviññāṇādīni rūpaṃ samuṭṭhāpentī”ti<sup>2</sup> **aṭṭhakathāyaṃ** vuttaṃ. Nāmarūpaṃ na na labbhatīti yojanā.

Kusalābyākataniddesavaṇṇanā niṭṭhitā.

1. Abhi-Ṭṭha 2. 200 piṭṭhe.

2. Abhi-Ṭṭha 2. 201 piṭṭhe.

### Avijjāmūlakakusalaniddesavaṇṇanā

334. **Kusalaphaleti** kusalavipākapaṭisandhiviññāṇassa gahitattā tassa sādurasavisarukkhavījasadisatā vuttā.

Yadipi “saṅkhārahētukan”ti-ādinā yojanā labbhati, avigatacatukkādīni pana na labbhanti yathālābhayojanāya dassitattā.

Avijjāmūlakakusalaniddesavaṇṇanā niṭṭhitā.

### Kusalamūlakavipākaniddesavaṇṇanā

343. **Kammaṃ viya paccayo hoti** vipākabhāvatoti adhippāyo. Vipākassa kammaṃ paccayo hontam sātisayam hotīti tassa nippariyāyatā, taṃsampayuttānam pariyāyatā siyāti adhippāyena “**pariyāyena upanissayapaccayoti vuttāni**”ti āha. “Kusalo dhammo abyākatassa dhammassa upanissayapaccayena paccayo<sup>1</sup>, akusalo dhammo abyākatassa dhammassa<sup>2</sup>, vipākadhammadhammo nevavipākanavipākadhammadhammassa upanissayapaccayena paccayo”ti<sup>3</sup> pana vacanato nippariyāyena sabbepi kusalākusalā dhammā vipākassa upanissayapaccayo hotīti ayamatto dissati. “Kusalamūlam akusalamūlan”ti imesaṃ anvādesopi paccayasaddāpekkhāya “esā”ti pulliṅgavasena vuttoti dassento āha “**esāti -pa- yojetabban**”ti.

“**Manasikāropi**”ti-ādinā appahīnāvijjānampi kiriyāya kusalākusalamūlāni, avijjā ca upanissayā na hontīti dasseti. Kammavaṭṭavipākavaṭṭabhūtāniyeva saṅkhāraviññāṇāni pacchimanaye adhippetānīti vuttam “**kiriyāni<sup>4</sup> pana -pa- gacchanti**”ti. Tesam paccayānam vasena anekappakāratoti adhippāyoti yojanā.

**Navādibhedānanti<sup>5</sup>** nava-aṭṭhasattachāti evaṃ pabhedānam. **Catunnam catukkānanti** purimanaye, pacchimanaye ca āgatānam yathālābham catunnam catunnam catukkānam.

1. Abhi 8. 147 piṭṭhe Paṭṭhāne.

2. Abhi 8. 149 piṭṭhe Paṭṭhāne.

3. Abhi 8. 373 piṭṭhe Paṭṭhāne.

4. Kiriyāya (bahūsu), kiriyānam (Mūlaṭī 2. 142 piṭṭhe.)

5. Navādīmūlapadānanti (Ṭīkā)

“Kusalākusalānaṃ pana vipāke cā”ti **ca**-saddena kusalākusale cāti samuccetabboti āha “**kusala -pa- vattabban**”ti.

**Mūlapadekapaccayatāvasenā**ti mūlapadassa ekapaccayabhāvavasena upanissayapaccayatāvasena. **Ekkasseva nayassā**ti kusalākusalesu avijjāmūlakassa, vipākesu kusalākusalamūlakassāti evaṃ ekasseva nayassa vasena. **Dhammapaccayabhedeti** dhammassa paccayabhūtaṃ, paccayuppannassa vā paccayabhāvena bhedeti imamattham dassento “**avijjādīna**”ti-ādīnaṃ vatvā puna tameva “**taṃtaṃcittuppādā**”ti-ādīnaṃ pakāraṇaṃ vibhāveti.

Abhidhammabhājanīyavaṇṇanā niṭṭhitā.

**Paṭiccasamuppādavibhaṅgavaṇṇanā niṭṭhitā.**

## 7. Satipaṭṭhānavibhaṅga

### 1. Suttantabhājanīya

#### Uddesavāraṇṇanā

355. Samānasaddavacanīyānaṃ atthānaṃ uddharaṇaṃ **atthuddhāro**. So yasmā saddatthavicāro na hoti, tasmā vuttaṃ “**na idha -pa- atthadassanan**”ti. **Pa-saddo padhānatthadīpako** “paṇīṭā dhammā”ti-ādīsu<sup>1</sup> viya.

**Anavassutatā** anupakiliṭṭhatā. Tenāha “**tadubhayavītivattatā**”ti.

**Bhusattham pakkhandananti** bhusatthavisiṭṭhaṃ pakkhandanaṃ anupavisaṇaṃ.

**Assādassāti** taṇhāya. “Niccāṃ attā”ti abhinivesavatthutāya diṭṭhiyā visesakāraṇānaṃ cittadhammānaṃ, taṇhāyapi vatthubhāvato visesaggahaṇaṃ, tathā kāyavedanānaṃ, diṭṭhiyāpi vatthubhāvasambhavato “**visesenā**”ti vuttaṃ. Sarāgavītarāgādivibhāgadvayavaseneva cittānupassanāya vuttatā taṃ “**nātipabhedagatan**”ti vuttaṃ. **Dhammāti** idha saññāsāṅkhārakkhandhā adhippetā, saṅkhārakkhandho ca phassādivasena anekabhedoti dhammānupassanā “**atipabhedagatā**”ti vuttā. Sarāgādivibhāgavasena soḷasabhedattā vā cittānupassanā nātipabhedagatā vuttā, sutte āgatanayena nīvaraṇādivasena anekabhedattā dhammānupassanā atipabhedagatā vuttā. “Visuddhimaggoti vuttānī”ti ānetvā yojetabbaṃ. Tā anupassanā etesanti **tadanupassanā**, cittadhammānupassino puggalā, tesāṃ.

Tattha “**asubhabhāvadassanenā**”ti yathāṭṭhitavasenāpi yojanā labbhateva. **Bhavoghassa vedanā vatthu** bhavassādabhāvato. **Niccaggahaṇavasenāti** attābhinivesavisiṭṭhassa niccaggahaṇassa vasena. Tathā hi vuttaṃ “**sassatassa attano**”ti. Oghesu vuttanayā eva yogāsavevapi yojanā atthato abhinnattāti te na gahitā.

---

1. Abhi 1. 3 piṭṭhe.

**Niccaggahaṇavasenā**ti attābhini vesaviṣiṭṭhassa niccaggahaṇassa vasena. Paṭhamoghatatiyacatutthaganthayojanāyaṃ vuttanayeneva kāyacittadhammānaṃ itarupādānavatthutā gahetabbāti vedanāya diṭṭhupādānavatthutā dassitā. Tathā kāyavedanānaṃ chandadosāgativatthutā kāmoghabyāpādakāyaganthavatthutāvacaṇena vuttāti. Tenāha “**avuttānaṃ vuttanayena vatthubhāvo yojetabbo**”ti.

**Dhāraṇatā** asammissanātā, anussaraṇameva vā. **Ekatteti** ekasabhāve nissaraṇādivasena. **Samāgamo** sacchikiriyā. **Satipaṭṭhānasabhāvo** sammāsatiṭā niyyānasatiṭā samānabhāgatā ekajātiṭā sabhāgatā. **Purimasmini** “ekatte nibbāne samāgamo ekattasamosaraṇaṃ”ti etasmiṃ atthe. **Visunti** nānā-atthadvayabhāvena. Tadeva gamanaṃ samosaraṇanti satisaddatthantarābhāvā -pa- ekabhāvassāti yojetabbaṃ. **Satisaddatthavasena avuccamāneti** “eko satipaṭṭhānasabhāvo ekattaṃ”ti-ādinā avuccamāne, “ekatte nibbāne samāgamo ekattasamosaraṇaṃ”ti evaṃ vuccamāneti attho. **Dhāraṇatāva satīti** “saraṇatā”ti<sup>1</sup> vuttadhāraṇatā eva satīti katvā. **Satisaddatthantarābhāvā**ti satsaṅkhātassa saraṇekattasamosaraṇasaddatthato aññassa atthassa abhāvā. **Purimanti** saraṇapadaṃ. **Nibbānasamosaraṇepīti** yathāvutte dutiye atthe saraṇekattasamosaraṇapadāni sahitāneva satipaṭṭhānekabhāvassa nāpakāni, evaṃ nibbānasamosaraṇepi “ekatte nibbāne samāgamo ekattasamosaraṇaṃ”ti etasmimpi atthe sati -pa- kāraṇāni.

**Ānāpānapabbādīnanti** ānāpānapabba-iriyāpathacatusampajañña koṭṭhāsadhātumanasikāraṇavasivatthikapabbānīti etesaṃ. Imesu pana yasmā kesuci devānaṃ kammaṭṭhānaṃ na ijjhati, tasmā tāni anāmasitvā yadipi koṭṭhāsadhātumanasikāravasenevettha desanā pavattā, desanantare pana āgataṃ anavasesaṃ kāyānupassanāvibhāgaṃ dassetuṃ “cuddasavidhena kāyānupassanaṃ bhāvetvā”ti<sup>2</sup> vuttaṃ. Tenāha “**mahāsatiṭṭhānasutte vuttānaṃ**”ti. “**Tathā**”ti iminā “mahāsatiṭṭhānasutte<sup>3</sup> vuttānaṃ”ti imameva upasaṃharati. **Pañcavidhenā**ti nīvaraṇa-upādānakkhandhāyatanabojjhaṅga-ariyasaccānaṃ vasena pañcadhā. **Bhāvanānubhāvo** ariyamaggaggahaṇasamatthatā.

1. Abhi 1. 19 piṭṭhe.

2. Abhi-Ṭṭha 2. 206 piṭṭhe.

3. Dī 2. 238 piṭṭhe.



**Tamniyamato**ti tassā kāyānupassanādipaṭipattiyā niyamato.  
Tassābhikkhubhāve niyate sāpi bhikkhubhāve niyatāyeva nāma hoti.

### Kāyānupassanā-uddesavaṇṇanā

**Etthā**ti kāye. Avayavā assa atthīti avayavī, samudāyo, samūhoti attho, so pana avayavavinimuttam drabyantaranti gāho laddhi **avayavīgāho**. Hatthapādādi-aṅgulinakhādi-aṅgapaccaṅge sannivesavisitṭhe upādāya yāyam aṅgapaccaṅgasamaññā ceva kāyasamaññā ca, tam atikkamitvā itthipurisarathaghaṭṭādidrabyantiparikappanam **samaññātidhāvanam**. Atha vā yathāvuttasamaññam atikkamitvā pakati-ādidrabyādijivādikāyādi padatthantaraparikappanam **samaññātidhāvanam**. Niccasārādigāhabhūto abhiniveso **sārādānābhiniveso**.

**Na tam diṭṭhanti** tam itthipurisādi diṭṭham na hoti. Diṭṭham vā itthipurisādi na hotīti yojanā. **Yathāvuttanti** kesādibhūtopādāyasamūhasaṅkhātam.

**Kesādipathavinti** kesādisaññitam sasambhārapathavim.  
**Pubbāpariyabhāvenā**ti santānavasena. **Aññatthā**ti “āpokāyan”ti evamādīsu.

**Ajjhattabahiddhā**ti sapaasantāne kāyo vuttoti. “**Kāyo**”ti cettha sammasanupagā rūpadhammā adhippetāti āha “**ajjhatabahiddhādhammānan**”ti. Ghaṭitam ekābaddham ārammaṇam **ghaṭitārammaṇam**, ekārammaṇabhūtanti attho. Tenāha “**ekato ārammaṇabhāvo natthī**”ti.

**Anto-oliyanā** antosaṅkoco antarāvosaṅgam.

**Dvīhī**ti abhijjhāvinayadomanassavinayehi.

Sati ca sampajaññaṅca **satisampajañnam**, tena. **Etena** karaṇabhūtena. Vipakkhadhammehi anantaritattā **avicchinnassa**. **Tassa** sabbatthikakammaṭṭhānassa.

Kāyānupassanā-uddesavaṇṇanā niṭṭhitā.

### Vedanānupassanādi-uddesavaṇṇanā

**Sukhādīnanti** sukhadukkhādukkhamasukhānaṃ.

Rūpādi-ārammaṇanānattabhedānaṃ vasena yojetabbanti sambandho. Tathā ca sesesupi. **Savatthukāvattukādīti ādi-**saddena hīnādiyoni-ādibhedanā saṅgaṇhāti. Visum visum na vattabbanti codanaṃ dassetiyo yojanā. **Ekattā**ti kāyādīsu ekasmiṃ. **Purimacodanāyāti** “pubbe pahīnattā puna pahānaṃ na vattabban”ti codanāya. **Pahīnanti** vikkhambhitaṃ. **Paṭipakkhabhāvanāyāti** maggabhāvanāya. **Ubhayatthāti** ubhayacodanāya. **Ubhayanti** parihāradvayaṃ. Yasmā purimacodanāya nānāpuggalaparihāro, nānācittakkhaṇikaparihāro ca sambhavati, dutiyacodanāya pana nānācittakkhaṇikaparihāroyeva, tasmā vuttanā “**sambhavato yojetabban**”ti. Maggasatipaṭṭhānabhāvanānaṃ sandhāya vuttanā. **Sabbattāti** sabbesu kāyādīsu.

Uddesavāraṇṇanā niṭṭhitā.

### Kāyānupassanāniddesavaṇṇanā

356. **Ajjhattādīti ādi-**saddena idha vuttā bahiddhā, ajjhatabhiddhā-anupassanappakārā viya mahāsatiipaṭṭhānasutte vuttā samudayadhammānupassī-ādi-anupassanappakārāpi kāyānupassanābhāvato gahitā icceva veditabbanā. **Tattāti** ajjhattādi-anupassanāyaṃ. **Cuddasa pakārā** mahāsatiipaṭṭhānasutte āgatacuddasappakārādike apekkhitvā idha vuttā. Ajjhattādippakāro eko pakāroti āha “**ekappakāraniddesenā**”ti. **Bāhiresūti** ekaccesu aññatitthiyesu. Tesampi hi ānāpānādivasena samathapakkhikā kāyānupassanā sambhavati. Tenāha “**ekadesasambhavato**”ti.

Tacassa ca atacaparicchinnatā tacena aparicchinnatā atthīti yojanā. “Dīghabhāhu naccatū”ti-ādīsu viya aññapadatthepe samāse avayavapadatthasaṅgaho labbhatevāti vuttanā “**kāyekadesabhūto taco gahito evā**”ti. Tacapaṭibaddhānaṃ nakhadantanhārumānsānaṃ, tacapaṭibaddhānaṃ tadanuppaviṭṭhamūlānaṃ kesalomānaṃ, tappaṭibaddhapaṭibaddhānaṃ itaresaṃ samūhabhūto sabbo

kāyo “tacapariyanto” tveva vuttoti dassento **“tappaṭibaddhā”** ti-ādimāha. Atthi kesā, atthi lomāti sambandho. Tattha **atthī**ti puthuttavācī ekaṃ nipātapadam, na kiriyāpadam. Kiriyāpadatte hi santīti vattabbam siyā, vacanavipallāsenā vā vuttanti.

Kammaṭṭhānassa vācuggatakarāṇādinā uggaṇhanam **uggaho**. Koṭṭhāsapāliyā hi vācuggatakarāṇam, manasikiriyāya kesādīnam vaṇṇādito upadhāraṇassa ca paguṇabhāvāpādanam idha uggaho. Yena pana nayena yogāvacaro tattha kusalo hoti, so **vidhī**ti vutto.

**Purimehī**ti purimapurimehi pañcakachakkehi sambandho vutto. “Maṃsam -pa- vakkaṃ”ti hi anulomato vakkapañcakassa puna “vakkam -pa- kesā”ti vakkapañcakassa, tacapañcakassa ca paṭilomato sajjhāyakkamo sambandho dassito. Svāyam sajjhāyoti sambandho. **Visum tipañcāhanti** anulomato pañcāham, paṭilomato pañcāham, anulomapaṭilomato pañcāhanti evam pañcakachakkesu paccekam tipañcāham. **Purimehi ekato tipañcāhanti** tacapañcakādīhi saddhim anulomato vakkapañcakādīni ekajjham katvā vuttanayeneva tipañcāham. **Ādi-antadassanavasenā**ti ādibhūṭassa anulomato sajjhāyassa, anulomapaṭilomato sajjhāye antabhūṭassa paṭilomato sajjhāyassa dassanavasena. Tenāha **“anuloma -pa- antimo”**ti. **Etampī**ti yadidam purimehi saddhim pacchimassa pañcakādino ekato sajjhāyakarāṇam, pañcakādīnam paccekam anulomādinā sajjhāyappakārato añño sajjhāyappakāro esoti attho. Dvinnam hatthānam ekamukhā aññamaññasambandhā ṭhapitā aṅguliyo idha hatthasaṅkhalikāti adhippetāti āha **“aṅgulipantī”**ti. **Asubhalakkhaṇam** kesādīnam paṭikkūlabhāvo. Thaddhādibhāvo **dhātulakkhaṇam**.

Attano koṭṭhāso, samāno vā koṭṭhāso sakoṭṭhāso, tattha bhavo **sakoṭṭhāsiko**, kammaṭṭhānam.

**Kāyānupassanam hitvā**ti asubhato vā dhātuto anupassanam manasikāram akatvā. Pubbe viya pariyantatālaṅca āditālaṅca agantvā.

Samādhānādivisesayogena adhikam cittanti **adhicittam**. Tena vuttam **“samathavipassanācittan”**ti. **Manasikarāṇam** cittanti ekantam samādhinimittasseva

samannāhāraḥaṁ cittaṁ. Vikkhepavasena cittaṁ nānārammaṇe viṣaṭṭappavatti idha pabhañjanaṁ, samādhānena tadabhāvato **na ca pabhañjanasabhāvaṁ**<sup>1</sup>.

**Sakkhibhavanatā** paccakkhakāritā. **Pubbahetādiketi ādi**-saddena tadanurūpamanasikārānuyogādīṁ saṅgaṇhāti.

**Samappavattanti** līnuddhaccarahitaṁ. **Tathāpavattiyāti** majjhimasamathanimittaṁ paṭipattiyā, tattha ca pakkhandanena siddhāya yathāvuttasamappavattiyā. **Paññāya tosetīti** yāyaṁ tattha jātānaṁ dhammānaṁ anativattanā, indriyānaṁ ekarasatā, tadupagavīriyavāhanā, āsevanāti imāsaṁ sādhiḥā bhāvanāpaññā, tāya adhicittaṁ toseti pahaṭṭhaṁ karoti. Yathāvuttavisesasiddhiyāva hi tamsādhiḥāya paññāya taṁ cittaṁ sampahaṁsitaṁ nāma hoti. Evaṁ sampahaṁsanto ca yasmā sabbaso paribandhavisodhanena paññāya cittaṁ vodāpetīti ca vuccati, tasmā “**samuttejeti cā**”ti vuttaṁ. **Nirassādanti** pubbenāparaṁ viṣesālābhena bhāvanārasavirahitaṁ. **Sampahaṁsetīti** bhāvanāya cittaṁ sammā pahāseti pamodeti. **Samuttejetīti** sammā tattha uttejeti.

**Āsayo** pavattiṭṭhānaṁ.

**Vavatthitanti** asaṁkiṇṇataṁ.

**Antoti** abbhantare koṭṭhāse. **Sukhumanti** sukhumanhāru-ādīṁ sandhāya vadati.

**Tālapaṭṭikā** tālapattavilivehi katakaṭasārako.

Gaṇanāya **mattā**-saddo katipayehi ūnabhāvadīpanatthaṁ vuccati. Dantaṭṭhivajjitāni tīhi ūnāni tīṇi aṭṭhisatāni. Tasmā “**timattāni**”ti vuttaṁ. Yaṁ pana visuddhimagge “atirekatisata-aṭṭhikasamussayan”<sup>2</sup>ti vuttaṁ, taṁ dantaṭṭhīnīpi gahetvā sabbasaṅgāhikanayena vuttaṁ. “Goppakaṭṭhikādīni avuttāni”ti na vattabbaṁ “ekekasmīṁ pāde dve goppakaṭṭhīni”ti vuttatā, “ānisadaṭṭhi-ādīni”ti pana vattabbaṁ.

**Tena aṭṭhināti** ūruṭṭhinā.

**Marumpehīti** marumpacuṇṇehi.

1. Pabhijjanasabhāvaṁ (Mūlaṭṭi 2. 151 piṭṭhe.)

2. Visuddhi-Ṭṭha 1. 189 piṭṭhe.

**Susamāhitacittena** hetubhūtena. **Nānārammaṇavipphandanavirahenāti** nānārammaṇabhāvena vipphandanam nānārammaṇavipphandanam, tena virahena. **Anatikkantapītisukhassa** jhānacittassa. Taṃsamaṅgīpuggalassa vā.

**Paṭikkūladhātuvaṇṇavisesanti** paṭikkūlavisesam, dhātuvisesam, vaṇṇakasiṇavisesam. Vakkapañcakādīsu pañcasu visum, heṭṭhimehi ekato ca sajjhāye channam channam pañcāhānam vasena pañca māsā paripuṇṇā labbhanti, tacapañcake pana visum tipañcāhamevāti āha “**addhamāse ūnepī**”ti. **Māsantaragamanam** sajjhāyassa sattamādimāsagamanam.

**Yamentanti** bandhentam.

“Nīlam pītan”ti-ādinā saṅghāṭe nīlādivavatthānam taṃnissayattā mahābhūte upādāyāti āha “**mahābhūtam -pa- duggandhanti-ādinā**”ti. Upādāyarūpam mahābhūtena paricchinnanti yojanā. **Tassāti** upādārūpassa. **Tatoti** mahābhūtato. Chāyāya ātapapaccayabhāvo ātapo paccayo etissāti, ātapassa chāyāya uppādakabhāvo **chāyātapānam ātapapaccayachāyuppādakabhāvo**. Tena uppādetabba-uppādakabhāvo aññamaññaparicchedakatāti dasseti. **Āyatanāni ca dvārāni cāti** dvādasāyatanāni, tadekadesabhūtāni dvārāni ca.

**Sappaccayabhāvāti** sappaccayattā.

**Yathāvuttena ākārānāti** “iti idam sattavidham uggahakosallam suggahitam katvā”ti-ādinā<sup>1</sup>, “imam pana kammaṭṭhānam bhāvetvā arahattam pāpūṇitukāmenā”ti-ādinā<sup>2</sup> vā vuttappakārena vidhinā. “Avisesato pana sādharmaṇavasena evam veditabbā”ti, “ito paṭṭhāyāti ca vadanti. **Vaṇṇādimukhenāti** vaṇṇapaṭikkūlasuññatāmukhena. **Upaṭṭhānanti** kammaṭṭhānassa upaṭṭhānam, yo uggahoti vutto. **Etthāti** catukkapañcakajjhānapaṭṭhamajjhānavipassanāsu ekasmiṃ sandhīyati. Kena? Kammaṭṭhānamanasikāreneva, tasmā uggahova sandhi **uggahasandhīti** veditabbam.

**Uṭṭhānakam** uppajjanakam. Sātirekāni cha ambaṇāni **kumbham**. **Tatoti** mukhadhovanakhādanabhojanakiccato. **Nivattatīti** arahattādhigamena accantanivattivasena nivattati.

1. Abhi-Ṭṭha 2. 221 piṭṭhe.

2. Abhi-Ṭṭha 2. 213 piṭṭhe.

**Kammamevāti** manasikārakammameva. **Ārammaṇanti**<sup>1</sup>  
pubbabhāgabhāvanārammaṇam.

**Tathāti** vanamakkaṭo viya.

**Ekanti** ekaṃ koṭṭhāsam.

**Sattagahaṇarahiteti** sattapaññattimpī anāmasitvā desitattā vuttam.  
Sasantānatāya ahaṅkāravatthumhi appahīnamānassa pahīnākāram  
sandhāyāha “**viddhastāhaṅkāre**”ti. **Tatthāti** parassa kāye.

357. **Ādimhi sevanā** manasikārassa uppādanā ārambho.

362. **Gamitāti** vigamitā.

Kāyānupassanāniddesavaṇṇanā niṭṭhitā.

### Vedanānupassanāniddesavaṇṇanā

363. **Sampajānassāti** sammā pakārehi jānantassa, vatthārammaṇehi  
saddhim sukhasāmisādippakārehi aviparītam vedanam jānantassāti attho.  
Pubbabhāgabhāvanā vohārānusāreneva pavattatīti āha “**voḥāramattenā**”ti.  
**Vedayāmīti** “ahaṃ vedayāmī”ti attupanāyikā vuttāti, pariññātavedanopi vā  
uppanāya sukhavedanāya lokavohārena “sukhaṃ vedanam vedayāmī”ti  
jānāti, voharati ca, pageva itaro. Tenāha “**voḥāramattena vuttan**”ti.

**Ubhayanti** vīriyasamādhim. **Saha yojetvāti** samadhurakiccato  
anūnādhikam katvā. Atthadhammādīsu sammohaviddhaṃsanavasena pavattā  
maggapaññā eva **lokuttarapaṭisambhidā**.

Vaṇṇamukhādīsu **tīsupi mukhesu**. **Pariggahassāti** arūpapariggahassa.  
“Vatthu nāma karajakāyo”ti vacanena nivattitam dassento “**na cakkhādīni  
cha vatthūni**”ti āha. Aññamaññupatthambhena ṭhitesu dvīsu naḷakalāpesu  
ekassa itarapaṭibaddhaṭṭhititā viya nāmakāyassa  
rūpakāyapaṭibaddhavuttitādassanañhetam nissayapaccayavisesadassananti.

1. Kammārammaṇanti (bahūsu)

**Tesanti** yesaṃ phassaviññāṇāni pākaṭāni, tesam. **Aññesanti** tato aññesaṃ, yesaṃ phassaviññāṇāni na pākaṭāni. Sukhadukkhavedanānaṃ suvibhūtavuttitāya vuttam **“sabbesaṃ vineyyānaṃ vedanā pākaṭā”**ti. **Vilāpetvā vilāpetvāti** suvisuddham navanītam vilāpetvā sītibhūtam atisītale udake pakkhipitvā patthinnaṃ ṭhitam matthetvā paripiṇḍetvā puna vilāpetvāti satavāraṃ evaṃ katvā.

**Tatthāpīti** yattha arūpakammaṭṭhānaṃ eva -pa- dassitam, tatthāpi. Yesu suttesu tadantogadaṃ rūpakammaṭṭhānanti yojanā.

Vedanānupassanānidhesavaṇṇanā niṭṭhitā.

### Cittānupassanānidhesavaṇṇanā

365. Kilesasampayuttānaṃ na visuddhatā hotīti sambandho. **Itarehipīti** attanā sampayuttakilesato itarehipi asampayuttehi. **Visuṃ vacananti** aññākusalato visuṃ katvā vacanaṃ. **Visiṭṭhaggahaṇanti** visiṭṭhatāgahaṇam, āveṇikasamohatādassananti attho, yato tadubhayaṃ momūhacittanti vuccati.

Cittānupassanānidhesavaṇṇanā niṭṭhitā.

### Dhammānupassanānidhesa

#### Nīvaraṇapabbavaṇṇanā

367. Ekasmim yuge baddhagoṇānaṃ viya ekato pavatti **yuganaddhatā**.

**Gahaṇākārenāti** asubhepi ārammaṇe “subhan”ti gahaṇākārena. **Nimittanti cāti** subhanimittanti ca vuccatīti yojanā. Ekamsena sattā attano attano hitasukhameva āsīsaṇṭīti katvā vuttam **“ākaṅkhitassa hitasukhassā”**ti. **Anupāyo** eva ca hitavisiṭṭhassa sukhasa ayonisomanasikāro, ākaṅkhitassa vā yathāhippetassa hitasukhassa **anupāyabhūto**. Avijjandhā hi tādisepi pavattantīti.

**Nippḥādetabbeti** ayonisomanasikārena nibbattetabbe kāmaccchandeti attho.

**Tadanukūlattāti** tesam asubhe “subhan”ti, “asubhan”ti ca pavattānaṃ ayonisomanasikārayonisomanasikārānaṃ anukūlattā. Rūpādīsu aniccādi-abhinivesassa, aniccasaññādīnaṃca yathāvuttamanasikārūpanissayatā tadanukūlatā.

Āhāre paṭikkūlasaññaṃ so uppādetīti sambandho. **Tabbipariṇāmassāti** bhojanapariṇāmassa nissandādikassa. **Tadādhārassāti** udarassa, kāyasappa vā. **Soti** bhojanemattaññū. Suttantapariyāyena kāmārāgo “kāmaccchandaniṇvaraṇaṃ”ti vuccatīti āha **“abhidhammapariyāyena”**ti. Abhidhamme hi “nīvaraṇaṃ dhammaṃ paṭicca nīvaraṇo dhammo uppajjati napurejātapaccayā”ti<sup>1</sup> etassa vibhaṅge “arūpe kāmaccchandaniṇvaraṇaṃ paṭicca thinamiddhanīvaraṇaṃ uddhaccaniṇvaraṇaṃ avijjāniṇvaraṇaṃ uppajjati”ti-ādi<sup>1</sup> vacanato bhavarāgopi kāmaccchandaniṇvaraṇaṃ vuttanti viññāyati. Tenāha **“sabbopi lobho kāmaccchandaniṇvaraṇaṃ”**ti.

**Sīmābhede kateti** attādimariyādāya bhinnāya, attādīsu sabbattha ekarūpāya mettābhāvanāyāti attho. **Vihārādi-uddesarahitanti** viharādīpadesaparichedarahitaṃ. **Uggahitāya** mettāya. **Aṭṭhavīsatividhāti** itthi-ādivasena sattavidhā paccekāṃ averādīhi yojanāvasena aṭṭhavīsatividhā. **Sattādi-itthi-ādi-averādiyogenāti** ettha sattādi-averādiyogena vīsati, itthi-ādi-averādiyogena aṭṭhavīsatiṭi aṭṭhacattārīsaṃ ekissā disāya. Tathā sesadisāsūpīti sabbā saṅgahetvā āha **“asītādhikacatusatappabhedā”**ti.

Katākatānusocanaṃca na hotīti yojanā. “Bahukāṃ sutāṃ hoti suttāṃ geyyan”ti-ādi<sup>2</sup> vacanato bahussutā navaṅgassa sāsanaṃ vasena vedītabbā, na vinayamattassevāti vuḍḍhataṃ pana anapekkhitvā icceva vuttāṃ, na bahussutatañcāti.

**Tiṭṭhati** anuppannā vicikicchā **ettha** etesu “ahosiṃ nu kho ahamatītamaddhānaṃ”ti-ādikāya<sup>3</sup> pavattiyā anekabhedesu purimuppannesu vicikicchāddhammesūti te **ṭhānīyā** vuttā.

1. Abhi 10. 300 piṭṭhe Paṭṭhāne.

2. Am 1. 313 piṭṭhe.

3. Ma 1. 10; Saṃ 1. 265 piṭṭhesu.



**Aṭṭhavatthukāpī**ti na kevalaṃ soḷasavatthukā, nāpi ratanattayavatthukā ca, atha kho aṭṭhavatthukāpi. Ratanattaye saṃsayāpannassa sikkhādīsu kaṅkhāsambhavato, tattha nibbematikassa tadabhāvato ca sesavicikicchānaṃ ratanattayavicikicchāmūlikatā daṭṭhabbā. **Anupavisanāṃ** “evametan”ti saddahanavasena ārammaṇassa pakkhandanaṃ.

Nīvaraṇapabbavaṇṇanā niṭṭhitā.

### Bojjhaṅgapabbavaṇṇanā

**Tenā**ti atthasannissitaggaṇeṇa.

Paccayavasena dubbalabhāvo **mandatā**.

Pabbatapadesavanagahanantaritopi gāmo na dūre, pabbataṃ parikkhipitvā gantabbatāya āvāso araṅṅalakkhaṇūpeto, tasmā maṃsasoteneva assosīti vadanti.

Sampattihetutāya pasādo sinehapariyāyena vutto.

Indriyānaṃ tikkhabhāvāpādanaṃ **tejanaṃ**. **Tosanaṃ** pamodanaṃ.

Bojjhaṅgapabbavaṇṇanā niṭṭhitā.

**Samathavipassanāvasena** paṭṭhamassa satipaṭṭhānassa, **suddhivipassanāvasena** itaresaṃ. **Āgamanavasena vuttaṃ** aññathā maggasammāsatiyā kathaṃ kāyārammaṇatā siyāti adhippāyo. **Kāyānupassī-āḍīnaṃ** catubbidhānaṃ puggalānaṃ vuttānaṃ. Tenāha “**na hi sakkā ekassa -pa- vatthun**”ti. **Anekasatisambhavāvabodhapasaṅgā**ti ekacittuppādena anekissā satiyā sambhavassa, sati ca tasmim̐ anekāvabodhassa ca āpajjanato. **Sakiccaparicchinneti** attano kiccavisesavisiṭṭhe. **Dhammabhedenā**ti ārammaṇabhedavisiṭṭhena dhammavisesena. **Na dhammassa dhammo kiccanti** ekassa dhammassa aññadhammo kiccaṃ nāma na hoti tadabhāvato. **Dhammabhedena** dhammassa vibhāgena. **Tassa bhedoti** tassa kiccassa bhedo natthi. **Tasmā**ti yasmā nayidha dhammassa vibhāgena kiccabhedo icchito,

kiccabhedena pana dhammavibhāgo icchito, tasmā. Tena vuttaṃ “**ekāvā**”ti-  
ādi.

Suttantabhājanīyavaṇṇanā niṭṭhitā.

---

## 2. Abhidhammabhājanīyavaṇṇanā

374. “**Kāye kāyānupassī**”ti idaṃ puggalādhiṭṭhānena  
satipaṭṭhānavisesanaṃ, tañca āgamanasiddhaṃ, aññathā tassa asambhavatoti  
āha “**āgamanavasena -pa- desetvā**”ti. **Puggalaṃ anāmasitvāti** “kāye  
kāyānupassī”ti evaṃ puggalaṃ aggahetvā. Tathā anāmasanato eva  
**āgamanavisesanaṃ akatvā**. **Nayadvayeti** anupassanāyayo, suddhikanayoti  
etasmimṃ nayadvaye.

Abhidhammabhājanīyavaṇṇanā niṭṭhitā.

**Satipaṭṭhānavibhaṅgavaṇṇanā niṭṭhitā.**

## 8. Sammappadhānavibhaṅga

### 1. Suttantabhājanīyavaṇṇanā

390. Kāraṇasaddo yuttivācako “sabbametam akāraṇam vadatī”ti-ādīsu viya, tasmā **kāraṇappadhānāti** yuttippadhānā, anuppannapāpakānuppādanādikiriya anurūpappadhānāti evam vā ettha attho daṭṭhabbo. Anuppannapāpakādīnam anuppādādi **anuppannapāpakānuppādādi**.

391. “**Na aññodhammo**”ti yathā taṇhāyanamicchābhinivesavā-yamasabhāvānam taṇhādīnam chandapariyāyo aññadhammo nāma hoti kattukamyatāsaṅkhātassa chandaniyassa tesu abhāvā, dhammacchando pana taṇsabhāvattā aññadhammo na hoti. Tenāha “**dhammacchandoti sabhāvachando**”ti.

406. **Aṭṭhakathāyanti** porāṇaṭṭhakathāyam. **Vatṭānatthasamvattanatotī** saṁsāradukkhambhavato.

**Na sakkontīti āha** “santāya samāpattiyā parihīnā brahmacariyavāse santhambhitum na sakkontī”ti.

Tattha duvidhāyāti yojetabbam. **Uppannāyevāti** uppannapubbā eva uppajjanti samudācārādivasena.

**Sabbāsu avatthāsūti** pakatattādi-avatthāsu. Pakatattāvattthena hi sabbena sabbam tāni na caritabbāni. Itarāvattthena ca tadavatthāya tāni tāniyeva caritabbāni. **Vatthabbanti ādīnīti ādi**-saddena “na ekacchanne anāvāse vatthabbam, na ekacchanne āvāse vā anāvāse vā vatthabbam, na ekāsane nisīditabbam, na nīce āsane nisinne ucce āsane nisīditabbam, na chamāyam nisinne āsane nisīditabbam, na ekacaṅkame caṅkamitabbam, na nīce caṅkame caṅkamante ucce caṅkame caṅkamitabbam, na chamāyam caṅkamante caṅkame caṅkamitabbam”ti<sup>1</sup> imāni saṅgaṇhāti. **Tesanti** pārivāsikavuḍḍhatarādīnam vasena. **Sampiṇḍetvāti** saṅkaḍḍhitvā. **Ekekaṁ katvāti** navāpi

ekamekaṃ katvā. “Abhivādana paccuṭṭhānañjalikammasāmīcikammaṃ na sādītabbam, āsanābhīhāram, seyyābhīhāram, pādodakam, pādapīṭham, pādakathalikam, pattacīvarapaṭiggahaṇam na sādītabban”<sup>1</sup>ti idam sabbampi asādiyanasāmaññena ekaṃ. **Dasāti** “na sīlavipattiyā, na ācāravipattiyā, na diṭṭhivipattiyā, na ājīvavipattiyā, na bhikkhū bhikkhūhi bhedetabbā, na gihiddhajo dhāretabbo, na titthiyaddhajo dhāretabbo, na titthiyā sevitabbā, bhikkhū sevitabbā, bhikkhusikkhāya sikkhitabban”<sup>2</sup>ti<sup>2</sup> evamāgatā dasa.

“**Kammañcā**”ti paccattavasena vuttam kammaṃ “avipakkavipākassā”ti ettha “kammassā”ti sāmivacanavasena pariṇāmetvā yojetabbam. Bhūtāpagatuppannanti<sup>3</sup> vuttanti sambandho. **Idhāti** imissā sammohavinodaniyā. “Evaṃ kate okāse vipāko -pa- uppannoti vuccatī”ti vadanto **vipākameva vadati. Tatthāti** aṭṭhasāliniyam. Maggena samucchinnā thāmagatā kāmarāgādayo “anusayā”ti vuccantīti āha “**anusayita -pa- maggena pahātabbā**”ti.

**Āhatakhīrarukkho viya ārammaṇam**, katham? Nimittaggāhavasena. Tamevattham vivarati “**adhigatan**”ti-ādinā. Tattha nimittaggāhavasena ārammaṇassa adhiggaḥitattā tam ārammaṇam anussarītānussaritakkhaṇe kilesupattihetubhāvena uppattiṭṭhānato adhigatameva nāma hotīti āha “**adhigatam nimittaggāhavasena**”ti, tam ārammaṇam pātubhūtakilesanti adhippāyo. Kilesupattinimittatāya uppattiraham kilesam “**ārammaṇam antogadhakilesan**”ti vuttam. Tañca kho gāhake labbhamānam gahetabbe upacaritvā, yathā nissite labbhamānam nissaye upacaritvā “mañcā ukkuṭṭhim karontī”ti. Idāni upacāram muñcitvā nippariyāyeneva attham dassento “**nimittaggāha -pa- sadisā**”ti āha. **Vitthāretabbanti** “yathā kim? Sace khīrarukkhan”ti-ādinā vitthāretabbam.

**Tidhāti** atītādivasena tidhā. **Ābhato** upamāvasena. **Appahīnatādassanattampīti pi-saddena** “tidhā navattabbatādassanattampī”ti vuttameva sampiṇḍeti. **Evaṃ maggena pahīnakilesā daṭṭhabbā** magge anuppanne uppattirahānampi uppanne sabbena sabbam abhāvato.

Suttantabhājanīyavaṇṇanā niṭṭhitā.

1. Vi 4. 84 piṭṭhe.

2. Vi 4. 63 piṭṭhe.

3. Bhutvāpagatuppannanti (Ka)

### 3. Pañhapucchakavaṇṇanā

427. **Vīriyajetṭhikāya pana maggabhāvanāya na vattabbāni** sammappadhānāni “maggādhipatīnī”ti vā “namaggādhipatīnī”ti vāti vāti ettha paṭhamassa vīriyantarābhāvo, itarassa itarādhipatino, namaggabhūtavīriyādhipatino ca abhāvo navattabbatāya kāraṇanti imamatthamāha “maggādhipatīnī”ti-ādinā. **Tadāti** vīriyajetṭhikamaggabhāvanākāle.

**Sammappadhānavibhaṅgavaṇṇanā nitṭhitā.**

## 9. Iddhipādavibhaṅga

### 1. Suttantabhājanīyavaṅṅanā

431. **Paṭhamo kattu-attho** “ijjhatīti iddhī”ti. **Dutiyo karaṇattho** “ijjhanti etāyā”ti. Pajjitabbā iddhi vuttā “iddhiṃ pajjanti pāpuṇantī”ti kattusādhanassa iddhisaddassa karaṇasādhanena pādasaddena samānādhikaraṇatāya asambhavato, ijghanakassa ca atthassa karaṇabhūtena pādena pajjitabbattā “iddhi eva pādo”ti saddayojanā na sambhavatīti imamattamāha “**na ca -pa- vatthun**”ti. **Iddhikiriyaḅkaraṇenā**ti ijghanakiriyaḅya karaṇabhūtena atthena sādhetabbā ca iddhi pajjitabbāti yojanā. **Dvinnam karaṇānanti** ijghanapajjanakiriyaḅkaraṇānam iddhipādattānam. **Na asamānādhikaraṇatā sambhavati** paṭisedhadvayaṃ pakatiyaṃ ṭhapatīti. **Tasmā**ti yasmā paṭhamenatthena samānādhikaraṇasamāso, dutiyena sāmivacanasamāso iddhipādasaddānam na yujjati, tasmā. Yathāvuttā vā paṭhamenatthena samānādhikaraṇasamāsavaseneva yojanā yujjati pādassa pajjamānakotṭhāsabhāvato. Dutiyaenatthena itarasamāseveva yojanā yujjati pādassa ijghanakaraṇūpāyabhāvato.

**Kecīti dhammasirittheraṃ** sandhāya vadati. **Duvidhatthāyā**ti nibbatti-atthāya, vuddhi-atthāya ca. **Visunti** “iddhi eva pādo iddhipādo”ti imasmā visuṃ. **Samāsayojanāvasenā**ti “iddhiyā pādo iddhipādo”ti evaṃ samāsayojanāvasena. **Yathāyuttoti** kattukaraṇatthesu yo yo yutto. **Paṭilābhapubbabhāgānanti** visesādhigamataṃpubbabhāgānam yathākkamaṃ kattiddhikaraṇiddhibhāvaṃ sandhāya vuttoti yojanā. Uttaracūḷabhājanīye “chandoyeva chandiddhipādo, cittameva, vīriyameva, vīmaṃsāva vīmaṃsiddhipādo”ti vuttattā āha “**uttaracūḷabhājanīye vā vuttehi chandādīhi iddhipādehi**”ti-ādi.

Chandacittavīmaṃsiddhipādesu tāva yuttaṃ padhānasaṅkhāraggahaṇaṃ apubbattā, vīriyiddhipāde pana kathanti codanaṃ sandhāyāha “**vīriyiddhipādaniddese**”ti-ādi. Yadi dveveva samannāgamaṅgāni, chandādayo kimatthiyāti āha “**samādhivisesanāni**”ti. **Na idha -pa- vuttā hoti** atabbisesanattā.

yadipi samādhivisesanasamannāgamaṅgadassanattam dvikkhattum vīriyam āgatanti vuttam, tam pana “vīriyasamādhisamannāgatan”ti ettāvataṭṭhi siddham hoti. Evaṃ siddhe sati puna vacanam vīriyantarasabbhāvam nu kho dīpetīti kadāci āsaṅkeyyāti tadāsaṅkānivattanattam “**vīriyañcā**”ti-ādimāha. **Chandādīhi** **visiṭṭhoti** chandādīnam adhipatipaccayatāvisesena visiṭṭho. Teneva hi chandādīmukheneva iddhipādā desitā. Tathā ca vuttam “chandam ce bhikkhu adhipatim karitvā labhati samādhin”ti-ādi<sup>1</sup>.

**Tamtamavassayanavasenā**ti tassa tassa chandassa samādhino avassayatāvasena, paccayavisesatāyāti attho. **Upāyatthena -pa- vuttā hoti** adhigamūpāyatāpi nissayabhāvoyevāti. “**Tenevā**”ti-ādinā yathāvuttam chandādīnam iddhipādātam pāliyaeva vibhāveti. Tattha **tenevāti** chandādīnamyeva upāyatthabhāvene va iddhipādabhāvassa adhippetattā. **Upāyiddhipādadassanattamevāti** chandādīke dhure jeṭṭhake pubbaṅgame katvā nibbattitasamādhī chandādīnam iddhiyā adhigamūpāyatādassanam upāyiddhipādadassanam, tadattameva “tathābhūtaṃ vedanākkhandho -pa- viññāṇakkhandho”ti<sup>2</sup> tattha tattha pāliyam nissayiddhipādadassanam kataṃ chandādivisiṭṭhānamyeva vedanākkhandhādīnam adhippetattā. Evañcetam sampañcchitabbaṃ. **Aññathā** kevalam iddhisampayuttānamyeva khandhānam vasena iddhipādabhāve gayhamāne **catubbidhatā na hoti** visesakāraṇabhāvatoti adhippāyo.

433. **Tosanam** satthu ārādhanam, sikkhāya vā. **Thāmabhāvatoti** thirabhāvato. Kulāpadese jātimā purissaro hotīti “**pubbaṅgamattā cittassa visiṭṭhajātisadisatā**”ti vuttam. Vicāraṇapaññāhetukattā mantassa vīmaṃsāsadisatā suviññeyyāvāti na uddhaṭā.

**Chandādīketi** chandasamādhīpadhānasāṅkhārā, vīriyacittavīmaṃsāsamādhīpadhānasāṅkhārāti ime tayo tayo dhamme. **Abhedato** bhedaṃ akatvā abhinditvā iddhibhāvasāmaññena, iddhipādabhāvasāmaññena ca saṅgaṇhitvā. Tenāha “**sampiṇḍetvā**”ti. Bhedanam vā sambhedanam missīkaraṇanti āha “**amissetvā**”ti. Tathā hi “sesā pana sampayuttakā cattāro khandhā iddhipādāyevā”ti<sup>3</sup> iddhi-iddhipāde amissetvāpi kathitam. **Visesenāti** bhedena catūsu iddhipādesu asammissabhāvena āveṇikattā.

1. Abhi 2. 223 piṭṭhe.

2. Abhi 2. 226 piṭṭhe.

3. Abhi-Ṭṭha 2. 293 piṭṭhe.

Āveṇikā hi chandādayo tassa tassa iddhipādassa. **Avisesenāti** abhedena, caturiddhipādasādhāraṇabhāvenāti attho.

**Chandiddhipādasamādhiddhipādādayoti ādi-**saddena padhānasaṅkhāraṃ, vīriyacittavīmaṃsā ca saṅgaṇhāti. **Pādoti** tehi sampayuttaṃ catukkhandhamāha. “Chandiddhipāde pavisanti”ti-ādinā **visiṭṭhesveva pavesam avatvā. Catūsūti** chando, samādhi, padhānasaṅkhārā, taṃsampayuttā khandhāti evaṃ catūsu. Chanda hetuko, chandādhiko vā samādhi adhippetoti āha “**chandavato ko samādhi na ijjhissati**”ti. Iti evaṃ anena pakārena, yaṃ samādhibhāvanāmukhaṃ. Samādhibhāvanānuyogena bhāvitā khandhā **samādhibhāvitā.**

“**Ye hī**”ti-ādinā “abhinavaṃ natthī”ti saṅkhepato vuttaṃ vivarati. **Tiṇṇanti** chandasamādhipadhānasaṅkhārānaṃ. **Idanti** “ime hi tayo”ti-ādivacanaṃ. **Purimassāti** “chando samādhi”ti-ādivasena. **Kāraṇabhāvenāti** sādhanabhāvena. **Tenāti** “ime hi tayo dhammā”ti-ādivacanena. Yasmā chandādayo tayo dhammā aññamaññaṃ, sampayuttakānaṃ nissayabhāvena pavattanti, tasmā tesampi iddhipādabhāvo vutto. So pana nissayabhāvo sampayogāvinābhāvīti āha “**tadantogadhattā**”ti, sampayuttakantogadhattāti attho. Chandādīnaṃ viya sampayuttakkhandhānaṃ sabhāvato iddhibhāvo natthīti āha “**iddhibhāvapariyāyo atthī**”ti. Tena vuttaṃ “**sesā sampayuttakā -pa- na attano sabhāvenā**”ti. **Ekadesassāti** chandādīnaṃ. **Catunnampī** khandhānaṃ, chandādīnaṃ vā **catunnaṃ. Punapīti** “sampayuttakā panā”ti-ādīnaṃ sandhāyāha. **Iminā** catukkhandhatadekadesānaṃ iddhibhāvādīpanena.

Pubbe vuttato vacanakkamena aññanti āha “**apubbanti katvā**”ti. Kenaṭṭhena iddhi paṭilābho, kenaṭṭhena pādo pubbhāgoti yathākkamaṃ yojanā. Yadi patiṭṭhānaṭṭhena pādo, nissayiddhipādoyeva vutto siyā, na upāyiddhipādoti āha “**upāyo cā**”ti-ādi. **Sabbatthāti** suttantabhājanīye, abhidhammabhājanīye ca. Tenāha “**suttantabhājanīye hī**”ti-ādi. **Samādhivisesanabhāvenāti** “chandādhīpati, chanda hetuko, chandādhiko vā samādhi chandasamādhi”ti-ādinā samādhissa



visesanabhāvena. “Samādhisevanavasenā”ti ca pāṭho. Tattha **samādhisevanavasenā**ti chandādhike adhipatim karitvā samādhissa āsevanavasena. **Upāyabhūtānanti** “chandavato ce samādhi ijjhati, mayheva ijjhati”ti samādhi-āsevanāya upāyabhūtānam.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

444. Sādhipativārāni aṭṭhasatāni, tesu paccekam cattāro iddhipādā na sambhavatīti āha “**sādhipativārānam paripuṇṇānam abhāvā**”ti. Tattha kāraṇamāha “**na hi adhipatīnam adhipatayo vijjantī**”ti. Yadi hi adhipatī siyūm sādhipatīti iddhipādabhedena dvattimsa nayasatāni, suddhikāni aṭṭhāti cattāri nayasahassāni bhavēyyūm, taṃ pana natthīti adhippāyo. Yattakā pana nayā idha labbhanti, taṃ dessetum “**ekekasmim panā**”ti-ādi vuttam. Suddhikāni aṭṭha nayasatāni sādhipatikānipi aṭṭhevāti catunnam maggānam vasena soḷasa nayasatāni.

Abhidhammabhājanīyavaṇṇanā niṭṭhitā.

## 3. Pañhapucchakavaṇṇanā

Sayam jeṭṭhakabhāvena pavattanato cattāro adhipatayo aññamaññam garum na karonti. Tasmā “cattāro iddhipādā na maggādhipatino”ti vuttā. Tenāha “**aññamaññassa pana adhipatayo na bhavanti**”ti. **Etamatthanti** “adhipatayo aññamaññassa adhipatī na bhavanti”ti etamattham. **Adhipatinoti** adhipati bhavitum samatthassa. **Adhipatim na karontīti** adhipatim katvā garum katvā nappavattanti. **Adhipatīnam sahabhāveti** adhipatikiccakaraṇena sahapavattiyam. “**Avīmaṃsādhipatikassa maggassa abhāvā**”ti idam “adhipatitāsamatthā dhammā adhipatibhāveneva pavatteyyun”ti dosāropanavasenāha, na yathādhigatavasena. Adhipatidhammānañhi pubbābhisankhāre sati adhipatibhāvena pavatti, na aññathāti sahabhāvepi tadabhāvam sandhāya visesanam

nakattabbaṃ siyāti sakkā vattum. **Aññamaññādhīpatikaraṇabhāveti**  
**aññamaññaṃ adhipatim katvā pavattiyam. Vīmaṃsādhīpatikattavacananti**  
**vīmaṃsādhīpatikabhāvassa vacanam. Na vattabbaṃ siyā sabbesampi**  
**adhipatīnaṃ sādhipatikattāti adhippāyo. Sahabhāvo paṭikkhitto eva**  
**sādhipatibhāvassa anekamsikatāvacanato.**

**Iddhipādavibhaṅgavaṇṇanā niṭṭhitā.**

## 10. Bojjhaṅgavibhaṅga

### 1. Suttantabhājanīya

#### Paṭhamanayavaṇṇanā

466. Paṭiṭṭhānaṃ idha saṃsāre avatṭhānaṃ, tassa mūlaṃ kilesāti āha “**kilesavasena paṭiṭṭhānaṃ**”ti. Paṭiṭṭhānāya pana byāpārāpatti kammanti vuttaṃ “**abhisāṅkhārasena āyūhanā**”ti. Yasmā kilesesu taṇhādiṭṭhiyo taṇhādiṭṭhīcaritānaṃ visesato saṃsāranāyikā, kilesasahitameva ca kammaṃ paṭiṭṭhānāya hoti, na kevalaṃ, tasmā vuttaṃ “**taṇhādiṭṭhīhi -pa- āyūhanā**”ti. Tathā taṇhāya bhavassādabhāvato, diṭṭhiyā vibhavābhinandanabhūtāya vibhavābhisaṅkharaṇabhāvato “**taṇhāvasena paṭiṭṭhānaṃ, diṭṭhivasena āyūhanā**”ti vuttaṃ. Diṭṭhisupi antomukhappavattāya bhavadiṭṭhiyā visesato saṃsāre avatṭhānaṃ, yato oliyanāti vuccatīti āha “**sassatadiṭṭhiyā paṭiṭṭhānaṃ**”ti. Bahimukhappavattāpi vibhavadiṭṭhi bhavābhisaṅkharaṇaṃ nātivattatīti vuttaṃ “**ucchedadiṭṭhiyā āyūhanā**”ti. Layāpatti yathāraddhassa ārambhassa aniṭṭhānaṃ antosaṅkocabhāvatoti āha “**līnavasena paṭiṭṭhānaṃ**”ti. Uddhatāpatti anupāyabhūtā byāpārāpatti asaṅkocabhāvatoti vuttaṃ “**uddhaccavasena āyūhanā**”ti. Tathā kosajjapakkhikattā ca kāmasukhānuyogassa uddhaccappakkhikattā ca attakilamathānuyogassa tadubhayavasena paṭiṭṭhānāyūhanā vuttā, itaraṃ vuttanayānusārena veditabbaṃ. **Idhāti imissā sammohavinodaniyā. Avuttānanti** “kilesavasena paṭiṭṭhānaṃ”ti-ādīnaṃ vasena veditabbā paṭiṭṭhānāyūhanāti yojanā.

**Samappavatte dhammeti** linuddhaccavirahena samappavatte sampayuttadhamme. **Paṭisañcikkhatīti** patirūpaṃ saṅkaleti gaṇeti tuleti. Tenāha “**upapattito ikkhatī**”ti. **Tadākāro**ti paṭisaṅkhānākāro upapattito ikkhanākāro. **Evañca katvāti** paṭisaṅkhānasabhāvattā eva upekkhāsambojjhaṅgassa. **Pacchimapacchimākāraṇabhāvoti** pacchimassa pacchimassa kāraṇabhāvo. Purimaṃ purimaṃ hi pacchimassa pacchimassa visesapaccayoti.

467. Aviparītakāyādisabhāvaggahaṇasamatthatāya **balavatī eva sati**. **Paññā gahitā** satinepakkenāti attho. **Evamcittoti** evaṃ lābhasakkārasilokasannissitacitto. **Cirakatavattādivasenāti** cirakatavattādisīsenā. “**Vutto**”ti imināpi “katvā āha kāyaviññattim -pa-koṭṭhāsan”ti yojanā.

**Paresanti** na anantarānaṃ. **Sabbesaṃ -pa- yojetabbā** “sabbe bojjhaṅgā sabbesaṃ paccayavisesā hontiyevā”ti. Kāmetīti kāmo, assādanavasena āmasatīti āmisaṃ, kāmova āmisanti **kāmāmisaṃ**, kilesakāmo. Vatthukāmo pana āmasīyatīti **āmisaṃ**. Evam sesadvayampi. Tesu lokīyanti ettha sukhavisesāti **loko**, upapattiviseso. **Vatṭaṃ** saṃsāro. Kāmassādavasena pavatto lobho **kāmāmisaṃ**. Bhavavisesapatthanāvasena pavatto **lokāmisaṃ**. Vibhavo nāma kimatthiyo, ko vā taṃ abhipattheyyāti vaṭṭānugedhabhūto lobho vaṭṭāmisanti ca vadanti. **Tadārammaṇanti** tassā taṇhāya ārammaṇaṃ, rūpādi. **Lokadhammā** lābhādayo. Vuttāvasesā sabbāva taṇhā **saṃsārajanako rāgo**.

Paṭhamanayavaṇṇanā niṭṭhitā.

### Dutiyanayavaṇṇanā

468-9. **Sabbe sattāti** kāmabhavādīsu, saññībhavādīsu, ekavokārabhavādīsu ca sabbabhavesu sabbe sattā. Āhārato ṭhiti etesanti **āhāraṭṭhitikā**, paccayaṭṭhitikā. Yena paccayena te tiṭṭhinti, so ekova dhammo ñātapariññāsankhātāya “āhāraṭṭhitikā”ti abhiññāya abhiññeyyo. **Dve dhātuyoti** saṅkhatāsankhatadhātuyo. **Tisso dhātuyoti** kāmadhāturūpadhātu-arūpadhātuyo. **Pañca vimuttāyatanānīti** “idha bhikkhave bhikkuno satthā dhammaṃ deseti aññataro vā garuṭṭhāniyo”ti-ādinā<sup>1</sup> āgatāni vimuccanakāraṇāni. **Anuttariyānīti** dassanānuttariyādīni cha anuttariyāni. **Niddasavatthūnīti**

1. Dī 3. 200, 234; Am 2. 18 piṭṭhesu.

yehi kāraṇehi niddaso hoti, tāni niddasavattḥūni nāma. Desanāmatṭaṅcetaṃ. Khīṇāsavo hi dasavasso hutvā parinibbuto puna dasavasso na hoti. Na kevalaṅca dasavasso, navavassopi -pa- ekamuhuttikopi na hotiyeva puna paṭisandhiyā abhāvā, aṭṭhuppattivāsena panevaṃ vuttaṃ. Tāni pana “idha bhikkhu sikkhāsamādāne tibbacchando hoti”<sup>1</sup>ti-ādina<sup>1</sup> sutte āgatāniyeva. “Sammādiṭṭhissa purisapuggalassa micchādiṭṭhi nijjīṇṇā hoti”<sup>2</sup>ti-ādini<sup>2</sup> **dasa nijjaravattḥūni. Khandhādayoti** khandhāyatanadhātādayo. **Vinandhananti** “bhavādivinandhanaṭṭhena vānaṃ vuccati taṅhā”<sup>3</sup>ti<sup>3</sup> dasseti. **Gamananti** assādanavasena ārammaṇe pavattimāha. Tena vuttaṃ “**piyarūpasātarūpesū**”ti.

**Vipassanāsahagatanti veditabbaṃ** viññattisamuṭṭhāpakattā. “Maggam appattaṃ kāyikaṃ vīriyaṃ”ti visesetvā vuttattā pana lokuttaravīriyampi pariyāyena kāyikaṃ nāma atthīti dīpitaṃ hoti.

Rūpāvacare pītisambojjhaṅgoti na vuccatīti āha “**rūpāvacare -pa- paṭikkhittā**”ti. Yathā vipassanāsahagatā pīti pariyāyena “pītisambojjhaṅgo”ti vuccati, evaṃ rūpāvacare pīti nibbedhabhāgiyā vattabbā siyā. Evaṃ labbhamānāpi alabbhamānaṃ upādāya na vuttā. “**Avitakka-avicārā**”ti visesanaṃ santapaṇītāya pītiyā dassanattḥaṃ. **Bojjhaṅgabhūtāti** pariyāyabojjhaṅgabhūtā. **Avitakka-avicāro pīti -pa- na vutto** savitakkasavicārattā tassa. Na hi kāmāvacarā avitakka-avicārā pīti atthi.

**Idha vutto** pariyāyenāti attho. Maggapaṭivedhānulomanato vipassanāya viya pādakajjhānesupi sati-ādayo “bojjhaṅgā”tveva vuccantīti āha “**nibbedhabhāgiyattā na paṭikkhipitabbo**”ti. Evaṃ kasiṇajjhānādīsu bojjhaṅge uddharantānaṃ adhippāyaṃ vatvā anuddharantānaṃ adhippāyaṃ vuttum “**anuddharantā panā**”ti-ādīmāha. Te hi āsanekantakiccanibbattīhi vipassanākkhaṇe bojjhaṅge uddharanti, na jhānakkhaṇe tadabhāvato. Tenāha “**vipassanākkicassa viya -pa- na uddharanti**”ti. Kasiṇanissando arūpānīti āha “**tadāyattānī**”ti.

Dutiyanayavaṇṇanā niṭṭhitā.

1. Dī 3. 209 piṭṭhe. 2. Dī 3. 259; Am 3. 430 piṭṭhe. 3. Taṅhāti vuttanti (bahūso)

### Tatīyanayaṇṇanā

470-1. Vossajjanam pahānam vossaggo, vossajjanam vā vissaṭṭhabhāvo nirāsaṅkānuppavesoti āha “vossaggasaddo -pa- duvidhatā vuttā”ti. Vipassanākkhaṇe **tadaṅgatanninnappakārena**, maggakkhaṇe **samucchadatatārammaṇakaraṇappakārena**.

Suttantabhājanīyayaṇṇanā niṭṭhitā.

### 2. Abhidhammabhājanīyayaṇṇanā

472. Upekkhanamupekkhāsambojjhaṅgassa sabhāvo, so ca samādhivīriyasambojjhaṅgo viya sampayuttānam ūnādhikabhāvabyāvaṇo ahutvā tesam anūnādhikabhāve majjhatakkārappavattīti imamattam āha “**upekkhanavasenā**”ti-ādinā. Tattha **upapattito ikkhananti** paṭisaṅkhānamāha.

Abhidhammabhājanīyayaṇṇanā niṭṭhitā.

**Bojjhaṅgavibhaṅgayaṇṇanā niṭṭhitā.**

# 11. Maggaṅgavibhaṅga

## 2. Abhidhammabhājanīyavaṇṇanā

490. **Abhidhammeti** dhammasaṅgahe. So hi nibbattitābhidhammadesanā, na vibhaṅgadesanā viya suttantanayavimissā. **Ariyopapadataṃ na karotī** vināpi tenassa ariyabhāvasiddhito. Tenāha aṭṭhakathāyaṃ “yathā hī”ti-ādi.

493. “**Lokiyakālenā**”ti idaṃ pubbhāgabhāvanānubhāvena kiccātirekasiddhīti dassanattham vuttaṃ. **Etesanti sammādiṭṭhi-ādīnaṃ**. Appahāne, pahāne ca ādīnavānisamsavibhāvanādinā visesappaccayattā **sammādiṭṭhi-ādīni micchāvācādīni pajahāpentīti vuttāni**. Micchāvācādito nivatti sammāvācādikiriyāti vuttaṃ “**sammāvācādikiriyā hi viratī**”ti. Sammādiṭṭhi-ādayo viya **na kārapakabhāvena**, taṃsamaṅgīpuggalo viya **na kattubhāvena**. **Lokuttarakkhaṇepīti** na kevalaṃ lokiyakkhaṇeyeva, atha kho lokuttarakkhaṇepi.

**Khandhopadhiṃ vipaccaṭīti** paṭisandhidāyikaṃ sandhāyāha. **Tattha vipaccaṭīti** pavattivipākādāyikaṃ.

**Ekekanti** “tattha katamā sammādiṭṭhī”ti-ādīnā<sup>1</sup> ekekaṃ aṅgaṃ pucchitvā. **Tassa tassevāti** ekeka-aṅgasseva, na aṅgasamudāyassa. **Saha pana pucchitvāti** “tattha katamo pañcaṅgiko maggo”ti<sup>1</sup> pucchitvā. **Ekato vissajjanapaṭiniddesattāti** yadipi “tattha katamā sammādiṭṭhi? Yā paññā”ti-ādīnā<sup>1</sup> vissajjanaṃ katam, “tattha katamo pañcaṅgiko maggo”ti<sup>1</sup> pana ekato katāya pucchāya vissajjanavasena paṭiniddesabhāvato na pāṭiyekkaṃ pucchāvissajjanaṃ nāma hoti. Kasmā panettha pañcaṅgakavāre eva pāṭiyekkaṃ pucchāvissajjanaṃ katam, na aṭṭhaṅgikavāreti codanaṃ sandhāyāha “**tatthā**”ti-ādi. **Ekekamukhāyāti** sammādiṭṭhi-ādimukhāya. Tena vuttaṃ “ariyaṃ vo bhikkhave sammādiṭṭhiṃ desessāmi sa-upanisaṃ

---

1. Abhi 2. 246 piṭṭhe.

saparikkhāraṇaṃ”ti-ādi<sup>1</sup>. **Pubbasuddhiyā sijnhanti.** Tathā hi vuttaṃ “pubbeva kho paṇassa kāyakammaṃ vacīkammaṃ ājīvo suparisuddho hotī”ti<sup>2</sup>, tasmā sammāvācādimukhā bhāvanā natthīti adhippāyo. Tenāha “**na maggassa upacārenā**”ti.

Abhidhammabhājanīyavaṇṇanā niṭṭhitā.

**Maggaṅgavibhaṅgavaṇṇanā niṭṭhitā.**

---

1. Saṃ 3. 17 piṭṭhe.

2. Ma 3. 337 piṭṭhe.



## 12. Jhānavibhaṅga

### 1. Suttantabhājanīya

#### Mātikāvaṇṇanā

508. **Pātimokkhasamvarādīti ādi-saddena** indriyesu guttadvāratā, bhojane mattaññutā, satisampajaññaṃ, jāgariyānuyogoti evamādike saṅgaṇhāti. **Asubhānussatiyoti** asubhajhānāni, anussatijhānāni ca. Sati samaṇabhāvakarapubbabhāgakarāṇīyasampattiyāṃ samaṇabhāvopi siddhoyeva hotīti āha “**suñña -pa- dasseti**”ti. Kāraṇe hi sidde phalampi siddhameva hotīti. Sikkhāpadānaṃ sarūpaṃ, sikkhitabbākāraṃ, saṅkhepato vibhāgaṇca dassetuṃ “**sikkhāpadesū**”ti-ādi vuttaṃ. Tattha **nāmakāyādivasenāti** nāmakāya, padakāya, byañjanakāyavasena vuttetu. Iminā sikkhāpadānaṃ sikkhāya adhigamūpāyabhūtapaññattisabhāvataṃ dasseti. Tesu sikkhitabbākāro satthu-āṇānatikkamoyevāti āha “**vaca -pa- tabbesū**”ti. **Sikkhākoṭṭhasesūti** vuttappabhedesu adhisīlasikkhābhāgesu. Tesu samādānameva sikkhitabbākāroti vuttaṃ “**paripūraṇavasena sikkhitabbesū**”ti. **Sikkhāpadekadesabhūtāti** sikkhāpadasamudāyassa avayavabhūtā. Bhikkhusikkhā hi idhādhippetā “idha bhikkhū”ti<sup>1</sup> vuttattā. Tathā hi vakkhati “sesasikkhā pana atthuddhārasena sikkhāsaddassa atthadassanattam vuttā”ti<sup>2</sup>.

Mātikāvaṇṇanā niṭṭhitā.

#### Niddesavaṇṇanā

509. **Diṭṭhattāti** sayambhūññaṇena sacchikatattā. **Khanti-ādīsupi** eseva nayo. sayambhūññaṇena sacchikaraṇavaseneva hi bhagavato khamanaruccanādayo, na aññesaṃ viya anussavākāraparivitakkādīmukhena. **Aviparītatto** ekantaniyyānaṭṭhena veditabbo. **Sikkhiyamānoti** sikkhāya

1. Abhi 2. 251 piṭṭhe.

2. Abhi-Ṭṭha 2. 329 piṭṭhe.

paṭipajjiyamāno. **Sikkhitabbāni sikkhāpadānī**ti sikkhāpadapāḷim vadati. **Khandhattayanti** sīlādikkhandhattayaṃ. “Sabbapāpassa -pa- buddhāna sāsanān”ti<sup>1</sup> vacanato āha “**anusāsanadānabhūtaṃ sikkhattayan**”ti.

**Sammādiṭṭhiyā paccayattā**ti maggasammādiṭṭhiyā ekantahetubhāvato. Ettha ca **sammādiṭṭhī**ti kammassakatāsammādiṭṭhi, kammapathasammādiṭṭhi ca. **Phalakāraṇopacārehī**ti phalūpacārena sammādiṭṭhipaccayattā, kāraṇūpacārena sammādiṭṭhipubbaṅgamattā. **Kusaladhammehi attano ekadesabhūtehī**ti sammādiṭṭhidhamme sandhāyāha. Kusalapaññāviññāṇānaṃ vā pajānavijānavasena dassanaṃ **diṭṭhī**ti. Tena avayavadhammena samudāyassa upacaritataṃ dasseti. **Vinayanakiriyattā**ti desanābhūtaṃ sikkhattayamāha. **Dhammenā**ti dhammato anapetena. **Avisamasabhāvenā**ti avisamena sabhāvena, samenāti attho.

510. **Anaññatthenā**ti garahādi-aññattharahitena sakatthena. **Bhinnapaṭadhareti** bhikkhusārūppavasena pañcakhaṇḍādinā chedena chinnacīvaradhare.

**Bhedanapariyāyavasena vuttaṃ**, tasmā kilesānaṃ pahānā kilesānaṃ bhedaṃ bhikkhūti vuttaṃ hoti.

**Guṇavasenā**ti sekkhadhammādiguṇānaṃ vasena. Tena bhāvatthato bhikkhu-saddo dassito hoti.

**Idaṃ dvayanti** “ettha cā”ti-ādinā parato saṅghadassanavasena vuttaṃ “sekkho”ti-ādikāṃ vacanadvayaṃ. **Iminā**ti “sekkho bhikkhu bhinnattā pāpakānaṃ”ti padānaṃ atthadassanena. **Na sameti** sekkha-asekkhaputhujjanāsekkhadīpanato. **Tadidanti** paṭhamadvayaṃ. **Nippariyāyadassanaṃ** ariyānaṃ, asekkhānaṃyeva ca sekkhabhinnakilesabhāvadīpanato. **Vuttoti** paṭiññāvacaṇaṃ, saccāṃ vuttoti attho. **Na pana idhādhippeto** atthuddhāravasena dassitattā.

**Bhagavato vacananti** upasampadākammavācamāha. **Tadanurūpanti** tadanucchavikaṃ, yathāvuttanti attho. Parisāvattusīmāsampattiyo “samaggena saṅghena akuppenā”ti<sup>2</sup> iminā pakāsītāti “**ṭhānārahan**”ti padassa “**anūna -pa- avuttan**”ti ettakameva atthamāha.

1. Khu 1. 41; Dī 2. 42; Khu 10. 37 piṭṭhādīsu.

2. Abhi 2. 254 piṭṭhe.

511. **Avītikkamanaviratibhāvatoti** avītikkamasamādānabhūtā viratīti katvā vārittasīlam̄ patvā virati eva padhānanti cetanāsīlassapi pariyāyatā vuttā. “**Nagaravaḍḍhakī vatthuvijjācariyo**”ti idaṃ idhādhippetanagaravaḍḍhakīdassanaṃ. Vatthuvijjā, pāsādavijjāti duvidhā hi vaḍḍhakīvijjā. **Lehitabbanti** sāyitabbaṃ. **Cubitabbanti** pātābbaṃ.

**Indriyasamvarāhārattāti** indriyasamvarahetukattā. Pātimokkhasīlam̄ sikkhāpadasīlam̄ na pakatisīlādikena gayhatīti āha “**pātimokkhato aññaṃ sīlam̄ kāyika-avītikkamādiggaḥaṇena gahitaṃ**”ti. Taṃ pana pātimokkhasīlena na saṅgayhatīti na sakkā vattum̄, kāyikavācasikasamvarassa tabbinimuttassa abhāvatoti dassento “**iminā adhippāyena vuttan**”ti āha.

Tattha pātimokkhasaddassa evaṃ attho veditabbo—kilesānaṃ balavabhāvato, pāpakiriyāya sukarabhāvato, puññakiriyāya ca dukkarabhāvato bahukkhattum̄ apāyesu patanasīloti pātī, puthujjano, aniccatāya vā bhavādīsu kammavegakkhitto ghaṭṭiyantaṃ viya anavaṭṭhānena paribbhamanato gamanasīloti pātī, maraṇavasena vā tamhi tamhi sattānikāye attabhāvassa pātanāsīloti pātī, sattasantāno, cittameva vā. Taṃ pātinaṃ saṃsāradukkhato mokkhetīti **pātimokkham̄**. Cittassa hi vimokkhena sattopi “vimutto”ti vuccati. Vuttañhi “cittavodānā visujjhantī”ti<sup>1</sup>, “anupādāya āsavehi cittaṃ vimuttan”ti<sup>2</sup> ca. Atha vā avijjādinā hetunā saṃsāre patati gacchati pavattaṭṭīti pātī. “Avijjānīvaraṇānaṃ sattānaṃ taṇhāsamyōjanānaṃ sandhāvataṃ saṃsaratan”ti<sup>3</sup> hi vuttan̄. Tassa pātino sattassa taṇhādisaṃkilesattayato mokkho etenāti **pātimokkham̄**. “Kaṇṭhekālo”ti-ādīnaṃ viya tassa samāsasiddhi veditabbā.

Atha vā pātetī vinipātetī dukkhetī pātī, cittaṃ. Vuttañhi “cittena nīyati loko, cittaṃ parikassatī”ti<sup>4</sup>. Tassa

1. Saṃ 2. 123 piṭṭhe.

2. Vi 3. 23 piṭṭhe.

3. Saṃ 1. 387; Saṃ 2. 121; Saṃ 3. 199; Abhi 4. 30 piṭṭhādīsu.

4. Saṃ 1. 36 piṭṭhe.

pātino makkho etenāti **pātimokkham**. Patati vā etena apāyadukkhe vā saṁsāradukkhe vāti pātī, taṇhādisaṁkilesa. Vuttañhi “taṇhā janeti purisaṁ<sup>1</sup>, taṇhādutiyo puriso”<sup>2</sup> ca ādi. Tato makkhoti **pātimokkham**.

Atha vā patati etthāti pātīni, cha ajjhattikabāhirāni āyatanāni. Vuttañhi “chasa loko samuppanno, chasu kubbatī santhavan”<sup>3</sup>. Tato cha-ajjhattikabāhirāyatanasaṁkhātato pātito makkhoti **pātimokkham**.

Atha vā pāto vinipāto assa atthīti pātī, saṁsāro, tato makkhoti **pātimokkham**.

Atha vā sabbalokādhipatibhāvato dhammissaro bhagavā “patī”<sup>ti</sup> vuccati, muccati etenāti makkho, patino makkho tena paññattattāti patimokkho, patimokkho eva **pātimokkham**. Sabbaguṇānaṁ vā mūlabhāvato uttamaṭṭhena pati ca so yathāvuttenatthena makkho cāti patimokkho, patimokkho eva **pātimokkham**. Tathā hi vuttam “pātimokkhanti mukhametaṁ pamukhametan”<sup>4</sup> vitthāro.

Atha vā pa-iti pakāre, atīti accantatthe nipāto, tasmā pakārehi accantaṁ makkhetīti **pātimokkham**. Idañhi sīlaṁ sayam tadaṅgavasena, samādhisahitaṁ paññāsahitaṁ vikkhambhanavasena, samucchadavasena ca accantaṁ makkheti mocetīti **pātimokkham**. Pati pati makkhoti vā patimokkho, tamhā tamhā vītikkamosato paccekaṁ makkhoti attho, patimokkhoyeva **pātimokkham**. Makkho vā nibbānaṁ, tassa makkhassa paṭibimbabhūtoti patimokkham. Sīlasamvaro hi nibbedhabhāgiyo sūriyassa aruṇuggamaṁ viya nibbānassa udayabhūto tappaṭibhāgo viya hoti yathārahaṁ kilesanibbāpanatoti patimokkham, patimokkhamyeva **pātimokkham**.

1. Saṁ 1. 34, 35 piṭṭhesu.

2. Khu 1. 201; Saṁ 1. 316; Khu 7. 362; Khu 8. 211 piṭṭhesu.

3. Saṁ 1. 38; Khu 1. 304 piṭṭhesu.

4. Vi 3. 141 piṭṭhe.

Atha vā mokkhaṃ pati vattati, mokkhābhimukhanti vā patimokkhaṃ, patimokkhaṃyeva **pātimokkhanti**. Idampi pātimokkhasaddassa mukhamattadassanameva. Sabbākārena pana jinapātimokkho<sup>1</sup> bhagavāva anavajjapatimokkhaṃ pātimokkhaṃ saṃvaṇṇeyya.

513. Garubhaṇḍavissajjanakaraṇabhūtaṃ etassa atthīti **garubhaṇḍavissajjanam**.

**Garubhaṇḍantarabhūtaṃ** thāvarādi. Ūnakaṃ na vaṭṭatīti **phātikammaṃ** vuttaṃ. Atirekagghanaṃ, tadagghanakameva vā vaṭṭatīti. **Yathāvuttanti** pokkharāṇito paṃsu-uddharaṇādithāvarakammaṃ.

**Dhāreti, poseti vā** paresaṃ dārake.

**Gihīnaṃ kariyamānaṃ vuttaṃ**, na saṃghassa, gaṇassa vāti attho. **Piṇḍapaṭipīṇanti** uttarapadalopaṃ, purimapade uttarapadalopaṃca katvā niddesoti āha **“piṇḍatthan”**ti-ādi. **Ayoniso vicāraṇaṃ** ayāthāvapaṭipatti.

514. Gacchanti yathāsakaṃ visaye pavattantīti **gāvo**, cakkhādīni indriyāni.

**Vidhunanaṃ** papphoṭanaṃ, pavāhanati attho.

515. Yathā karaṇattho karaṇīyasaddo, evaṃ vikiraṇatthopi hotīti āha **“vikkhipitabbāni”**ti, viddhamsitabbānīti attho. Saṃyamanīyāni vā **saṃyamakaraṇīyāni**, “na puna evaṃ karomī”ti attano dahanam manasā adhiṭṭhānaṃ saṃyamaṇaṃ, saṃyamanakaraṇīyāni **saṃvarakaraṇīyānī**ti cittamattāyattā eva saṃyamasamvarā ācariyena adhippetāti āha **“anāpattigamanīyāni”**ti. Antevāsikatthero pana desanāpi cittuppādamanasikārehi vinā na hotīti desanāvisuddhiṃ nissaraṇaṃ vadati.

516. “Alaṅkato cepi -pa- sa bhikkhū”ti-ādīsu<sup>2</sup> viya idhāpi **guṇato bhikkhu adhippeto**. Tathā ca vuttaṃ “idha bhikkhūti paṭipattiyā bhikkhubhāvadassanato evamāha”ti<sup>3</sup>. Yattakaṃ ekena puggalena asesetvā

1. Jinapātimokkho (Ka)

2. Khu 1. 34 piṭṭhe.

3. Abhi-Ṭṭha 2. 206 piṭṭhe.

samādātuṃ sakkā, taṃ sandhāyāha “**yena samādānena sabbāpi sikkhā samādinna honti**”ti yathā upasampadāpāripūriyā asesam upasampannasikkhāsamādānam. **Tanti** samādānam. **Anekesūti** visum visum samādānesu. Yathā samādinna sikkhāya sabbena sabbam avitikkamanam sikkhitabbākāro, evam sati vitikkame desanāgāminiyā desanā, vuṭṭhānagāminiyā vuṭṭhānam tadupāyabhūtam pārivāsikavattacaraṇādīti vuttam “**avīti -pa- ākārenā**”ti. Yam sikkhāpadam pamādena vitikkantam, tam sikkhiyamānam hotīti sesitam nāma hotīti āha “**vitikkamanavasena sesassā**”ti.

519. **Cittaparisodhanabhāvanāti** cittassa parisodhanabhūtā āvaraṇīyadhammavikkhambhikā samādhivipassanābhāvanā cittaparisodhanabhāvanā. **Suppariggāhakanti** niddāpariggāhakam. **Idanti** idam abbokiṇṇabhavaṅgottaraṇasaṅkhātam kiriyamayacittānam appavattanam suppaṃ nāmā. **Itō** bhavaṅgottaraṇato. **Pubbe itō** kiriyamayacittappavattito paraṅca natthi. **Ayam** kāyakilamatho, thinamiddhaṅca **etassa** suttassa paccayo.

522. **Satipaṭṭhānādayoti** satipaṭṭhānasammappadhāna-iddhipādā, ekacce ca maggadhammā saha na pavattanti, tasmā pāḷiyam na vuttāti adhippāyo. Ete tāva ekasmiṃ ārammaṇe saha na pavattantīti na gaṇheyyum, indriyabalāni kasmā na gahitānīti āha “**pavatta -pa- honti**”ti. Evampi saddhindriyabalāni bojjhaṅgehi na saṅgayhantīti katham tesam tadantogadhatāti codanam sandhāyāha “**pīti -pa- vuttattā**”ti.

523. **Samantatoti** sabbabhāgesu sabbesu abhikkamādīsu, sabbabhāgato vā tesu eva abhikkamādīsu atthānatthādisabbabhāgato sabbākārato. **Sammāti** aviparītam yoniso. **Samanti** avisamaṃ, iṭṭhādi-ārammaṇe rāgādivisamarahitam katvāti attho.

Bhikkhā carīyati etthāti bhikkhācāro, bhikkhāya caraṇaṭṭhānam, so eva gocaro, bhikkhāya caraṇameva vā sampajañṇassa visayabhāvato gocaro, tasmim **bhikkhācāragocare**. So pana abhikkamādibhedabhinnanti visēnavasena vuttam “**abhikkamādīsu panā**”ti. **Kammaṭṭhānasaṅkhātetī** yogakammasa bhāvanāya pavattiṭṭhānasaṅkhāte ārammaṇe,

bhāvanākammeyeva vā, yogino sukhavisesahetutāya vā  
kammaṭṭhānasaṅkhāte sampajaññassa visayabhāvena **gocare**.

**Abhikkamādīsūti** abhikkamapaṭikkamādīsu ceva cīvarapārūpanādīsu ca.  
**Asammuyhanaṃ** cittakiriyāvāyodhātuvipphāraseneva tesam pavatti, na  
aññathāti yāthāvato jānanam.

**Kammaṭṭhānaṃ padhānaṃ katvāti** cīvarapārūpanādīsarīra-  
pariharaṇakiccakālepi kammaṭṭhānāmanasikārameva padhānaṃ katvā.

**Tasmāti** yasmā ussukajāto hutvā ativiya maṃ yācasi, yasmā ca  
jīvitantarāyānaṃ dujjānataṃ vadasi, indriyāni ca te paripākaṃ gatāni, tasmā.  
**Tihāti** nipātamattaṃ. **Te** tayā. **Evanti** idāni vattabbākāraṃ vadati.  
**Sikkhitabbanti** adhisīlasikkhādīnaṃ tissannampi sikkhānaṃ vasena  
sikkhanaṃ kātabbāṃ. Yathā pana sikkhitabbāṃ, taṃ dassento “**diṭṭhe**  
**diṭṭhamattaṃ bhavissati**”ti-ādimāha.

Tattha **diṭṭhe diṭṭhamattanti** rūpāyatane cakkhuviññāṇena diṭṭhamattaṃ.  
Yathā hi cakkhuviññāṇaṃ rūpe rūpamattameva passati, na niccādisabhāvaṃ,  
evaṃ sesatāṃdvārikaviññāṇehipi me ettha diṭṭhamattameva bhavissatīti  
sikkhitabbanti attho. Atha vā **diṭṭhe diṭṭhaṃ** nāma cakkhuviññāṇaṃ, rūpe  
rūpavijānananti attho. **Mattāti** pamāṇaṃ. Diṭṭhaṃ mattā etassāti  
**diṭṭhamattaṃ**, cakkhuviññāṇamattameva me cittaṃ bhavissatīti attho. Idaṃ  
vuttaṃ hoti—yathā āpāthagate rūpe cakkhuviññāṇaṃ na rajjati na dussati na  
muyhati, evaṃ rāgādivirahena cakkhuviññāṇamattameva me javanaṃ  
bhavissati, cakkhuviññāṇappamāṇeneva naṃ ṭhapessāmīti. Atha vā **diṭṭhaṃ**  
nāma cakkhuviññāṇena diṭṭharūpaṃ. **Diṭṭhe diṭṭhaṃ** nāma tattheva  
uppannaṃ sampaṭicchanasantīraṇavotṭhabbanasaṅkhātaṃ cittattayaṃ. Yathā  
taṃ na rajjati na dussati na muyhati, evaṃ āpāthagate rūpe teneva  
sampaṭicchanādippamāṇena javanaṃ uppādessāmi, nāssa taṃ pamāṇaṃ  
atikkamitvā rajjanādivasena uppajjitum dassāmīti evamettha attho  
daṭṭhabbo. Esa nayo sutamutesu. **Mutanti** ca tadārammaṇaviññāṇehi  
saddhiṃ gandharasaphotṭhabbāyatanaṃ veditabbāṃ. **Viññāte**  
**viññātamattanti** ettha pana **viññātaṃ** nāma manodvārāvajjanena  
viññātārammaṇaṃ, tasmiṃ viññāte. **Viññātamattanti** āvajjanappamāṇaṃ.  
Yathā āvajjanaṃ na rajjati na dussati na muyhati, evaṃ rajjanādivasena  
uppajjitum adatvā āvajjanappamāṇeneva cittaṃ ṭhapessāmīti

ayamettha attho. **Evañhi te bāhiya sikkhitabbanti** evaṃ imāya paṭipadāya tayā bāhiya tissannaṃ sikkhānaṃ anupavattanavasena sikkhitabbaṃ. Iti bhagavā bāhiyassa saṃkhittarucitāya chahi viññāṇakāyehi saddhiṃ chaḷārammaṇabhedabhinnaṃ vipassanāvisayaṃ diṭṭhādīhi catūhi koṭṭhāsehi vibhajitvā tathassa nātatīraṇapariññaṃ dasseti.

Kathaṃ? Ettha hi rūpāyatanāṃ passitabbaṭṭhena **diṭṭhaṃ** nāma, cakkhuvīññāṇaṃ pana saddhiṃ taṃdvārikaviññāṇehi dassanaṭṭhena, tadubhayampi yathāpaccayaṃ pavattamānaṃ dhammamattameva, na ettha koci kattā vā kāretā vā. Yato taṃ hutvā abhavaṭṭhena aniccaṃ, udayabbayaṭṭhena dukkhaṃ, avasavattanaṭṭhena anattāti kuto tattha paṇḍitassa rajjanādīnaṃ okāsoṭi ayañhettha adhippāyo. Esa nayo sutādīsipi.

Idāni nātatīraṇapariññāsu paṭiṭṭhitassa upari saha phalena pahānapariññaṃ dassetuṃ “**yato kho te bāhiyā**”ti-ādi āradhaṃ. Tattha **yato**ti yadā, yasmā vā. **Teti** tava. **Tatoti** tadā, tasmā vā. **Tena**ti tena diṭṭhādīna, diṭṭhādipaṭibaddhena vā rāgādīna. Idāni vuttaṃ hoti—bāhiya tava yasmim kāle, yena vā kāraṇena diṭṭhādīsū mayā vuttavidhiṃ paṭipajjantassa aviparītasabhāvāvabodhena diṭṭhādīmattaṃ bhavissati, tasmim kāle, tena vā kāraṇena tvaṃ tena diṭṭhādipaṭibaddhena rāgādīna saha na bhavissasi, ratto vā duṭṭho vā mūḷho vā na bhavissasi pahīnarāgādīkattā, tena vā diṭṭhādīna saha paṭibaddho na bhavissasi. **Tato tvaṃ bāhiya na tatthāti** yadā, yasmā vā tvaṃ tena rāgena vā ratto, dosena vā duṭṭho, mohena vā mūḷho na bhavissasi, tadā, tasmā vā tvaṃ tattha diṭṭhādīke na bhavissasi, tasmim diṭṭhe vā sutamutaviññāte vā “etaṃ mama, esohamasmi, eso me attā”ti<sup>1</sup> taṇhāmānadiṭṭhīhi allīno paṭiṭṭhito na bhavissasi. Ettāvata pahānapariññaṃ matthakaṃ pāpetvā khīṇāsavabhūmi dassitā. **Tato tvaṃ bāhiya nevidha, na hurāṃ, na ubhayamantarenāti** yadā tvaṃ bāhiya tena rāgādīna tattha diṭṭhādīsū paṭibaddho na bhavissasi, tadā tvaṃ neva idha loke, na paraloke, na ubhayattha hosi. **Esevento dukkhassāti** kilesadukkhassa, vaṭṭadukkhassa ca ayameva anto ayaṃ paricchedo parivaṭṭumabhāvoti ayameva hi ettha

---

1. Vi 3. 19 piṭṭhe.



attho. Ye pana “ubhayamantarenā”ti padaṃ gahetvā antarābhavaṃ nāma icchanti, tesam taṃ micchā. Tattha yaṃ vattabbaṃ, taṃ parato **antarābhavakathāyaṃ**<sup>1</sup> āvi bhavissati.

**Etesanti** atiharaṇavītiharaṇānaṃ.

“**Tattha hī**”ti-ādinā pañcaviññānavīthiyaṃ puretaraṃ pavattayonisomanasikāravasena āvajjanādīnaṃ ayoniso āvajjanādīnā itthādi-ārammaṇe lobhādippavattimattaṃ hoti, na pana itthipurisādivikappagāho, manodvāreyeva pana so hotīti dasseti. **Tassāti** “itthī, puriso”ti rajjanādikassa. **Bhavaṅgādīti** bhavaṅga-āvajjanadassanāni, sampañcchana santīraṇavoṭṭhabbanapañcadvārikajavanañca. **Apubbatittaratāvassenāti** apubbatā-ittarabhāvānaṃ vasena.

**Atiharatīti** mukhadvāraṃ atikkamitvā harati.

**Taṃtaṃvijānananipphādakoti** tassa tassa pariyesanādivisayassa, vijānanassa ca nipphādako. Yena hi payogena pariyesanādi nippajjati, so tabbisayaṃ vijānanampi nipphādeti nāma hoti. **Sammāpaṭipattinti** dhammesu aviparītaṭipattinā yathābhūtāvabodhaṃ.

**Gamanepīti** gamanapayogepi. **Atiharaṇaṃ** yathāṭṭhasseva kāyassa icchitadesābhimukhakarāṇaṃ. **Gamaṇaṃ** desantaruppatti. **Vakkhamānoti** “abhikkante paṭikkanteti -pa- addhāgamanavasena kathito. Gate ṭhite nisinneti ettha vihāre cuṅṅikapāduddhāra-iriyāpathavasena kathito”ti<sup>2</sup> vakkhamāno viseso.

**Pavatteti** caṅkamādīsu pavatte rūpārūpadhamme. **Pariggaṇhantassa** aniccādito.

Kāyikakiriyādinibbattakajavanaṃ phalūpacārena “**kāyādikiriyāmayan**”ti vuttaṃ. **Kiriyāsamuṭṭhitattāti** pana kāraṇūpacārena.

526. **Kammaṭṭhāna-upāsanassāti** kammaṭṭhānabhāvanāya. **Yogapathanti** bhāvanāyogakiriyāya pavattanamaggaṃ.

537. **Kāyādisūti** kāyavedanācittadhammesu. **Suṭṭhu pavattiyāti** asubhānupassanādivasena pavattiyā. **Niyyānasabhāvo** sammāsatiṭā

1. Abhi 4. 269 piṭṭhe.

2. Abhi-Ṭṭha 2. 348 piṭṭhe.

eva. **Upaṭṭhānanti** satim kiccato dasseti. Ettha ca yathāvutto pariggaho jāto etissāti **pariggahitā**, tam pariggahitam niyyānabhūtam satim katvāti attho veditabbo.

542-3. Pakuppannam idha **vikārāpattibhāvo**.

550. **Tappaṭipakkhasaññā**ti thinamiddhapaṭipakkhasaññā. Sā atthato tadanādivasena thinamiddhavinodanākārappavattā kusalavitakkasampayuttasaññā, tathābhūto vā cittuppādo saññāsīsena vuttoti veditabbo.

553. **Sārambhanti** ārambhavantam, sahārambhanti attho. **Nirāvaraṇābhogā** thinamiddhandhakāravigamena nirāvaraṇasamannāhārasaññā. **Vivaṭā** appaṭicchādanā.

564. **Tattha tatthāti** “iminā pātimokkhasamvarena upeto hoti”ti-ādīsu<sup>1</sup>.

588. Yathā kenaci nikkujjitam “idam nāmetan”ti pakatiñāṇena na ñāyati, evam sabbappakārena aviditam nikkujjitam viya hotīti āha “**sabbathā aññātātā nikkujjitabhāvo**”ti. **Niravasesapariicchindanābhāvoti** duviññeyyatāya niravasesato paricchinditabbatābhāvo, paricchindikābhāvo vā. Ekadesaneva hi gambhīram ñāyati.

**Ācikkhantī**ti ādito paribyatam kathenti. **Desentī**ti upadisanavasena vadanti, pabodhenti vā. **Paññāpentī**ti pajānāpentī, sampakāsentīti attho. **Paṭṭhapentī**ti pakārehi asaṅkarato ṭhapenti. **Vivarantī**ti vivaṭam karonti. **Vibhajantī**ti vibhattam karonti. **Uttānīkarontī**ti anuttānam gambhīram uttānam pākātam karonti. Ettha ca “**paññāpentī**”ti-ādīhi chahi padehi atthapadāni dassitāni. “**Ācikkhanti desentī**”ti pana dvīhi padehi byañjanapadānīti evam atthabyañjanapadasampannāya ulārāya pasamsāya pasamsanam dasseti. Yam panetesu atthabyañjanapadesu vattabbam, tam **netti-atṭhakathāyam**<sup>2</sup> vitthārato vuttameva, tasmā tattha vuttanayeneva veditabbam.

1. Abhi 2. 255 piṭṭhe.

2. Netti-Ṭṭha 32, 33 piṭṭhesu.

602. **Ettheva yojetabbaṃ** tassa heṭṭhābhūmisamatikkamanamukhena bhūmivisesādhigamupāyadīpanato. **Sabbatthāpīti** “rūpasaññānaṃ samatikkamā, ākāsañācāyatanam samatikkammā”ti sabbesupi samatikkamavacanesu.

610. **Taṃyeva ākāsaṃ phuṭaṃ viññāṇanti** taṃyeva kasiṇugghāṭimākāsaṃ “anantaṃ”ti manasikārena phuṭaṃ pharivā ṭhitaṃ paṭhamāruppaviññāṇaṃ “anantaṃ viññāṇaṃ”ti **manasi karotīti** attho. Dutiyavikappe pana sāmaññajotaṇā<sup>1</sup> visese tiṭṭhatīti “phuṭaṃ”ti iminā viññāṇameva vuttanti **phuṭaṃ viññāṇanti** paṭhamāruppaviññāṇamāha. Tañhi ākāsaṃ sapharaṇakaviññāṇaṃ. **Viññāṇenāti** ca kāraṇatthe karaṇavacanaṃ, tañca dutiyāruppaviññāṇaṃ vadatīti āha “**viññāṇaṇicāyatanaviññāṇena manasi karotī**”ti. **Tenāti** paṭhamāruppaviññāṇena. **Gahitākāraṇanti** anantapharaṇavasena gahitākāraṇaṃ. **Manasi karotīti** dutiyāruppaparikkammamanasikārena manasi karoti. **Evanti** yathāvuttākāraṇaṃ kasiṇugghāṭimākāse paṭhamāruppaviññāṇena anantapharaṇavasena yo gahitākāro, taṃ manasi karontaṃyeva. **Taṃ viññāṇanti** taṃ dutiyāruppaviññāṇaṃ. **Anantaṃ pharati** “anantaṃ”ti pharati, tasmā dutiyoyevattho yuttoti. “**Yañhi**”ti-ādinā yathāvuttamatthaṃ pākaṭaṃ karoti. **Taṃpharaṇākārasahitanti** tasmim ākāse pharaṇākārasahitaṃ. **Viññāṇanti** paṭhamāruppaviññāṇaṃ.

615. **Pubbeti** dutiyāruppaparikkammakāle. Yaṃ “anantaṃ viññāṇaṃ”ti manasi kataṃ, **taṃyeva** paṭhamāruppaviññāṇameva. Taṃyeva hi abhāveti. Ārammaṇāṭikkamavasena hi etā samāpattiyo laddhabbāti.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

623. Catukkanaye dutiyajjhānameva yesaṃ vicāro oḷārikato na upaṭṭhāti, yesaṃca upaṭṭhāti, tesaṃ vasena dvidhā bhinditvā

1. Sāmaññācodanā (bahūsu)

desitanti catukkanayato pañcakanayo nīhatoti āha “**uddhaṭānaṃyeva catunnaṃ -pa- dassanato cā**”ti.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

640. **Tīsūti** paṭhamādīsu tīsu. Catukkanayena hi taṃ vuttaṃ. **Evaṃ** koṭṭhāsikāti appamaṇāti vuttā. Tenāha “**lokuttarabhūtā evāti adhippāyo**”ti. Paricchinnākāsa -pa- catutthānaṃ vaṭṭavipassanāpādakattā “**sabbatthapādakacattutthe saṅgahitānī**”ti vuttaṃ.

**Ayaṃ kathāti** parittārammaṇādikathā. Heṭṭhimo ariyo uparimassa ariyassa lokuttaracittāni paṭivijjhituṃ na sakkotīti vuttaṃ “**na ca -pa-sakkotī**”ti.

“Kiriyaṭo dvādasannaṃ”ti ca pāṭho atthi. **Saha vadati** lokuttaraphalacattutthātāsāmaññenāti adhippāyo. Idha sabbasaddassa padesasabbavācibhāvato ekadesassa asambhavepi sabbatthapādakatā eva veditabbāti dassetuṃ “**sabbattha -pa- daṭṭhabban**”ti āha. **Paricchinnākāsakasiṇacattutthādīnīti ādi-saddena ānāpānacattutthādayo saṅgahitā. Navattabbatāyāti navattabbārammaṇatāya.**

**Nibbānañcāti vattabbaṃ** tadārammaṇassāpi bahiddhārammaṇabhāvato.

“**Sasantānagatampi**”ti idaṃ rūpa-saddena, **kamma-saddena** ca sambandhitabbaṃ “sasantānagatampi apākaṭaṃ rūpaṃ dibbacakkhu viya sasantānagatampi apākaṭaṃ kammaṃ vibhāvetī”ti. Pākaṭe pana sasantānagate rūpe, kamme ca abhiññāññāṇena payojanaṃ natthīti “**apākaṭan**”ti visesetvā vuttaṃ.

**Jhānavibhaṅgavaṇṇanā niṭṭhitā.**

## 13. Appamaññāvibhaṅga

### 1. Suttantabhājanīyavaṇṇanā

642. **Disādesodhinā**ti “ekam disan”ti-ādidisodhinā, vihāragāmanigamanagarajanapadarajjādidesodhinā ca. **Sattodhinā**ti “sabbā itthiyo, sabbe purisā, ariyā, anariyā”ti-ādivasappavattena sattodhinā. **Etassā**ti etassa padassa, padatthassa vā. **Anuvattakanti** adhi-kāravasena pavattakam. **Tam dvayanti** tathā-saddo, iti-saddoti ubhayam. “Tathā dutiyan”ti hi vutte “tathā-saddo yathā mettāsahagatena cetasā puratthimādisu ekam disam pharivā viharati, tathā dutiyampi disam mettāsahagatena cetasā pharivā viharati”ti imamatham dīpeti. Sesadvayepi eseva nayo. Yasmā **itī**ti ayam iti-saddo pakāratthe, evanti vuttam hoti, tasmā “yathā mettāsahagatena cetasā ekam, dutiyan, tatiyan, catuttham disam pharivā viharati, evam uddham, adho, tiriyan mettāsahagatena cetasā pharivā viharati”ti imamatham dīpeti. Tena vuttam “**mettā -pa- tam dvayan**”ti. **Tassā**ti dvayassa. **Pharaṇantarādīṭṭhānanti** pharaṇato aññaṃ pharaṇantaram, tam ādi yassa, tam pharaṇantarādi. Pharaṇantaram hetam mettābhāvanāya, yadidaṃ vipulatā. **Ādi**-saddena bhummantarapaguṇabhāvādi gayhati, tassa pharaṇantarādino ṭhānaṃ ṭhānabhūto “vipulenā”ti-ādinā vuccamāno mettābhāvanāviseso. Vuttapakāramattaparāmasanassa **tassa** dvayassa **aṭṭhānam** anokāsoti. **Iti katvā** iminā kāraṇena na vuttam tam dvayanti attho.

643. **Rāgassā**ti kāmarāgassa. **Sinehassā**ti puttasinghādisinehassa. **Vipattiyā**ti rāgasinehasaṅkhātāya mettābhāvanāya vipattiyā vināsassa. **Anuppattito** hirottappabalena anuppajjanato.

645. **Adhimuñcivā**ti bhāvanācittam ārammaṇe suṭṭhu vissajjetvā, tam panettha adhimuccanam yasmā pharaṇavaseneva hoti, tasmā vuttam “**suṭṭhu pasāretvā**”ti. Yasmā pana ārammaṇe suṭṭhu asaṃsappanavaseneva tam mettābhāvanāya adhimuccanam hoti, tasmā “**balavatā vā adhimokkhena adhimuccivā**”ti ca vuttam.

648. **Etesaᅇ**ᅇ padānaᅇ **sabbena** sakalena disādesādibhedena **avadhinā**.  
**Sabbāvadhidisādipharanaᅇkāreᅇti**  
 sabbāvadhībᅇtadisaᅇsapuggalapharaᅇappaᅇkāreᅇchi.

650. **Vighātavasenā**ti vikkhambhanavasena.

Suttantabhājanīyavaᅇᅇanā niᅇᅇhitā.

### 3. Paᅇhapucchakavaᅇᅇanā

699. **Kathitānaᅇ**ᅇ kusalādidhammānaᅇ. Imasmiᅇᅇ pana  
 appamaᅇᅇāvibhaᅇge kathitā appamaᅇᅇā, tā ca sabᅇavato lokiyā eva, na  
 khandhavibhaᅇgādīsu kathitā khandᅇādayo viya lokuttarāpīti ekamsato  
 sabbāsaᅇᅇ appamaᅇᅇānaᅇᅇ lokiyabhāvameva dīpetuᅇᅇ aᅇᅇhakathāyaᅇᅇ “ismīᅇᅇ  
 panā”ti-ādi vuttanti imamatthaᅇᅇ dassento āha “**imasmiᅇᅇ pana -pa- hotī**”ti.

**Appamaᅇᅇāvibhaᅇgavaᅇᅇanā niᅇᅇhitā.**

## 14. Sikkhāpadavibhaṅga

### 1. Abhidhammabhājanīyavaṇṇanā

703. Sikkhāsaṅkhātānaṃ kusaladhammānaṃ pañca sīlaṅgāni nissayabhāvena vā patiṭṭhā siyuṃ, upanissayabhāvena vāti tadubhayaṃ dassento āha “**sampayogavasena, upanissayavasena ca okāsabhāvenā**”ti.

704. “Kammaṭṭhā evā”ti niyamassa katattā vuttāṃ “**asabbasādhāraṇesū**”ti. Na hi sakkā indriyādisādhāraṇakoṭṭhāsavasena niyamaṃ kātuṃ. **Kammaṭṭhāsikā eva**, na jhānādikōṭṭhāsikā. **Kammaṭṭhābhāvena āgatanti vadanti**, duggatīyā, tattha uppajjanadukkhassa ca pavatti-upāyabhāvatoti adhippāyo. **Assa** surāpānassa. **Upakāraṅgataṃ** sabbesaṃ. **Sabhāgataṃ** micchācārassa.

**Tathāgahitasāṅkhārārammaṇatāyāti** “sattaṃ avaharāmi, satte vippaṭṭipajjāmi”ti-ādinā sattākārena gahitasāṅkhārārammaṇatāya, na pana sattapaññatti-ārammaṇatāyāti adhippāyo. “**Pañca sikkhāpadā**”ti-ādinā tamevattaṃ vivarati.

**Tassa tassāti** yassa yassa byasanatthāya. Sayāṃ vā usu-ādiṃ khipati, opātakhaṇanādiṃ karoti, tādisaṃ mantāṃ pariṇappati, kammaja-iddhiṃ vaḷaṅgeti, aññena vā taṃ sabbaṃ kāretīti āha “**nissaggiya -pa- dve eva gahitā**”ti.

Yadipi koṭṭhāsavāre virati sarūpena nāgatā “yevāpanā”tveva vuttā, bhajāpiyamānā pana maggabhāvaṃyeva bhajatīti āha “**viratisīlaṃ pana maggakoṭṭhāsikaṃ**”ti. **Sesasīlānanti** sesa-avītikkantasīlānaṃ.

712. **Abhabbatṭhānāti** pāṇātipātādayo. Yathā pāṇātipātādayo verahetutāya veraṃ, evaṃ tadanāpi akusalāti vuttāṃ “**tāmsabhāgatāya verabhūtanā**”ti. Viratīnaṃ uppatti na na bhavissati sekkhānanti yojanā. “**Akusalasamuṭṭhitāni cā**”ti-ādināpi sekkhānaṃ ubhayaena viratisabbhāvaṃyeva vibhāveti. Tassattho—yāni akusalasamuṭṭhitāni kāyakammādīni, tāni tesāṃ sekkhānaṃ kāyaduccarītādīnīti

verāṇīyeva, **tehi** verehi **tesaṃ** sekkhānaṃ viratiyo sambhavantiyeva. **Yatoti** yasmā pāṇātipātādiviramitabbanipariyāyaverābhāvepi kāyaduccaritādiveramattato sekkhānaṃ viratisambhavato. **Naphalabhūtassāpī**ti yathā phalassa maggapaṭibimbabhūtattā maggasadisam satta-aṭṭhaṅgikatā siyā, evaṃ aphalabhūtassāpi sakadāgāmimaggādikassa yato viratisambhavato **aṭṭhaṅgikatāhoti**, aññathā pañcaṅgiko eva siyāti adhippāyo.

Abhidhammabhājanīyavaṇṇanā niṭṭhitā.

---

## 2. Pañhapucchakavaṇṇanā

714. **Yathāviramitabbatoti** yo yo pāṇātipātādi viramitabbo, tato virativasena.

**Sikkhāpadavibhaṅgavaṇṇanā niṭṭhitā.**



# 15. Paṭisambhidāvibhaṅga

## 1. Suttantabhājanīya

### 1. Saṅgahavāraṇṇanā

718. “Eseva nayo”ti dhammādīsu kato atideso saṅkhepato tesam dassanaṃ hotīti āha “**saṅkhepena dassetvā**”ti. Tesam niruttipaṭibhānānaṃ visayā **tabbisayā**, tesam, niruttipaṭibhānavisayabhūtānanti attho. **Paccayuppannādibhedehī**ti paccayuppannanibbānabhāsitatthādibhedehi.

Dukkhahetuphalajātādidhammajarāmarañāni **dukkhādīni**. Saccahetudhammapaccayākāravāresu dukkhasamudayādipariyāyena āgato phalanibbattako hetu, saccapaccayākāravāresu ariyamaggo, pariyattivāre bhāsitaṃ, abhidhammabhājanīye kusalaṃ, akusalanti evaṃ pāḷiyam vuttānaṃyeva vasena pañca dhammā veditabbāti imamatthamāha “**tathā dhammā cā**”ti iminā.

**Nibbattakahetu-ādīnanti** nibbattakasampāpakañāpakānaṃ. **Purimoti** pavattanattho. **Tasminti** magge. **Pacchimoti** pāpanattho daṭṭhabbo.

**Aviparītaniruttīti** buddhādīhi āciṇṇā tassa tassa atthassa vācakabhāve niruḷhā yāthāvanirutti. Yasmā viññattivikārasahito saddo paññattīti attano adhippāyo, tasmā paramatato<sup>1</sup> taṃ dassento “**avacanabhūtāyā**”ti visesetvā “**keci vaṇṇayantī**”ti āha. **Evaṃ satīti** evaṃ niruttiyā paññattibhāve satī. Paññatti abhilapitabbāti āpajjatīti vutte, hotu, ko doso tassā vacanīyabhāvatoti kadāci vadeyyāti āsaṅkanto āha “**na ca vacanato -pa-uccāretabbari atthī**”ti. **Tesam** atthadhammānaṃ. Na vacananti **avacanam** avacanasabhāvaṃ. **Evaṃpakāraṇanti** evaṃvidham evaṃ niyatalingavisesajotanākāraṃ.

---

1. Paramatthato (Ka)

**Paratoti** parabhāge anantaramanodvāre. Saddaggahaṇānusārena gahitāya nāmaniruttiyaṃ niruttipaṭisambhidā pavattatīti vadanti. Yadi evaṃ kasmā pāḷiyāṃ “niruttipaṭisambhidā paccuppannārammaṇā”ti vuttatī āha “**nirutti-pa-sandhāya vuttan**”ti. **Pacchā jānananti** saddaggahaṇuttarakālaṃ nāmaniruttiyā jānanaṃ. **Evanti** evaṃ saddaggahaṇato pacchā nāmaniruttiṃ ārabha pavattāṃ nāṇaṃ niruttipaṭisambhidāti gayhamāne. Evaṃ niruttiyā nāmapaññattipakkhe pāḷiyā, aṭṭhakathāya ca virodhaṃ dassetvā saddapakkhe tadabhāvaṃ dassento “**yathā panā**”ti-ādimāha. **Tarantaṃsaddavibhāvakanti** yathā tassa tassa saddappabhedanicchayassa paccayabhūtaṃ dibbasotañāṇaṃ saddārammaṇameva taṃ taṃ saddaṃ vibhūtaṃ karoti, evaṃ niruttippabhedanicchayassa paccayabhūtaṃ niruttisaddārammaṇameva niruttipaṭisambhidāñāṇaṃ taṃ vibhūtaṃ karotīti tassa paccuppannārammaṇatā vuttā. Saddaṃ pana vibhāventāṃ ekantato saddūpanibandhaṃ paññattimpi vibhāvetiyeva, yato sabhāvāsabhāvavisesavibhāvanaṃ sampajjati. Aññathā hi saddamattaggahaṇe visesāvabodho eva na siyāti porāṇā paññattivibhāvanampi tassa icchanti. **Taṃvibhāvakanti** niruttisaddavibhāvakaṃ. **Na pāḷivirodho hotīti** yadipi abhidhamabhājanīye “yāya niruttiyā tesāṃ dhammānaṃ paññatti hotī”ti<sup>1</sup> vuttāṃ, tampi sabhāvaniruttisaddena dhammānaṃ pabodhanameva sandhāya vuttāṃ, na tabbinimuttaṃ paññattinti “niruttisaddārammaṇā niruttipaṭisambhidā”ti vuccamāne pāḷiyā virodho na hotīti attho. “Paccavekkhantassā”ti vuttattā saddaṃ gahetvā pacchā gahitāya paññattiyā paccavekkhaṇena bhavitabbanti āsaṅkeyyāti tadāsaṅkānivattanatthamāha “**taṃ sabhāvaniruttiṃ saddaṃ ārammaṇaṃ katvā**”ti-ādi. **Sabhāvaniruttiṃ vibhāventāṃyevāti** sabhāvaniruttivisayassa sammohassa pageva viddhamasitattā atthasādhanavasena abhiññāñāṇaṃ viya taṃ vibhāventameva pavattati. Tenāha “**niruttiṃ bhindantaṃ paṭivijjhantameva uppajjati**”ti. Pabhedagamaṇācetha anavasesato niruttivibhāgajānanaṃ. Tathā sesesu. **Sakkaṭānāmādīti** sakkaṭāvasena vuttanāmākhyātādi. Nipātapadaṃ nāmādipadāni viya atthaṃ na vadati, atha kho byañjeti jotetīti “**byañjanaṃ**”ti vuttāṃ nipātapadaṃ.

---

1. Abhi 2. 310 piṭṭhe.

Bodhi ñāṇaṃ maṇḍabhūtaṃ etthāti **bodhimaṇḍo**, mahābodhiṭṭhānaṃ. Tenāha “**paṭhamābhisambuddhaṭṭhāne**”ti. Aññena pakārenāti uggahādippakārena.

**Aññathā hontīti** purisayuge purisayuge ekadesena parivattantā kālantare aññākārā bhavanti. **Vinassantīti** taṃtaṃbhāsānaṃ manussānaṃ vināsenā na paññāyanti, manussānaṃ duruggahaṇādinā katthaci kadāci parivattantīpi brahmalokādīsu yathāsabhāveneva avaṭṭhānato na sabbattha, sabbadā, sabbathā ca parivattati. Tenāha “**kappavināsepi tiṭṭhatiyevā**”ti. **Etassa** niruttipaṭisambhidāñāssa.

**Atthādīsu ñāṇanti** atthapaṭisambhidādi. Atthadhammaniruttivasena **tīsu**. Atthadhammaniruttipaṭibhāvānavasena **catūsūpi vā**. Atthadhammādinā attanā jotetabbena saha atthenāti **sāttakāni**. **Sabbo** atthadhammādikō **attho** visayabhūto **etassa** ñāṇassa atthīti **sabbatthakaṃ**. **Sabbasmim** atthādike viseye **khittam** attano paccayehi ṭhapitaṃ pavattitaṃ. **Arahattappattiyā visadā honti** paṭipakkhadhammānaṃ sabbaso viddhamsittatā. **Pañcannanti** adhigamapariyattisavanaparipucchāpubbayogānaṃ. **Yathāyoganti** yaṃ yaṃ yassa puggalassa visadatāya yujjati, tathā yojetabbaṃ.

Paripucchāhetu pavattā kathā paripucchāti vuttāti āha “**pucchāya -pa-paripucchāti vuttā**”ti.

**Tehīti** maggehi. **Paṭilābho** nāma<sup>1</sup> pubbayogasampattiyā atthādivisayassa sammohassa samucchindanaṃ, taṃ pana maggakiccamevāti āha “**solokuttaro**”ti. Atthādīnaṃ pabhedato sallakkhaṇavibhāvanavavattāpanā yathārahaṃ parittakusalamaḥākiriya-cittavasena hotīti vuttam “**pabhedo kāmāvacaro**”ti. **Yathā** pubbayogo **adhigamassa balavapaccayo** sabhāvahetubhāvato, **na tathā pabhedassa** asabhāvahetutāya, paramparapaccayatāya cāti adhippāyo. **Pariyatti-ādīnaṃ** pabhedassa balavapaccayatāya, **adhigamassa** ca tadabhāve eseva nayo. **Tatthāti** nimittatthe bhummaṃ, tāsu pariyattisavanaparipucchāsu nimittabhūtāsūti attho. **Yaṃ vuttam hotīti** “etesu panā”ti-ādīnā aṭṭhakathāvacaṇena yaṃ atthajātam

---

1. Paṭighāto nāma (Ka)

vuttam hoti. **Tam dassentoti** tam niddhāretvā dassento.

“**Pubbayogādhigamā**”ti vatvā “**dvepi**”ti vacanam adhigamasahitoyeva pubbayogo pabhedassa balavapaccayo, na kevaloti dassanattam. Tena vuttam aṭṭhakathāyam “dvepi ekato hutvā”ti<sup>1</sup>. “Dvepi visadakāraṇā”ti vutte pubbayogassāpi visadakāraṇattam labbhatevāti āha “**dvepi visadakāraṇāti -pa- vuttan**”ti.

Saṅgahavāraṇaṇanā niṭṭhitā.

## 2. Saccavārādivaṇṇanā

719. **Kālattayepī**ti atītādīsu tīsupi kālesu. **Hetuphaladhammā** hetūnam phalabhūtā dhammā, paccayanibbattāti attho. **Tesañca hetudhammā**ti tesam hetuphalānam paccayanibbattānam hetubhūtā dhammā “dhammā”ti vuttāti yojanā. **Vineyyavasenāti** tathāvinetabbapuggalajjhāsavāsena. **Uppannā samuppannāti-ādi na vuttanti** uppannā samuppannā uṭṭhitā samuṭṭhitā paccuppannāti-ādi na vuttam ekantapaccuppannasseva saṅgāhakattā. **Tamnibbattakāti** tesam atthabhāvena vuttānam nipphādakā. **Dhammāti vuttā** dhammabhāvena kathitā.

Suttantabhājanīyavaṇṇanā niṭṭhitā.

## 2. Abhidhammabhājanīyavaṇṇanā

725. **Sāmaññena vatvā visesena avuttattāti** “tesam vipāke”ti yathāvuttakusalavipākatādisāmaññena vatvā sahetukāhetukādivisesena avuttattā, sarūpena niddhāretvā avuttattāti attho. **Avipākattāti** avipākadhammattā. **Yadi evanti** paccayabhāvato labbhamānopi dhammabhāvo avipākadhammatāya kiriyānam yadi na vutto, evam sati. Satipi paccayuppannabhāve avipākabhāvato atthabhāvopi na vattabbo. Tenāha “**vipākā na hontīti atthabhāvo ca na vattabbo**”ti. **Evañceti** yadi paccayuppannattā kiriyānam atthabhāvo vutto. **Nappaṭisiddho**

1. Abhi-Ṭṭha 2. 373 piṭṭhe.

icchitovāti attho. Yadi evaṃ kasmā na vuttoti āha “**vipākassa panā**”ti-ādi. **Tesanti** kusalākusalānaṃ, vipākakiriyadhammānaṃca. **Atthadhammatāti** vuttanayena labbhamānopi yathākkamaṃ atthabhāvo, dhammabhāvo ca na vutto. **Paccayabhāvaṃ sattivisesaṃ sanipphādetabbatanti** padattayenāpi vipākadhammatamevāha. Sā hi vipākānaṃ hetubhāvato paccayabhāvo, taduppādanasamatthatāya sattiviseso, **tehi** sagabbhā viya hotīti “sanipphādetabbatā”ti ca vuccati. Tam **passantī** nipphādakavisesāpi **nipphādetabbāpekkhā hoti** dhammaṭṭisambhidā. **Taṃsambandhenāti** nipphādetabbasambandhena. Dhammaṭṭisambhidaṃ vadantena atthapaṭṭisambhidāpi vuttā.

Sabhāvadhamme paññatti **sabhāvapaññattīti** āha “**na sattādipaññattiyā**”ti. sabhāvena, niruttiyeva vā sabhāvapaññattīti vuttāti āha “**aviparītapaññattiyā vā**”ti.

746. Vohārabhūmiṃ, adhigamabhūmiṃca ekajjhaṃ katvā āha “**kāmāvacarā, lokuttarā ca bhūmi bhūmi**”ti. **Cittuppādā vā** pavattiṭṭhānabhāvato bhūmi.

Abhidhammabhājanīyavaṇṇanā niṭṭhitā.

### 3. Pañhapucchakavaṇṇanā

747. **Sabbañāṇārammaṇatāyāti**

paṭṭisambhidāpaṭṭisambhidāñāṇārammaṇatāya. “Suttantabhājanīye pana -pa-siyā”ti idaṃ abhidhammabhājanīyena virujjhati, tassa vā sāvasesadesanatā āpajjatīti codanaṃ manasi katvā āha “**abhidhammabhājanīye**”ti-ādi.

**Niravasesakathananti** asesetvā kathanam. Tena cittuppādasāṅgahite atthe asesetvā desanā idha abhidhammabhājanīyassa bhāro, na sabbañeyyadhammeti dasseti. **Yathādassitavisayavacanavasenāti** dassitappakāravisaṃsāraṃ kathanavasena, dhammatthavasena dassite taṃtaṃcittuppāde tattha dhammaniruttābhilāpena ñāṇassa kathanavasenāti attho. **Aññārammaṇatam na paṭisedheti** atapparabhāvato adhippāyo. **Na niravasesena kathanam** acittuppādapariyāpannessa visayassa akathitattā. Evaṃ paṭṭisambhidāpaṭṭisambhidāvisayassāpi

na niravasesena kathananti suttantabhājanīye avisesavacanena sabbañāṇārammaṇataṃyeva paṭibhānapaṭisambhidāya patitthāpeti. Tathā **tisso paṭisambhidāti** ādipaṇhapucchakapāḷiyāpi. **Tissoti** atthadhammapaṭibhānapaṭisambhidā. Niruttipaṭisambhidā hi “parittārammaṇā”teva vuttā.

Yadipi siyā na tassā mahaggaṭārammaṇatāti sambandho. “**Na hi maggo paccayuppanno na hoti**”ti iminā “atthapaṭisambhidā na maggārammaṇā”ti vacanassa yathāvuttatthasādhakataṃ vibhāveti. **Tassāti** paṭibhānapaṭisambhidāya **na mahaggaṭārammaṇatā** sambhavati nanu nayam anussarantassāti adhippāyo. **Dvepīti** “atthapaṭisambhidā na maggārammaṇā,<sup>1</sup> tisso paṭisambhidā siyā parittārammaṇā, siyā mahaggaṭārammaṇā, siyā appamāṇārammaṇā”ti<sup>1</sup> ca dvepi etā pāḷiyo. Tāsu balavatarāya ṭhānassa, itarāya adhippāyamagganassa ca upāyadassanamukhena tāsam aññamaññaṃ avirodham dassetuṃ “**kusalākusalānaṃ panā**”ti-ādimāha. “**Nippariyāyā tattha dhammapaṭisambhidā**”ti etena tattha atthapaṭisambhidāya pariyaḃbhāvamāha. **Tathā vipākakiriyaṇanti**-ādi yathādhippetassa atthassa visadisūdāharaṇadassanaṃ. Ubhayenapi “atthapaṭisambhidā na maggārammaṇā”ti<sup>1</sup> vacanaṃ suttantanayānugataṃ nippariyāyatthassa tattha adhippetattāti dīpeti. **Kiñci pana ñāṇanti**-ādi “tisso paṭisambhidā”ti-ādipāḷiyā samatthakaṃ. Yathādhippetassa atthassa paṭibhānaṃ dīpanaṃ **paṭibhānaṃ**. Tenāha “**ñeyyappakāsanato**”ti. Iti yā “tisso paṭisambhidā”ti pāḷi, tassā balavabhāvavibhāvanena itarāya adhippāyamaggaṇaṃ katanti veditabbaṃ. **Nippariyāyāti** pariyaḃrahitā ujukaṃ sarūpeneva pavattā. **Nippariyāya -pa-pavattiyanti** ekantika-atthārammaṇaṃ ñāṇaṃ atthapaṭisambhidā, ñāṇārammaṇaṃ paṭibhānapaṭisambhidāti gahetvā desanāyaṃ.

**So evāti** parassa abhilāpasaddo eva. Anuvattamānatā cassa niruttipaṭisambhidā paccuppannameva saddaṃ ārammaṇaṃ karontī, saddaṃ sutvā “ayaṃ sabhāvanirutti, ayaṃ na sabhāvanirutti”ti jānantīti ca ādivacanavasena veditabbo.

### **Paṭisambhidāvibhaṅgavaṇṇanā niṭṭhitā.**

1. Abhi 2. 320 piṭṭhe.

## 16. Nāṇavibhaṅga

### 1. Ekakamātikādivaṇṇanā

751. Sampayuttānaṃ nissayapaccayatāya, ārammaṇassa pavattiṭṭhānatāya okāsaṭṭho veditabbo. **Nahetādīti ādi**-saddena “ahetukā”ti-ādikaṃ sabbaṃ ekavidhena nāṇavatthum saṅgaṇhāti. **Ekam nahetūti** nahetutāya ekam pañcaviññāṇaṃ nahetūti vuttā tesam nahetutā. Ekantāhetubhāvena hi te ekappakārāvāti. **Aññampīti** ahetakādi. **Avitathasāmaññayuttanti** teneva ahetakatādinā yathābhūtena samānabhāvena yuttam. **Nāṇārammaṇanti** nāṇassa ārammaṇaṃ yathāvuttapañcaviññāṇādi. **Vatthuvibhāvanāti** pañcaviññāṇādikassa nāṇavatthussa yathāvuttavisesena vibhāvanā pakāsanā paññā.

**Osānadukassāti** “atthajāpikā paññā, jāpitatthā paññā”ti imassa dukassa. Dukamātikā dhammasaṅgaṇiyam vuttadukamātikāti āha “**dukamātikam anissāyā**”ti.

“Cintāmayā paññā”ti-ādikā tikamātikam anissāyā vuttāti āha “**evam tikānurūpehīti etthāpi daṭṭhabban**”ti. Yadipi jāpasaddo byattavacane, mānase ca pavattati, jananatthepi pana daṭṭhabboti dassento āha “**anekatthattā dhātusaddānan**”ti-ādi. Kusalapaññā vipākasaṅkhātassa, kiriyapaññā parikammādhūtā attanā nibbattetabbaphalasaṅkhātassa atthassa nibbattanato atthajāpikāti vuttāti āha “**atthajāpikā kāraṇagatā paññā**”ti. Vipākapaññā, kiriyapaññā ca saha-jātādipaccayavasena tamtamvipākādi-attham jāpeti janētīti āha “**jāpito janito attho etissāti jāpitatthā**”ti. Satipi saha-jātānaṃ paccayabhāve vipākakiriyapaññā na kusalā viya vipākānaṃ nippariyāyena kāraṇavohāraṃ labhatīti āha “**kāraṇapaññāsadi**”ti. Vibhāvenatthena paññā ārammaṇaṃ viya sampayuttepi pakāsetiyevāti vuttam “**phalappakāsanabhūtā**”ti. Yato sā ālokobhāsapajjotapariyāyehi vibhāvitā.

### 10. Dasakamātikāvaṇṇanā

760. “Jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Atītampi addhānaṃ jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Anāgatampi addhānaṃ jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Yampissa taṃ dhammaṭṭhitiñāṇaṃ, tampi khayadhammaṃ vayadhammaṃ virāgadhammaṃ nirodhadhammanti ñāṇaṃ. Bhavapaccayā -pa-avijjāpaccayā saṅkhārā -pa- nirodhadhammaṃ”<sup>1</sup> evamāgatāni **sattasattati ñāṇāni**. “Jarāmarāṇe ñāṇaṃ, jarāmarāṇasamudaye ñāṇaṃ, jarāmarāṇanirodhe ñāṇaṃ, jarāmarāṇanirodhagāminiyā paṭipadāya ñāṇaṃ. Jātiyā ñāṇaṃ -pa- saṅkhāresu ñāṇaṃ -pa- paṭipadāya ñāṇaṃ”<sup>2</sup> evamāgatāni **catucattārīsaṃ ñāṇāni**. Sutamayañāṇādīni anāvaraṇañāṇapariyosānāni paṭisambhidāmagge<sup>3</sup> āgatāni **tesattati ñāṇāni**. Tenāha “**tesattati pana -pa- na saṃyuttake**”<sup>ti</sup>. “Saṃyuttake”<sup>ti</sup> vā idaṃ “sattasattati ñāṇāni”<sup>ti</sup> iminā sambandhitabbaṃ, na “tesattati”<sup>ti</sup> iminā. **Aññattha** nikkhepakaṇḍādisu. Yathā sammāpaṭivedhābhāvato micchāñāṇādi thusarāsīmhi nikhātakhāṇuko viya ārammaṇe cañcalaṃ hoti, na evaṃ hoti yathābhūtāvabodhakaṃ ñāṇanti āha “**yāthāvapaṭivedhato sayañca akampiyā**”<sup>ti</sup>. Adhibalakarāṇaṃ upatthambhananti taṃ puggale āropento āha “**puggalañca -pa- karotī**”<sup>ti</sup>. Visabhāgadhammesu vā akampiyattho, sabhāgadhammesu upatthambhanattho veditabbo.

**Abhimukhaṃ gacchantī** “upagacchantī”<sup>ti</sup> padassa atthavacanaṃ. Upagamanañcetha sabbaññutāya paṭijānanamevāti vuttam “**paṭijānanaśasena**”<sup>ti</sup>. **Aṭṭha vā parisā upasaṅkamantī** etthāpi paṭijānanaśasena sabbaññutanti yojetabbaṃ. Aṭṭhasu parisāsu dassita-akampiyāñāyuttoti sambandho.

**Phalasampattipavattī** sappurisūpanissayādīnaṃ kāraṇasampattīnaṃ phalabhūtāya patirūpadesavāsa-attasammāpaṇidhi-ādisampattiyā pavattanaṃ. **Ādi**-saddena suttasesā saṅgahitā. **Tattha** sappurisūpanissayādike. Kasmā panettha samāne atthakicce paṭivedhañāṇassa viya desanāñāṇassāpi yāva arahattamaggā uppajjamānatā na vuttāti codanaṃ sandhāyāha

1. Saṃ 1. 291 piṭṭhe.

2. Saṃ 1. 288 piṭṭhe.

3. Khu 9. 1 piṭṭhādīsu.



“**paṭivedhaniṭṭhattā**”ti-ādi. **Paṭivedhaniṭṭhattā**ti paṭivedhassa pariyosānattā. **Tenā**ti paṭivedhapariyosānabhūtena arahattamaggañāṇena. Tadadhigamena hi sampattasakalasabbaññuḅuḅo bhagavā anantapaṭiḅhāno anupamāya buddhalīḷāya dhammaṃ desetum samattho ahoṣi. “**Paṭiladdhasāpi**”ti iminā sabbathā labhāpakassa paṭivedhānurūpatā desanāññāṇassa asakkuṇeyyāti dīpeti, tena ca paṭivedhanamattenettha atthasiddhīti dasseti. Tenāha “**desanāññāṇassā**”ti-ādi.

**Hānabhāgiyadhammanti** vā hānabhāgiyabhāvassa kāraṇaṃ. **Kāmasahagatasaññādidhammanti** kāmaguṇārammaṇaṃ saññāmanasikārādīm. **Pubbeva katābhisankhārādinti** “cande vā sūriye vā ettakaṃ gate vuṭṭahissāmī”ti-ādinā samāpajjanato pubbe pavattacittābhisankhāraparikammādīm.

**Tadabhāvaggahaṇenā**ti kilesāvaraṇābhāvaggahaṇena. **Ṭhitinti** atthibhāvaṃ. **Tabbiparītāyā**ti “natthi dinnan”ti-ādikāya micchādīṭṭhiyā. **Ṭhānābhāvanti** appavattim, natthibhāvaṃ vā. **Uparī**ti imissā balānaṃ anukkamakathāya upari anantarameva. **Vipākāvaraṇābhāvadassanādikassā**ti ādi-saddena kammāvaraṇābhāvadassanaṃ saṅgaṇhāti. **Itaranti** adhigamassa aṭṭhānadassanaṃ. **Tamsahitānaṃ dhātūnanti** rāgādisahitānaṃ sabhāvānaṃ. **Vemattatā** ca tesam paccayavisesasiddhena avatthādivisesena veditabbā. **Cariyāhetūnanti** rāgādicariyākāraṇabhūtānaṃ dhammānaṃ.

### 1. Ekakaniddesavaṇṇanā

761. **Ayam visesoti** samānepi nayadvayassa tesam ahetubhāvādidīpane ekassa hetubhāvādipaṭisedhatā, itarassa rāsantarāsaṅgahoti idaṃ nānākaraṇaṃ. **Ekāya jātiyā**ti ādānanikkhepaparicchinnaṃ ekassa bhavassa. **Tadantogadhatāyā**ti gati-antogadhatāya. **Tattha tatthā**ti taṃtaṃgaticutibhavesu.

762. **Tathā**ti aññadvārārammaṇatāya. **Khīrādīnaṃ -pa- vilakkhaṇatā**ti yathā khīrassa dadhibhāvena, dadhino takkabhāvena vilakkhaṇatāpatti, na evaṃ pañcaviññāṇānaṃ nahetubhāvādito aññassa sabhāvāpatti atthīti attho.

763. **Mahattepī**ti puthuttepi. Bahubhāvavācako hi ayaṃ mahāsaddo “mahājano”ti-ādīsu viya rūpasaṅghāṭassa adhippetattā. Aññathā sabhāvadhammassa kā mahantatā, sukhumatā vā. Cakkhuviññāṇassa vacanaṃ katvā vuttattā āha “**cakkhupasāde mama vatthumhī**”ti.

**Issariyaṭṭhānanti** issariyapavattanaṭṭhānaṃ. Tathā hi naṃ aññattha bhāvitaṃ vibhāventameva tiṭṭhati, aññaviññāṇāni ca tena dinnanayāneva tattha pavattanti, api dibbacakkhuñāṇaṃ, yato taṃ andhassa na nippajjati.

764. **Vavatthitānampī**ti aññamaññaṃ asaṃkiṇṇānampi. **Paṭipāṭiniyamo** niyatānupubbikatā. **Tenā**ti “abbokiṇṇā”ti vacanena.

766. **Āvaṭṭanabhāvo** āvajjanakiccatā.

**Tesanti** rūpādīnaṃ. Etesaṃhi rūpādīnaṃ pañcahi viññāṇehi samāgamo. **Abhinipatitabbāni** ālambitabbāni, vijānitabbānīti attho. Tenāha “**ārammaṇakaraṇena paṭivijānitabbāni**”ti. Kusalākusalacetanāya, taṃsamyuttānaṃca yathāvuttānaṃ “manopubbaṅgamā -pa- akusalaṃ vā”ti<sup>1</sup> evaṃ vuttānaṃ paṭivijānitabbānaṃ paṭivijānananti sambandho. Kammatthe hi etaṃ sāmivacanaṃ. **Sahajapubbaṅgamadhammenā**ti dassanādīhi sahajātaḥṣādinā pubbaṅgamena āvajjanādinā. **Kiccantaranti** dassanādikiccatō aññaṃ sampaṭicchanaḍikiccam.

**Avipākabhāvena** kāraṇena, tena vā saddhiṃ. **Aññanti** rūpabhāvādīṃ. **Bhāsanakaraṇakarā**ti viññattisamuṭṭhāpanavasena pavattakusalākusalacittuppādadhammā. Te eva kāyaṅgavācaṅgaṃ acopetvā pavattā **taṃsadisā**. **Pubbaṅgamapaṭivijānananti** pubbaṅgamabhāvena vijānaṃ manodvārikajavanānaṃ purecarabhāvena gahaṇaṃ. **Tatthāti** pañcadvāre. “**Na paṭisiddhan**”ti vatvā svāyamappaṭisedho sāmattiyaladdhoti dassetuṃ “**na kāyakammaṃ -pa- anuññātattā**”ti vuttaṃ. “**Tathā**”ti idaṃ yathā kāyavacīkammaṭṭhapanāṃ, evaṃ kusalādidhammasamādānampi natthīti upasaṃharaṇatthaṃ veditabbāṃ. Yadi na bhavato cavati, kathaṃ pañcadvāre cuti vuttāti āha “**na pañcadvārika -pa- atamdvārikattā**”ti. **Tassā** pāḷiyā. **Āpāthamattanti**

1. Abhi-Ṭṭha 2. 387 piṭṭhe.

āpāthagamanamattaṃ ārammaṇapaccayabhāvamattaṃ. **Aññanti** “rūpaṃ nīlan”ti evamādidhammavisesaṃ. Tenāha “**dhammasabhāvan**”ti. **Rūpanti ca na gaṇhāti** rūpārammaṇampi samānaṃ, “rūpaṃ nāmetan”ti na gaṇhāti. Tathā cāhu eke “cakkhuviññānasamaṅgī nīlaṃ vijānāti, no tu nīlan”ti. **Rūpanīlādi-ākāro** rūpārammaṇarūpādānākārapaññatti. Tajjāpaññatti hesā yathā aniccatādi. **Sātisayaṃ** savitakkasavicārattā. **Tato aññanti** saddārammaṇato aññaṃ nāmapaññatti-ārammaṇaṃ, aññathā sahuppattipaṭisedho na sambhaveyyāti adhippāyo.

**Manodvārepī**ti na pañcadvāreyeva dutiye moghavāre, atha kho manodvārepi. **Āvajjanaṃ dvattikkhattuṃ -pa- daṭṭhabbaṃ** ekacittakkaṇikassa āvajjanassa uppattiyaṃ tathā asambhavato.

**Tassāti** yāthāvaka vatthuvibhāvanāya paññāya.

Ekakaniddesavaṇṇanā niṭṭhitā.

## 2. Dukaniddesavaṇṇanā

767. **Adhikaraṇesūti** padatthesu. **Aññatra sabhāvaṃ gahetvāti** atthasaddassa tattha pavattanākāradassanaṃ, tena atthasaddassa sabhāvatthataṃ<sup>1</sup> dasseti. **Adhikaraṇavasena liṅgaparivattiṃ gacchati.** “Abhidheyyānurūpaṃ liṅgavacanāni”ti hi saddavidū vadanti.

Dukaniddesavaṇṇanā niṭṭhitā.

## 3. Tikaniddesavaṇṇanā

768. **Paripācitesūti** sādhitese. “Vihitesū”ti ettha duddhādīsu viya bhūtakālatā nādhippetāti āha “**visayavisesanamattamevā**”ti. “**Kammaṃ, sippan**”ti paññā kāraṇūpacārena vuttāti āha “**paññā eva vā -pa- veditabbā**”ti.

---

1. Bhāvatthataṃ (bahūsu)

**Kusalaṃ kammaṃ sakaṃ** ekantaṃ hitasukhāvahattā. Tappaṭipakkhattā **itarāṃ** akusalaṃ kammaṃ **nosakaṃ**. Saccapaṭivedhānulomanāṃ saccānulomanāṃ vuttanti āha “**tappaṭivedhapaccayabhāvenā**”ti. Maggasaccassa anulomanato vā saccānulomikatā, tathā paramatthasaccassa anulomanato. Tenāha aṭṭhakathāyaṃ “**maggasaccassā**”ti-ādi. **Paññā vuttā** paññāvisaye paññākiccassa dassitattā. “Yogavihitesū”ti-ādinā vuttabhūminiddeso, “kammassakataṃ saccānulomikan”ti vuttasarūpaniddeso, “rūpaṃ aniccan”ti-ādinā vuttappakāraniddeso ca **yathāvuttā -pa- niddesā**. “Yogavihitesu kammāyatanesu khantiṃ, kammassakataṃ khantiṃ, ‘rūpaṃ aniccan’ti khantiṃ”ti-ādinā khanti-ādipadehi yojetabbā. **Olokanāṃ** paccakkhakarāṇaṃ. **Dhammā olokanāṃ khamantī**ti paññāya tadolokanasamatthatamāha.

769. **Muñcatī**ti pajahati. Ārabbhakiriyāya adhiṭṭhānaṃ samaṅgibhāvo, adhikarāṇaṃ paṭṭhapananti āha “**muñca -pa- vattuṃ yuttan**”ti.

770. Pañcasīladasasīlāni kammavaṭṭekadesabhūtāni sandhāya tesāṃ dhammaṭṭhitiyaṃ samavarodho vutto. **Satipi savaneti** “idha bhikkhave ariyasāvako paṇātipātā paṭivirato”ti-ādinā<sup>1</sup> tathāgatato savane satipi. **Bhikkhu-ādīnampi taṃ vuttaṃ** adhisīlapaññāpanaṃ viya na buddhāveṇikanti.

**Adhipaññānibbattesūti** ṭhapetvā adhipaññaṃ tadaññesu maggaphaladhammesu. **Tadadhiṭṭhānesūti** tassā adhipaññāya adhiṭṭhānesu vipassanādhammesu.

771. **Apāyuppādanaṃ** avaḍḍhinibbattanaṃ. **Tasmimyeva ṭhāneti** tasmimyeva khaṇe.

Tikaniddesavaṇṇanā niṭṭhitā.

#### 4. Catukkaniddesavaṇṇanā

793. Paritassanaṃ parittāso, cittutrāso cāti “**na paritassatī**”ti padassa “**na pattheti na uttasatī**”ti atthamāha.

1. Saṃ 2. 527; Aṃ 3. 76; Abhi 4. 255 piṭṭhesu.

796. **Ariyasaccesu dhammasaddo** “diṭṭhadhammo”ti-ādīsu viya. **Ariyamaggo, tassa ca phalaṃ dhammo** yathānusiṭṭhaṃ paṭipanne apāyesu apatamāne dhāretīti. **Tattha paññāti** tasmim ariyamaggaphale nissayabhūte paññā. Tenāha “**tamsahagatā**”ti. Aviditaṃ viditaṃ viya neti nāpetīti **nayo**, anumānaṃ, tassa **nayanam** pavattanaṃ, taṃ pana visumyevekaṃ nāṇuppadananti āsaṅkāya nivattanatthamāha “**na añña -pa- viseso**”ti. Attano hi adhigamānusārena parādhigatānaṃ kālattaye maggādīnaṃ pavatti-ākārānumānaṃ **nayanayanam**. Anuminanākārameva hissa sandhāya vuttaṃ “**nāṇasseva pavattiviseso**”ti. **Kāraṇaṅga nayanayanassa** saccesu paccakkhapavattanato. “**Tathā**”ti iminā yathā maggañāṇato aññāpi “iminā dhammena”ti vattuṃ yuttaṃ, tathā pakārantarenapi “iminā dhammena nāṇena”ti ettha attho yujjatīti imamatthaṃ upasaṃharati. **Tenāti** tasmā nāṇena nātato sampayogehi nayanayanato. **Nāṇavisayabhāvenāti** paṭivedhañāṇassa visayabhāvena. **Nātena** paṭividdhena catusaccadhammena, nāṇasampayogena vā nātena jānitvā ṭhitena maggaphaladhammena.

**Sabbena sabbanti** sabbappakārena sabbam, anavasesanti attho. Addhattayapariyāpannaṃ hi sabbam tebhūmakasaṅkhārāgataṃ sammasīyati. **Nayanatoti** nayaggāhato. **Anurūpatthavācako vā kāraṇasaddo** “kāraṇam vadaṭī”ti-ādīsu viya.

Anvayañāṇassapi pariyoḡāhetvā pavattanato saviseso visayāvabodhoti vuttaṃ “**dhamme nāṇa -pa- abhāvā**”ti.

**Visayobhāsanamattajānanasāmaññenāti** asatipi abhisamecca gahaṇe visayavibhāvanasaṅkhāta-avabodhasāmaññamattena. “**Nāṇan**”ti **sammatesūti** “nāṇan”ti voharitesu laddhañāṇavohāresu. **Sammutivasenāti** dhammañāṇādi viya samukhena visaye appavattitvā paññattimukhena pavattaṃ. **Avasesanti** sammutiñāṇamevāha. **Itarañāṇattayavisabhāgantī** dhammañāṇādiñāṇattayavidhuraṃ.

797. **Kāmabhavadhammeti** kāmabhavasāṅkhāte<sup>1</sup> dhamme.

---

1. Kāmabhavadhammeti kāmabhavasāṅkhāte (bahūsu)

798. **Sāti** paṭhamajjhānapaññā. **Vītarāgabhāvanāvattassāti** “vītarāgo hotī”ti evaṃ vuttassa. **Tanti** chaṭṭhābhīññāṃ. Maggañāṇaṇhi kiccato maggasaccampi paṭivijjhati. **Itarāti** heṭṭhimamaggapaññā. **Tadupanissayattāti** tassā chaṭṭhābhīññāya, tassa vā paṭivijjhanassa upanissayattā paṭivijjhati nāma. **Yathānurūpanti** diṭṭhāsavadīnaṃ yathānurūpam. **Āsavakkhayeti** āsavakkhayapariyāye kāraṇūpacārena. **Tam nibbattanatoti** tassa āsavakkhayasaṅkhātassa phalassa nibbattanato. Idañca “āsavānaṃ khaye ñāṇaṃ chaṭṭhābhīññā”ti sutte āgatattā vuttaṃ.

801. **Abhivisiṭṭhena vā ñāṇena pākataṃ karontassāti** adhigamavasena pakāsaṃ vibhūtaṃ karontassa.

802. **Vasitāpañcakarahitaṃ** vasibhāvaṃ apāpitaṃ paṭiladdhamattaṃ. Paṭipadārammaṇasahagatā paññā paṭipadārammaṇasambandhinīti āha “paññāya paṭipadārammaṇuddesenā”ti.

Catukkaniddesavaṇṇanā niṭṭhitā.

## 5. Pañcakaniddesavaṇṇanā

804. **Tameva** paññaṃ “dvīsu jhānesu paññā pītipharaṇenā”ti-ādinā **vibhajati**. Abhisandanaparisananaparipūraṇānipi parippharaṇaṃ viya pharaṇāpītiyā, taṃsahagatasukhassa ca kiccavisesabhūtāni adhippetānīti āha “**abhisandeti -pa- veditabban**”ti. **Ādinā nāyenti** “abhisandeti”ti-ādinā<sup>1</sup> sutte āgatanayena. Pharaṇācettha pītisukhasamuṭṭhitapaṇītarūpehi kāyassa abhibyāpanaṃ daṭṭhabbaṃ. **Ārammaṇeti** pītipharaṇatāsukhapharaṇatāsīsena vuttānaṃ tikadukajhānānaṃ ārammaṇe. **Tāti** pītipharaṇatāsukhapharaṇatā.

**Samādhimukhenāti** samādhimū mukhaṃ pamukhaṃ katvā, samādhisīsenāti attho, samādhipamukhena vā uddesaniddesena. **Aññe kilesā**

1. Dī 1. 70; Ma 1. 344 piṭṭhesu.

diṭṭhimānādayo. **Appayogenā**ti jhānavimokkhādīnaṃ viya uppādanīyaparikkammapayogena vinā. Āvijjanāsadiṣo hi phalasaṃpattī-attho sammāsaṃcāro. **Ṭhapitattā**ti pavattitattā. **Satibahulatāyā**ti satiyā abhiñhuppattiyā. Paricchindanasatiyā kālassa satoti dassetīti yojanā.

Pañcakaniddesaṃṇāni niṭṭhitā.

### 6. Chakkaniddesaṃṇāni

805. **Visuddhibhāvanti** visuddhiyā sabbhāvaṃ.

“**Dibbacakkhuñṇāṇekadesattā**”ti idaṃ tassa paribhaṇḍaṇṇattā vuttaṃ. Tathā hi pāḷiyāṃ “sattānaṃ cutūpapātaṇṇāyā cittaṃ abhinīharati abhininnāmeti”<sup>1</sup>ti ārabhitvā “so dibbena cakkhunā visuddhenā”<sup>1</sup>ti-ādi<sup>1</sup> vuttaṃ. Dibbassa tirohitavippakaṭṭhādibhedassa, itarassa ca rūpāyatanassa dassanasamattassāpi dibbacakkhuñṇāṇassa sikhāpatti cavamānopapajjamānasattadassananti āha “**muddhappattena cā**”<sup>2</sup>ti-ādi.

Chakkaniddesaṃṇāni niṭṭhitā.

### 7. Sattakaniddesaṃṇāni

806. **Chabbidhampi paccavekkhaṇāṇanti** “jātipaccayā jarāmaṇanti nāṇaṃ”<sup>3</sup>ti-ādinā<sup>3</sup> vuttaṃ paṭiccasamuppādaṅgānaṃ paccavekkhaṇavasena pavattaṇṇaṃ. **Saha gahetvā**ti ekajjhaṃ gahetvā vipassanārammaṇabhāvasāmaññaṇa ekattena gahetvā. **Saṅkhipitvā vuttenā**ti pubbe chadhā vuttaṃ viya dassitaṃ dhammaṭṭhitiññaṇanti evaṃ saṅkhipitvā vuttena. “Khayadhammaṃ”<sup>3</sup>ti-ādinā pakārena dassananti sambandho. **Pavattaṇṇassā**ti “jātipaccayā jarāmaṇanti”<sup>3</sup>ti-ādinā pavattassa nāṇassa, pavatte vā saṃsāraṇṇe nāṇassa. Ñāṇārammaṇā vipassanā **ñāṇavipassanā**. **Vipassanā**ti ca “jātipaccayā

1. Dī 1. 78 piṭṭhe. 2. Muddhappattena (Mūlaṭī 2. 206 piṭṭhe.) 3. Abhi 2. 347 piṭṭhe.

jarāmarañan”ti-ādinā paccayapaccayuppannadhamme vibhāgena dassanato dhammaṭṭhitiñāṇam idhādhippetam. Tassa khayadhammatādi jānanam **paṭivipassanā**. Tenāha “**vipassanāpaṭivipassanādassanamattan**”ti.

Evamettha aṭṭhakathādhippāyavasena pāliya attham dassetvā idāni attano adhippāyavasena dassetum “**pāliyam panā**”ti-ādimāha. **Sabbatthāti** addhattaye paccayavisesena paccayuppannavisesaniddhāraṇe. **Ñānavacanenāti** “jātipaccayā jarāmarañan”ti-ādinā ñāṇassa gahaṇena. **Aṅgānanti** sattasattatiyā aṅgānam. **Itisaddenāti** “nirodhadhamman”ti ettha vutta-itisaddena. **Pakāsetvāti** ñāṇassa pavatti-ākāram jotetvā. tena dhammaṭṭhitiñāṇato aññāmyeva pariyoṣāne vuttam ñāṇanti dasseti. Tenāha “**vipassanāñāṇam sattamam ñāṇan**”ti. Ayameva cettha attho yuttoti dassento “**na hi**”ti-ādimāha. Tattha “**tampi ñāṇantisambandho na hoti**”ti evam sambandho na yutto aṅgantarabhāvassa avibhāvanatoti attho. Tena vuttam “**taṃ ñāṇa -pa- anadhippetattā**”ti. Na hi visum visum vuttameva ekajjham vacanamattena atthantaram hotīti. “**Khayadhammam -pa- to cā**”ti iminā purimasmiṃ pakkhe upacayena dosamāha.

Sattakaniddesavaṇṇanā niṭṭhitā.

## 8. Aṭṭhakaniddesavaṇṇanā

808. **Paccanīkadhammeti** nīvaraṇādīpaccanīkadhamme. **Dukkhanti** samāpajjane asati uppajjanakadukkham.

Aṭṭhakaniddesavaṇṇanā niṭṭhitā.

## 10. Dasakaniddesa

### Paṭhamabalaniddesavaṇṇanā

809. Na ṭhānanti **aṭṭhānam**, anupalabbhanattho ayamakāroti āha “**avijjamānam ṭhānam aṭṭhānan**”ti. Abhāvattho vā, na aññapaṭipakkhādi-atthoti āha “**natthi ṭhānanti vā aṭṭhānan**”ti. Ko panetassa



atthadvayassa visesoti? Paṭhamo hetupaccayehi anupalabbhamānataṃ vadati, dutiyo sabbena sabbaṃ abhāvanti ayametesāṃ viseso. Taṅhupādānādīnampi sukhato upagamanassa hetubhāve diṭṭhivipallāsassa so sātisayo asukhepi dalhaṃ pavattāpanatoti āha “**diṭṭhivipallāsova -pa-adhippetan**”ti. “Attadiṭṭhivasenā”ti kasmā visesetvā vuttaṃ, nanu ariyasāvakaassa sabbāpi diṭṭhiyo natthīti? Saccaṃ natthi, attadiṭṭhisannissayā pana sabbadiṭṭhiyoti dassetuṃ “**attadiṭṭhivasenāti padhānadiṭṭhimāhā**”ti vuttaṃ. **Bhedānurūpassa** vatthuno. **Bhedānurūpena** “adhamme dhammo”ti-ādinayappavattena.

**So evāti** yo liṅge aparivatte tasmim attabhāve bhavaṅgajīvitindriyappabandho, so eva. Tañhi upādāya ekajātisamaññā, na cettha bhāvakalāpajīvitindriyassa vasena codanā kātabbā tadaññasseva adhippetattā. Tañhi tattha avicchedavuttiyā pabandhavohāraṃ labhati, itarampi vā bhāvānurūpālanatāsāmaññenāti anokāsāva codanā.

**Sapattavasena yojetabbanti** “sapattaṃ māremīti abhisandhinā sapattena nipannaṭṭhāne nipannaṃ manussabhūto manussabhūtaṃ mātaraṃ, pitaraṃ vā mārento”ti-ādinā yojetabbaṃ. **Sabbatthāti** catūsupi vikappesu. **Purimaṃ abhisandhicittanti** pubbhāgiyo maraṇādhippāyo. **Appamāṇaṃ** tena atthasiddhiyā abhāvato. **Puthujjanasseva taṃ dinnam hotīti** ettha yathā arahattaṃ patvā paribhuttampi puthujjanakāle dinnam puthujjanadānameva hoti, evaṃ maraṇādhippāyena puthujjanakāle pahāre dinne arahattaṃ patvā teneva pahārena mate kasmā arahantaghātoyeva hoti, na puthujjanaghātoti? Visesasambhavato. Yathā hi dānaṃ deyyadhammassa pariccāgamattena hoti, na evaṃ vadho. So hi paṇo, paṇasaññitā, vadhakacetanā<sup>1</sup>, upakkamo, tena maraṇanti imesaṃ pañcannaṃ aṅgānaṃ pāripūriyāva hoti, na apāripūriyā. Tasmā arahattaṃ pattasseva maraṇanti arahantaghātoyeva hoti, na puthujjanaghāto. Yasmā pana “imaṃ māremī”ti yaṃ santānaṃ ārabha māraṇicchā, tassa puthujjanakhīṇāsavabhāvena payogamaraṇakkhaṇānaṃ vasena satipi santānabhede abhedoyeva. Yadā ca atthasiddhi, tadā khīṇāsavabhāvo. Tasmā

---

1. Vadhakacittam (?)

arahantaghātova hotīti nicchitaṃ. Kathaṃ panettha vadhakacetanā vattamānavisayā siyāti āha “**vadhakacittam**paccuppannārammaṇampi -**pavattati**”ti. Tattha **pabandhavicchedavasenā**ti yena pabandho vicchijjati, tādisaṃ payogaṃ nibbattetīti attho. Tena yadā pabandhavicchedo, tadā arahāti yathāvuttaṃ arahantaghātaṃ patiṭṭhāpeti. **Na evanti** yathā kālantarāpekkhakiccasiddhaṃ vadhakacittaṃ, na evaṃ cāgacetanā. “**Sāhi**”ti-ādinā cāgacetanāya kālantarānapekkhakiccasiddhitaṃyeva vibhāveti. **Aññasakakaraṇanti** attato vinimocetvā aññassa dakkhiṇeyyassa santakabhāvakaraṇaṃ. **Tassāti** cajitabbassa vatthuno. **Yassāti** yassa puthujjanassa. **Tasseva taṃ dinnaraṃ hoti**, saccepi arahattaṃ patvā tena paribhuttanti attho.

“Kappavināse”ti idaṃ “saṅṭhahante kappe”ti vuttattā mahākappavināsaṃ sandhāya vuttanti āha “**appaṭṭhakathāya na sameti**”ti ettha āyukappassa adhippetattā. Āyukappo cettha avīciyaṃ nibbattasattānaṃ antarakappaparimāṇaṃ paramāyu veditabbaṃ. Tañhi sandhāya “ekam kappam asītibhāge katvā tato ekabhāgamattaṃ kālan”ti<sup>1</sup> vuttaṃ. Tayidaṃ “**ekam kappan**”ti yadi ekam mahākappanti attho, tathā sati vīsati-antarakappaparimāṇo eko asaṅkhyeyyakappoti vuttaṃ hoti. Atha ekam asaṅkhyeyyakappanti attho, sabbathāpi “catusaṭṭhi antarakappā”ti vacanena virujjhatīti vīmaṃsitabbaṃ. Yathā pana kappapaṭṭhakathāya ayaṃ aṭṭhakathā sameti, taṃ dassetuṃ “**kappavināseyevāti panā**”ti-ādimāha.

**Pakatatto** vā apārājiko. **Samānasaṃvāsako** kammaladdhīnaṃ vasena anānāsaṃvāsakoti evamettha attho veditabbo.

Niyatassa puggalassa vijjamānataṃ paṭisedhetvāti yojanā. Tattha **paṭisedhetvāti** “puggalo pana niyato nāma natthi”ti evaṃ paṭisedhetvā. Tattha kāraṇamāha “**micchattasammattaniyatadhammānaṃ viya sabhāvato**”ti. Paññattimattaṃ hetuṃ micchattasammattaniyatadhammanissayaṃ, yadidaṃ niyato puggaloti. **Yathāpucchitanti** “kiṃ pubbaheṭu niyameṭi”ti-ādinā pucchitappakāraṃ niyamakahetuṃ. **Yenāti** yena uparimaggattayavipassanāññāna.

---

1. Abhi-Ṭṭha 3. 234 piṭṭhe.

**Niyatāniyata**bedanti sotāpannādiniyatabhedan̄, sattakkhattuparamādi-niyatabbadañca. Sotāpanno eva hi eko sattakkhattuparamo nāma hoti, eko kolaṅkolo nāma, eko ekavijī nāmāti sotāpannassa niyatabhāvo vuttoti āha “**sotāpanno ca niyato**”ti. Byatirekattho hi ayaṁ **ca-saddo**. **Tato pubbeti** sotāpattimaggato pubbe. “**Pubbahetukiccam natthī**”ti idaṁ sotāpannassa niyatatāya vuttattā vakkhamānañca dosan̄ hadaye ṭhāpetvā vuttan̄. Uparimaggānaṁ sa-upanissayatte paṭhamamaggassāpi sa-upanissayatā siddhā evāti codanaṁ sandhāyaha “**yadi hī**”ti-ādi. **Tañca** niyatattan̄. **Assāti** sotāpattimaggassa.

**Teneva khīṇāti** sotāpattimaggeneva khīṇā. Kāraṇupacchedena hi phalupacchedo siyā. **Tatoti** sattakkhattuparamādito. **Sāti** sattakkhattuparamādītā. **Pavattitoti**<sup>1</sup> vipākappabandhato. **Tenāti** sotāpattimaggena. **Vuṭṭhāneti** vuṭṭhāne sati. Kāraṇena vinā phalaṁ natthīti āha “**sakkāya -pa- bhavitabban**”ti. “**Nāmakaraṇanimittato**”ti iminā nāmakaraṇahetutāya niyāmakataṁ vibhāveti ekabījī-ādisamaññānaṁ anvatthasaññābhāvato. Tenāha “**vipassanā -pa- sandhāya vuttan**”ti.

Ādi-saddena “ekomhi sammāsambuddho, sītībhūtosmi nibbuto”ti-ādīni<sup>2</sup> saṅgayhanti. Ettha ca “sadiso me na vijjati<sup>2</sup>, ekomhi sammāsambuddho<sup>2</sup>. ‘Atthetarahi aññe samaṇā vā brāhmaṇā vā bhagavatā samasamā sambodhiyan’ti evaṁ puṭṭho ahaṁ bhante ‘no’ti vadeyyan”ti<sup>3</sup> ādivacanehi imissā lokadhātuyā viya aññassa buddhassa aññissā lokadhātuyā uppādo niviritoti daṭṭhabbaṁ. Na hi vijjamāne “sadiso me na vijjati”ti-ādī<sup>2</sup> sakkā vattuṁ. Yaṁ pana vadanti “lokadhātuvisesāpekkhāya vuttan”ti, tampi natthi tathā visesanassa abhāvato, buddhānubhāvassa ca asamatthabhāvavibhāvanati. Āṇākhettakittanañcettha dhammatādassanatthaṁ. Sakkoti hi bhagavā yattha yattha icchati, tattha tattha

---

1. Pavattato (Ka)

2. Vi 3. 12; Abhi 4. 218; Ma 1. 227 piṭṭhesu.

3. Dī 3. 94 piṭṭhe.

āṇaṃ vattetuṃ. “**Ekissā lokadhātuyā**”ti ca idaṃ buddhakhettabhūtāya lokadhātuyā dassanattamaṃ vuttaṃ. Tatthāyamattho—buddhakhettabhūtā ekāvāyaṃ lokadhātu. Tattha ekasmiṃ kāle eko eva sammāsambuddho uppajjatīti. Tenāha “**buddhakhetta -pa- adhippāyo**”ti.

**Tasmāti** yasmā upasampadādhiṇaṃ pātimokkhaṃ, upasampadā ca pabbajjadhīnā, tasmā. **Pātimokkhe** sidde, siddhāsu **tāsu** pabbajjūpasampadāsu. **Tato paramā vīnaṭṭhaṃ nāma hotīti** pacchimapaṭivedhato paramā paṭivedhasāsaṇaṃ, pacchimasīlabhedato ca paramā paṭipattisāsaṇaṃ vīnaṭṭhaṃ nāma hotīti sāsana bhāvasāmaññaṇaṃ pana ubhayaṃ jakajjhaṃ katvā dassento “**pacchima -pa- ekato katvā**”ti āha.

**Paridevanakāruṇṇanti** paridevanena karuṇāyitabbatā karuṇāyaṇā.

**Dhammānaṃ sabhāvaviseso na sakkā dhāretuṃ**, yato pāramīpavicayādīsu udakapariyaṇaṃ katvā mahāpathavīkampo ahoṣi, abhisambodhidivase ca ṭhapetvā pubbuttaradisābhāge bodhirukkhamūle bhūmibhāgo mahāpurisaṃ dhāretuṃ nāsakkhi, aññaṇadattu ekapasse pakkhitta-atibhārabharitaṇā vā viya cakkavāḷagabbo viparivatto. “Samuppādikā”ti vattabbe sa-kāre a-kārassa ā-kāro, ekassa **ca** pa-kārassa lopo katoti dassento āha “**samaṃ uddhaṃ pajjatīti sāmupādikā**”ti. Samaṃ upādīyatīti vā samupādā, samupādā eva **sāmupādikā**, samupāhīnīti attho.

**Santatikhaṇavasenaṇā**ti santativasena āyūhanasamaṅgītā, sapubbapacchābhāgassa gahaṇavasena cetanākkhaṇavasena setanāsamaṅgītāti yojetabbā. Ekasmiṃ upaṭṭhite paccayavasena tadaññaṇassa upaṭṭhānaṃ parivattanaṃ.

Paṭhamabalaniddesavaṇṇanā niṭṭhitā.

### Dutiyabalaniddesavaṇṇanā

810. Bhoge bhuñjitum na jānāti, vināsetīti yojanā.

**Lahuparivattitāya** jīvitassāti adhippāyo.

**Na adāsi** payuttavācāya uppananti adhippāyena.

**Sammāpayogenāti** sammāpaṭipattiyā.

Dutiyabalaniddesavaṇṇanā niṭṭhitā.

---

### Pañcamabalaniddesavaṇṇanā

813. **Dhātusabhāvoti** bhūtādisaṅkhātadhātūnaṃ sabhāvo.

**Sabhāgavasena** phalabhūtena. **Ajjhāsayadhātuparicchindanatoti** ajjhāsayasabhāvassa “hīnaṃ, paṇītaṃ”ti vā paricchijja jānanato, vuṭṭhinimittena viya mahoghena uparimeghavuṭṭhiyā.

Pañcamabalaniddesavaṇṇanā niṭṭhitā.

---

### Chaṭṭhabalaniddesavaṇṇanā

**Saddattho sambhavati** samāsanteneva tathā saddasiddhito. **Tesanti** paroparānaṃ visadāvisadānaṃ saddhādi-indriyānaṃ. **Evañca katvāti** āsayādito indriyaparopariyattassa, indriyaparopariyattato ca adhimuttibhedassa viṣiṭṭhasabhāvattā eva.

815. “Ke pana te ariyāvāsā”ti pucchitvā te sutteneva dassento “**idha bhikkhave**”ti-ādipāḷim āharitvā “**evaṃ vuttā**”ti nigamtvā puna maggādhigameneva tesam adhigamaṃ dassento “**etesū**”ti-ādimāha. Tattha **itaretī** chaḷaṅgasamannāgama, ekārakkhā, saṅkhāyapaṭisevanādayo.

816. **Ārammaṇasantānānusayanesūti** ārammaṇānusayanaṃ, santānānusayananti dvīsu anusayanesu. Yathā hi maggena asamucchinno rāgo

kāraṇalābhe uppajjanāraho thāmagataṭṭhena santāne anusetīti vuccati, evaṃ iṭṭhārammaṇepīti tassa ārammaṇānusayanāṃ daṭṭhabbāṃ. Taṃ panassa anusayanāṃ uppattiyā pākaṭaṃ hotīti dassetuṃ aṭṭhakathāyaṃ “yathā nāmā”ti-ādi<sup>1</sup> vuttaṃ. “**Āciṇṇasamāciṇṇā**”ti etena iṭṭhārammaṇe rāgassa ciraparibhāvanāṃ vibhāveti. Yasmā pana evaṃ ciraparibhāvitaṃ pariveḥetvā viya ṭhitaṃ hoti, tasmā “**samantato veḥetvā viya ṭhita bhāvena anusayitāṃ dasseti**”ti vuttaṃ. Tathā hi uduke nimuggasadiṣo udāhaṭo. “Sabbepi tebhūmakā dhammā kāmaṇiyatṭhena kāma”ti-ādipāḷivesena bhavarāgassāpi vatthukāmatā veditaḥḥā. **Rāgavasenāti** ārammaṇarajjanavasena.

818. **Indriyaviseso** vineyyānaṃ indriyaparopariyattaṃ.

819. Pahātabbena upaddutanirodhanatthaṃ pahāyakaṃ pariyesatīti paṭṭhamāṃ pahātabbāṃ, pacchā pahāyakanti ayam **pahātabbapajahanakkamo** pahānakkamapadena vutto. **Yassāti** pahātabbassa. **Tanti** pahātabbāṃ. **Paṭṭhamāṃ vuccatīti** pahānavicāraṇānaṃ paṭṭhamāṃ vuccati. **Tato** pacchā **appahātabbāṃ** yathā taṃ dassanattikādīsu.

826. **Tanti** bhavaṅgaṃ. **Tassāti** lokuttarassa. **Pādakanti** antimabhavikassa bhavaṅgaṃ sandhāyāha.

Chaṭṭhabalaniddesavaṇṇanā niṭṭhitā.

### Sattamabalaniddesavaṇṇanā

828. **Samāpannomhīti** maññatīti attho.

Samādhī vā tassa ārammaṇabhūtaṃ **kammaṭṭhānaṃ vā** cittamañjūsāti yojanā. **Ṭhapetunti** yathāparicchinnaṃ kālaṃ samāpatticittaṃ pavattetuṃ.

1. Abhi-Ṭṭha 2. 441 piṭṭhe.

**Tehī**ti saññāmanasikārehi. **Tamsabhāvatā**ti kāmādidutiya<sup>1</sup>jhānādi-anupakkhandanasabhāvatā. **Paguṇavodānaṃ** paguṇabhāvasiddhā jhānassa paṭipakkhato visuddhi.

Sattamabalaniddesavaṇṇanā niṭṭhitā.

### Dasamabalaniddesavaṇṇanā

831. **Paññāva vimuttī**ti rāgādīhi vimuttibhūtā paññāva vimuttīti yojanā. **Kammantarassa vipākantaramevā**ti attho vipākantarajānanasseva dutiyabalakiccattā, kammantarajānanassa ca tatiyabalakiccattā. **Balasadisanti** ekaccabalasadisatāṃ. Kasmā panettha balañāṇakicce vuccamānejhānādi-abalañāṇaṃ udāhaṭanti codanaṃ sandhāyāha “**yadipi**”ti-ādi. **Tadantogadhanti** tasmim jhānādipaccavekkhaṇāsabhāve sattamabalañāṇe antogadham. **Evanti** jhānādiñāṇaṃ viya. **Appetum**, **vikubbituñcā**ti attanā vuttākāraṃ sandhāyāha. Samudayappahānādi-ekaccañāṇakiccampi akarontaṃ sabbaññutaññāṇaṃ kathamappanādikaṃ jhānādikiccam kareya, balañāṇehi pana jānitabbaṃ, tato uttariṇca jānantampi yasmā ekaccabalakiccam na karoti, tasmā aññāneva balañāṇāni, aññāṃ sabbaññutaññāṇanti dassanatthaṃ “etesāṃ pana kiccaṃ na sabbaṃ karoti”ti-ādi<sup>1</sup> aṭṭhakathāyaṃ vuttaṃ. Tattha yathā sabbaññutaññāṇaṃ abalakiccam ekaccaṃ na karoti, evaṃ balakiccampīti udāharaṇadassanavasena “tañhi jhānaṃ hutvā appetun”ti-ādi vuttanti dassetum “**atha vā -pa- daṭṭhabban**”ti vuttaṃ.

Ñānavibhaṅgavaṇṇanā niṭṭhitā.

## 17. Khuddakavatthuvibhaṅga

### 1. Ekakaniddesavaṇṇanā

843-4. **Atthipaṭiccam nāmāti** atthitā paṭiccattho nāma, asatipi sahajātapurejātādibhāve yasmim sati yaṃ hoti, so tassa paccayoti katvā yathā tathā atthitāmattaṃ idha paṭiccatthoti attho. Taṃ pana paṭiccatthaṃ byatirekamukhena pākaṭataraṃ kātum “**yathā**”ti-ādimāha. Tattha **nissayādipaccayabhāvena paṭiccāti vuttanti** nissayādipaccayabhāvato paccayabhūtaṃ cakkhādi “paṭiccā”ti vuttaṃ. **Ekissā seṇiyāti** aṭṭhārasasu seṇisu mayāṃ amukāya seṇiyā jātāma, na aññe viya appaññātāti evamettha atthaṃ vadanti.

**Purato karaṇaṃ** pamukhabhāvakaraṇaṃ. **Nidhānarāsīti** nidahitvā ṭhapitadhananicayo. **Yasoti** issariyaṃ. Taṃ pana yesu vattati, tesu paṭṭhāpaka-āṇākaraṇehi pākaṭo hotīti “**paṭṭhāpakamado, āṇākaraṇamado**”ti ca vuttaṃ.

845. **Vatthunāti** jāti-ādipavattihetunā.

846. **Paṭiṭṭhābhāvoti** kusalakammesu paṭiṭṭhānābhāvo, so pana yasmā kusalakiriyāya ṭhānaṃ na hoti, tasmā “**kusalakaraṇe aṭṭhānān**”ti āha. Pamādasāṅkhātassa atthassa evamādiko pariyāyoti yojanā. **Ādi-saddena** “vacīducarite, manoduccarite cittassa vossaggo, makkho, paḷāso”ti ca evamādikassa saṅgaho daṭṭhabbo. “Pamādo pamajjanādī”ti-ādiko **tadatthappakāsako**, “cittassa vossaggo vossaggānuppādanān”ti-ādiko **tappariyāyappakāsako** byañjanapariyāyo ca apaniyantoti sambandho. “**Cattāro khandhe dasseti**”ti iminā sativossaggākārappavattā cattāro akusalakkhandhā pamādoti vadati.

847. Anivātavuttitīya hetubhūto cittasampaggaho **mānaviseso**.

848. Uttarabhāvo uttariyaṃ, karaṇena uttariyaṃ **karaṇuttariyaṃ**, sārāmbhena parassa kiriyato uttarikiriyā.



849. **Neruttikavidhānenā**ti i-kāra, cca-kārānañca rakāratāpādanena.

**Attahitaṃ attā**ti uttarapadalopena niddesamāha yathā “rūpabhavo rūpaṃ, bhīmaseno bhīmo”ti ca. **Ādinno, patto** vā attho **attā**ti niruttinayena padasiddhi veditabbā.

**Mudditassā**ti añkitassa.

850. **Jānantasseva** mahājanassa. **Upādānādipaccayeti** indanudakacīvarādike pāripūrihetuke.

851. **Gaṇṭhikā** sayam gaṇṭhikaraṇato. Patirūpavacanato, aññesaṃ gaṇṭhibhedato ca **gaṇṭhibhūtā**.

852. Abhejjantaratāya<sup>1</sup> **samāsevitatāya** suṭṭhu āsevitatāya.

853. Cirakālaparibhāvitattena **temanakaraṇaṃ** allabhāvakaraṇaṃ, lobhavasena avassavananti attho.

Evam sante kathaṃ khīyananti niddesoti āha “**khīyananti cā**”ti-ādi.

854. **Cīvaramaṇḍanādīnanti** cīvaramaṇḍanā pattamaṇḍanā senāsanamaṇḍanāti imesaṃ. Idāni taṃ visesaṇabhāvaṃ yojetvā dassetuṃ “**cīvarena hī**”ti-ādi vuttam.

855. Sabhāgarahito, sabhāgapaṭipakkho vā **asabhāvo**, ananukūlānaṃ paṭikkūlatā vā. Tenāha “**mānathaddhatā, virodho vā**”ti.

856. **Saṅkampanā** ukkaṇṭhanāvasena anavaṭṭhānaṃ, anavadhānaṃ vā. **Tassa tassa** ārammaṇassa **taṇhāyanā**.

857. **Kāyassā**ti nāmakāyassa. Tasmiñhi avipphārike rūpakāyopi avipphāriko hoti.

---

1. Asejjantaratāya (Ka)

860. **Rāgādīnanti** rāgamoha-ahirikānottappavicikicchādīnaṃ.

861. Tividhampi kuhanavattum dassetunti sambandho. **Tatthāti** mahāniddese. “Tattha katamā kuhanā lābhasakkārasilokasannissitassā”<sup>1</sup>ti-ādīnā<sup>1</sup> idha khuddakavibhaṅge āgataṃ desanānayaṃ nissāya mahāniddesadesanā pavattāti āha “**nissayabhūtāya imāya pāḷiyā**”ti.

**Antarahitānīti** antavikalāni chindantāni.

Lābhasakkārasilokahetu sambhāvanādhippāyena saṃyatākāradassanaṃ kohaññanti āha “**pāpicchatāyaniratthakakāyavacīvipphandaniggahaṇaṃ korajan**”ti. Yo saṃvegabahulo kukkuccako pubbenāparaṃ attanopi kiriyāṃ parisāṅkanto paccavekkhamāno tiṭṭhati, tādisaṃ viya attānaṃ dassento “**atiparisāṅkito**”ti vutto.

864. Pasaṃsāmukhena nindananti pasaṃsāvattuto khipanaṃ **bahi chaḍḍanaṃ** yathā “adāyakaṃ aho dānapatī”ti.

865. **Gavesanakammanti** appakena lābhena mahantassa pariyesanakabyāpāro.

866. Pokkharāṃ vuccati sundaraṃ, vaṇṇassa sundarabhāvo vaṇṇapāripūrī hotīti āha “**vaṇṇapāripūrī vā vaṇṇapokkharatā**”ti.

879. **Seyyamānādīniddesesūti** “tattha katamo seyyassa seyyohamasmīti māno”<sup>2</sup>ti-ādīnā<sup>2</sup> niddiṭṭhesu navasu mānaniddesesu. “**Seyyādipuggalo**”ti idaṃ tattha pāḷiyaṃ seyyādīnaṃ navannaṃ puggalānaṃ āmaṭṭhattā vuttam. Idha pana puggalāmasane sati seyyapuggalo ca āmasitabbo siyā. Tenevāha “**seyyamānabhāvepī**”ti. **Seyyamānabhāvepīti pi-saddo** ākaḍḍhako aseyyamānaniddesepe puggalāmasanassa katattā. **Yassa kassacīti** seyyādīsu yassa kassaci puggalassa.

1. Abhi 2. 365 piṭṭhe.

2. Abhi 2. 367 piṭṭhe.

880. **Purimamānassā**ti pubbe pavattassa sadisamānassa, hīnamānassa vā, sadisamānavaseneva pana pāḷi āgatā.

881. “Migānaṃ kotthuko anto, pakkhīnaṃ pana vāyaso”<sup>1</sup>ti vacanato āha “**pakkhijātisu vāyaso anto lāmake**”ti.

882. **Virāganti** arahattaṃ.

883. **Mānasampayuttacchando** taṇhāchando. **Mānasabhāvaṃ anugato** seyyādito sampaggaṇhanavasena pavatto mānasampayuttakattukamyatāchando **vā mānacchando**.

884. **Tatthāti** tasmim vilambane nipphādetabbe. **Yuttaṃ** anucchavikaṃ. **Muttaṃ** vissaṭṭhaṃ. **Siliṭṭhaṃ** sahitaṃ, atthadvayavibhāvakaṃ vā.

888. **Anuddayassevāti** mettāyantassa viya anukampantassa viya vikappanāti āha “**sahananditādikassā**”ti, mettādiptirūpena pavattagehasitasinehassāti attho. Tenāha “**tādiso rāgo**”ti. **Attho yujjātī** evampi “tatthā”ti pāḷipadassa attho yujjati. Parānuddayatāhetuko hi parānuddayatāsahito so vitakkoti.

890. Kāmaguṇapāripūriyā yebhuyyena loko sambhāvetīti āha “**anavaññattatthameva kāmaguṇe ca pattheti**”ti.

Ekakaniddesavaṇṇanā niṭṭhitā.

## 2. Dukaniddesavaṇṇanā

891. **Bandhatī**ti kujjhanākāraṃ bandhati ghaṭeti. Upanāho hi āghātavatthunā cittaṃ bandhanto viya hoti, yato aññathā pavattitvāpi avidite upanāhe āghātavatthusannissitova hoti.

---

1. Khu 5. 90 piṭṭhe Jātake.

892. **Dantehi chinditvāti** dantehi chinditvā viya ekadesaṃ apantvā ekadesaṃ gahetvāti adhippāyo.

894. **Accayaṃ katvāti** vītikkamaṃ katvā. **Paṭicchādaneti** attanā katassa accayassa paṭicchādane. Vocchindanaṃ vītikkamakiriyāya appaṭijānavasena upacchindanaṃ, vocchindanena chādanā **vocchindanachādanā**.

Asammābhāsane saṭhasaddo loka niruḷhoti āha “**yo na sammā bhāsati, so saṭho**”ti. Saṭhassa yakkhasūkarasadisataṃ dassento “**kucchi vā piṭṭhi vā jānitum na sakkā**”ti āha, indajālasadiso vā eso daṭṭhabbo.

Yo sabbathā vipannajjhāsayopi samāno kāyavacībhedaṃ attānaṃ sampannaṃ viya dassetvā lokaṃ vañcento aññathā santaṃ aññathā pavedeti. Tenāha “**tenetaṃ sātheyyaṃ māyāto balavataṃ vañcānāti daṭṭhabban**”ti. Santadosapaṭicchādaneva hi māyā. **Tenevāti** balavataṃ vañcānābhāveneva. Daḷhakerāṭiyaṃhi “**parikkhatatā**”ti vuttaṃ.

908. **Abhāvepi** pi-saddena “ko pana vādo bhāve”ti dasseti. Yadihi hi puthujjanānaṃ, ekaccānaṃ sekkhānaṃ yathārahaṃ attābhinivesādīhi katūpakāraṃ rūparāgādisaṃyojanakiccaṃ sādheti, ekaccānaṃ pana vinā eva tehīti kassacipi kilesassa avikkhambhitattā kathaṅcipi avimutto kāmabhavo ajjhattaggahaṇassa visesapaccayoti “ajjhattan”ti vuccati, tadabhāvato “bahiddhā”ti laddhavohāre rūpārūpabhāve kevalampi saṃyojanakiccaṃ sādhetāṃ pavattatīti, tato eva rūpārūpāvacarasattānaṃ bahiddhāsaṃyojanabhāvahetu jātanti ca “bahiddhāsaṃyojanan”ti vuccatīti imamatthamāha “**sakkāyaditṭhādīnaṃ -pa- yojanaṃ nāmā**”ti.

Dukaniddesavaṇṇanā niṭṭhitā.

### 3. Tikaniddesavaṇṇanā

909. Avijjābhavataṇhāti viya issāmacchariyadomanassādisahāyabhūtena dosenapi bhavābhisaṅkharāṇaṃ hoṭīti “**akusalamūlāneva vaṭṭamūlānī**”ti. Tenāha “**tīhi -pa- kathito**”ti.

919. Rūpārūpāvacaravipākānaṃ santapaṇītabhāvena uḷāratamattā tattha sātisayo bhavarāgo vutto.

920. **Mānena ṭhapanā**ti mānena seyyādivasena attano ṭhapanā. **Ṭhapanā**ti ca dahanā, paggaṇhanā vā.

921. **Taṃsampayuttā**ti dosasampayuttā.

922. **Tesaṃ vaṇṇabhedanti** tesaṃ jīvānaṃ vaṇṇavisesaṃ, tesaṃ vā tathā kathentānaṃ sutvā. **Byāpī**ti sakalalokabyāpī, sakalasarīrabyāpī vā. **Parimaṇḍaloti** paramāṇupparamāṇo hutvā parimaṇḍalo. **Ādi**-saddena aṅguṭṭhappamāṇo vayappamāṇoti-ādikaṃ saṅgaṇhāti.

923. **Utuvipariṇāmajo** sītādi-utuviparivattajāto. **Opakkamiko** attano, parassa vā tādissa-upakkamanibbatto. **Visamaparihārajo** cirāsanaciraṭṭhānādinā kāyassa visamapariharaṇato jāto. **Sannipātajo** sañcayato paṭṭhāya paccekaṃ visamākārato dosattayasamodhānato jāto. **Kammasamuṭṭhāno** utuvipariṇāmādīhi vinā kammato samuṭṭhito. **Pittasemhavātasamuṭṭhānā** pana pittādīnaṃ adhikabhāveneva vuttā. Sabbassāpi hi rogassa dosattayaṃ āsannakāraṇaṃ dosappakopena vinā abhāvato. Kammaṃ padhānakāraṇaṃ katokāse eva tasmim uppajjanato, itaraṃ pana tassa sahakārikāraṇaṃ daṭṭhabbaṃ. Tayidaṃ pubbekatahetuvādino paṭikkhipanti. Upapajjavedanīyaphalampi pubbekatahetukapakkkhikameva atītaddhikattā kammassāti arucisūcanatthaṃ kira-saddaggaṇaṃ karoti “**upapajjavedanīyañca kira paṭikkhipanti**”ti.

924. **Dāhakāraṇatāyā**ti rāgādidasavidhaggidāhassa, narakaggidāhassa ca kāraṇatāya.

926. **Puthunimittasabhāvesūti** puthu nānākilesādīnaṃ kāraṇasabhāvesu.

931. Addanaṃ **addā** maddavo, anekatthattā dhātūnaṃ tappaṭikkhepena **anaddāti** āha “**amudutā vā anaddā**”ti.

936. Ayonisomanasikārahetukattā āvajjanāya akusalānukūlakiccatā daṭṭhabbā.

Tikaniddesavaṇṇanā niṭṭhitā.

#### 4. Catukkaniddesavaṇṇanā

939. **Evam-saddenāti** nidassanatthena evaṃ-saddenāti adhippāyo. Bhavo eva abhivuddho **abhavo** yathā “asekkhā dhammā”ti<sup>1</sup>. Dutiyasmiṃ pakkhe bhavābhava-saddena sampattivipattiyo, vuddhihāniyo vā vuttāti veditabbā.

**Agatiyāti** ayuttagatiyā, appatirūpakiriyāyāti attho.

Kodhūpāyāsa -pa- mātugāmā vā ūmi-ādibhayanti yojanā. **Pañcakāmaguṇamātugāmaggaḥaṇeti** pañcakāmaguṇaggahaṇe, mātugāmaggaḥaṇe ca.

“Sayāṃkatam sukhadukkhan”ti-ādikā diṭṭhi yadipi aññesampi diṭṭhigatikānaṃ attheva, **timbaruko** pana tathādiṭṭhiko bhagavantam upasaṅkamitvā pucchīti sā diṭṭhi “**timbarukadiṭṭhi**”ti<sup>2</sup> vuttā. Tenāha “**timbaruko -pa- āgatattā**”ti.

Catukkaniddesavaṇṇanā niṭṭhitā.

1. Abhi 1. 2 piṭṭhe.

2. Saṃ 1. 261 piṭṭhe.

### 5. Pañcakaniddesavaṇṇanā

940. **Āgamanassa** paṭisandhiggahaṇavasenāti adhippāyo.

941. **Upacayanatoti** vaḍḍhanato. **Aññathāti** lābhato, takkanato ca aññappakāro gahitoti taṃ dassento “**saddhārucci-ādīhi**”ti āha. Anussavato hi saddahanam, ruccanam pana jātissarañāṇatopi hoti. **Ādi**-saddena khanti-ādīnam saṅgaho.

942. Akkhanti mūlam etesanti **akkhantimūlakā**.  
**Dukkaṭadubbhāsitatādidosā** tādisāni kāyavacīmanoduccaritāni.

943. **Udaggatāsaṅkhāto avūpasamo** na uddhaccasaṅkhātoti pītiyā eva savipphārikatāsaṅkhataṃ asantasabhāvaṃ āha. **Avūpasamahetubhūtoti** vikkhepahetubhūto. **Pītiyā ākāroti** pītiyā pavatti-ākāro.

Pañcakaniddesavaṇṇanā niṭṭhitā.

### 6. Chakkanidesavaṇṇanā

944. **Tenāti** kodhādīnaṃyeva vivādamūlattā.

945. Kusalānuyoge sātaccam **kusalānuyogasātaccam**.

Gaṇena sattasamūhane saṅgaṇi sannipatanam yena saddhim, tena saṅgati **gaṇasaṅgaṇikā**. **Kassaci** ghāsacchādanādikassa.

946. **Upavitakketīti** ārammaṇam upecca takketi.

948. **Adhiccasmuppannikoti** “adhiccasmuppanno attā ca loko cā”ti evaṃvādī.

Chakkaniddesavaṇṇanā niṭṭhitā.

### 8. Aṭṭhakaniddesavaṇṇanā

852. **Osīdanākārenā**ti kattabbakamme anussahanākārena.

958. **Te** abhinivesā **asaññīvādā** vadanti etehīti.

Aṭṭhakaniddesavaṇṇanā niṭṭhitā.

---

### 9. Navakaniddesavaṇṇanā

960-963. **Dasamassāti** aṭṭhānaghātassa.

**Ajjhattanti** gocarajjhataṃ adhippetam. **Etassa** gāthāvacanassa. **Niṭṭhapetvāti** abhinigassa.

964. **Aññesam** phassādīnam **saṅkhatabhāve** yathāsakam paccayehi. Yenākārena mānassa sātisayā pavatti, tam dasseturam “**ahanti, asmīti cā**”ti vuttam. **Attanoti** diṭṭhigataparikkappatassa attano. Yathā mānassa sampaggahavasena, evam taṇhāya mamattavasena, diṭṭhiyā niccādivasena **pavatti visesavatī** samānepi anāgatakālāmasaneti āha “**bhavissantī -pavutto**”ti. “Ahamasmī”ti pana pavattamānasseva bhavati sabbapadassādhāraṇassa mānasseva vasena iñjitādītā aṭṭhakathāyaṃ vuttā.

Navakaniddesavaṇṇanā niṭṭhitā.

---

### 10. Dasakaniddesavaṇṇanā

970. **Saṅkappananti** “kusalatā”ti vuttapadassa atthavacanam. **Tassā** upāyacintāya. **Micchābhāvo** sāvajjabhāvo. **Tadākāro** mohoti yathāvuttākārena pavatte cittuppāde moho. **Tassāpi** yathāvuttapaccavekkhaṇāyapi yathākatapāpepi. **Adhimānasampayuttam** **sañjānam** pakatipurisantaradassanādivasena pavattam diṭṭhisampayuttacittam phalam viya vimuttanti gahitam daṭṭhabbam.

Dasakaniddesavaṇṇanā niṭṭhitā.



### Tañhāvicaritaniddesavaṇṇanā

973. **Visesaṃ akatvā**ti anupanidhānaṃ, samato ca asamato ca upanidhānanti imaṃ vibhāgaṃ akatvā, yo “itthaṃ, evaṃ, aññathā”ti padehi pakāsito.

**Visesassā**ti “itthaṃ, evaṃ, aññathā”ti yathāvuttasseva visesassa. **Diṭṭhiyā**ti diṭṭhiyā gahitāya tadavinābhāvinī **tañhā** dassitā. **Sīsasīsamūlakehī**ti catūhi sīsehi, dvādasahi ca sīsamūlakehi. Sayameva ca tañhā dassitāti yojanā. Yadi diṭṭhimānagāhopi idhādhippeto, yato “tañhāmānadiṭṭhivasena samūhagāhato”ti<sup>1</sup> aṭṭhakathāyaṃ vuttaṃ, kathaṃ “tañhāvicaritānī”ti vacananti āha “**diṭṭhimānesū**”ti-ādi. **Tammūlakattā**ti tañhāmūlakattā.

974. Na avakkariyatīti **anavakārī**, taṃ anavakāriṃ katvā, taṃ padantarena vibhāvento “**anavakkari, taṃ katvā**”ti āha. **Vikkhepanaṃ** avayavato vibhāgo. **Attato avinibbhujitvā**ti yvāyaṃ diṭṭhigatikaparikappito atthā, tato avisuṃ katvā.

976. Bahikatāni rūpādīni upagantvā pavattā tañhā upādāyāti vuttāti yojanā.

Ekaccassa puggalassa ekasmiṃ attabhāve kassaci tañhāvicaritassa asamabhavo, kassacideva sambhavoti āha “**kassaci sambhavadassanatthaṃ vuttan**”ti.

Tañhāvicaritaniddesavaṇṇanā niṭṭhitā.

**Khuddakavatthuvibhaṅgavaṇṇanā niṭṭhitā.**

---

1. Abhi-Ṭṭha 2. 496 piṭṭhe.

## 18. Dhammahadayavibhaṅga

### 1. Sabbasaṅgāhikavāraṇṇanā

978. **Dhātusambhava -pa- saṅgahitattā**ti ettha khandhādīnaṃ kāmādhātu-ādīdhātūsu sambhavabhedabhinnānaṃ niravasesato saṅgahitattāti vibhāgena yojanā, tathā sesesupi pariyāpannapabhedabhinnānanti-ādīnā. Tattha “**niravasesato saṅgahitattā**”ti iminā “sabbasaṅgāhikavāro”ti ayamassa atthānugatā samaññāti dasseti. Yasmā cettha khandhādīnaṃ dvādasannaṃ koṭṭhāsānaṃ anavasesasaṅgaho, tasmā evaṃ dutiyavārādīnañcettha anuppaveso veditabbo. Khandhādīnameva hi tesāṃ sambhavādivicāro uppattānuppattidassanavāroti vattuṃ yuttoti yojanā. Anuppattidassanañcettha atthāpattisiddhaṃ veditabbaṃ. Na hi tattha “kati khandhā na pātubhavanti”ti-ādīpālī atthi.

979. **Pucchānurūpanti** yenādhīppāyena pucchā kattā, tadanurūpaṃ. **Avitathabyākaraṇaṃ** nāma buddhānaṃ eva āveṇikaṃ, aññesaṃ taṃ yādicchikaṃ sutakkharasadisanti āha “**sabbaññuvacanaṃ viññāya katattā**”ti.

Sabbasaṅgāhikavāraṇṇanā niṭṭhitā.

### 2. Uppattānuppattivāraṇṇanā

991. “Kāmabhava”ti idaṃ okāsavasena vatvā puna sattasantānavasena vattuṃ “kāmādhātusambhūtānañcā”ti vuttanti tamatthavisesaṃ dassento “**iddhiyā -pa- attho**”ti āha. “Na vattabbaṃ siyā”ti kasmā vuttaṃ, yadipi asaññasattānaṃ acakkhutattā, rūpāyatanāṃ accantasukhumattā heṭṭhimabhūmikānañca agocarō, samānabhūmikānaṃ pana vehapphalānaṃ, uparibhūmikānañca suddhāvāsānaṃ cakkhāyatanassa gocarō hotīti āyatanādīkiccaṃ karotiyevāti sakkā vattuṃ. Yaṃ panettha vitthārato vattabbaṃ, taṃ heṭṭhā<sup>1</sup> vuttameva. “Heṭṭhato avīcinirayaṃ pariyantaṃ katvā uparito

paranimmitavasavattideve antokarivā yaṃ etasmin”ti-ādinā<sup>1</sup> vuttapadesā **kāmāvacarādi-okāsā. Te sattanikāyā ca dhātūti vuccanti** samudāyassa avayavādhārabhāvato yathā “māsapuñjo māso”ti. Sattā uppajjanti etthāti sattuppatti, uppajjanatthēna sattāva uppatti sattuppattīti evaṃ okāsasattalokadvayassa sattuppattipariyāyo veditabbo. **Sattabhāvena uppatti**, na anupādinakkhandhā viya saṅkhārabhāvenevāti adhippāyo. Ke pana teti āha “**sattāvāsavasena -pa- upādinakakkhandhā**”ti.

**Taṃtaṃpariyāpannānanti** taṃtaṃsattāvāsapariyāpannānaṃ sattānaṃ, saṅkhārānameva vā. **Sadisādhiṭṭhānabhāvenāti** sadisākārena pavattamānānaṃ khandhānaṃ patiṭṭhānabhāvena. Yebhuyyena hi tasmimṃ sattāvāse dhammā samānākārena pavattanti.

Uppattānuppattivāraṇṇanā niṭṭhitā.

### 3. Pariyāpannāpariyāpannavāraṇṇanā

999. **Tattha, aññattha cāti** tasmimṃ, aññasmiṃca bhava, okāse ca. Paricchedakārikāya kāmāditaṇhāya paricchiṇṇā āpannā gahitāti pariyāpannāti taṃtaṃbhavādi-antogadhā **taṃtaṃpariyāpannā**.

Pariyāpannāpariyāpannavāraṇṇanā niṭṭhitā.

### 6. Uppādakakamma-āyupamāṇavāra

#### 1. Uppādakakammavaṇṇanā

1021. **Dhātuttayabhūtadevavasenāti** kāmādidhātuttaye nibbattadevānaṃ vasena.

Uppādakakammavaṇṇanā niṭṭhitā.

---

1. Abhi 1. 253 piṭṭhe.

## 2. Āyuppamāṇavaṇṇanā

1026. Suparimajjitakañcanādāsam viya sobhati vijjotatīti subho, sarīrobhāso, tena subhena kiṇṇā vikiṇṇāti **subhakiṇṇā**.

1027. **Taritammanasikāra**nti parittapathavīkasiṇādīgatamanasikāram. **Appanākkhaṇepīti pi**-saddena pubbhāgamam sampiṇḍeti. Chandanam ārammaṇapariyesanam **chando**, kattukamyatāchando. Paṇidhānam cittaṭṭhapanā **paṇidhi**, saññāviraḡādīhi ārammaṇassa visesanam tathāpavattāya bhāvanāya ārammaṇakaraṇameva.

Vipulam vuccati mahantam, santabhāvopi mahanīyatāya mahantamevāti āha “**vipulā phalāti vipulasantasukhāyuvāṇṇādīphalā**”ti.

1028. Yam cātumahārājikānam āyuppamāṇam, **sañjīve** eso eko rattidivo, tāya rattiyā tiṃsa rattiyō maso, tesa māsenā dvādasamāsiko samvaccharo, tena samvaccharena pañca vassasatāni sañjīve āyuppamāṇam. Yam tāvatimsānam āyuppamāṇam, eso **kālasutte eko** rattidivo -pa- tena samvaccharena vassasahassam kālasutte āyuppamāṇam. Yam yāmānam āyuppamāṇam, eso **saṅghāte** eko rattidivo -pa- tena samvaccharena dve vassasahassāni saṅgāte āyuppamāṇam. Yam tusitānam āyuppamāṇam, **roruve** eso eko rattidivo -pa- tena samvaccharena cattāri vassasahassāni roruve āyuppamāṇam. Yam nimmānaratīnam āyuppamāṇam, **mahāroruve** eso eko rattidivo -pa- tena samvaccharena aṭṭha vassasahassāni mahāroruve āyuppamāṇam. Yam paranimmitavasavattīnam devānam āyuppamāṇam, **tāpane** eso eko rattidivo -pa- tena samvaccharena soḷasa vassasahassāni tāpane āyuppamāṇam. **Mahātāpane** upaḍḍhantarakappo. **Avīciyam** eko antarakappo ca āyuppamāṇanti vadanti. Devānam adhimuttakālakiriya viya tādisena puññabalena antarāpi maraṇam hotīti “**kammameva pamāṇan**”ti vuttanti veditabbam. Evañca katvā abbudādi-āyuparicchedopi yuttataro hotīti.

**Kim jhānanti** aṭṭhasu jhānesu kataraṃ jhānaṃ. **Bhavasīsānīti** bhavaggāni, puthujjanabhavaggaṃ ariyabhavaggaṃ sabbabhavagganti vehapphalādīnaṃ samaññā. **Kassaci sattāti** puthujjanassa, **kassaci pañcāti** sotāpannassa, sakadāgāmino ca, **kassaci tayoti** anāgāmino vasena vuttaṃ. Tasmā so brahmakāyikādīhi cuto arūpaṃ upapajjanto veditabbo. “Navasu brahmalokesu nibbattariyasāvakaṇaṃ tatrūpapattiyeva hoti, na heṭṭhūpapatti”<sup>1</sup>ti<sup>1</sup> ayaṃ aṭṭhakathāpāṭhoti adhippāyena “**yaṃ panā**”ti-ādi vuttaṃ. “Tatrūpapattipi hoti uparūpapattipi, na heṭṭhūpapatti”ti pana pāṭhoti tena “heṭṭhūpapattiyeva nivāritā”ti-ādivacanena payojanaṃ natthi. Arūpadhātūpapatti ca na nivāritāti sambandho. Arūpadhātūpapatti na nivāritā “matthake ṭhitova parinibbātī”ti niyamassa anicchitattā.

**Aññatthāti** kāmaloke. **Tatthāti** rūpaloke. **Ayaṃ aṭṭhakathāti** “paṭhamajjhānabhūmiyaṃ nibbatta -pa- parinibbātī”ti<sup>1</sup> evaṃ pavattā aṭṭhakathā. **Tenevāti** yasmā rūpadhātuyam upaṇno adhippeto, na upapajjanāraho, teneva kāraṇena. **Tassāti** yathāvuttassa rūpadhātuyam upaṇnassa ariyasāvakaṇa. Yena rūparāgena tattha rūpabhava upaṇno, tasmim arūpajjhānena vikkhambhite sammadeva diṭṭhādīnavesu yathā kāmarūpabhavesu āyatim bhavābhilāso na bhavissati, evaṃ arūpabhavēpīti dassento āha “**puna -pa- bhavissatiyevā**”ti. **Tattha nibbattoti** rūpadhātuyam upaṇno. **Ariyamaggaṃ bhāvetvāti** heṭṭhimam ariyamaggaṃ sampādetvā. **Nibbattabhavādīnavadassanavasenāti** tasmim rūpabhava nibbattopi tattheva ādīnavadassanavasena. **Anivattitabhavābhilāsoti** upari arūpabhava avissatṭhabhavapatthano, yato arūpadhātuyam upapajjanāraho. **Tassa vasenāti** tādisassa ariyasāvakaṇa vasena. “Kassaci pañca, kassaci tayo anusayā anussenti”ti ayaṃ **yamakapāli**<sup>2</sup> pavattā.

Āyupamāṇavaṇṇanā niṭṭhitā.

1. Abhi-Ṭṭha 2. 505 piṭṭhe.

2. Abhi 6. 282 piṭṭhe.

### 7. Abhiññeyyādivāraṇṇanā

1030. “Ruppanalakkhaṇaṃ rūpaṃ, anubhavanalakkhaṇā vedanā”ti-  
ādinā **sāmaññalakkhaṇapariggāhikā**. “Phusalakkhaṇo phasso, sātalaḥkhaṇaṃ  
sukhaṃ”ti-ādinā **visesalakkhaṇapariggāhikā**.

“Cattāro khandhā siyā kusalā”ti-ādīsu idha yaṃ vattaḥbbaṃ, taṃ  
khandhavibhaṅgādīsu vuttaṃ, tasmā tattha vuttanayeneva gahetabbanti  
adhippāyo. Sesāṃ yadettha na vuttaṃ, taṃ suviññeyyamevāti.

Abhiññeyyādivāraṇṇanā niṭṭhitā.

Dhammahadayavibhaṅgavaṇṇanā niṭṭhitā.

Iti sammohavinodaniyā ṭikāya līnatthavaṇṇanā

**Vibhaṅga-anuṭikā samattā.**



## Vibhaṅga-anuṭṭikāya

### Saṁvaṇṇitapadānaṁ anukkamaṇikā

Padānukkamo	Piṭṭhaṅko	Padānukkamo	Piṭṭhaṅko
[ A ]		[ A ]	
Akkhantimūlakā	222	Anavassutatā	150
Agatiyā	221	Aniṭṭhānaṁ	6
Acchantavisabhāgattā	19	Anugantvā	14
Accayaṁ	219	Anuddayassa	218
Aññajhānikāpi	78	Anupavisanaṁ	160
Aññarūpānaṁ	31	Anupāyabhūto	158
Aññasakakaraṇaṁ	209	Anuppattito	188
Aṭṭhānaṁ	188, 207	Anuvattakaṁ	188
Aticca	9	Anussavo	63
Atiharaṇaṁ	184	Anekesu	181
Atiharati	184	Antarahitāni	217
Atītaṁse	3	Anto	155
Attanomati	90	Anto-olīyanā	152
Attā	216	Antokarivā	69
Atthajāpikā	198	Antonijjhānaṁ	71
Atthi	154	Apekkhitabbarahitā	36
Atthipaṭṭiccam	215	Appaṭihataṁ	3
Atthuddhāro	150	Appayogena	206
Addā	221	Appahātabbānaṁ	103
Adhicittaṁ	154	Abhabbaṭṭhānā	188
Adhiccasaṁmuppaniko	222	Abhavo	221
Adhimuccitvā	188	Abhinandaṇaṁ	77
Adhimuñcitvā	188	Abhinipatitabbāni	201
Anaddā	221	Abhimukhaṁ gacchanti	199
Anabhisamayabhūtattā	95	Abhisamayassa	61
Anavakārī	224	Amaraṇatthā	106



Padānukkamo	Piṭṭhaṅko	Padānukkamo	Piṭṭhaṅko
[ A ]		[ U ]	
Amusāsabhāvā	60	Uggaho	154
Ariyasīlaṃ	69	Uṭṭhānakaṃ	156
Alabbhaneyya-icchaṃ	73	Utunā	24
Avacanaṃ	188	Utuvipariṇāmajo	220
Avayavīgāho	152	Uttānīkaronti	185
Avitathasāmaññayuttaṃ	198	Upacayanato	222
Aviparītanirutti	188	Upaṭṭhānaṃ	185
Avī	110	Upanissayānaṃ	36
Avīciyaṃ	227	Upabrūhitānaṃ	18
Asaṅṭhānattā	95	Uppajjamānā	74
Asabhāgo	216	[ Ū ]	
Assādassa	150	Ūnacodanā	40
[ Ā ]		Ūnehi	33
Ācikkhanti	185	Ūhitvā	68
Ādibhāvanā	100	[ E ]	
Ānubhāvo	74	Ekattā	65
Āpāthamattaṃ	201	Ekatte	151
Āyūhanaṃ	52	Ekuppādato	26
Ārakūṭaṃ	52	Evamsaṅṭhānaṃ	23
Ālambanato	50	[ O ]	
Āvaṭṭanabhāvo	201	Okāsesu	8
Āsayo	155	Ogāhituṃ	68
Āhāraṭṭhitikā	171	Opakkamiko	220
Āhārabhede	67	Olokaṃ	203
[ I - Ī ]		[ Ka ]	
Indriyaviseso	213	Kāmsalohaṃ	52
Īsati	2	Kapālesu	67

Padānukkamo	Piṭṭhaṅko	Padānukkamo	Piṭṭhaṅko
<b>[ Ka ]</b>		<b>[ Ga ]</b>	
Kammameva	157	Guñjaṁ	100
Kammasamuṭṭhāno	220	Guṇehi	2
Karaṇuttariyaṁ	215	<b>[ Gha - Ca ]</b>	
Karonti	52	Ghaṭitārammaṇaṁ	152
Kāmakāriyaṁ	42	Cakkhati	39
Kāmāmisāṁ	171	Cakkhudvārabhāve	82
Kāyassa	216	Cakkhusaṁghaṭṭanāya	35
Kāyo	17	Cittasambandho	36
Kāraṇasamatthata	41	Cuṇṇitaṁ	46
Kālasutte	227	Cubitabbaṁ	178
Kiccajātito	99	<b>[ Cha ]</b>	
Kilesakkhayavisesāṁ	91	Chandassa	3
Kilesadāho	60	Chando	227
Kukkuccaṁ	71	Chādāpanato	33
Kumbhaṁ	156	Chādentiyā	99
Koṭṭhāso	52	Chiddaṁ	74
<b>[ Kha - Ga ]</b>		<b>[ Ja ]</b>	
Khandhabhedassa	70	Jāti-ādisaṅkaraṁ	18
Khandhassa	6	Jāti-uṇṇā	23
Gaṇasaṅgaṇikā	222	Jāpitatthā	198
Gaṇṭhikā	216	Jīvitasāṅkhārā	27
Gaṇṭhibhūtā	216	<b>[ Ña ]</b>	
Gatamaggo	77	Ñānapubbaṅgamaṁ	3
Gamitā	157	Ñānavisesāṁ	91
Gamiyatthattā	73	Ñāṇanuparivattaṁ	3
Gamiyati	39	Ñāṇārammaṇaṁ	198
Garubhaṇḍavissajjanaṁ	180	Ñātena	204
Gavesanakammaṁ	217		
Gahaṇavaḍḍhanavasena	34		

Padānukkamo	Piṭṭhaṅko	Padānukkamo	Piṭṭhaṅko
[ Tha ]		[ Da ]	
Ṭhapanā	220	Diṭṭhekaṭṭhā	76
Ṭhapitattā	206	Dukkarakiriyā	106
Ṭhapitā	36	Dukkhañāṇādīnaṃ	78
Ṭhapetuṃ	213	Dukkhavivekabhāvaṃ	62
Ṭhānābhāvaṃ	200	Desenti	185
Ṭhitim	200	Dvārādibhāvo	41
Ṭhitikkhaṇe	27	[ Dha ]	
[ Ta - Tha ]		Dhammañāṇakiccaṃ	63
Taṃkammajā	27	Dhammadesanāya	3
Taṃsadisā	201	Dhammābhilāpo	21
Tato	183	Dhāraṇatā	151
Tadanupassanā	150	[ Na ]	
Tadanurūpaṃ	177	Nayadvaye	161
Tantūsu	67	Nayanam	204
Tāpane	227	Nayanato	204
Tālapaṭṭikā	155	Nayanayanam	204
Tikabhūmivasena	36	Nayanayanassa	204
Tiṭṭhānikam	101	Nayanīharaṇam	34
Tiṇākāro	69	Nicchidde	26
Tiha	182	Nijjaravattūni	172
Tejanam	160	Niṭṭhapetvā	223
Temanakaraṇam	216	Nidadāti	60
Tosanam	160, 166	Niddasavattūni	171
Thāmabhāvato	166	Nidhānarāsi	215
[ Da ]		Nippariyāya	197
Dassanam	36	Nippādiyamāno	32
Diṭṭhattā	176	Niyogato	103
Diṭṭhamattam	182	Niravasesakathanam	196

Padānukkamo	Piṭṭhaṅko	Padānukkamo	Piṭṭhaṅko
[ Na ]		[ Pa ]	
Nirodham	81	Parihīnāvijjāṭṭhānā	147
Nivatteti	64	Palibodhupacchedavasena	61
Nisitabhāvena	53	Pavatteti	64
Nīto	46	Pahātabba-ekattaṁ	77
[ Pa ]		Pākatiko	53
Pakatatto	209	Pāṭiyekko	52
Pakativādīnaṁ	66	Pātimokkham	179
Pakārantaraṁ	37	Piṇḍaṭṭho	7
Pakkhandanaṁ	150	Pujjanibbattako	99
Paccanīkadhamme	207	Puññabhavo	109
Paccayasaṅkhātāṁ	80	Puṭaṁ	33
Paññāpenti	185	Punabbhavassa	66
Paṭicchādane	219	Pubbantato	39
Paṭibhānaṁ	197	[ Pha - Ba ]	
Paṭivedhaniṭṭhattā	200	Phalassapi	78
Paṭisañcikkhati	170	Phalena	96
Paṭṭhapenti	185	Bandhati	218
Paṇidhi	227	Bāhullena	33
Paṇṇattimattā	71	Bojjhaṅgabhūtā	172
Pabandhasamucchedo	70	Bodhimaṇḍo	194
Payogaṁ	52	Byāpī	220
Payojanaṁ	35	Byāpetvā	60
Parāmaṭṭham	34	[ Bha ]	
Pariggaṇhanaṁ	77	Bhajāpetabbe	103
Pariggahitā	185	Bhavasīsāni	228
Paridevanakāruññaṁ	211	Bhijjamānatā	31
Parivācitesu	202	Bhindati	34
Parimaṇḍalo	220	Bhindamāno	16
Pariyāyadesanattā	12	Bhinnapaṭadhare	177

Padānukkamo	Piṭṭhaṅko	Padānukkamo	Piṭṭhaṅko
[ Bha ]		[ Ya ]	
Bhujāṅgasīsajā	53	Yuganaddhatā	158
Bhusatthaṃ	150	Yuttam	218
Bhūtavisesā	67	Yonivasena	69
Bhūtiṇakassa	110	[ Ra ]	
[ Ma ]		Rañjanam	74
Macchāsīsajā	53	Rittakāneva	41
Mattā	155, 182	Roruve	227
Madhurambilarasādi	110	[ La ]	
Mandatā	160	Lohitabbaṃ	178
Marumpehi	155	Lokāmisam	171
Maro	106	Lohasadisam	52
Mahattepi	201	[ Va ]	
Mahātāpane	227	Vacanam	20, 39
Mahāpadese	90	Vacādhīnā	20
Mahāparimāṇam	67	Vaṭṭalohaṃ	52
Mahāroruve	227	Vaḍḍhanakanayo	34
Mānacchando	218	Vaṇṇappaṭibhāgo	23
Mucchāpattiyā	11	Vatthubhāvena	23
Muñcati	203	Vatthuvibhāvanā	198
Muṭṭhipoṭhanādīni	72	Varāhadāṭhajā	53
Muttam	218	Valāhakajā	53
Mudditassa	216	Vavatthitataṃ	155
[ Ya ]		Vavatthitānampi	201
Yato	183	Vāyanam	53
Yathādhigatānam	22	Vikkhepanam	224
Yaso	215	Vighātakattā	65
Yathāyogam	194	Viññātam	182
Yamentam	156		

Padānukkamo	Piṭṭhaṅko	Padānukkamo	Piṭṭhaṅko
[ Va ]		[ Sa ]	
Vidhunanam	180	Sañjīve	227
Vibādhitānam	18	Sañhattam	68
Vibhaṅgappakaraṇam	4	Satisampajaññam	152
Vibhajanti	185	Santam	66
Vibhāvato	66	Santāpanakiccaṁ	18
Virāgam	218	Santānavasena	12
Vivaṭā	185	Santiṭṭhati	90
Vivaranti	185	Sannipātaḷo	220
Vilāpetvā	158	Sabbatthakaṁ	194
Vivekaṭṭho	61	Sabyāpārāni	147
Visamaparihāraḷo	220	Samaṁ	181
Visuddhibhāvaṁ	206	Samaññātidhāvaṁ	152
Visesapaccayo	79	Samappavattaṁ	155
Vihimsāya	54	Samappavatte	170
Vīriyam	52	Samavāyo	67
Vīriyassa	3	Samāgamo	151
Vekantakaṁ	52	Samādhijā	68
Veṇupabbajā	53	Samādhimukhena	205
Vocchindanachādanā	219	Samānagaṇanaguṇehi	22
Vodāpanam	76	Samānajātiyam	18
[ Sa ]		Samānavīthiyam	35
Saṁyogo	67	Samānasamvāsako	209
Sakkaṭanamādi	193	Samāsevitatāya	216
Sagabbhā	67	Samāhaṭāni	1
Saṅkappanam	223	Samuttejeti	155
Saṅkampanā	216	Samudayabhāvena	67
Saṅkhajā	53	Samudīraṇam	53
Saṅgati	110	Samūhato	45
Saṅghāte	227	Sampajānassa	157
		Sampannajjhāsayo	37

Padānukkamo	Piṭṭhaṅko	Padānukkamo	Piṭṭhaṅko
[ Sa ]		[ Sa ]	
Sampahamseti	155	Sinchassa	188
Sampiṇḍetvā	162	Sippijā	53
Sammā	181	Siliṭṭham	218
Sammāpayogena	212	Sukhumattam	68
Saraseneva	60	Suñño	51
Saviggahamiva	39	Suttam	90
Sahajātādipaccayo	147	Supākaṭattā	1
Sahuppādakā	69	Suppariggāhakaṃ	181
Sāthakāni	194	Subhakiṇṇā	227
Sāmupādikā	211	Soko	71
Sārambham	185	[ Ha ]	
Sārādānābhiniveso	152	Hatthikumbhajā	53
Sāsanam	79	Hānabhāgiyadhammam	200
Sikkhākoṭṭhāsesu	176	Hitam	71
Sikkhitabbaṃ	182		
Sikkhiyamāno	176		